

COHUEN ÑOÑETS ÑEÑT̃ QUELLCA' SAN LUCAS

*Ñehua, añpa' ñeñtca'yeña e'ñe pa'moter penña ser-
rparñats*

1-4 Masheñe Teófilo, p̃apa' peñoteñ ahuañmo'chapa' pa'namen esocmañen ñeñt̃ atet etsotayese't Jesús acheñenesesho ñeñt̃ e'ñe ñanom ame'ñaya ña, ama't teme'ttsen yocpa'naña ñeñt̃ey o' yame'ñera yaña. Ñaña allempoteñ Jesúsapa' orrtana pa'namen acheñenesha' ñeñt̃ entyesaye't e'ñe allame'tets. Ñetñapa' e'ñe entuoñete't allohuen ñeñt̃ atet p̃a'yese't. Ñetñapa' serrpare'tyesete't atet oten Yompor po'ñoñ. Attoñña eñotaterryetña yaña. Ñeñt̃ atet eñotatyenet ñetpa' shonte' acheñenesha' quellca'yeseña ñeñt̃ atet p̃osa Cristo allempo huapa. Ñeñto'marña napa'cho'ña e'ñe pocte' nenteñ o'ch nequellconap̃ e'ñe ora allpon ñeñt̃ atet orrtatos Jesús, tarro'mar napa' ahuañmo'choteñ atarr noctape'cheñ o'ch e'ñe neñocheñ errotente'ña ñeñt̃ e'ñe po'ñocheñ atet p̃a'yesosa Jesús. Ñeñto'marña te' arrpa' o'ch e'ñe neñotatap̃ ora allpon ñeñt̃ o' etsotua allochñapa' attoch e'ñe peñotuer p̃aña ñeñt̃ allpon yechatenpetpa' ñeñt̃pa' e'ñe po'ñocheñ atet. Ñehua, arrpa' atet o' etsotua.

Ñehua, te'pa' o'ch neserrpare'tataḅ atto mel-lañoṭeñpa' eñotatanet o'ch eñalleta Juan ñeñtcha' ap-atañtatsa Yomporecop

⁵ Ahuaṭ allempo añ añcha'tarettatse't Herodes all anetso Judeo, eñall ñaña puesheñarr ñeñt judionesha' po'corneshar. Ñeñtpa' añ pa'so'cheñ Zacarías ñeñt chocma yemtenana po'potantañ cornaneshachno ñeñt otenet Abíasona'tar ñeñt torratse't Yompor pa'paclo. Zacarías puetapor añ pa'so'cheñ Elisabet; ñapa'cho'ña corneshapnor ñeñt po'mreneñ pen Aarón ñeñt corneshatats'e't ahuaṭ. ⁶ Ñetña epsheño'maretpa' Yomporñapa' e'ñe pocte' entenanet ñeñt atet penet ñet, e'ñe cohuen etsotueññañet ora po'ñoñ ñeñt atet anaret ahuaṭoteñ acheñeneshacop ñeñtcha' atet ḵohuenet. Ñeñto'marña ama't puesheñarrapa' amach errotenoṭ otaretteto, "ama pocteyaye ñeñt atet sepena." ⁷ Ñetpa' ama eñalleto ama't puesheñarra pacñe'ter tarro'mar Elisabetpa' ama achoyore'tañeyaye. Ama't ñaña puerrollar epsheño'maret o' atfa po'nme'tuenet.

⁸⁻⁹ Atteñapa' chap allempo torrena allohuen cornaneshachno ñeñt epuet parro yemtena Zacarías atto corneshatenet Yomporecop. Ñehua, allempopa' allohuen ñeñt corneshatats'e't Yomporecop, ñetñapa' añ yeçhete't ahuo'ch yellsheñe'chenet allohuenet attoch eñochet po'suertot erra'tsencha' puesheñarrer ñeñtcha' be'tosets Yompor pa'paclo allcha' a'crratan ñeñtcha' eñmosañtatsa Yomporecop. Allempoña pamtarrpa' aña orrtatsa Zacarías ñeñtcha' be'tosets Yompor pa'paclo allcha' a'crratan

ñeñtcha' eñmosañtatsa Yomporecop. ¹⁰ Ñehua, allempo chap allempoch be'tosos puesheñarr Yompor pa'paclo shonte' acheñenesha' ñetñapa' allach tomcha'tet a'yoť allcha' ma'yochrra'toset. Ama't allempo be'tosos Zacaríaspa' atterach ma'yochrra'tet a'yoť.

¹¹ Ñehua, Zacarías allempo sherbenan Yompor o'pono, allñapa' machayotepa'tcha' orrtoña Yompor po'mllañoñeñer. Arr tomos altar po'cohuenrot, ñeñt altarpa' allecma a'crratenet ñeñt eñmosañtetsa Yomporecop, ñeñtpa' atto sherbete't Yompor.

¹² Allempo orrtoña mellañoñeñ, Zacaríasñapa' atarr yoren, atarr nanac mecha'ch. ¹³ Mellañoñeññapa' atet otosan Zacarías:

—Zacarías, amach peyorenatsto tarro'mar Yomporpa' e'muennañ ñeñt atet penamueñ pema'yocheñoť. Ñeñto'marña te' petapor Elisabetpa' eñalletaterranča' paterr asheñorr ñeñt e'ñe po pechemer, ñeñtñapa' pesočcha' Juan.

¹⁴ Papa' atarrča' pöcshena nanac. Shonte'ch acheñenesha' ñeñtča' nanac pöcshapretaya atto o' eñalleta pechemer. ¹⁵ Ñapa' atarrča' asherben enteñ Yompor.

Ñapa' amach orrarñañeyaye, ama't vinosapa' amach orreñe. Ama't ñaña pa'namen ñeñt aposa'tpotetsapa' amach orreñe ama't mamesha. Ñapa' e'ñech añña chorraya Parets Puecamquëñ. Ama't allempoteñ pachor pa'to'tsen ñapa' e'ñech chorreña Parets Puecamquëñ.

¹⁶ Allempoña mellañoñeñpa' alla otererr:

—Ñapa' cohuenča' cotape'chaterran shonte' israelena'tarnesha' allochñapa' attoch

coṭape'cherret e'ñe cohuen Yomporecop ñeñtcha' Po'partseshar perret. ¹⁷ Ñeñtña Juanpa' ñeñtcha'ña ñanom orrtatsa Yomporecop. Ñapa' añcha' ahuaamencat pene' Yompor Puecamquëñ atet pe't ahuañ Elías ñeñt a'mtaye't Yompor po'ñoñ. Allochñapa' attoch e'ñe cohuen amo'tstaterrana achemeretechno puechemerasha'. Allochñapa' ama't ñeñt atpare'tetsapa' o'ch ame'ñaterranet ñeñt e'ñe pocte' es pets. Attochña coṭape'chaterranet cohuen, allochñapa' attoch agapueret Partsasha' ñerra'm esempoch orrta.

¹⁸ Zacaríasñapa' ahuo' a'p'to'tan mellañoñeñ, ahuo' och:

—Ta', ¿erroñenochña neñoch e'ñeñe' po'ñoñch o'ch eñalleta cheshatoll? Tarro'mar napa' o' nepo'nme'ten; neṭaporpa'cho'ña e'ñe attecmay o' atarr yepo'nme'tuen.

¹⁹ Mellañoñeññapa' alla otererr:

—Napa' ñeñten Gabrieletets ñeñten sherbene' Yompor. Napa' ña nellsensene' attoch ne'ñorana'tapa o'ch neñotataṭ añ cohuen ñoñets. ²⁰ Tarraña ṗapa' ama ṗame'ñenno ñeñt atet noteneṗ, ñeñto'marña te' ṗapa' o'ch ṗo'panat, amach eshec pe'ñorerro tayoteñ tarrempohuach allempoch eñalleta pechemer, allempochña pe'ñorerra. Tarro'mar po'ñoñch etsoterrach ñeñt atet o' notuaṗ o'ch chap allempo onañchareñ. Arrpa' allohua ñeñt atet ot mellañoñeñ.

²¹ Atto' ellapes Zacarías o'ponopa' acheñenesha'ñapa' cohueñet a'yot ama cha'nerro. Atto' cohueñetpa' otanna'tet:

—¿Eso'marte' amo' čha'nerroña Yompor pa'pacloŧ?

²² Allempoña čha'nerrpa' ama eshcaye' eñorana'tuerraneto. Ñetñapa' otyenet pueyočhreto, ñato' čhote' es orrtoya Yomporecop ñeñto'marte'ña atarr ellapes o'pono Yompor pa'paclo. Ñañaapa' ama eshcaye' eñorana'tuerraneto, potota eñotatuerranet ñeñt atet ent Yompor pa'paclo.

²³ Allempoña o' chap allponmat ñeñt atto sherbenet Yompor pa'paclo, Zacaríasñapa' o' ahuerr pa'paclo. ²⁴ E'ñe allponmatatsapa' o' ačhomenta pueŧapor. Allempoteñña Elisabetpa' ama mueno o'ch orrterra acheñeneshesho. Ama't o' amnarnña arorrpa' ñañaapa' ama orrteno. Ñañaapa' atet oten:

²⁵ —Te'ñapa' atarr cohuen muera'na Yepapar, allochñapa' o'huañcha' allo'na pencna'ntatnennet tarro'mar napa' otyennet muečhopeno'.

Atto mellañoŧeñpa' eñotatanet o'ch eñalleta Jesús

²⁶ Allempoña o' pechapña arorr ačhomenta Elisabet, Yomporñapa' o' alla mueñerranerr po'mllañoŧeñer ñeñtara Gabriel. Arr mueñe anetso Nazareto ñeñtara Galilea. ²⁷ Allempoña čhap Nazareto, allñapa' orrtosana puešeñarr shopshesha' ñeñt ama a'pllareteyaye. Ñehua, ñeñt shopshesha'pa' añ o'patenaya yacma ñeñtpa' añ pa'so'cheñ José, ño'ch yore'. Ñeñtña shopshesha' arrot eñalletña David po'mrenñoŧ; ñeñtpa' añ pa'so'cheñ María. ²⁸ Mellañoŧeñña allempo čhap e'ñe ñeshopa' atet otos:

—O'ch no'cha nehuom'cha'tosep̄. Yompor e'ñe puemuereño'tep̄ p̄apa' atarrcha' coshaterre'p̄, ñapa' e'ñe pesho'tsen. Yomporpa' atarr bensare'tam̄pene'p̄. Ello pen̄tana'tueñ allohuen p̄acmanesha' atto bensare'tam̄penanet ñet.

²⁹ Allempo e'man atet och mellaño'teñ, ñaña'pa' cha moññe'tacha, cha co'tape'ch pueyo'chro:

—Ta', ¿este' otenenña ñeñt̄ atet huom'cha'tenen?

³⁰ Mellaño'teñña'pa' alla otererr:

—María, amach pen̄cha'tatsto, Yomporpa' atarr o' morrenterr̄pa. ³¹ Te'pa' p̄achomentach, pechyore'tcha' ñeñt̄pa' asheñorrcha'. Ñeñt̄ña'pa' pesochcha' JESÚS. ³² Ñeñt̄cha' nanac am̄cha'tarettatsa. Otyesetcha' ñapa' ña Ñeñt̄ Nanac Parets Puechemer. Pomporña ñeñt̄ara Paretspa' ñachña ne' am̄cha'taret̄ atet am̄cha'tarette't̄ pa'tañ David. ³³ Atteña ñapa' am̄cha'tarettach Jacob po'm̄renñecop ñeñt̄ara israelnesha'. Ama't errponañapa' amach huañerro ñeñt̄ atto am̄cha'tarettena ña.

³⁴ Maríañapa' atet otapan mellaño'teñ:

—Ta'm ¿errot̄enotcha'ña nechyore'tña? Napa' ama't puesheñarra encanesha' amarramtso yorenna'.

³⁵ Mellaño'teñña'pa' alla otererr:

—Paretscha'ca'ye Puecamquẽ pe'chapoya. Ñeñt̄ Nanac Parets po'huamencpa' a'pomam̄p̄sosep̄cha' atet ñerra'mrrate' os p̄a'pomam̄pene'. Ñeñto'marña cheshatoll ñeñt̄cha' pe'ñalletatpa' ñapa' añach e'ñe ma'yo'chrosa ñeñt̄ atet muenen Parets. Otyesetcha' ñapa' ña e'ñe Yompor Puechemer.

36 Ñaña Elisabetña ñeñt̃ p̃amo'ts pepen, ñapa'cho'ña o' totana asheñorro'toll, ama't o' po'nme'ten. Ñaña ama't oteñet mue'cho'p̃a' te'ñapa' o' pechapña arrorr o' a'chomenta.

37 Tarro'mar Yomporpa' ama eñalle ñocop ñeñt̃ atarr torrapo' enten.

38 Allempoña Maríapa' alla oterranerr mellaño'teñ:

—Ñehua, napa' e'ñe pocte' nenteñ o'ch nesherber Yepapar ñeñt̃ Nepartseshar nepen. Ñeñt̃pa' attetepa'ch nocop ñeñt̃ atet p̃otenen.

Allempoña mellaño'teñpa' o' ahuerr.

Atto Maríapa' emo'tenana' Elisabet ñeñt̃ e'ñe pamo'ts pen

39-40 Maríañapa' allenta ahuo' poma'yorñecma o'ch emo'tenana' Elisabet. All ye'chenapa' all shonte' aspen'arar allara Judeo. Allempoña chap anetso all sechenapa' be'tosos Zacarías pa'paclo, huom'cha'tosan Elisabet.

41 Ñaña'papa' allempo e'mapan María ñeñt̃ atet huom'cha'tospa' pue'maretollña ñeñt̃ pa'to'tsenpa' allente'pa'tcha' pella. Pachorñapa' e'ñe chorreña Parets Puecamquëñ. 42 Ñeñt̃ña eñoratene', pocsheñeshocmañen eñorena huomencpa' atet otapan María:

—Papa' o' atarr coshaterre'p̃ Yepapar. Papa' o' e'ñe pen'tana'tue ora allohuen yacmaneshachno atto coshatenanet ñet Yepapar. Ñaña Yepaparpa' atarrcha' bensare'tan'pennap̃ pechoyoretoll. 43 Ama't na Yepaparpa' atarr coshatenen atto pemo'tenen ama't ñeñt̃ep̃

pachor pen ñeñtcha' Yepartseshar yeperr.
 44 Tarro'mar e'ñe allempocma ne'maponañ
 peñoñ atet pehuomcha'tosen, ne'maretollpa' e'ñe
 pocsheñesho'pa' allentepa'tcha' pella nato. 45 Paña
 te'pa' atarr cosheñtso'tseneñ tarro'mar p'apa'
 e'ñe pame'ña'huoña ñeñt atet otuenpa' Yepapar.
 Ñeñto'marña ñeñt'pa' e'ñech atet etsoterra p'ocop.

46 Maríañapa' alla otererr:

—Te'ñapa' e'ñech neyoçhrocmañen
 na'ye'choçhtatoñ Yepapar.

47 Necamquëño'huen atarr nocsheña Yepapar ñeñt
 Ya'queshpatañer yepen.

48 Yepapar e'ñe puemuereño'ten ñapa' entenen
 ama esoyayno, añana ñeñten torretsa
 ñocop. Tarraña te'pa' allohuen acheñenesha'
 ñeñtcha' mererrtsa arr patsro ñetñapa'
 atarrcha' coshapreterrnet atto Yepaparpa'
 o' atarr coshaterren na.

49 Tarro'mar ñapa' ñeñt atarr ahuamencattetsa
 attoña o' orrtaton ñeñt nanac sherbets,
 ñeñtara Yepapar ñeñt otenet Ñeñt atarr
 nanac Parets.

50 Allohuen ñeñt añcha'na'tpo' entene' Yepapar,
 ñaña'pa' çhocmach atarr muererranet ama't
 tayoteñ errponañohuen ama't allpon allo-
 huen acheñenesha' ñeñtcha' mererrtsa arr
 patsro.

51 Ñaña ñapa' e'ñe etsotuenan ama't ñeñt atarr
 nanac echarr entyenet, ñaña allpon allo-
 huen acheñ ñeñt atarr asherben entyetsa,
 ñaña'pa' e'ñech pomnaren p'ohuerranet.

- 52 Ñaña ñeñt̃ atarr ahuamencat̃ entyetsa ñañaapa' eñech a'suatanrrortatuerranet allot̃ am̃cha'taret̃tenet. Tarraña ñeñt̃ ama esoshe'maye' entyetsopa' ñet̃ñaapa' Yepaparcha' nohuerrahuet attot̃cha' am̃cha'na'tpo' enter allohuen acheñenesha'.
- 53 Ñaña ñeñt̃ nanac es pallta'yetsa, ñet̃ñaapa' Yepaparcha' esocmañen aphuerrahuet. Tarraña ñeñt̃ atarr esocmaneñ es echyets, ñet̃ñaapa' Yepaparcha' puerratañpesuerrahuet, amach es anerreto ama't coñe'ta. ⁵⁴⁻⁵⁵ Yepaparpa' añach chocma yenpuen israelena'tar ñeñt̃ pueyochresha' pen ña. Amach pueserrano ñeñt̃ atet̃ otane't̃ ahuat̃ yamo'mtayñeneshañ ñeñt̃cha' atet̃ perranet̃ ñaña allohuen ñeñt̃cha' po'mreneñ perret. Eñe atet̃ otane't̃ ahuat̃ Abraham po'mrenñecop. Attoch chocma muerenanet̃ ama't errponohuañen. Arrpa' allohua ñeñt̃ atet̃ ačhotan María Yompor.

⁵⁶ Allempoñapa' ñato' ma'pñate' arrorr alla a'pa Elisabetesho. Allot̃ña Mariáapa' ahuerr pa'paclo.

Arrpa' atto eñalleta Juan ñeñt̃ apatañtatse't̃ Yomporcop

- ⁵⁷ Allempoña chap allempoch emare'ten Elisabet. Ñeñt̃ña pue'marpa' asheñorroñoll.
- ⁵⁸ Allohuen acheñenesha' ñeñt̃ yeçhetsa all ñesho ñaña allohuen pamo'tsesha' ñet̃ñaapa' eñe coshaprechet. Tarro'mar eñoteñet̃ Yomporpa' o' orrtatoñ atto ñapa' atarr muereña. ⁵⁹ Allempoña o' posocmata'muen ñeñt̃ña asheñorroñollpa' o'

tsorraŧolle'ta'mueñet ŧarro'mar ñetpa' atetca'ye yeçhenet ñeñŧet judioneshet.* Allempopa' añ soçetañ Zacarías o'ch anmatoñetañ pompor pa'so'cheñ. ⁶⁰ Tarraña pachorpa' otanet:

—Napa' ama nemno o'ch sesochon ne'mar Zacarías. Napa' añcha' nesoch Juan.

⁶¹ Allempoña acheñenesha'pa' atet ochet:

—¿Eso'mare't pemneñña o'ch pesoch Juan ŧarro'mar ama't puesheñarra pamo'tspa' ama eñalle ñeñŧ soçetsa Juan?

⁶² Allempoña acheñenesha'pa' e'ñe pototeta a'pŧo'toñet ematoll pompor escha' sochanña puechemeretoll. ⁶³ Ñapa'çho'ña potota eñotatan

acheñenesha' o'ch apet quellcatets allcha' quellcan ñeñŧcha' sochan puechemeretoll. Allempoñapa' apet quellcatets, allñapa' atet quellca': “Añcha' yesoch Juan.” Acheñenesha'ñapa' atta cohuanrrorçhet. ⁶⁴ E'ñe allempocma Zacaríasñapa' allenta eñorerra. Allorocma aye'choçhtaterran Yompor.

⁶⁵ Acheñenesha'ña ñeñŧ yeçhetsa allpa' allohuenet atarr mecha'na'teñet Yompor. Ñetñapa' serrpare'tatanna'tyeset all aspentarero

Judeo. ⁶⁶ Ñaña ama't allohuen ñeñŧ e'mare'tyese' ñetñapa' cotape'çhyeset pueyoçhreto, atet otyenet:

—Añ cheshatollpa' po'ñoçhcha' atarr sherber-ran Yompor tsapaŧonet.

* **1:59** Añ ñoñets “atsorraret”, añ ñeñŧ otets atet yeçhe't judionesha'. Ñeñŧpa' atet: Ñerra'm allempo eñalletena asheñorroŧollesha' ñeñŧ e'ñe judionesha'pa' añña pomporpa' o'ch tsorratenet po'çhtso. Ñehua, ñeñŧ tsorratenetpa' ematollach o'ch çhapa'muen po'psocmatño. Ñehua, po'çhtso allcha' tsorret asheñorroŧollpa' all e'ñech poteretollo e'ñe po'ñoç parmatollo.

Tarro'mar Yomporpa' atarr muereña.

Atto Zacarías atarr ačhotenan Yompor Parets

⁶⁷ Cheshatollña pompor ñeñt Zacaríaspa' añ chorrenaya Parets Puecamquëñ ñeñtña eñoraterre' Yomporecop ñeñtcha' atet perra ama't esempo. Ñeñtpa' atet ot Zacarías:

⁶⁸ —Aye'chočhtaterrapo'ch Yompor, ñeñtara ñeñt Po'partseshar pen allohuen israelnesha', tarro'mar te'ñapa' o' orrtaterrnay puemuereña ñeñtcha' ya'queshpaterre' ñeñtey puechemer pen.

⁶⁹ Ñapa' o' orrtatonay ñeñtcha' a'queshpatañterrtsa ñeñt atarr ahuamencatesha' ñeñtara ñeñtcha' eñalletatsa David po'mrenñot, ñeñtara David ñeñt atarr sherbaye't ahuat Yompor.

⁷⁰ Ñeñtpa' ahuatoteñ atet eñoratyese't ñeñt a'mta'yesaye't po'ñoñ, ama't allohuen ñeñt e'ñe ma'yočhra'yestse't Partsocop.

⁷¹ Ama't ñaña allohuen allpon ñeñt ye'moñe'tene' ñeñt añcha'nočhetyetsa yocop, ñachña ya'rroyataterre'.

⁷² Attochña etsotaterrnay ñeñt atet otane't ahuat yatañneshañ ñeñtcha' atto chocma muererrya. Atteña ñapa' amach pueserrano ñeñt atet a'pocstat ahuatoteñ yocop tarro'mar ñeñtpa' e'ñe Partseshot a'pocstataretta.

⁷³ Ñehua, añpa' atet pa' allempo Yomporpa' ahuat otan yatañ Abraham ñeñtcha' atet perrnay e'ñe po'ñočh.

- 74 Ñeñtpa' atet ote't Yompor yocop ama't ñeñt allpon ñeñt ye'moñe'tene' ñeñt añcha'nochen yentyen ya, ñañapa' ñach ya'rroyataterre'. Allochña yapa' o'huañcha' yemcha'nañot yesherber Yompor.
- 75 Attoch yetsotoñ ñeñt e'ñe pocte' enten Parets allochñapa' attochña pocte' enteney ñaña acheñenesha' atto e'ñe cohuen es yeḡa'yen e'ñech tarremphua esempohuach yocrena arr patsro.
- 76 Te'pa' o'ch nechemeretolle notap: Papa' otterpetcha' ñeñteḡo' ñeñtcha' eñorana'tena ñeñt nanac Parets. Tarro'mar ḡapa' ḡanomcha' orrtatsa attoch ḡa'cohuentatyesoñ allcha' oñmos Partsesha'.
- 77 Ñeñtpa' attoch ḡoctape'chater acheñenesha' e'ñe cohuen allochña ñetpa' esheccha' aḡpretnareḡterret ḡo'chñaret attoch a'qeshḡatareḡterret.
- 78 Te'pa' ḡhapcha' allempoch Yompor e'ñe puemuereñotey ḡchapaterrnaycha' ñeñt huetsa entot ñeñtcha' yoctape'chaterre' e'ñe cohuen, ñeñtña cotapñatserpa' ñeñtcha' ya'puetarsamḡperre'.
- 79 Attochña a'puetarsamḡsareḡterra allohuen acheñenesha' ñeñt checmeto'tsa'yeneta, ñeñt ama eñotenaye Yompor, ñetñapa' aña o'patenahuet rromueñets ñeñtara coñcheñets. Ñeñt atto a'puetarsamḡsareḡey ñeñtcha'ña yeñotatene' attoch e'ñe cohuen yocsheñeshocmañen yeychena

arr patsro. Arrpa' allohua huañ atto Zacaríaspa' ačhotenan Yompor e'ñe pocsheñeshocmañen.

80 Añña cheshatoll Juanpa' allo'na sen atarretnomtsa. Puecamquëño'pa' atarr ahuaencatetnena. Ñaña'pa' alla yečhena allapa' amayo tarremphua allempo orrta israelena'tarneshesho.

2

Atto eñalleta Jesús (Mt. 1.18-25)

1 Allempopa' añ añcha'tarettatset romo'marnesha' ñeñ'pa' añ pa'so'cheñ Augusto. Ñaña'pa' nenan po'ñoñ ñeñ'pa' atet oten: Allohuen acheshenesha' erraparen añe patsropa' quellcatyesetepa' pa'so'cheñ. 2 Ñehua, allempo ñanom quellcatyeset pa'so'cheñpa', arrña anets Siriapa' añ añcha'tarettetsa ñeñ'pa' añ pa'so'cheñ Cirenio ñeñ' pa'm'cha'tareter pen allohuen judionesha'. 3 Ñehua, allohuenet ahuanerret pa'tañnesha' pa'netsro allochñapa' allcha' quellcatyerreta' pa'so'cheñ. 4 Ñeñto'marña Josépa' on Nazaretot allara anets Galileo, o'ch ahua' all pa'netser pe't pa'tañneshañ, ñeñña anetserpa' añ pa'so'cheñ Beléñ, allara Judeo, tarro'mar Beléño eñalleta ahua't pa'tañ David. Tarro'mar Josépa' Davidna'tarca'ye. 5 Allempoña Josépa' ahua' epuet María o'ch quellcateneta' pa'so'cheñ. María'pa' José o'patenaya ño'ch yore'. Allempoña María'pa' ačhomenepa'to'. 6 Allempoña allo'tsa'yenet Beléño, María'pa'

ahuepa't çhen allempoch emare'ten. ⁷ Alla emare't, ñeñña pue'mare'tollpa' asheñorro'toll ñeñt e'ñe po'moter pa'. Epe' po'ño'mopa' alla ñanatolle'ch huacshepahuo allote'cma apueñet huaquësh puerrar. Ñehua, tarro'mar alla emare'tos huacshepahuoña' muetsopahuopa' ama esesha' epatso e'ñe poctacma eshepena acheñ ñeñt manrra'tosets all.

Atto Yompor po'millaño'teñerpa' orrtana ñeñt co-huanñpene' po'carrneror

⁸ Allempo emare'ten María all Beléño ñeñte tsaprocma allampaño'tsen ñaña ñeñt cohuanñpene' po'carrneror pastemo. ⁹ Allñapa' machayote'pa'tcha' orrtanet Yompor po'millaño'teñer, çha poptana'tosanet. Ñeñtpa' Yompor po'cohuenña ñeñt çha a'puetarsañpsosahuet. Ñetñapa' atarr nanac mecha'trra'tapet. ¹⁰ Mellaño'teññapa' otosanet:

—Amach semcha'tatsetno çhoña se'mñoten na, o'ch neñotatoses ñeñtcha' atarr socshaterre' sa ama't ñaña allohuen errañaren acheneshacop. ¹¹ Te'pa' socop o'eñalleta ñeñtcha' Sa'queshpatañer seperr ñeñtpa' ñeñtcha' Cristotats ñeñt Yepartseshar yepen. Ñeñña cheshatollpa' arr eñalleta David pa'netsro allara Beléño. ¹² Te'pa' o'ch noterrser attoch señoç ñeñt cheshatoller. Ñeñtcha' sentos cheshatoll eparet po'ño'mo all ñanatolle'teñet huacshepahuo, ñeñtca'yeña Yompor Puechemer.

¹³ Allempoñapa' machayote'pa'tcha' orrterrerr po'potantañ shonte' mellaño'teñnesha' ñeñt o' so-

huačherrerr entot. Ñeñña mellañoñeñnesha'pa' atarr aye'chočhtatosñañet Yompor. ¹⁴ Atet otoset:

¡Aye'chočhtaterrapo'ch Yeyomporer ñeññ
pue'ntaño'tsen! Ama't ñaña acheñenesha'
ñeññ añe patsro'tsen cosha'rrtetepa' ñamet
ñeññ coshaten Yompor.

¹⁵ Allempoña mellañoñeñnesha'pa' sohuaneret ñeññ cohuanñpene' po'carrneror, ñetñapa' o' ahuanerret pue'ntaño. Allempoña ñeññ cohueñe' po'carrnerorpa' allenta otanna'tyeset:

—Errotenuaca'yeña ñeññ otenya' Yompor. O'ch ahuey Beléño o'ch yenteña' ñeññ atet otenyeta'.

¹⁶ Allempoñapa' poma'yorñecma ahuanmuet, o'ña çhapuet Beléño'pa' all entoset María ñaña José ñaña cheshatoll all panañolle'tena huacshepahuo. ¹⁷⁻¹⁸ Allempo entoset ñetñapa' serrpare'toset ñeññ atet o' otuananeta' mellañoñeñ cheshatollecop. Allohuen ñeññ e'muene'pa' nanac cohuanrrroretyeset, otanna'tyeset:

—Ta'm errotentofte'ñaca' o' serrpare'tosña atet.

¹⁹ Maríañapa' e'ñe ñeñña nen pueyoçhro e'ñe ñeñña cotape'chen ñeññ allpon o' entua ahuañoñeñ.

²⁰ Allempoña ñeññ cohueñe' po'carrnerorpa' o' ahuanerret. Atet otenaneta' mellañoñeñnesha'pa' ñetñapa' e'ñe po'ñoçh entoset. Allpon ñeññ atet e'muet, ama't ñaña ñeññ atet entet, ñeñño'marña ñetpa' e'ñe pa'ye'chočhtateñeshet ahuanerret, attoña ñetpa' atarr cohuentatnerrñañet Yompor.

*Atto anmet cheshatoll Jesús Parets pa'pacillo
attoch a'pocstateñeta' ñeññ Partsocop*

21 Ñehua, allempoña o' posocmata'muen, ñeñt' asheñorro'tollpa' o' tsorrata'tolle'chet, ñeñt'pa' atet ye'chenaña allohuen judionesha'. Allempo ñeñt'ña chesha'tollpa' o' sochet JESÚS. Ñehua, ñeñt' so'chñets ñeñt'pa' atet otenana' mellaño'teñ María ama't ahuañmo'cho'teñ allempo ama a'chomentena'.

22-24 Allempoña chap allempoch a'pochtachet ñeñt' atet nane't Moisés po'ñoñ ñeñt'cha' atet ye'cha' judionesha'. Ñehua, ñeñt'ña ñoñetspa' atet oten: “Ñerra'm esempoch cheyore'ten coyanesha', ñerra'm asheñorr pue'maretoll ñeñt' e'ñe po'moterpa' neñetepa' Partsocop.” Ñaña po'poñ Moisés po'ñoñ ñeñt' atet ne't, ñeñt'pa' atet oten: “Muetsatenetepa' epña arot amapa' epña yepe'cho'ye' ñeñt'cha' net Yomporecop.” Ñeñto'marña allempo chap allempoch a'pochtachet Yomporecop ñeñt' atet anaret' po'ñoñ, ñeñt'ña chesha'tollpa' allenta anmet Jerusaléño, allcha' a'pochtachet Yomporecop.

25-27 Allempoña chapuet Jerusaléño'pa' o' be'tososet Parets pa'pac'llo attoch a'pochtateneta' ñeñt' atet ye'chenet ñeñt' atet oten ñoñets ñeñt' anaret' ahua'toteñ. Allñapa' huapa puesheñarr yacma añ pa'so'cheñ Simeón ñeñt'pa' jerusaléño'marnesha'. Tarro'marña ñapa' allempocma huapaña' ñapa' añ eñotate' Parets Puecamquëñ. Tarro'mar ñeñt' acheñerpa' atarr cohuen ñeñt' atarr ma'yo'chrenaya ñeñt' cohuentetsa Yomporecop. Ñapa' ñeñt' atarr cohue'ne' esempoch huapa ñeñt'cha'

a'rroyataterre' israelena'tarnesha' allochñapa' o'ch alla atarr cosherret. Atto çapoña Parets Puecamquëñ ñeñña eñotatene' ñapa' amach rromuena'pa' enterrancha' Yompor Puechemer ñeñt Cristo ñeñtcha' llesenserr esempo. ²⁸ Huaptsapa' allenta enatatolle'tosan cheshatoll, atarr aye'chochtatosan Yompor. Ñeñtpa' atet otos: ²⁹⁻³⁰ Te'ña po'ñoçh Nompore ama'tcha' nerromapa' e'ñech noçsheñeshocmañen nerroma tarro'mar te'pa' po'ñoçh o' nenterrnañ ñeñt o' pemñerrnay ñeñtcha' ya'queshpaterre' e'ñe atet potne't ahuañmo'cho'teñ na ñeñfen atarr pesherbene'.

³¹ Ñeñña o' porrtaterrnay allohuenacpay ñeñtey pa'nameney acheñenesacpay añe patsro.

³² Ñapa' ñach sherberrets atet ñerra'mrrate' puetare' ñeñtcha' a'puetarsamperre' allohuen acheñenesha' ama't ñeñt ama israelena'tareyaye attoch ñetpa'cho'ña o'ch eñoteret ñeñtcha' a'queshpatañterrtsa e'ñe po'ñoçh. Allochñapa' attotcha' e'ñe cohuen aye'chochtaterrnañ ñaña peyochresha'çhno ñeñtara israelena'tarnesha'.

³³ Ñeñña pamo'mte' pen cheshatollpa' ñetñaapa' atta cohuana'teñet Simeón atet eñorana'tenanet pue'maretollet. ³⁴ O' eñorana'tuanet pue'maretolletpa' allempoñapa' enamatanet ñamet ñocpuet Yompor pa'nateña. Allempoñapa' otoñ pachor María, ñeñtpa' atet och:

—Peñoche'pa'ch añ cheshatoll ñeñtpa' ñeñña onañche't ahua't Yompor. Ñocoppa'

shonte'ch israelena'tarnesha' ñeñtcha' ama ame'ñerrayo ñeñtcha' chenquërrtsa. Tarraña eñall ñaña shonte' po'potantañ ñeñtcha' ame'ñerraya ñeñtcha' cohueno'tsenterrtsa. Tarro'mar Pomporpa' añecopña mueñer allochñapa' ñach eñotaterrahuet ñapa' Pomporeshoť huapa. Tarraña shonte'ch acheñ ñeñtcha' achmãare'terre'. ³⁵ Papa' ñeñtcha'ña atarr pellcaterre'ña pa. Atarrcha' atserr pe'muerr pellquëña e'ñech atet pe'muerr puellquëña atet ñerra'mrrate' cochllo patenpet peyočhro. Elloña puesheña'tetspa' eñotaterranetcha' errotente' ñeñt atet cotape'chyenet pueyočhreto.

³⁶ Allñapa' allo'tsen ñaña puesheñarr coyanesha' ñeñtpa' añ pa'so'cheñ Ana ñeñtecma a'mtene' Yompor po'ñoñ. Ñapa' año' po'señ ñeñt sochetsa Fanuel, ñeñtpa' Aserna'tar.* Ñeñtña Anapa' o' atarr nanac po'nme'ten. Ñehua, allempo shopshena'pa' some'ta, e'ñe cančherr charohua yečhañ epuet puerrollarpa' o' rromapes.

³⁷ Ñeñtña rretorrnanesha'pa' atfa correna ñapueť. O' poscoch čharra' puechena pa'tats char allponmat correna atfa. Ñapa' e'ñe ellapene't sherbe' Yompor ama't ñaña tsapome'tets. All Yompor pa'pacloťpa' amach čha'nenno. All atarr ma'yochenana Yompor. Erroteno e'ñe puema'yocheñoť Yomporpa' amach rreno ama't coñe'ta. ³⁸ Ñapa'čho'ña allempocma huapa all o' čhapachet cheshatoll Jesús. Ñaña'pa' ma'yochosa, atarr parasyoso'tenan Yompor cheshatollecop.

* **2:36** Ñeñtña Aserpa' Jacob puechemer.

Ñeñto'marña ñapa' atarr serrpare'tatosan
acheñenesha' ñeñt cheshatollecop tarro'mar o'
huapa ñeñt atarr cohuen allohuen acheñenesha'
ñeñtcha' a'queshpatose' israelnesha' ñeñt
pa'netser pene' Jerusalén.

Allempo alla puerrerret anetso Nazareto

³⁹ Allempoña o' a'pocstatuet ora allpon ñeñt
atet anaret Yompor po'ñoño ñeñtcha' e'ñe
yecha' judionesha' ñetñapa' ahuanerret pa'nyeto
Nazareto allara Galileo. ⁴⁰ Cheshatollñapa' allo'na
sen rrorranmats, allo'na sen huomencatnomuets,
nanac eñotnenan ñeñt atarr cohuen enten Pompor
Parets, ñeñto'marña Yomporpa' atarr muereña.

*Allempo alla a'pa cheshachor Jesús Parets
pa'paclo*

⁴¹ Ñehua, ñeñt cheshachor pamo'mte' ñetpa' atet
yechenet pate'tets char pascuapopa' chocmach
senet Jerusaléño o'ch coshapreteneta' pascua
ñeñt atet yeçhena judionesha'. ⁴² Allempo
chap Jesús po'charña çharra' pueçhena epa
ahuanerretter Jerusaléño, ñetpa' atetca'ye
yechenet. ⁴³ O'ña huañ pascuapa' ñetñapa' o'
ahuanerret. Ñeñtña cheshachor Jesúspa' alla't
a'pa Jerusaléño. Pomporña ñaña pachorpa' ama
eñoteñeto o'te' alla a'pa. ⁴⁴ Cha otapuetañ añte'
co'tanen po'potantañ ñeñt parro onaçhenet.
O'ña chope'cherret pamtarrpa' allempoñapa' o'
yerpueret, e'name'tyereta' pamo'tseshesho'mar.
E'name'tyereta' allo'tsen ñeñt e'ñe cheme'tyen
pompor ñaña pachor. ⁴⁵ O'ña e'name'tuet ama

es enterrayepa' o' alla ahuerret Jerusaléño. Allpa'cho' e' name'tuereterr.

46 Poma'pamtañoñapa' alla entereta' Parets pa'paclo. All anen e'ñe parro maestronesha' ñeñt atarr eñotyene' Yompor po'ñoñ ñeñt atet anaret. Jesúsñapa' all e'mñotyenanet ñeñt atet serrpare'tyenetpa' o'chcho' a'p'to'tyerranet.

47 Ñeñto'marña allohuen ñeñt e'muene'pa' cha atarr cohuanrrorteñet, otyenet:

—Errotenotuañaca'yeña atarr es eñoten ñeñto'mar atarr cohuen es anapyen.

48 Allempo enter pompor ñaña pachorpa' atta cohuanatset. Pachorñapa' atet otos:

—¿Eso'marte'ña ne'mare o' atarr pellcatya? ¿Ama't peñoteñe atarr yellquëñesha' ye'nameneþ?

49 Ñaña'pa' otapanet:

—Eso'mare'tña se' name'tenen. Ama't señothennoña napa' ñeñt poctetsa nocop o'ch netorreññaña ñeñt poctetsa Nomporecop.

50 Ñetñapa' ama es eñotaye ñeñt atet otanet.

51 Allempoñapa' o' co'terran pamo'mte' o' cha'cherret Nazareto, ñapa' e'ñe cohuen ame'ñenana pompor ñaña pachor. Pachorñapa' allohuen ñoñetspa' e'ñe eñotueñ pueyo'chro.

52 Jesúsñapa' allo'na sen rrorranmats atarretnomtsa. Allo'na nanac eñotañetnena. Pomporña Paretspa' atarr cohuen enteñ, ñaña acheñenesha'pa' atarr cohuen enteñet.

3

Allempo orrta Juan ñeñt serrpare'tosets all amayo

(Mt. 3.1-12; Mr. 1.1-8; Jn. 1.19-28)

¹Ñehua, allempo chap allempoch amcha'taretta ñaña ñeñt pa'so'cheñ Tiberio all Romo. Allempo chap o' amcha'taretta charra' puechena amnar char allempoña Judeopa' añ amcha'tarettatsa ñaña Poncio Pilato. Galileoñapa' añ amcha'tarettatsa Herodes. Pa'mo'nasheñña Felipepa' ñapa' epa anetsocop amcha'taretta, ñeñtpa' arr amcha'taretta Iturea ñaña Traconite. Lisanciasñapa' arr amcha'taretta Abilinio. ²Ñehua, allempopa' judionesha' añ po'corneshar penet Anás ñaña Caifás, ñeñt po'corneshar pen ora allohuen cornaneshachno. E'ne ñeñte chararocma amcha'tarefetyenet allemeñ anetso'mar e'ne allempocma Yomporpa' eñorana'tana ñaña Juan ñeñt Zacarías puechemer ñeñt amayo'tsen. ³Ñeñto'marña Juan allempopa' o' chopeñe'chyes erracmañen Jordanaso'mar, all serrpare'tyesnom. Ñeñtpa' atet otyesnomanet:

—Te'pa' o'ch soctape'cherr e'ne ello cohuen Yomporecop attoch Yomporpa' o'ch peretnerrnas allohuen so'chñar, allochñapa' o'ch sapataretterra Yomporecop.

⁴Ñeñtpa' añ serrpare'tatosanet attoch etsoterra ñoñets ñeñt anaref ñeñt atet eñose't ahua't Isaiás ñeñt a'mtaye't Yompor po'ñoñ. Ñeñt Isaiás po'ñoñ ñeñtpa' atet oten:

E'morrterrach puesheñarr po'ñoñ all amayo
allcha'ña serrpare'taterranña acheñenesha'.

Puerranarotpa' añcha' toma'ntaterranet
toñ, ñeñtpa' atetcha' oterranet: "Te'pa'
o'ch sa'cohuenetyes toñ allcha' oñmos
Partsesha', o'ch e'ñe sa'pačharretyesoñ
pa'teḗ.

⁵ All rrapatse'tyen patspa' o'ch e'ñe sa'muepñetyes,
all pocmo'yaretyenapa' o'ch e'ñe
sa'muepñetuahue, all terepe'ḗarreyenapa'
o'ch e'ñe sa'pačharretyes, all arrorotetyena
toñpa' o'ch e'ñe sepampa'huahue.

⁶ Allempoña allohuen acheñenesha'pa' enteretcha'
ñeñt o' mueñerrnay Yompor ñeñtcha'
ya'queshpaterre'." Arrpa' allohua ñeñt
atet aquellcari ahuatoteñ Cristocop.

⁷ Allempoñapa' shonte' acheñenesha' huacha'tet
Juanesho. Ñetpa' tarro'mar huachenet añ
muenenet o'ch apatapanet Juan Yomporecop.
Juanña serrpare'tatapanetpa' otapanet:

—Sapa' ama cohuenayayso atarr ashcarñaes,
ča sottena ñerra'mrrate' shechḗa sompor
sepen. Po'ñočca' ama eseshaye' sotenaye e'ñech
sapatareteñoča o'ch sequeshperra allochñapa'
amach coñchatuerrso Yompor allempoch
yoročtatuer tsapaonet. ⁸ Napa' añcha'ña notapas
o'ch sorrtatyas ñeñt e'ñe cohuen enten Yompor
ñeñt atet pena ñeñt po'ñoč o' cotape'cherran
ello cohuen Yomporecop. Sapa' ča soteneñ
seyočhro año' es sepallteno sapa' año' e'ñe
seyemtena satañ Abraham. Tarraña napa' o'ch
notas amach atet soctape'chatsto tarro'mar
ñeñtpa' ama esoye' enteñe Yompor. Tarro'mar
o'ch notas ñerra'm Yompor muenetseñ ama't

añ mapue' ñeñt senten arr o'ch a'pnasereñ Abraham po'mireneñ. ⁹ Ñeñto'marña napa' o'ch notas ñerra'm amach soctape'cherro cohuen Yomporecop o' mameshamña o'ch çhaponasa attoch coñchaterres Yompor. O'ch netma'ntatasa atet ñerra'mrrate' allempo o'ch a'matamochet tsach. O' e'ñe onañchachet gach allcha' tet e'ñe allohua huañen puepallactar. Ñeñt allohuen tsachečno ñeñt ama cohuenaye' me'tetsopa' a'mata'tueretcha' sarrrochetcha' all huorten tso' allcha' e'ñe a'poyatatueret.

¹⁰ Allempoña acheñenesha'pa' a'p'to'tyeset Juan, ochet:

—Ñehua, ¿eso'tña poctetsaña yocop attoch e'ñe yorrtatyees ñeñt cohuentetsa Yomporecop?

¹¹ Ñaña'pa' anapanetpa' otanet:

—Ñerra'm eseshas echene' epma seshtam o'ch sañ ñeñt ama echenaye ñeñtcha' chorrena. Ñaña ñerra'm eseshas echene' serrar o'ch sañ ñeñt ama echenaye ñeñtcha' rrenet.

¹² Allempoña huaçha'ta ñaña acheñenesha' ñeñt po'taruas pene' atto cobrenan acheñenesha' quelle ñeñt gobiernocop. Ñetpa'çho'ña añecop huenet Juanesho o'ch apatarettet Yomporecop. Ñetpa'çho'ña o' a'p'to'toset Juan, atet otoset:

—Yocop Nomporcha' ¿eso'tña poctetsa attoch yorrtatyees yanña ñeñt cohuentetsa Yomporecop?

¹³ Ñaña'pa' anapanetpa' atet otanet:

—Ñeñt allpon quelle ñeñt e'ñe allpona enamuen gobiernopa' e'ñech allpona secobreñña acheñenesha', amachña allo'na atarr aton

secobra'neñe acheñenesha' quelle ñeñt e'ñech socpa'na.

¹⁴ Allempoña patantarr guardianesha' ñeñt allo'tsa'yenpa' a'p'to'toset ñamet, ñetpa' atet otet:

—Yocoppa'cho'ña ¿eso'tña poctetsa ñeñtcha' attoch yorrtatyes yaña ñeñt cohuentetsa Yomporecop?

Ñaña anapanetpa' atet otanet:

—Sapa' amach es seprratam̄psatsche acheñenesha' e'ñe se'mueñocma ñaña sa'metam̄peñoñ e'ñe seshquëñoñpa'cho'ña amach es seprratam̄psatsto e'ñe attota. Ñaña ñeñt allpon tsa'tenset gobiernesho'tpa' e'ñepa'chña ñeñta cohuen socshena.

¹⁵ Acheñenesha'ñapa' atta cohueñet, pueyo'chretoñapa' atta cotape'chyenet cha otenapuetañ Juanpa' ñeñt'e'ña Cristotets ñeñt cohuenet ahuatoteñ ñeñtcha' mueñerranet Yompor. ¹⁶ Juanñapa' atet otanet:

—Napa' ama añeyayno ñeñt Cristotets, tarro'mar napa' ama't napatensoñ Yomporecop e'ñe oño'chaya napatenes. Tarraña Cristo ñeñtcha' huapatsa chenta'pa' ñapa' añcha'ña chorratossa Parets Puecamquëñ ñeñt atet ñerra'm tso'. Ñapa' ñeñt atarr ahuamencatesha', nañapa' ama tama ahuamencateyayno. Ñapa' ñeñtña atarr sherbets, nañapa' ama es nesherbena attoch ama't po'sapatre'chapa' o'ch nepyoñ.* ¹⁷ Ñapa' atarr ahuamencat, ñapa' ñach acrerre' allohuen acheñenesha'. Ñapa' añ toma'ntena ñeñt orrene'

* **3:16** Ñeñt atet po'taruas pe't ahuat esclavos o'ch pueyan pamo'mte' po'sapatre'ch.

pueshoshnat alloch shoshnan po'trigo o'ch e'ñe pue'llomirochayaña. Ñeñña pue'llomerpa' o'ch a'yapa'che' o'ch añño'ch allecma añño'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeñña tso'pa' ama emaya'pahuo ama't errponaña.

¹⁸ Juanña allpa' atet serrpare'tatyenanet cohuen ñoñets ñeñ huetsa Yomporeshot alloch yequeshperra. Ellonetñapa' shonte' pa'namen serrpare'tatan acheñenesha' ñeñ ama pocteye' enteno Yompor.

*Allempo apatareta Jesús Yomporecop
(Mt. 3.13-17; Mr. 1.9-11)*

¹⁹⁻²² Allempoña o' atarr apatareta shonte' acheñenesha' Yomporecoppa' cho apatarettatsa ñaña Jesús. E'ñe apataretetuatsapa' o' ma'yocha. Allempoña ma'yochenapa' enetñapa' ahuepa't atorareta. Allotña e'ñe sohua'nma Parets Puecamquëñ e'ñe atet entapet ñerra'mrrate' yeþ o' sohua'nma entoþ. E'ñe arr chap Jesúsesho. Cha e'morrtatsa ñoñets entoþ atet eñorena Yompor. Ñeñña ñoñetspa' atet oten:

—Papa' ñeñþeþ Nechemereþ ñeñþeþ atarr nemorrentena, þa atarr nanac nocshatene'.

Allempoña añcha'taret Herodespa' o' yottañpsatan Juan tarro'mar Juanpa' eñotach ama pocteye' enteñe ñeñ atet þatse'tyena. Ama't pa'mo'nasheñ Felipe puetaporpa' o' yorañper. Ama't shonte' pa'namen ñeñ atet þatse'tyena Herodespa' elloñapa' o'cho' yottañpsaterranerr ñaña Juan.

*Arrpa' all aquellcareġ allohuen pa'so'chñechno
ñeññ pa'tañneshañ pen Jesús*

(Mt. 1.1-17)

²³ Ñehua, Jesúsapa' allempo orrta o' torra'mochana ñeññ po'taruas pen Pomporcop, allempoña po'charñapa' ñato' o'te' chap ma'poch charra' char. Acheñenesha'ñapa' aña pompor p̄ateñet ñeññ José. Ñehua, Josépa' Elí puechemer, ²⁴ Elípa' Matat puechemer, Matatpa' Leví puechemer, Levípa' Melqui puechemer, Melquipa' Jana puechemer, Janapa' José puechemer, ²⁵ Josépa' Matatías puechemer, Matatíaspa' Amós puechemer, Amósapa' Nahum puechemer, Nahumpa' Esli puechemer, Esliapa' Nagai puechemer, ²⁶ Nagaipa' Maat puechemer, Maatpa' Matatías puechemer, Matatíaspa' Semei puechemer, Semeipa' José puechemer, Josépa' Judá puechemer. ²⁷ Judápa' Joana puechemer, Joanapa' Resa puechemer, Resapa' Zorobabel puechemer, Zorobabelpa' Salatiel puechemer, Salatielpa' Neri puechemer, ²⁸ Neripa' Melqui puechemer, Melquipa' Adi puechemer, Adipa' Cosam puechemer, Cosampa' Elmodam puechemer, Elmodampa' Er puechemer, ²⁹ Erpa' Josué puechemer, Josuépa' Eliezer puechemer, Eliezerpa' Jorim puechemer, Jorimpa' Matat puechemer, ³⁰ Matatpa' Leví puechemer, Levípa' Simeón puechemer, Simeónpa' Judá puechemer, Judápa' José puechemer, Josépa' Jonán puechemer, Jonánpa' Eliaquim puechemer, ³¹ Eliaquimpa' Melea puechemer, Meleapa' Mainán puechemer, Mainánpa' Matata

puechemer, Matatapa' Natán puechemer,
³² Natánpa' David puechemer, Davidpa' Isaí
 puechemer, Isaípa' Obed puechemer, Obedpa'
 Booz puechemer, Boozpa' Salmón puechemer,
 Salmónpa' Naasón puechemer, ³³ Naasónpa'
 Aminadab puechemer, Aminadabpa' Aram
 puechemer, Arampa' Esrom puechemer,
 Esrompa' Fares puechemer, Farespa' Judá
 puechemer, ³⁴ Judápa' Jacob puechemer, Jacobpa'
 Ísaac puechemer, Isaacpa' Abraham puechemer,
 Abrahampa' Taré puechemer, Tarépa' Nacor
 puechemer, ³⁵ Nacorpora' Serug puechemer,
 Serugpa' Ragau puechemer, Ragaupa' Peleg
 puechemer, Pelegpa' Heber puechemer, Heberpa'
 Sala puechemer, ³⁶ Salapa' Cainán puechemer,
 Cainánpa' Arfaxad puechemer, Arfaxadpa' Sem
 puechemer, Sempa' Noé puechemer, Noépa'
 Lamec puechemer, ³⁷ Lamecpa' Matusalén
 puechemer, Matusalénpa' Enoc puechemer,
 Enocpa' Jared puechemer, Jaredpa' Mahalaleel
 puechemer, Mahalaleelpa' Cainán puechemer,
³⁸ Cainánpa' Enós puechemer, Enóspa' Set
 puechemer, Setpa' Adán puechemer, Adánpa'
 Yompor puechemer.

4

*Allempo oneñētpa' topatenan Jesús, mueneñ o'ch
 atet p̄atan Jesús ñēñt̄ ama pocteye' enteno Yompor
 (Mt. 4.1-11; Mr. 1.12-13)*

¹ Allempoña Jesús^{pa'} o' err Jordanasot. Ñaña^{pa'}
 añ e'ñe chorrenaya Parets Puecamqueñ ñēñt̄ña
 anmue'ña all amayo. ² Attoña all^{pa'} o' huapoña

oneñeĩ, mueneñ o'ch atet p̄atyes ñeñĩ ama poct-eye' enteno Pompor. Allñapa' ama rreno e'ñe añña torrena attoch etsotuañ ora allohuen ñeñĩ cohuentetsa Pomporecop. Ñeñto'mañña ama't o' pa'tatsoch çharramatpa' ama't coñe'tapa' ama es rreno. O'ña pa'tatsoch çharramatuapa' çho cheporratsa.

³ Allempoña oneñeĩ atto topatosan Jesúsapa' atet otos:

—Pa ñerra'm po'ñochte' Parets Puechemerep̄pa' o'ch p̄ot: Añ mapue' puenasepa' pan.

⁴ Jesúsñapa' atet otaḗ:

—Napa' ama nemno o'ch atet neḗa tarro'mar Yompor po'ñoñ ñeñĩ anuaret ahuatoteñ ñeñĩpa' atet oteneý: “Allohueneý acheñenesho hueneýpa' ama e'ñe rreñtsa ñapue't yocrrañ yepeno. Añe'naña yocrrañ yepen yecamquẽñecop ñeñĩ allohuen allpon oteneý Yompor.”

⁵ Allempoña oneñeĩpa' o' anem̄ all atarr aspen̄to e'ñe a'noso. Alloñña gatyuesuererr allohuen ñeñĩ allpon all añcha'taretetyena pa'namen acheñenesha' ñeñĩ yeçha'yetsa erraḗparen añe pat-sro. Alloñña ama't mamesha cohuospa' e'ñe orre'tuena erracmañen. ⁶⁻⁷ Oneñeĩñapa' alla oterranerr Jesús:

—Ora allohuen ñeñĩ o' pentyesua ñeñĩpa' e'ñe nocma tarro'mar ñeñĩpa' na aparet. Ñerra'm esesha' nemnen o'ch naḗpa' napa' naḗcha'ca'ye. Ñeñto'mar te'pa' o'ch notaḗ, ñerra'm na pema'yocheñoñen o'ch peconcorpana'tna, napa' napaḗcha' ora all añcha'taretetyenet all atarr cohuentatyeñet, e'ñe ora allohuen ñeñĩpa' e'ñech p̄ocma.

⁸ Jesúsñapa' alla otererr:

—Te'pa' o'ch orrerreḡ oneñeḡe. Napa' ama nemno o'ch atet neḡa tarro'mar Yompor po'ñoñ ñeñḡ anuareḡ ñeñḡpa' atet oteney: “Añach ñapueḡ yema'yochena Yeyomporer ñeñḡ Yepartseshar yepen, e'ñech ñapḡa yesherbe'.”

⁹ Allempoña oneñeḡpa' o' anerranerr Jesús Jerusaléño. Allñapa' a'tapatos nanac eno allohuanen Parets pa'paquell. Allñapa' otuererr:

—Papa' ñerra'm po'ñoḡhte' Parets Puechemereḡ te'pa' ḡomacha arrot tarro'mar amach ḡa'tserrḡo
¹⁰ tarro'mar Parets po'ñoñ ñeñḡ anuareḡ ñeñḡpa' ama'tña atet oten:

Yomporpa' o'ch mueñonaḡ po'millañoḡeñrenesha' ñeñḡcha' pecuañḡsapue'.

¹¹ Ñetcha' ḡagapapuet o'ch enatapapet attoch amach ḡa'tserrḡatca'toso mapyo.

¹² Allempoña Jesúspa' alla otererr:

—Añpa'cho'ña anuareḡ Yompor po'ñoño, ñeñḡpa' atet oten: “Amach ya'llocchame'tatsche Yeyomporer ñeñḡ Yepartseshar yepen.”

¹³ Allempoña oneñeḡ topatuahuan Jesús pa'namenotpa' o' ahuer o' cachpa'ner allponmat tarro'mar oneñeḡ ḡhocma topach.

Allempo e'ñe ñenmaḡ torrena Jesús Partsocop all Galileo

(Mt. 4.12-17; Mr. 1.14-15)

¹⁴ Allempoña Jesúspa' o' alla ahuer Galileo. Ñapa' añ atarr ahuañenat pene' Parets Puecamquēñ. Erraḡaren Galileo'mar o' e'ñe e'mare'tuet ñeñḡ atet ḡa'yena Jesús.

¹⁵ All apḡha'yena judionesha' po'prahuetopa'

ñañapa' all yeçhatyenanet. Attoña allohuen
acheñenesha'pa' atarr cohuen enteñet.

*Allempo serrpare'tatan Jesús acheñenesha' all
Nazareto*

(Mt. 13.53-58; Mr. 6.1-6)

¹⁶ Atteñapa' o' alla çherr Nazareto all yeçhache't
pompör allempo cheshena'. Pamtarrña allempo
çhap yet allempo çhocma amesen judionesha',
Jesúsñaapa' o' ahuo' judionesha' po'prahuo,
ñaapa'çho' atet yeçhena. O' çhap puerahuopa'
allñaapa' tomos allcha' lleyatan acheñenesha'
Yompör po'ñoñ. ¹⁷ Allñaapa' añ apet libro ñeñt
allo'tsen Isaías po'ñoñ ñeñt a'mtaye't Yompör
po'ñoñ ahuat. Ñañaapa' toran libropa' all entan
ñoñets ñeñt atet aquellcare't ñocop, ñeñtñaapa' atet
oten:

¹⁸ Napa' añ nechorrenaya Nompör Puecamquëñ
tarro'mar ña nellsense' nach ser-
rpare'taterre' ora allohuen acheñenesha'
ñeñt atarr es palltetsa. Napa' añcha'
neñotatterranet cohuen ñoñets ñeñtpa'
alloch queshperret. Ñaña añecopña
llesenserren attoch nach a'crratyerre'
allohuen ñeñt mueroçhetyetsa puellquëño't
pueyoçhreto. Nach eñotaterre' ñaña ñeñt
ayottamñpsare'tetyetsa allochñaapa' o'ch
atoramñpsare'tetterret. Nach eñotaterre' ñaña
ñeñt ama entetso allochñaapa' o'ch enterret.
Ñaña ñeñt amueroçhtatare'tetyetsa nachña
a'rroyaterrahuet.

¹⁹ Ñaña napa' añecopña llesenserren nach
eñotatterahuet te'pa' o' çhap allempo pocte'

enteñ Yompor o'ch atarr orrtaterranet puemuereña. Ñehua, arrpa' allohua ñeñt allpon lleyatanet Isaías po'ñoñ.

²⁰ O' lleyatuanetpa' o' alla e'tam̄perran libro apuerran ñeñt sherbets all puerahuo. Allempoñapa' o' alla anorruerr. Allohuenña acheñenesha' ñeñt puerahuo'tsa'yen ñetñapa' atarr cohuanrrorteñet Jesús. ²¹ Ñaña' atet otanet:

—Atto' o' se'mhua añ ñoñetspa' te'ñapa' o' e'ñe çherr attoch e'ñe etsoterra ñeñt atet aquellcaret ahuaotoñ.

²² Allohuenña acheñenesha'pa' e'ñe cohuen eñora'yenet Jesúsocop. Atarr coçhnesha' enteññañet po'ñoñ ñeñt atet serrpare'tatyenanet. Ñetñapa' atet otanna'tyenet:

—Errotenotuañaca'yena atarr coçhneshare' serrpare'tatyeney. Ñapa' añaca'ye José puechemer.

²³ Jesúsñapa' atet oterraneterr:

—Sapa' ñeñt atet o' se'mare'ton ñeñt atet norrtatyena' ahuaña Capernaumo te'ña sapa' cha semneñ o'ch soten añ ñoñets ñeñtecma muene' yotannena ama't ahuaotoñ: “Pa ñeñtep a'crratañtetsa te'pa' o'ch pa'crrata e'ñe pañeña”, tarro'mar sapa' añte' semnen o'ch atet norrtat ñaña arr cohuen e'ñe ya ya'netsro atet norrtatena' ahuaña Capernaumo.

²⁴ Tarraña napa' po'ñoçh o'ch notas:

—Ñeñt a'mtene' Yompor po'ñoñ ama't puesheñarra ama eñalleña ñeñt e'ñe cohuen enten allohuen pamo'tsesha' ñeñt parro yeçhenet all e'ñe ñet pa'netsreto. ²⁵⁻²⁶ Napa' po'ñoçh te'pa' añcha' neyerpatasa ñeñt atet pe't Elías

ñeñt̃ a'mtaye't Yompor po'ñoñ ahuat. Ñehua, allempopa' o' ma'pa char ñaña po'poñ pueshmet charpa' nanac chares ama't mameshapa' ama huateno ñeñto'marña orrta muecheñets erracmañen all anetso ñeñt̃ Israel all yeche't Elías. Ñaña ama't shonteñ israelena'tar ñeñt̃ rretorraneshatyets allempo, tarraña Yomporñapa' ama alleye' mueñanoña Elías attoch yenposan ama't puesheñarra rretorranesha' ñeñt̃ e'ñe pamo'ts pen ña. Arra mueñe po'poñ anetso ñeñt̃ pa'so'cheñ Sarepta ñeñt̃ allara Sidón allo'tsen puesheñarr rretorranesha', ñañaapa' ñeñña yenpos. ²⁷ Elloña o'ch alla neyerpaterrser po'poñ ñeñt̃ atet pe't ñaña Eliseo, ñapa'cho'ña ñeñt̃ a'mtaye't Yompor po'ñoñ ahuat. Ñehua, allempopa' shonte' israelena'tarnesha' ñeñt̃ osyen puetsarñats ñeñt̃ otenet lepra all anetso Israel all yeche't Eliseo. Tarraña ama't atteñ ama't puesheñarro'tapa' ama a'crratereña Eliseo e'ñe all Israelo. Ñapa' aña a'crraterr ñeñt̃ po'poñena'tar acheñ ñeñt̃pa' añ pa'so'cheñ Naamán ñeñt̃pa' po'poñ anetso'marnesha'; ñeñt̃ pa'netser penpa' añ pa'so'cheñ Siria.

²⁸ Acheñenesha'ña allempo e'met ñeñt̃ atet yerpatanet Jesúsapa' ñeñt̃ña atarr atsrre'matahuet allohuenet ñeñt̃ puerahuo'tsa'yen. ²⁹ Ñetña tantrra'tetpa' o' mueño'teret allot pa'netsretot. Cheta'neret, allotpa' arr anmet allohua huañen pocoll allot e'ñe atseretena allcha' huapore'chet attoch muetsatachet. ³⁰ Tarraña ama't huapore'chetañ, Jesúsñaapa' o' chope'chnerr ama't all shontena acheñenesha'. Ñañaapa' all

cheta'tnerra rroçhopa' o' ahuerr.

*Allempo Jesús'pa' entaḷ puesheñarr yacma ñeñt
chorrena oneñet
(Mr. 1.21-28)*

³¹ Allempoñapa' o' alla ahuerrerr anetso Capernaumo allara Galilea. Pamtarrña allempo çhap yeñats allempo amesen judionesha' ñañapa' o' ahuo' po'prahueto. Allñapa' yeçhatyesosan acheñenesha'. ³² Ñeñt atet yeçhatenanet, acheñenesha'ñapa' atta cohuanrrorteñet. Tarro'mar ñapa' atet yeçhatenanet ñerra'mrrate' ñeñt allsensarettetsa Partseshot.

³³ Puesheñarrña yacma ñeñt allo'tsen puerahuo, ñeñtñapa' añ chorrenaya oneñet. Ñaña rranare'tapa' atet otapan Jesús:

³⁴ —¿Eso'mare'tcha'ña errot peḷosey Jesús'o, ḷa ñeñteḷ nazareto'marneshaḷ? Añecopte' pehuapa o'ch ḷa'chencaterrey. Napa' o' neñotapaḷ. Papa' atarr Partsoḷ añ pellsensene' Pompor ñeñt atarr nanac Parets.

³⁵ Tarraña Jesús'pa' ama muenache o'ch eñorana'cha. Ñañapa' atet och:

—Pemma, te'pa' çhoḷaña caçhpa'nerre'ña añ acheñer.

Oneñetñapa' çha atanman yacmapa' alla o'shshe'ma e'ñe all shontena allohuen acheñenesha'. Allempoñapa' o' caçhpa'ner e'ñe atta, ama errot ḷa'nme. ³⁶ Acheñenesha'ñapa' çha atarr toratsḷpanet pueyoçhret. Ñetñapa' atet otanna'tyeset:

—Ta'mca'ye, errotente'ca'yeña Jesús po'ñoñ, atarropa't huomenc po'ñoñ pen. E'ñe atet ñerra'mrrate' ñeñt allsensarettetsa ñeñt atarr

ahuamencatesha'. Ama't oneñeĩ erroť otenpa' atet'cho' p'ateñ. Po'ñočha'ye te'pa' o' čha'nerr oneñeĩ.

³⁷ Allempoñapa' erracmañen allampaño'mar serrpare'tyeset ñeñĩ atet pena Jesús.

Allempo a'crratosan Jesús Simón Pedro pa'so'mue

(Mt. 8.14-15; Mr. 1.29-31)

³⁸ Allempoña Jesúsapa' čha'nerr puerahuoť o' ahuo' ñaña Simón pa'paclo. Allña Simón pa'so'muepa' čha atsna'ten, čha atarr nanac hueraten. Otapet Jesús:

—Te' yapa' yemneñ o'ch p'a'crratos atsnañeĩ.

³⁹ Allempoña Jesúsapa' o' ponmosana atsnañeĩpa' čha a'huañañp'sose'ña po'urateña. Allempoña o' metua po'urateñapa' allenta tanta o' agapapanet e'ñe cohuen o' yema'tapanet.

Allempo Jesúsapa' a'crraterran shonte' pa'namen atsnañeĩečho

(Mt. 8.16-17; Mr. 1.32-34)

⁴⁰ Ñeñte yetrocma allempo o' emuena atsne'pa' acheñenesha'ña allohuenet ñeñĩ atsna'tyets pamo'tsesha' ñetñapa' o' huapatyesnenet atsnañeĩ e'ñe Jesúsesho. Ñañaapa' na'yesapanet pot ñesheto puesheña'ttset, attoña a'crratyesapanet allohuenet. ⁴¹ Ñaña shonte' acheñenesha' cačhpataťyesapanet oneñeĩ ñeñĩ puerranaroť otnomue' Jesús:

—Papa' ñeñtep e'ñe po'ñoč Paretš Puechemerep.

Tarraña Jesúsapa' a'mtsoñeñtanet, ama muenataneto o'ch eñorana'tnomet, tarro'mar ñetpa' e'ñe eñotnomet ñapa' ñeññ Cristotets.

*Allempo Jesúsapa' serrpare'tatyesnoman
acheñenesha' errañaren Galileo'mar*

(Mr. 1.35-39)

⁴² Tsapañaña o' puetarenpa' Jesúsñaapa' ahua'muen a'yo all ama acheñempañooyaye. Acheñenesha'ñaapa' e'name'ta'mueñet. Atteñaapa' o' çhapa'muenet allo'tsen Jesús. Ñetñaapa' ama mueneñeto o'ch erra sa'nmanet. ⁴³ Ñañaapa' atet otapanet:

—Napa' añ puctetsa nocop o'ch ahuen po'poñ anetso'mar, allpa'cho'ña o'ch neserrpare'tatyesnomanet ñeññ cohuen ñoñets, o'ch neñotatyesosanet Yompör po'cohuenña ñeññ attoch ayochreshattena ña, tarro'mar napa' ñeññecopña llesenserren Nompör.

⁴⁴ Atteñaapa' o' serrpare'tatyesnoman acheñenesha' errañaren Galileo'mar all açha'yenet po'prahuetö.

5

Atto Jesús rromatosanet shonte' cac

(Mt. 4.18-22; Mr. 1.16-20)

¹ Allempoña po'pocheño Jesúsñaapa' e'ñe sa'patopño ten, ñeñña sa'ppa' añ pa'so'cheñ Genesaretas. Allñaapa' huaçha'toña shonte' acheñenesha' o' çha echta'tatse'tanna'töset. Attoña ama't Jesúsapa' o'çha echta'töset. Ñetpa' añ muenenet o'ch e'mñnotosñañet Yompör po'ñoñ. ² Jesúsñaapa' all entosan epna noññ

e'ñe all sohua'puetso. Ñeñtña po'taruas pene' ñeñt rremuene' cacpa' ñetña' ama po'noñto'tsa'yeneto. Ñetpa' o' ahuanmuet a'yenet allcha' tsama'teneta' po'terraya. ³ Jesúsña allpa' a'tapos puenarr noñto, ñeñt Simón po'noñt. A'tapospa' otan Simón:

—Pechtam̃psen mame' rrocha'sonet.

Jesúsña anorros noñtopa' alloñña yeçhatosan allohuen acheñenesha'. ⁴ Allempoña serrpare'tatuanet, o' alla oterranerr Simón:

—Te'pa' o'ch ahuep̃ rrocha'sonet epopa' o'ch alla peterrayerrerr, te'pa' perrma'ch shonte' cac.

⁵ Simónña'pa' atet och:

—Yapa' o' Maestrocha' e'ñe yarepen torratta terrayats e'ñe orrena ama't parra cac ama yermueñe. Te'ña p̃aca' notene' o'ch alla neterrayererr ama'tpa' atetcha' nepa' o'ch alla neterrayererr.

⁶ Allempoña'pa' atetcho' pet, o' alla terrayerreterr. Terrayaña'pa' shonte' rroman cac nanac aton, cha muene' rrarre'tatan terraya.

⁷ Atteña'pa' agochet po'potantañ pamo'tset ñeñt po'noñto'tsa'yen o'ch huapuet ñeñtcha' rromapretahuet cac. O'ña chapuet o' esha'tanetet cac noñto e'ñe epno'mar chorreres cac noñto, cha muene' esha'tatan noñt. ⁸ Allempoña atet eñch Simón Pedro ñaña'pa' poma'yorñecma ponmana Jesús, concorposa pa'rrp̃ot, all otos:

—Amach Partseshacha' allo'na peyemtatset-nenno tarro'mar napa' ñeñten atarr ochñañen.

⁹ Atet otan Jesús pueyorñoñ tarro'mar eñoteñ ñeñt atto rreman shonte' cacpa' Parets atet

řatene'. Ama't allohuen ñaña ñeñt̃ epuet taruasetpa' atarr nanac yorenet. ¹⁰ Ama't ñaña Jacobo ñaña Juan ñeñt̃ Zebedeo puechemerasha' ñeñt̃ parro taruasen Simón, atarr nanac yorenet. Allempoña Jesús pa' atet oterranerr Simón:

—Amach čha peyorenatsto. Ñeñt̃ atet pepena ahuatoteñ e'ne' cac te'ñapa' atetča' peperra e'nerre' ñaña ačeñ ñeñt̃ča' řame'ñaterra.

¹¹ Allempoñapa' ahuanĩperret o'ch etsotuerret allecma etsotenet. Ñetñapa' allempocma sohuanmuet allohuen ñeñt̃ allpon echyenet. Allempoñapa' coteret Jesús attoch pueyochresha' per-ranet.

Atto Jesús a'crraterran puesheñarr yacma ñeñt̃ aptsarñat̃

(Mt. 8.1-4; Mr. 1.40-45)

¹² Allempo po'pocheño Jesúsñapa' alla čherrerr po'poñ anetso. Allñapa' huapoña puesheñarr yacma ñeñt̃ osen puetsarñats ñeñt̃ otenet lepra, atarr apočhtateñ. Entosan Jesús pa' alla rromañsosa. Allña rromuenapa' allotña enamosan Jesús, atet otos:

—Ayochreshate ñerra'm řa muenatspa' řa ñeñteř atarr ahuaencateshař řa'crrataye'cherren allochñapa' attoch e'ne cohuen entuerren ačeñenesha'.

¹³ Jesúsña anretapa' allenta a'p̃lle', atet och:

—Napa' nemneñca'ye, metuerrepa'ña peptsarña attoch e'ne cohuen enterreř allohuen ačeñenesha'.

Yacmañapa' allorocma metuer pueptsarña.

¹⁴ Jesúsñapa' alla otererr:

—Te' atto o' na'crraterreṗpa' ama't e'ñe puesheñarrapa' amach ṗotaṗsa'tatsche. Corneshachña pegatena' all peptsarse't. Atet nane't Moisés ñoñets añ acheñrecop ñeñtcha' a'crrataretterrtsapa' te'ñapa' o'ch es ṗanom ñeñtcha' ṗapos all ñeñt Yomporecop. Allochñapa' attoch e'ñe cohuen enterreṗ allohuen acheñenesha'.

¹⁵ Elloña atarr nanac serrpare'tyeñet, o' erracmañen epa'hua atto' pena Jesús. Ñeñto'marña shonte' acheñenesha' huach'a'toñet attoch e'mñotoñet po'ñoñ ñaña attoch a'crratyesanet allohuen pa'tsnañeferet.

¹⁶ Tarraña ñapa' errotenopa' o'ch ahuerr a'yo all ama acheñempañoaye allcha' ma'yochena.

*Atto Jesús a'crraterran ñaña ñeñt echarrtaña
(Mt. 9.1-8; Mr. 2.1-12)*

¹⁷ Po'pocheño allempo Jesúsṗa' all yeçhaterranerr shonte' acheñenesha', allña allpononeṗa' all anorrcha'tyen ñaña patantarr fariseonesha' ñaña ñeñt atarr etsotayenayeñ ñoñets ñeñt atet anaret judioneshacop. Ñetpa' pa'namen anetso't huach'a'tyenet —Galileo't ñaña Judeo't ñaña Jerusaléño't. Jesúsñapa' atarr ahuamencat peñ Pompoc, attoña a'crratyesan shonte' ñeñt atsna'tyets. ¹⁸ Atteña o' huapatoñet ñaña echarrtaña, huapatañṗset puechecnaṗo't. Ñetpa' añ muenenetañ o'ch be'toset o'ch e'ñe noset Jesúsesho. ¹⁹ Tarraña shonte' acheñenesha' ñeñto'marña ama eshcaye' abe'tosetoña atsnañe't attoch çhapachet e'ñe Jesúsesho. Atteñapa' a'tapatoset eno't pocollato. Allñapa' o' a'rro'toset

pateprarr echet allotña a'suatam̃pset echarrtaña puechechnape'na. Attoña chapachet e'ñe rrocho allo'tsen Jesús. ²⁰ Jesúsñapa' eñotapanet ñetpa' atarr nanac yemteñet, ñeñto'marña atet otapan echarrtaña:

—Masheñcha' te'ña pa po'chñarpa' o' aṗretna'huareṭta.

²¹ Otue' atetpa' añña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop, ñetñapa' otatset ñañeñeta:

—Esesha'huañaca'ye o' achm̃are'tanña Yompor. Arr patsropa' ama't puesheñarra ama eñalleña ñeñt peretnene' ochñarets, ñapṭaña Yompor peretnene' ochñarets.

²² Jesúsñapa' eñotanet ñeñt atet otenet ñocop, ñañaapa' atet otanet:

—Sapa' eso'mare'tcha'ña atet soctape'chatse'tyesña seyoṅhro. ²³ Ñehua, sapa' cha soten ñeñt atet o' notue echarrtaña po'chñarpa' o' aṗretna'huareṭta, ñeñtpa' ama torrapahuoyaye. Sapa' añña atarr torrapo' senten attoch na'crrater choncha'ña ote': "Petantena, pechope'chnen." ²⁴ Ñehua, napa' o'ch neñotatas na Ñeñten Acheñetosets, napa' apareten llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarrtaña:

—Te'ña napa' o'ch notap: Petantena, pechta'nen pemue' o'ch pechope'chnen, ahuenep pepaclo.

²⁵ E'ñe otue' atetpa' echarrtañañapa' cha tantetsa e'ñe allorocma. Allohuenña acheñenesha' e'ñe entueñet. O' cheta'nenan po'mue'

pa'ye'chochtateñesha' Yompor o' ahuen pa'paclo.
 26 Allohuenña acheñenesha'pa' cha atarr
 cohuanrrortapueñet. Attoña ñetpa'cho'ña atarr
 cohuentatyeññañet Yompor. Allohuenetñapa'
 atarr nanac yorenet, atet otyenet:

—Te'pa' o' yenterr ñeñt ama't ahuatapa' ama
 yentareña ya ñeñt atarr cohuen.

*Allempo Jesúsapa' hua'ña'nman Leví attoch puey-
 ochresha' per*

(Mt. 9.9-13; Mr. 2.13-17)

27 Allempoñapa' o' ahuererr Jesús. All oñempa'
 all entnoman puesheñarr ñeñt po'taruas pene'
 o'ch cobrenan acheñenesha' quelle ñeñt gobier-
 nocop. Ñeñtñapa' añ pa'so'cheñ Leví*. Alla
 anen allecma apchenet quelle ñeñt gobiernocop.
 Jesúsñapa' otosan Leví:

—Te'pa' pōcta'n attoch neyochresha' neperreñ.

28 E'ñe otue' atet Levíñapa' cha tantnomtsa o'
 cotan Jesús. Attoña ñapa' e'ñe sohuanman ñeñt
 allohuen pa'namen.

29 Allempoñapa' chapa'muen ñaña pamtarr
 allempo Leví pa'paclopa' ye'chcatatan shonte'
 rreñets attoch coshame'tañpesyet Jesús.
 All rrallme'chapreteñ shonte' acheñenesha'.
 Allo'tsa'yen ñaña ñeñt parro yemtena Leví.
 Ñetpa'cho'ña ñeñtareta ñeñt po'taruas penet
 o'ch cobra'yenet acheñenesha' quelle ñeñt gobier-
 nocop, tarraña ñetpa' puehquëñote'na cobreñet
 acheñenesha' aton. Ñeñt rrallme'chapretene'
 Jesús. 30 Fariseonesha' ñaña ñeñt atarr

* 5:27 Levípa' ñeñtara ñeñt sochenet Mateo.

etsotayenayeñ ñoñets ñeññ atet anaret, ñetñapa' sasare'teññañet Jesús pueyochresha'. Atteñapa' otarettet:

—Ta'm, eso'marte'ña serrallme'chapreteñña añ acheñeneshar ñeññ puehquëñoñe'na cobra'yene' acheñenesha' aton quelle ñaña epas acheñenesha' ñeññ atarr ochñañenesha'chno.

³¹ Atet e'manet Jesús, ñaña'apa' atet toma'ntatanet:

—Ñeññ e'ñe huomech entetsapa' ñetpa' ama e'neñetoña apartañ. Añña ñeññ atsna'tetspa' ñetñapa' chocma añ e'nenet ñeññcha' a'crraterrahuet. ³² Napa' ama añecpaye' nohuapo attoch nechore'tos ñeññ e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch nechore'tos ñeññ atarr ochñañ entyetsa. Allochñapa' attoch o'ch coñape'cherret ello e'ñe cohuen Yomporecop.

Allempo Jesús'pa' eñotatanet atetcha' tore'tet Yomporecop ñeññ e'ñe po'ño'ch sherbets

(Mt. 9.14-17; Mr. 2.18-22)

³³ Ñetñapa' alla otereterr Jesús:

—Ñeññ Juan pueyochresha'pa' chocma tore'tenet Yomporecop,† chocma ma'yochenet. Ñaña fariseonesha' pueyochresha'pa'cho'ña attecma penet. Tarraña paña peyochresha'pa' eso'mare'tña ama atteye' peneto. Ñetpa' atta es rratse'tyenet, atta es orryenet.

³⁴ Jesúsñapa' alla toma'ntaterraneterrpa' atet otanet:

† **5:33** Añ tore'teñetspa' añecop o'ch yetorra Yomporecop. Amach añecpaye atomat, ñeññpa' añecpa mameshacop o'ch yeque'chpa' yerrar.

—Ñeññ ahua'ñarečehno all rrallme'chapreteñet ñeññ e'ñe errte' sena'tetsa, ama pocteyaye o'ch yotanet "amach es serra'yesatsto", tarro'mar ñeññpa' atet coshapreteñet ñeññ sena'tetsa. ³⁵ Tarraña ñerra'm esempo machayoña sa'nerranet ñeññ sena'tetsa, ñeññña parro yemuetyena allempoña ñetpa' e'ñe puellquēñoŕet cachpa'huerretcha' puerrar, amach arrenaye' enterreto. Ñeññpa' attochña tore'terret allempo Yomporecop e'ñe po'ñočh. Arrpa' allohua huañ ñeññ atet Jesús toma'ntata ña sena'tostsa.

³⁶ Elloñapa' o' alla toma'ntaterraneterr ñeññ atet yečhen judionesha' arr patsro ñeñño'marña atet otanet:

—Ñehua, ñerra'm yečhen epma yeshtam, pa'terr emarr ñaña po'poñ mellashañpa' amach yerrar-ratstoña emarr yeshtam alloch yellta' yeshtam mellashañ all rrrarra'nen. Tarro'mar ama't atet yeŕatsechpa' ñeññpa' e'ñech orrena. Ama't yesh-tam emarrpa' o'huañcha' cohuenta all yerrarreñ. Ñaña yeshtam mellashañ ama't o' yelltereñ emar-ropa' amach alla cohuenterro tarro'mar ñeññ allo o' yellterpa' ama mellashañecmayaye, ñeñño'marña amach ñeññtatere.

Ñeññpa' attoña Jesúsapa' eñotatanet ña poctapña e'ñe etserra. ³⁷ Jesúsñapa' alla toma'ntaterraneterr po'poñ ñeññ atet yečhena judionesha' o'ch yečcatenet pa'rrom orroť. Ñeñño'marña atet otanet:

—Ama't puesheñarroťeyapa' amach yeshatstoña vinos emasa mellasha'mañ orroťo ñeññ ayečcatareť pa'rrom. Tarro'mar ñerra'm atet yepe'pa' o'ch chasa'ña vinospa' čhach a'ptsan

orrot, vinosñapa' e'ñech shebhua, ñeñña orrotpa' ama't mamesha'pa' amach es sherberro. ³⁸ Añña ñerra'm emasa vinos, arrcha'ña yeshe' emerra orroto ñeññ ayečhcataret pa'rrom. Allochñapa' ama'tcha' chasa' vinospa' amach čha potsa'psoña vinos ñeñtpa' allach yechen epo'mar.

Ñeñtpa'cho'ña attoña Jesús pa' eñotatanet ña poctapña e'ñe etserra. ³⁹ Po'poñonetpa' alla toma'ntaterraneterr Jesús, ñeñtpa' atet oterraneterr:

—Ñeññ e'ñe yečhenaya o'ch orran co'nes ñeññ atarr chase'pa' ñapa' ama mueno o'ch orran co'nes emasa, țarro'mar ñapa' atet oten ñeññ atet yečhena ahuatoteñpa' ñeñña e'ñe cohuen enten.

6

Allempo Jesús pueyochresha' taso'tam̄pesyesnomuet trigo añe yetro allempocma amesen judionesha'

(Mt. 12.1-8; Mr. 2.23-28)

¹ Allempoña čherrerr allempo čhocma amesen judionesha'. Allempoña Jesús pa' arr oñem chetso'mar epuet pueyochreshačhno. Allempo oñenet chetso'mar pueyochresha'ñapa' taso'tam̄pesyesnomuet puechña'tets trigo a'she'challme'chyenomet attot rrocllome'chachet o' rra'yenomet. ² Ñeñña patanta'tets fariseonesha'pa' che'ptaretanet, atet otaretet:

—Eso'mare'tña atet sepena ñeññ ama pocteyaye o'ch atet yeřa țarro'mar te'pa' añe yetro ñeññ atet anaret ahuatoteñ allempocmach yamesen.

³ Jesúsñapa' otanet:

—Sapa' ama'trra selleyareña añ ñoñets all oten ñeñt atet pa ahuat David allempo cheporra'nma epuet ñaña allohuen ñeñt cotene'. ⁴ Ña allempopa' be'tosos Yompor pa'paclo, allñapa' chetosan pan ñeñt atma'ntataret atet ñerra'mrrate' ñeñt nenet all Partsocop. Ñehua, ñeñt panpa' ama pocteyayñe o'ch esesha' rre'. Ñeñtpa' añach ñapue't rrene' cor-naneshachno; ñeñtpa' e'ñe atet anuaret judione-shacop. Ñeñña panpa' o' chetos David, rros, rratosan ñaña allohuen ñeñt epuet.

⁵ Allempoña alla otterraneterr Jesús, ñeñtpa' atet otanet:

—Ñeñto'marña te'pa' o'ch notas, na Ñeñten Acheñetosets ñeñten allsensareten, naca'ye atet otets este' poctetsaña ñeñtcha' atet ye'pa añe yetro allempocma yamesen.

Allempo Jesúsapa' a'crraterran ñeñt chelletsapota
(Mt. 12.9-14; Mr. 3.1-6)

⁶ Allempoñapa' cherrerr po'pocheño ñeñt yetñatsro allempocma amesenet. Jesúsñapa' be'tosuenerr judionesha' po'prahuo. Allñapa' ye'chatyesuananerr acheñenesha'. Allñapa' allo'tsen ñaña puesheñarr yacma ñeñt cha chellena pot po'cohuenrot. ⁷ Acheñenesha'ña ñeñt atarr etsotayenayañ ñoñets ñeñt atet anaret epuet ñaña fariseonesha' ñetña allpa' Jesúsapa' atarr cohuana'tyenet attoch enteñeterr ñato'rraña o'ch a'crratenanerr acheñ añe yetro allempocma amesenet. Ñerra'm o'ch a'crratenanerr ama't puesheñarra acheñ añe yetro allempo amesenet, allempoñapa' esheccha' a'metañpeñeta'

am̄cha'taretesho. ⁸ Jesúsñapa' eñotanet ñeñt̄ atet̄
cotape'chatse'tyenet pueyočhreto. Ñañaapa' atet̄
otan yacma ñeñt̄ chellets̄a pot:

—Aḡon ḡatomos arrma.

Yacmaña huapapa' o' tomos all rrocho.
⁹ Jesúsñapa' atet̄ otanet:

—Ñehua, napa' o'ch na'ḡto'tas: ¿Erra'tsena'tña
ñeñt̄ e'ñe pocte' senten ñeñt̄cha' atet̄ yeḡa añ yetro
allem̄po yamesen? Ñato' o'ch atet̄ yepe' e'ñe co-
huen po'psheñeñ, amapa' ñato' o'ch atet̄ yepon̄
ñeñt̄ ama pocteyaye. Ñato' añte' pocte' senten o'ch
ya'crrach acheñ amapa' añte' pocte' senten amach
ya'crratatsche čhachña yemtsatach.

Ñetñaapa' ama't puesheñarroḡetapa' ama
eseshaye' anapuenaye entaye.

¹⁰ Ñañaapa' cohua'yesan allohuen ñeñt̄
anorrčhets all, allem̄poñapa' otan ñeñt̄ chellets̄a
pot:

—Te'pa' o'ch notaḡ: Petapuerr ḡot.

E'ñe otue'pa' ñañaapa' allent̄epa'tcha' tapuerran
pot, o' e'ñe cohuenterra pot. ¹¹ Fariseonesha'ñapa'
ñeñt̄ña atarr atsrre'matahuet. Allem̄poñapa'
cotape'chatanna'tet, atarr o'pachet Jesús.

*Allem̄po Jesúsapa' acran čharrasheña ñeñt̄
puechets̄a epsheña ñeñt̄cha' llesensa'*

(Mt. 10.1-4; Mr. 3.13-19)

¹² Allem̄poña Jesúsapa' o' alla ahuerrerr
a'yo aspen̄to allcha' ma'yochena'. Allñaapa'
arepen ma'yochaya Pompor. ¹³ Tsapañña
puetarenpa' agota'muenan allohuen ñeñt̄
pueyočhreshačhno pen. Allem̄po čhačha'tet

ñeshopa' ñañaapa' o' acrapan ñeñt̃ charrasheña ñeñt̃ puechetsa epsheña ñeñt̃cha' llesensa' ñeñt̃cha' serrpare'tyetsa' allemeñ anetso'mar. ¹⁴ Ñeñt̃ llesensa' ñeñt̃pa' añechno: Simón ñeñt̃ soherr Pedro, allotpa' ñaña pa'mo'nasheñ Andrés, allotpa' Jacobo* ñaña pa'mo'nasheñ Juan, allotpa' Felipe, ñaña Bartolomé, ¹⁵ ñaña Mateo ñaña Tomás ñaña Jacobo ñeñt̃ Alfeo puechemer, ñaña ñeñt̃ po'psheñeñ Simón ñeñt̃ cananistanesha' ñeñt̃ atarr torratse't pa'netsrecop, ¹⁶ allotpa' ñaña Judas† ñeñt̃ Jacobo pa'mo'nasheñ, allotpa' ñaña po'psheñeñ Judas Iscariote ñeñt̃cha' pomuerre' tsapatonet̃ Jesús.

Allempo Jesúsapa' yechatenan shonte' acheñenesha' (Mt. 4.23-25)

¹⁷ Allempoña huerra Jesús aspeñot̃ epuet pueyochresha', tom̃cha'tuerret all aspeñet̃ pacñe'tpener poño po'mopñero. Allñapa' o' cha'cha't̃ shonte' po'potantañ acheñenesha' ñeñt̃ pueyochresha' pen. Ñaña allot'sa'yen shonte' acheñenesha' ñeñt̃ huachetsa allemeñ anetso't̃—Judeot̃ ñaña Jerusaléno't̃, ñaña sa'patopñño'marnesha' ñeñt̃ huetsa Tiro't̃ ñaña Sidono't̃. Ñetpa' añecopña huachenet o'ch e'mñoteret ñamet Jesús ñeñt̃ atet̃ serrpare'ten ñaña añecpa'naña huachenet attoch a'crratyapanet Jesús patsnañeteret. ¹⁸ Ama't̃ ñaña allohuen ñeñt̃ muerochtatyen oneñet̃ ñañaapa' e'ñe

* **6:14** Jacobopa' ñeñfara ñeñt̃ sochenet Santiago. † **6:16** Judaspa' ñeñfara sochenet Tadeo.

a'crratyesuapanet. ¹⁹ Allohuenña acheñenesha'pa' atarr mueneñet o'ch a'p'loset Jesús tarro'mar ñapa' ña atarr ahuamencatesha', e'ñe ña po'huamencot a'crratyenan allohuen acheñenesha'.

Atto atarr cosheñtso'tsa'yen patantarr ñaña atarr llequēñtso'tsa'yen po'potantañ (Mt. 5.1-12)

²⁰ Allempoña Jesús pa' cohua'yesan ñeñt puey-ochresha' pen, ñaña pa' atet otanet:

—Ñeñtes atarr huocchañnesha' entetsa ñeñtescha'ña atarrcha' cosheñtso'tsa'yenes tarro'mar sapa' o'pataterrsach Yompor po'cohuenña atto atarr ayochreshattena ña.

²¹ 'Ñaña sapa' ñeñtes cheporrare'tyetsa te' ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe señmataterre'.

'Ñaña sapa' ñeñtes yahuetsa te' e'ñe sellquēñot ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe seche'taterre' socsheñot.

²² 'Ñaña sapa' atarr cosheñtso'tsa'yenes ñerra'm esempo e'moñe'tenset no'mar ñerra'm esempo mueño'tenset, ñerra'm esempo puesasare'teñoftetas sochatse'tenset tarro'mar sapa' na same'ñena Ñeñten Acheñetosets.

²³ Allempo atet penset ñeñt ama cohuenayaye, sañapa' socshepa'ch nanac ñaña señoche pa'ch shonte' ñeñt o'patatensa Yompor pue'ntaño ñeñtcha'ña atarr socshaterre'. Ñehua, ñetpa' pa'tañneshañpa' attecma muerochtatyese'te' ñaña ñeñt a'mta'yese'te' Yompor po'ñoñ ahuat.

24 'Tarraña te'pa' o'ch notas sa ñeñtes atarr eçllayoretes ñeñtes echene' ora allpon ñeñt e'ñe socpa. Sapa' ñeñtescha'ña atarr llequëntso'tsa'yenes tarro'mar esempopa' huañerrcha' ñeñt socshatene'.

25 'Ñaña atarr llequëntso'tsa'yenes ñeñtes atarr esocmañen es echyets allo e'ñe señmatena seyeteñoť. Cherrcha' allempoch atarr sepallterra ñeñtcha' serrar seperr.

'Ñaña atarr llequëntso'tsa'yenes sa ñeñtes te'pa' e'ñe socsheñsha' seche'tatsetyena. Cherrcha'ña allempoch seyahuerra sellquëñoť.

26 'Ñaña atarr llequëntso'tsa'yenes ñerra'm esempo allohuen acheñnesha' e'ñech cohuen entapretenset, e'ñe cohuen eñosyenet socop. Tarro'mar ñetpa' atet pete't pa'tañneshañ ahuat, e'ñe cohuen eñosyese't añ acheñreneshacop ñeñt ama't ama Yomporeye' po'ñoñ a'mta'yese'te.

Atto Jesús pa' yeçhatosanet amorrentpo'ch yeñch ñeñt ye'moñe'tyene'

(Mt. 5.38-48; 7.12)

27 'Sa ñeñtes ne'mñotene' o'ch notas ñeñtcha' atet sepa e'ñe cohuen, semueryach ama't ñeñt se'moñe'tene'. O'ch atet sepe' e'ñe cohuen.

28 'Ñaña ama't erra'tsen ñeñt sarrnomare'tenaya sañapa' o'ch senamaterrñañ Yompor pa'nateña. Ñaña ñeñt sesasare'tene' sañapa' o'ch sema'yochampenanet. 29 Nehua, atet ñerra'm esempo esesha' pue'moñe'teñoťetas o'ch taclaset setsa'po, sañapa' poctepa'chña señch taclerrserrepa' ñaña po'pshemtañoť. Ñaña ñerra'm esempo esesha' seprratamñse' seshtam,

sañapa' poctepa'chña señch puerratañpsasetepa' seshtam ñeñt muenenet ama't ñaña po'pmañ seshtam allo sepmatena. ³⁰ Ñerra'm esesha' es senamuene' sañapa' sapepa'ch ama't esesha. Ñaña ñerra'm esesha' seyoratsre'tamñse' sañapa' amach alla senamatstere apuerrsetepa' alla. ³¹ Ñehua, ñerra'm erra'tsente' e'ñe cohuen senten ñeñt semnen sa ñeñtcha' atet ÷onas po'psheñeñ, sapa'cho'ña e'ñech attecma sepanet saña.

³² 'Ñaña sa ñerra'm aña semorrentena ñeñt atarr semorrentenaya saña, ñeñtpa' amach e'ñeye' sorrtatenoña ñeñt e'ñe po'ñoç cohuentetsa, tarro'mar ñeñt ama ame'ñenayo Yompor ñetpa aña morrentenet ñeñt e'ñe morrentenahuet ñamet. Añña atarr cohuentetsa ama't ñeñt ama yemorrentenayepa' o'ch yemorrencha e'ñe cohuen. ³³ Ñaña ñerra'm aña e'ñe cohuen seyenpa'yen ñeñt seyenpa'yene' saña, ñeñtpa' ama e'ñeye' sorrtatenoña ñeñt e'ñe po'ñoç cohuentetsa, tarro'mar ñeñt ama ame'ñenayo Yompor ñetpa' aña yenpa'yenet ñeñt yenpa'yenahuet ñamet. ³⁴ Ñaña ñerra'm añecpa es sartanna'tyena attoch ellopa' o'ch alla apuerrset saña, ñeñt atet sepenapa' ama e'ñeye' sorrtatenoña ñeñt e'ñe po'ñoç cohuentetsa; añcha'ña es saretyena po'psheñeñ ama't ñetpa' ama'tcha' ama apuerrseto ama't coñe'ta, tarro'mar atet pena ñeñt ama ame'ñenayo Yompor ñerra'm eñoteñet o'ch alla aparetterret ñamet esheccha'ña archet po'psheñeñ. ³⁵ Tarraña napa' o'ch notas, sapa' añe'nachña semorrentena ama't ñeñt se'moñe'tene'. Ñaña sapa' añe'nachña

seyenpuen ama't ñeñt ama seyenpuenaye. Ñaña sapa' añe'nachña es saretyena ama't ñeñtcha' ama sapuerraye. Ñerra'm atetcha' sepa Yomporña' apuerrescha' ello ñeñtcha' atarr socshatuerre'. Ñapa' allempoch e'ñe puechemer perres, ñeñtara Yompor Ñeñt Nanac Parets. Tarro'mar ñapa' añe'naña muerena ama't ñeñtcha' ama coshaterraye ña, ñeñtara ñeñt ama cohuenaye' es petso. ³⁶ Sapa'cho'ña atarrepa'chña semueranna'ta e'ñe atet pena ñeñt Yeyomporer yepen atarr muerenya yaña.

*E'ñe attotapa' amach yotteñe'channa'tatsto
(Mt. 7.1-5)*

³⁷ 'Sapa' amach sotatsche po'psheñeñ "ama pocteyaye ñeñt atet sepa'yena", allochñapa' amach otuerrso saña Yompor ama pocteyaye ñeñt atet sepa'yena saña. Ñaña e'ñe attotapa' amach sotteñe'chatsche po'psheñeñ allochñapa' Yomporpa'cho'ña amach otteñe'chuerrso saña, chochña e'ñe cohuen sepretnannena allochñapa' Yomporpa'cho'ña e'ñech cohuen peretna'huerres saña. ³⁸ Ñaña sapa' e'ñech cohuen es sapanna'tyena allochñapa' Yomporpa'cho'ña e'ñech cohuen es apuerres saña. Shonte'ch nanac es apuerres, atet ñerra'mrrate' cho es e'chorratenset soshaco atet ñerra'm chop e'charet. O'ch chorrapa' o'ch a'rrapuet esheccha' esha'tereter po'poñ, ñerra'm o'ch chorrerrerrpa' o'ch pa'shmuet attoch e'ñe a'tamo'yonaset. Ñeñtpa' añ toma'ntena atto es apueney Yompor

nanac aton. Ñaña errponcha' saṗ po'psheñeñ, sapa'cho'ña e'ñech allpon apuerres saña Yompor.

³⁹ Allempoña Jesús pa' atet toma'ntaterraneterr, ñeñtpa' atet otanet:

—Ñeñt aporo'yetpa' ñapa' amach errotenot echa'nmano po'psheñeñ ñeñt parro aporo'yetecmuet. Tarro'mar ñerra'm atet penet, ñerra'm arrorotonta echa'nmanna'tnomuetpa' epsheño'maret chach shora'nmuet arrorofo. Arrpa' allohua ñeñt atet toma'ntatanet atet ñerra'm ya allempo ama yoctape'cherra' ñeñt cohuentetsa Yomporecop amach errotenot yoctape'chache po'psheñeñ ñeñt ama eñotenaye ñeñt cohuen enten Yompor.

⁴⁰ 'Ñeñt aychatarettetsapa' ama't puesheñarra amach errotenot metanetoña ñeñt allpon eñoten ñeñt yechatene'. Ama't allempo e'ñe aychatarettapa' e'ñech allpona yecha' ñeñt allpon eñoten ñaña ñeñt yechate'. ⁴¹⁻⁴² Amach atet sentatsche po'potantañ ñerra'm ñetpa' ama cohuenaye' es peneto ama't sapa' ama sentenoña ñeñt atet sepa'yena sa; ñeñtpa' ello semtaneñña po'potantañ ñeñt atet es pa'yenet ñet. Ñerra'm ama cohuenaye' es sepeno samapa' amach sotatscheña po'potantañ: “Masheñcha' napa' o'ch noctape'chatterreṗ e'ñe cohuen.” Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr ñeñt ama cohuenaye' sepeno sa, allochñapa' attoch seño ch cotape'chate' samo'ts e'ñe cohuen. Ñeñtpa' añ toma'ntena o'ch senten po'psheñeñ pa'clloyo'tsen puepachña ama't sa seclloyopa' allo'tsen tsach;

ñeñtñapa' ama senteñe. Ñerra'm atetpa' amach errotenoť socheña po'psheñeñ: "Masheñcha' napa' o'ch nechterrnař pecloyoť pepachña." Tarro'mar añ tsach ñeñť seclloyo'tsenpa' čha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyoť allochñapa' attoch e'ñe cohuen es sentyen. Attochña e'ñe cohuen sechterrñañ po'psheñeñ puepachña pa'clloyoť.

Allohuen acheñ ñeñť e'ñe po'ñoč cohuen acheñer, ñetñapa' añcha' orrtatyenet ñeñť e'ñe cohuenare'

(Mt. 7.17-20; 12.34-35)

⁴³ 'Tarro'mar allohuen acheñ ñeñť e'ñe po'ñoč cohuen acheñer, ñetñapa' añcha' orrtatyenet ñeñť e'ñe cohuenare'. Tarraña po'potantañ acheñenesha' ñeñť po'ñoč ama cohuenayaye ñetñapa' añach orrtatyenet ñeñť ama cohuenayaye. Ñeñťpa' atetcha' netma'ntaterra: Ora allohuen ñeñť e'ñe cohuen narmetsoch, pue'merpa'čo'ña e'ñech cohuenare'. Añña po'pchañečno narmetsoch ñeñť ama cohuenayayepa' pue'merpa'čo'ña amach e'ñe cohuenayaye. ⁴⁴ Ñeñto'marña attoña yeñoten erra'tsente' ñeñť e'ñe cohuenare' narmetsoch ñaña ñeñť ama cohuenayaye, pue'meroťña e'ñe yechme'teñ. Ñaña yapa' e'ñe yeñoteñ ama arroteye' yetoquënoña llo'm ajchoť. Ñaña ama arroteye' yetoquënoña ap rrenagachot.†

⁴⁵ Ama't erra'tsena acheñer ñeñť e'ñe po'ñoč cohuen, ñapa' añcha'ña orrtaten ñeñť e'ñe cohuenare' coťape'chen pueyočhro tarro'mar

† **6:44** Ñehua, Jesús añ toma'ntatanet uva ñaña higo ñeñť puenarem penet all pa'nyo.

pueyočhro allña shonte' cotape'chenan ñeñt' cohuentetsa. Tarraña po'poñ acheñer ñeñt' po'ñočh ama cohuenayaye, ñapa'cho'ña añach orrtaten ñeñt' atet cotape'chen pueyočhro ñeñt' ama cohuenayaye tarro'mar pueyočhro allña shonte' pa'namen cotape'chenan sosya'tsañ. Tarro'mar ñerra'm shonte' yoctape'chen yeyočhro ñeñt' cohuentetsa, ñeñtpa' e'ñech ñeñta cohuen yeserrpare'ten. Tarraña ñerra'm shonte' yoctape'chen ñaña yeyočhro ñeñt' ama cohuenayayepa' ñeñtpa'cho'ña e'ñech ñeñta yemnen o'ch yeserrpare'teñ.

Atto Jesús toma'ntatana acheñ ñeñt' e'ñe eñotene' ñeñt' po'ñočh sherbets ñaña ñeñt' ama eñotenaye ñeñt' sherbets

(Mt. 7.24-27)

⁴⁶ 'Sapa' eso'maruañaca'yeña sotenen napa' Sa'yochresha'ero' sepenen, sapa' amaca' čoye' same'ñenno ñeñt' atet o' notuas. ⁴⁷ Allohuen erra'tsencha' huapatsa nesho ñeñt'cha' name'ñenaya na ñaña ñerra'm e'mñotennanet neñoñ ñeñt' atet cohuen neyčhatenanet ñerra'm atet e'ñe penet, ñetñapa' atarrcha' eñotenet ñeñt' e'ñe po'ñočh sherbets. ⁴⁸ Ñeñt' acheñer ñeñt' atet petsa o'ch netma'ntacha atet ñerra'mrrate' puesheñarr yacma ñeñt' atarr es eñotets ñeñt' tomatene' pocoll ñeñt' e'ñech echarr penan pa'paquëll. Ñaña'apa' atarrcha' o'pono eñan pats attoch e'ñe echarr pan po'quellpach. Atteñapa' o' chap allempo apellchena oñ, pocollña'apa' ama a'mato apellche' tarro'mar quellpachpa' atarr huomenc a'omataret. ⁴⁹ Tarraña po'potantañ

ñeññ e'muene' neñoñ ñetña ñerra'm ama atteye' peneto ñeññ atet notenanet, ñetñaapa' e'ñech attet ñerra'mrrate' puesheñarr yacma ñeññ ama es eñoto. Ñapa'cho'ña o' tomataneñ pa'paquëll tarraña ñañaapa' ama atarr o'ponoye' eñanoña pats attoch e'ñe echarr ñan po'quellpach. Allempoñaapa' apellcha oñ apellche'ñaapa' çhepa'tcha' a'matamñpsos pa'paquëll. Pocollñaapa' e'ñe poctacma muello'tstosa.

7

Atto Jesúsapa' a'crraterran capitán pa'taruasañer; ñeññ capitánpa' romo'marnesha'

(Mt. 8.5-13)

¹ Allempoña Jesúsapa' serrpare'tatuerranerr allohuen acheñenesha' ñeññ e'mñotene', ñañaapa' ahuererr; o' çherrerr Capernaumo. ² Allñaapa' allo'tsen puesheñarr yacma ñeññ solltar po'cañtaner, ñeññpa' romo'marnesha', ama judioneshayaye. Ñeññña capitánpa' echenan puesheñarr pa'taruasañer çha atsna'ten atarr pa'nattena, ñañaapa' atarr morrentenana pa'taruasañer. ³ Ñeññña capitánpa' allempo e'mare'tan Jesús o' alla çherr Capernaumo, ñañaapa' o' mueñan patantarr acheñ ñeññ pompornesha' pen judionesha', o'ch oteñeta' Jesús atto agotateñ capitán o'ch a'crraterrñaña' pa'taruasañer. ⁴⁻⁵ Allempoña çhapuet Jesúseshopa' ñetñaapa' atet otoset:

—Ñeññ capitánpa' ñapa' atarr cohuen acheñ, ñapa' atarr morrentenya ya ñeññey israelena'tarey, ama't yeprahuapa' o'

tomatatuosnay. Ñeñto'marña ama't yapa' e'ñe pocte' yenteñ o'ch peyenpueña' ñaña, ñapa' ama't ama judioneshayaye. Attoña atarr enamueñet Jesús attoch yenpuenana' capitán.

⁶ Allempoñapa' co'ta'nerranet Jesús. Chapmochet capitán pa'paclo, capitánñapa' mueñerranerr po'potantañ acheñ ñeñt parro yemtena ñeñtcha' otapue' Jesús atet oten capitán:

—Yapa' atet otapuey capitán atto'ch yotapař: “Amach Ayochreshate atsrre'mo'chen nentatat-stapape tarro'mar napa' ama cohuenayayno attoch pebe'tosapo'tam'pesna nepaclo. ⁷ Napa' ama cohuenayayno ñeñto'marña aña nemñen po'psheñeñ ñeñtcha' nepoctatapař, ñeñtcha' potap correrrepa' na'taruasañer, ñaña'apa' acrrerroche'ch. ⁸ Tarro'mar napa' ñeñten ñeñt atet petsa ñeñt atet otenen ñeñt neyechenaya. Ñaña napa'cho'ña eñall ñeñt neyechena namña ñeñt nesolltarer nepen. Ñerra'm puesheñarr solltar noteñ: Papa' o'ch ahueř a'yo, ñaña'apa' o'chcho' ahuo'. Ñaña po'psheñeñ solltar ñerra'm o'ch noch: Papa' apon arr, ñaña'apa' o'chcho' huapa. Ñaña po'psheñeñ na'taruasañer ñerra'm o'ch noch: Papa' arrcha' petaruasa'muen, ñaña'apa' allcha'cho' taruasa'muen. Ñeñto'marña napa' neñoteneř ñerra'm erroten potenpa' e'ñechca'ye atet pena.”

⁹ Allempo e'man Jesús ñeñt atet oten capitán, ñaña'apa' alla cohua'yesan allohuen acheñenesha' ñeñt co'ta'nene'. Ñaña'apa' atet otanet:

—Errotenotuañaca'yeña atarr yemtenna, ñapa' amaca'ye judioneshayaye. Napa' o'ch

notas, ama't ahuatapa' ama nentareña acheñ ñeñ e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñ atet atarr neyemtenaya. Ama'tpa' correrrepa' pa'taruasañer.

¹⁰ Allempoña ñeñ pocte' Jesús o' ahuanerret capitán pa'paclo. Ñetñapa' entuerrñañet capitán pa'taruasañer o' e'ñe correrra.

Atto Jesúsapa' tantaterran arromñañ ñeñ rretornanesha' puechoyor

¹¹ Allempo allponmaterrerr, Jesúsñapa' ahuerterr po'poñ anetso, ñeñ añets añ pa'so'cheñ Naín. Alla co'a'huanererr pueyochresha' ñaña shonte' po'potantañ acheñenesha'. ¹² O' chapmochet all allotecma be'tenet attoch chapuet anetso. Allotñapa' cha'nma'cha'tos ñeñ anene' arromñañ, o'ch pampueñeta'. Arromñañapa' asheñorr ñeñ e'ñe po'pa'rror pen pachor. Pachorñapa' rretornanesha'. Shonte' acheñ ñeñ allo'marnesha' ñeñ llecapretenaya rretornanesha' all co'a'neñet. ¹³ Partsesha'ña Jesús allempo entapan rretornanesha' puellcapreteño'tpa' atarr muerosya. Ñañaapa' atet otapan rretornanesha':

—Amach no'cha peyahuatsto.

¹⁴ Allempoña ponmapana arromñañ, a'pllata'tosñañ po'cajon. Ñeñña anene'pa' alla tom'cha'toset. Jesúsñapa' otan huepuesha' ñeñ rromuets:

—Napa' o'ch nota'p: ¡Te'pa' o'ch petanterra!

¹⁵ E'ñe otue'pa' ñeñña arromña'tpa' allenta tanterra cha' eñorerrtsa. Jesúsñapa' o' alla

apuerriñañ pachor. ¹⁶ Acheñenesha'ñapa' atarr nanac yorenet. Po'yorñoŕetpa' atarr aye'chochtateññañet Yompor. Ñetñapa' atet otyenet:

—Te'pa' o' orrtonaya puesheñarr ñeñt atarr sherbets ñeñt a'mtene' Yompor po'ñoñ. Yomporpa' o' yerpuerrya ñeñtey e'ñe pueyochreshay peney.

¹⁷ Attoña acheñenesha'ñapa' epaye' serpare'tyesuerret ñeñt atet pa'yena Jesús. O' e'ñe epa'hua ora Judeo'mar ñaña ora erracmañen allampaño'mar.

Juan ñeñt apatañtatse'tpa' mueñan pueyochresha' Jesúsesho
(Mt. 11.2-19)

¹⁸ Añña Juan ñeñt ayottam̄psareŕ, ñañaapa' chocma serrpare'tateñ pueyochresha' ñeñt atet pa'yena Jesús. ¹⁹ Atteña Juanñapa' agotatan epsheña ñeñt pueyochresha' pen ñeñtcha' mueña Jesúsesho ñeñtcha' a'pto'tenaya' Jesús po'ñochte' ñapa' ñeñt Cristotets ñeñt atarr cohuenet ahuatoteñ, ñato' amate' ñeñteyayepa' añcha' cohuet po'psheñeñ ñeñtcha' huapatsa. ²⁰⁻²¹ Allempoña ñetpa' ahuanmuet. Allempo chapuet allo'tsen Jesús, Jesúsñapa' añ torra'yena a'crratanatyese' shonte' acheñenesha' ñeñt atsna'tyets ñeñt pa'namen muerochtatyenahuet. Ñaña ñeñt chorra'yena oneñet ñapa' o' e'ñe caçhpatatuerranet oneñet. Ñaña shonte' aporo'yeteçhno ñañaapa' o'

alla e'ñe cohuatyesuerranet. Ñeñña Juan pueyochresha'pa' a'p'to'toset Jesús, atet otoset:

—Juan ñeñt' apatañtase't Yomporecop yapa' ñeñña yemñene' o'ch yotenpa', ñato' p'ate'ña ñeñte'p'te' e'ñe po'ño'ch Cristotets ñeñt' atarr yecuen ahuatoteñ o'ch huapa; ñerra'm amate' ñeñteyaypepa' o'ch e'ñe p'otey allochñapa' añcha' yecua' po'psheñeñ ñeñt'cha' huapatsa ñeñt' e'ñe Cristo.

²² Jesúsñapa' otapanet:

—Te'pa' o'ch ahuerres seserrpare'tatuercha' Juan ora allpon ñeñt' atet sentyesuennana' arr ñaña ora allpon ñeñt' atet se'myesuennana' arr. O'ch e'ñe seserrpare'tatuer ora ama't atto aporo'yete'chnopa' te'ñapa' o' e'ñe necuatyesuerranet, ñaña ñeñt' checa'repayetspa' te'pa' o' e'ñe chope'chyesuerret, ñaña ñeñt' osyen puetsarñats, te'pa' o' e'ñe a'cohuentataretetuerret ñamet, ñaña paquetnesha'chnopa' ama't ñetpa' te'ñapa' o' e'ñe e'myesuerret cohuen, ama't ñaña ñeñt' rromayets te'ñapa' o' alla atantataretetuerret, ñaña ama't ñeñt' huocchañnesha'chno te'ñapa' o' e'ñe neserrpare'tatuerranet añ cohuen ñoñets alloch qeshperret ñamet.

²³ Jesúsñapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt' atet notenes: Atarr cosheñtso'tsen ama't allohuen ñeñt' atarr neyemtenaya na, ñeñt' ama e'nenaye po'psheñeñ ñeñt'cha' coshaterrahuet.

²⁴ Allempoña Juan pueyochresha'pa' o' ahuanerret. Jesúsñapa' alla serrpare'taterranerr

acheñenesha' ñeñt atet pe't ahuaña Juan, ñeñtpa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ mōrr. ²⁵ Ñaña amaca' añecpaye' sete'teña all o'ch sentena' ñeñt atarr cochnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr cochnesha'tetsa pa'shtam. Yapa' yeñoteñ arrña yentenña ñeñt atarr cochnesha' chorra'yenaya shetamuets añcha'taretepahuo. ²⁶ Sapa' añecopca'yeña sete'tña amayo o'ch sentena' all ñeñt po'ñoch a'mtene' Yompor po'ñoñ. Napa' o'ch notas, Juanpa' atto atarr sherbenan Yomporpa' ello metana'tuenan allohuen ñeñt atto a'mtenet Yompor po'ñoñ. ²⁷ Tarro'mar Juanpa' ñocop eñose't Yompor ahuañ. Ñehua, allempopa' atet otne't na ñeñt atetcha' pōsa Juan nocop esempoch huapa, ñeñtpa' atet anaret ñoñets ahuañoteñ:

Papa' peñoche'pa'ch napa' o'ch nemñonañ puesheñarr ñeñtcha' ñanom otatsa ñeñtcha' pa'cohuentatyese' pōcop allcha' pōñmos.

²⁸ Ñeñto'marña na te'pa' atet notenes: Allohuen allpon acheñenesha' ñeñt eñalletetsa arr pat-sro ama't puesheñarra ama eñalleña ñeñt atarr sherbets atet ñerra'mrrate' Juan ñeñt apatyese't ahuaña acheñenesha' Yomporecop. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompor atto te'pa' o' ayochresha'tena, ñeñtña acheñerpa' atar-rca'ye sherben, ello metanenan atto atarr sherben Juan.

29 Allohuen acheñenesha' ama't ñaña ñeñt ashcañetyestse't atto atarr cobra'yese'te't quelle ñeñt gobiernocop ñeñt apatyese Juan, ñetñapa' atto e'mñnotenepa' otyeset: "E'ñe pocte' atet oteney Yompor." 30 Tarraña fariseonesha' epuet ñaña ñeñt atarr etsotayenayeñ ñoñets ñeñt atet anaret judioneshacop, ñetñapa' ama't e'ñe mamesha ama pocteye' enteñeto ñeñt atet muenen Yompor ñocpuet, ñeñto'marña ñetpa' ama apataneto Juan Yomporcop allempo.

Partsesha'ñapa' atet oterraneterr:

31-35 —Ñehua, napa' o'ch neñotatas ñeñt atet pena patantarr acheñenesha' ñeñt yentyente' ñeñt ama't errotena ama acshatpoteneto. Ñeñtpa' fariseonesha' atet petsa. Tarro'mar ama't allempo orrta Juan ñeñt apatañtatse't ñapa' ama rrane'te ñeñt yocrrañ yepen allohueney, ama orrane'te ñeñtecma yorren allohueney. Ñeñto'marña ñapa' čha sotyese't čhote' chorreña oneñe't, ama't e'ñe mameshapa' ama pocteye' señche'te. Te'ñapa' o' norrterra namña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen ñaña atarro' arratsñaten ñaña atarro' orrarñaten napa' año'chña e'ñe neyemuetyena ñeñt atarr ochñatenesha' ñaña ashcarñatečno ñeñt atarr cobra'yene' acheñenesha' quelle. Tarraña ama't atet sepennoñpa' Nomporña e'ñe eñotene' ñeñt po'ñočh atarr sherbets ñocop. Ñaña allohueney ñeñtey e'ñe puechemeresha' pohueney ñeñtey cotene' ña poctañña yapa'cho'ña e'ñe yeñotuenña ñeñt po'ñočh atarr sherbets. Ñeñto'marña

yorratyēññañ ñeññ cohuen enten ña. Sañapa' ama't e'ñe mamesha ama acshatpahuoyayso, e'ñe attes ñerra'mrrate' cheshaneshā' ñeññ čhocmach po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetñapa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o' yerequërca'hua allo yocshame'tenapa' sañapa' amaña se-she'rarampenye; allotpa' ama't o' yepoctorare'tua ñeññ ya'chpeñtsorecho allo yelcanrrortenapa' sañapa' amaña sellcapretenyo."

Allempo Jesúsapa' rrallme'chos fariseo pa'paclo ñeññ sochetsa Simón

³⁶ Allempoña Jesúsapa' o' huapoña ñaña puesheñarr fariseo o'ch otenana' Jesús rrallme'chapreteñepa' pa'paclo. Jesúsñapa' allenta coterran fariseo. Allempoña čhapach pa'paclo anorrcha'toset parro allcha' rrallme'chapretos. ³⁷ Puesheñarrña coyanesha' ñeññ allo'marnesha' ñeññ atarr ecañoreshať, ñañaapa' o' e'mare'ch o' čhap Jesús fariseo pa'paclo all rrallme'chen. Ñañaapa' huapa, huapatan ñeññ atarr eñmosať ñeññ nanac tsa'te'; huapatañpes puetellmō ñeññ otenet alabastro. ³⁸ Allñapa' pueya'chpeñesha' huapa, ponmosana Jesús pa'tco. All atarr yahuosa, puese'ñapa' čha tso'psa'tos Jesús pa'tco. Allempoña chetosanña pue'chpa' alloña alla a'porrarra'tquër, tso'tsteca'tosan pa'tac, she'tatca'tos eñmosaťo. ³⁹ Añña fariseo ñeññ

hua'ñene' Jesús, ñaña'pa' eñchpa' atet ot pueyoöchro: Tarraña añ yacma ñerra'm po'ñoçh ñeñt a'mitenayeñ Yompor po'ñoñpa' eñotapaneñcha'ña añ coyanesha' ñeñt a'pllene'pa' atarr ecañoreshat, amach muenacheñe o'ch a'pllosñañ ama't pa'tca.

⁴⁰ Jesúsña'pa' atet otan fariseo:

—Napa' nemneñ o'ch masheñe Simóna notap allpon ñoñets.

Fariseoña'pa' atet och:

—E'ñe pocte' nenteñ Maestrocha' o'ch pöten.

⁴¹ Jesúsña'pa' alla toma'ntacha, atet och:

—Napa' o'ch not, allo'tsen puesheñarr acheñ ñeñt artetsa quelle. Ñaña'pa' artana puesheñarr acheñ nanac shonte' quelle ñeñt otenet quinientos denario*; po'psheñeñña'pa' archa po'poñ quelle ñeñt ama tama atonayaye ñeñt otenet cincuenta denario. ⁴² Attoña epsheño'maretpa' ama eshcaye' tsa'tuerreto ñeñt allpon teña'yenet tarro'mar ama echeneto alloch tsa'terret. Ñaña'pa' e'ñe atta peretna'huerranet epsheño'maret, e'ñe attecma ama eseshaye' tsa'terrtso. Te'ña masheñe Simóna o'ch na'pö'tap, añ epsheño'mar ñeñt amorrentaret attoch peretnerranet allpon tebenet ¿erra'tsena't pentenña pa' ñeñt atarr morrentenaya ñeñt peretnene', ñato' ante' acheñer ñeñt tebene' quinientos denario amapa' ante' ñeñt e'ñe cincuenta denario tebene'?

⁴³ Simónña'pa' alla anapueranerr Jesús, atet otererr:

* **7:41** Denariopa' quelle ñeñt allpon tsa'tenet pamtarr ñeñt taru-
asets all pa'nyo.

—Ñehua, añte'ca'ye atarr morrentenaya ñeñt' ap shonte' quelle, tarro'mar ñapa' shonte' o' atta aṗretnareṗterra ñeñt' allpon shonte' teben.

Jesúsñapa' alla otererr:

—Atetca'ye masheñe.

⁴⁴ Allempoña Jesúsapa' cohua' allente'tsen coyanesha' allotñapa' alla oterranerr Simón:

—Pecue' añ coyanesha' ñeñt' atet ṗosen. Allempo neḅhap pepacllopa' ṗañaapa' ama es ṗapapno ama't oñapa' ama ṗapapno alloch ne'patca'tosa. Tarraña añña coyanesha'pa' ñaña ne'patca'tose' e'ñe ña puese'yo allempoña' alla a'porrarra'tquerren e'ñe ña pue'cho. ⁴⁵ Ñaña allempo neḅhap pepacllopa' ṗañaapa' ama't pehuomñcha'teñoṗapa' ama petso'tstsa'pa'tapno. Tarraña añ coyanesha' e'ñe allempo neḅhap pepaclo ama atta caḅhposno allorocma tso'tsteca'tosen attoña orrtatosan puemorrenteña nocop. ⁴⁶ Papa' ama't coñe'tapa' ama es peshapono noño ama't olivoso'ya ñeñt' ama tsa'teyaye. Tarraña ñañaapa' eñmosaṗo she'tatca'tosen ñeñt' atarr tsa'te'. ⁴⁷ Attoña te'pa' atarr orrtatosnan ñeñt' atto morrentosna. Napa' neñoteññañ ama't shonte' po'chñar te'ñapa' o' e'ñe aṗretna'huareṗta. Tarraña po'psheñeñ ama't ama tama ochñaṗeyaye attoña aṗretna'huareṗta po'chñarpa' ñañaapa' ama e'ñeye' morrentapanoña ñeñt' o' peretnerrñañ po'chñar.

⁴⁸ Allempoña Jesúsapa' otan coyanesha':

—Te'ña po'ñoḅhpa' o' e'ñe aṗretna'huareṗterra ṗo'chñar.

49 Allempoñapa' ñeñt̃ parro rrallme'chenet, ñetñapa' otanna'tyeset:

—Esesha'huañaca'yeña añ yacmar atto peretnerranña ochñarets.

50 Jesúsñapa' alla oterranerr coyanesha':

—Papa' atto atarr peyemtenna ñeñt̃ña o' a'qeshpaterrep̃. Te'ñapa' o'ch ahuerrep̃ e'ñe peñmañesha'.

8

Atto coyaneshačhnopa' es apa'yesete't Jesús ñeñt̃ allpon echyenet

1 Allempoñapa' chopeñe'cherrerr Jesús erraparen serrpare'tyesnomue' cohuen ñoñets attoch chap allempo ayochreshattena Yompor. Erracmañen chopeñe'chyen, ora allemeñ anetso'mar all shonta'yena acheñenesha' ñaña all ama tama shonteyaye acheñ. Allñapa' cota'huanererr pueyochresha' čharrasheña ñeñt̃ puechetsa epsheña. 2 Allñapa' cota'huanem̃ ñaña patantarr coyaneshačhno ñeñt̃ a'crratyesua Jesús ahuañmo'cha, puesheña'tetspa' ñeñt̃ cačhpatatyerr oneñeñ ñeñt̃ chorrahuete't, po'psheññečhnopa' ñeñt̃ a'crratyes ñeñt̃ pa'namen atснаñtsor mueročhtatyesahuete't. Puesheñarr coyanesha' ñeñt̃pa' añ pa'so'cheñ María Magdalena. Ñeñt̃ Maríarpa' Jesúsñapa' puecačhpatataroñ cančherr oneñeñ. 3 Ñehua, po'psheñeñ coyanesha' añ pa'so'cheñ Juana. Puerrollarñapa' añ pa'so'cheñ Chuza añ po'taruas pen atto sherbenan añcha'tare't Herodes. Alloñña po'psheñeñ coyanesha' ñeñt̃ cota'nene' Jesús

ñeñt̃pa' añ pa'so'cheñ Susana. Ellopa' shonte' po'potantañ coyaneshachno ñeñt̃ es apa'yesaye't̃ Jesús ñeñt̃ allpon echyenet ñet.

All toma'ntatanet Jesús ñeñt̃ a'parre'tene' puerets

(Mt. 13.1-9; Mr. 4.1-9)

⁴ Alleñateñ anetsot hua'cha'tyena acheñenesha' ñeñt̃ chachets Jesúsesho. Allempoñapa' o' cha shontotset nanac, Jesúsñapa' serrpare'tatapanet, atet̃ toma'ntatapanet:

⁵ —Ñeñt̃ña a'parrene' puerets ñaña' ahuo' allcha' a'parre'tyenana' puepuer. All a'parre'tyeñ patanta'tetsñapa' alla chapyes toño'mar, ñeñt̃ña' at̃ta at̃mama'tyes acheñenesha'. Allñapa' hua'cha'tyesa ñaña ot̃ e'ñe añyallme'chuenana' puerets.

⁶ Po'poñechnoñapa' alla chapyes mapuet̃ro'meso'mar. Ñeñt̃ña' mameshapa' cheparesuañ, tarraña mameshapa' alla hueya'huerra tarro'mar all mapuet̃ro'mesopa' ama eñalle ama't̃ coñe'ta oñ ñeñt̃cha' a'yamosañpse' narmets ñeñt̃ o' cheparesua all.

⁷ Po'potantañña pueretspa' alla chapyes allcha' chepares aj. Allpa'cho' mameshapa' cheparesuañpa' ajñapa' mameshapa' atesha'tua alla ca'matuerranña narmets alla a'cllatuer.

⁸ Po'potantañechno ñeñt̃ña' arr chapyes all e'ñe cohuen patso. Ñeñt̃ña' e'ñe cohuen chepares. Allempoña atesha'tuapa' atarr aton ellom̃re'tyes. Puecha'tetspa' charroch charra' pue'llomer.

Allempoña serrpare'tatuanet atet̃pa' o' alla oterraneter̃. E'ñe huomencocma eñorana'tanet, atet̃ otanet:

—Ñeñtes po'ñooh ne'mñotene', chaponasepa'ch seyoöhro ñeñt atet netma'ntatensa añ ñoñets.

Ateť otanet Jesús ñeñtecop atet toma'ntatyenanet

(Mt. 13.10-17; Mr. 4.10-12)

⁹ Allempoña pueyochresha'pa' ochet Jesús:

—Ta'm ¿esté'ña petma'ntatenya? Yañapa' ama yeñoteñe.

¹⁰ Jesúsñapa' alla oterraneterr:

—Sa te'pa' Yomporña o' muenaterres attoch señoterr ñeñt ama eñotpahuoyaye ama't ahuaťoteñ atet penaña Yompor po'cohuenña atto atarr ayochreshattena ña. Tarraña po'potantañechnoña ñeñt atta es puecha'yetsa, ñocpuetpa' ama eñoteñeto ñeñt atet atma'ntatareť ñoñets. Attoña ama't enteñetañ ñetñapa' amach es chenahueto pueyoöhreto. Ama't e'mueñetañ amaña chenaneťoña pueyoöhreto ñeñt atet yechateney Yompor po'cohuenña.

Arrpa' all eñotatanet Jesús ñeñt toma'ntatenanet ñeñt a'parre'tene' puerets

(Mt. 13.18-23; Mr. 4.13-20)

¹¹ 'Ñehua, ñeñt atet netma'ntatasa ñorra'pa' ñeñtpa' atet notenes: Ñeñt a'parre'tyene' puerets, ñeñt pueretspa' añ notenes Yompor po'ñoñ allempo serrpare'teñet. ¹² Añ puerets ñeñt chapyesets toño'mar ñeñtpa' añ notenes acheñenesha' ñeñt e'mñotenayeñ Yompor po'ñoñ. Allempo e'mñotueta'pa' allorocmach huapa oneñet o'ch alla puerratañperranet Yompor po'ñoñ pueyoöhretoť. Attoña amach

mueneñeto o'ch ame'ñenet, attochña ñetpa' amach a'queshpatareterreto. ¹³ Ñaña ñeñt̃ chapyesets mapuetro'meso'marpa' ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech pocsheñesha' aguerrñañetañ Yompor po'ñoñ. E'ñech cohuen ame'ñeretañ tarraña ñetpa' mamecpach atet pet. Tarro'mar ñetpa' atet penet ñerra'mrrate' narmets ñeñt̃ chepuets mapyo amach eñalle puerech. Tsapaonetña ñerra'm o'ch huapanet topateñets, ñetñapa' o'ch alla cáchpuerrñañet Yompor po'ñoñ. ¹⁴ Ñaña puerets ñeñt̃ chapyesets ajmo'mar, ñeñtpa' añ netma'ntatena po'potantañ acheñenesha' ñeñt̃ e'mñotenayeñ Yompor po'ñoñ. Ama'tcha' chapanetañ mame' pueyoçhreto, tarraña ñetpa' allo'nach senet aña atarr cotape'chenet ñeñt̃ lleca'yenet arr patsro ñeñt̃ e'ñe ñocueta. Añach muenenet o'ch esocmañen es echyenet attoch allo e'ñe cosha'yenet. Attoña ñetpa' amach errotent̃ orrtatoñeto ñeñt̃ atarr sherbets Yomporecop. Ñetpa' e'ñe atteta ñerra'm narmets ñeñt̃ cha ca'matuerr ajma' amach errotent̃ ellonre'tyeseto. ¹⁵ Ñaña añ puerets ñeñt̃ chapyesets e'ñe cohuen patso ñeñt̃ e'ñe cohuen cheparsatspa' ñeñt̃ña toma'ntenaya po'potantañ acheñenesha' ñeñt̃ e'mñotene' Yompor po'ñoñ. Ñetñapa' atto ame'ñeññañet Yompor po'ñoñ amach puesereto choch eñochet pueyoçhreto attoch e'ñe cohuen ma'yoçhroñet Yompor po'ñoñ. Chocmach orrtatyenet ñeñt̃ atarr sherbets Yomporecop amachña cha cáchpueñeto. Attoña ñetpa' e'ñe atet penet ñerra'm narmets ñeñt̃

atarr aton ellom̄re'tyets.

*Arrpa' all toma'ntatanet lampareñ atto
čoyo'tampeney
(Mr. 4.21-25)*

¹⁶ Jesús pa' alla toma'ntaterraneterr po'poñoneť; ñeñťpa' atet otanet:

—Ñerra'm esempo ya'llchaten lampareñ ñeñťpa' ama añecpaye' ya'huortateñe o'ch alla ye'rraman̄per coym̄o. Ñaña ama añecpayaye o'ch alla yener o'ponot yemayep̄načo. Añecopña ya'huortatenña lampareñ o'ch yene' enonet attoch čoyo'tam̄pesuan allohuen acheñ ñeñť be'ťosčets o'pono pocollo. ¹⁷ Tarro'mar allohuen ñeñť ama eñotpahuoyaye ama't ahuaťoteñ, te'ñapa' o'ch e'ñe orrtataretterra attoch e'ñech eñotataretetuerret e'ñe poctacma.

¹⁸ Ñeñťo'marña sapa' señotenaťe' e'ñeťe' po'ñočh cohuen se'm̄ñoteññañ Yompor po'ñoñ ñato'pa' amate'. Esesha'te' čhena pueyočhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama čhenaneto pueyočhro tarro'mar ñetpa' ama po'ñočhaye' aguěññañeto Yompor po'ñoñ ama't allpon eñotenetañ pueyočhro ñeñťñapa' čhach puerratañperranet Yompor.

*Allempo huapoña Jesús pachor ñaña
pa'mo'nasheñnesha'
(Mt. 12.46-50; Mr. 3.31-35)*

¹⁹ Allempoñapa' huapa Jesús pachor epuet ñaña pa'mo'nasheñnesha'. Chapuet allpa'

shonte' acheñenesha' ñeñt̃ emchorrenaya Jesús. Ñeñto'marña ñetpa' ama eshcaye' entosetoña Jesús allame'tets. ²⁰ Allempoña acheñenesha' ochet Jesús:

—O'ca'ye huapaña p̃achor ñaña pemo'nasheñnesha'. Ñetpa' a'yote'tsa'yenet, mueneñet o'ch entenpeta'.

²¹ Ñaña'pa' atet otanet:

—Allohuen ñeñt̃ e'mñotene' Nomp̃or po'ñoñ ñetña ñerra'm atet p̃ohuenet ñeñt̃ atet otene'y, ñeñt̃ña e'ñe po'ño'ch nachor nepen ñaña ñeñt̃ña e'ñe nemo'nasheñ nepen.

Allempo a'mchecherran Jesús huomenquēsha' ñaña sa'p ñeñt̃ emo'yarertetsa (Mt. 8.23-27; Mr. 4.35-41)

²² Allempo cherrerr pamtarr Jesúsña'pa' a'tapos noñto epuet ñaña pueyochresha'. Ñaña'pa' atet otanet:

—Te'pa' o'ch ahuañp̃sey yom̃ta'n.

Allempoña'pa' ahuañp̃set noñto. ²³ Allempo ahuañp̃set Jesúsña'pa' alla ma' noñto. All muenpa' machayo'ta huomenquēshatañpesnomuet. Emo'yare'ñapa' cha esha'tena noñto, atteña'pa' chorrachoch oñ noñto cha muene' esha'tatan noñt̃. ²⁴ Atteña pueyochresha'ñapa' ponerñyet Jesús all muenpa' opueret, atet ochet:

—Maestro, po'ño'chuachca'ye yoclla'huerrate'.

Jesúsña tanterrapa' e'ñe po'ñoñoña a'mtsoññetueran huomenquēsha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen muechettam̃perret. ²⁵ Allempoña Jesús'pa' otanet:

—Eso'mare'tña sapa' ama e'ñeye' seyemtenno.

Ñetñapa' čha atarr nanac yorenet. Atta cohuanrrorteñet ñetñapa' atet otanna'tyeset:

—Ta'mca'ye añ acheñerpa' esona'tarte'ca'ye. Atarropa't es a'mchechaten, ama't po'ñoñoťapa' a'mchechaterran huomenquēsha' ama't ñaña emo'yare' oñ.

Atto gadaro'marnesha' ñeñť chorrena oneñetpa' huapa Jesúsesho

(Mt. 8.28-34; Mr. 5.1-20)

²⁶ Allempoñapa' o' etsotoset yomťa'n all senet. Allpa' añ pa'ney pene' gadaro'marnesha' alla yot Galileot. ²⁷⁻²⁹ Allña sohuosa Jesús noñťotpa' allñapa' huapoña puesheñarr yacma ñeñť allo'marnesha', tarraña ñapa' añ chorrenaya oneñet patoner. Ñeñťñapa' ahuatoteñ atta chopeñe'chyen muelle'mcot, ama shetamteno. Ñapa' alla yečhena all pampueñet arromñatečhno ama pocolloye' yečheno. Ñehua, oneñetpa' allempo rromuenan yacmapa' epaye' ottatse'tacheť allempoteñ. Pamo'tsesha'ñapa' ahuo'ch rromuetpa' o'ch huanquētañ attoch cohuanñepeñet. Ñañaapa' čhach tsepe'tuanman allo huanquēññañet pot ñaña pa'tac oneñetñapa' ahuo'chcho' matach a'yo amayo. Allempoña entapan Jesúsapa' rrana'nma huomenc, mata Jesúsesho, rromosñaña allame'tets. Allempoña Jesúsapa' otosan oneñet ñeñť chorrenaya yacma:

—Te'pa' o'ch pecačpa'ner añ acheñer.

Ñeñťña chorrena oneñetpa' ñañaapa' atet otapan Jesús:

—Eso'maruachca'ye Jesús o p̄a'tsrr'e'moçhtana'tosen, p̄apa' ñeñtep̄ Ñeññ Nanac Parets Puechemerep̄. Te'pa' notapaṛcha' amach pecoñchatatstosno.

³⁰ Jesúsñapa' alla oterranerr ñeññ chorrena oneñeñ:

—Papa' ¿eso'tña pesoचना?

Ñañapa' atet oterranerr Jesús:

—Napa' añ neso'cheñ Legión.

Ñehua, añ so'chñets ñeññ otenet shonte' nanac, tarro'mar ñeññ nanac patoner oneñeñ ñeññ chorrenaya. ³¹ Ñehua, oneñeñechnoñapa' atet otare'tapet Jesús:

—Amach arra pemñatstosye o'pono coñcha'puetso.

³² Ñehua, allpa' a'yente'tsa'yen shonte' chañchochno ñeññ rratse'tyets aspentonet. Ñeñño'marña oneñeñechnopa' atet otare'tapet Jesús:

—Ñerra'm çhoch muene' erroten peṛoseypa' arrña pemñaye'chosey chañchesho allochñapa' o'ch yechorra'yerrerr ñañña chañchochno.

Jesúsñapa' allenta otanet:

—Ama'tca'ye orrasca'ye.

³³ Allempoña oneñeñechnopa' caçhpa'huaneret yacmapa', alla chorrereterr ñañña chañchochno. Chañchoñapa' allempo chorrosya oneñeñechnopa' çhepa'tcha' matrra'tua allohuen ñegoneñ shorçha'tuos allotpa' e'ñe ño'shrra'tuosa oño.

³⁴ Acheñenesha'ña ñeññ cohuanpene' chañcho allempo eñchet atet p̄a' chañcho o' shorçha'tua oño, ñetñapa' allenta matrra'tet ñamet pueyorñoñ ahuanmuet anetso.

Allña'pa' serrpare'tyesoset ñaña ora allohuen allampaño'mar. ³⁵ Acheñenesha'ñapa' allenta ahuanmuet ahuo'ch enteñeta'. O' čača'tet Jesúseshopa' allña'pa' entoset yacma ñeñt chorre't oneñeť. Alla anen allame'tets Jesús pa'tcoť ashtamať. O' eñoterra o' cohuenterra. Ñetña'pa' čha atarr mecha'na'toset. ³⁶ Añña ñeñt entene' Jesús atto cačhpatatenan oneñeť acheñ, ñetña'pa' allenta serrpare'tatapet ñeñt huača'ttsa anetsoť. ³⁷ Allempoña allohuen acheñenesha' ñeñt yeča'yetsa all ñeñt gadaro'marnesha' ñetña'pa' pueyorñoťet atet otoset Jesús:

—Te'pa' o'ch ahuerreř arroť.

Allempoña Jesús'pa' a'terr noñto o'ch ahuer.

³⁸ Yacmaña ñeñt chorre't oneñeť ñaña'pa' allenta otan Jesús:

—Napa' nemneñca'ye te'pa' o'ch nocterreř.

Tarraña Jesús'ñapa' ama muenache, atet och:

³⁹ —Allařach, te'pa' o'ch ahuerreř pepaclo řamo'tsesho'mar o'ch peserrpare'tatuerranet ora allohuen atto Yompor atarr yenposeř.

Ñaña'pa' atet otue Jesús'pa' atetčo' řa. Allenta ahuer serrpare'tyesnerrets ora anetso'mar atto Jesús'pa' atarr nanac yenpos.

Atto Jesús'pa' tantaterran Jairo po'señ ñaña all a'crratnoman puesheñarr coyanesha' ñeñt a'řlla'nmue'pa'shtam

(Mt. 9.18-26; Mr. 5.21-43)

⁴⁰ Allempoña alla čherr Jesús añeñta'n allot ta ahuaña. Acheñenesha'ña allpa' e'ñe pocsheñesha' agapapueñet řarro'mar o' atarr cohueret o'ch huerra. ⁴¹ Allempoña allpa' huapoña puesheñarr

am̄cha'tareṭ añ pa'so'cheñ Jairo. Ñapa' ñeñṭ
puesheñarr ñeñṭ am̄cha'tareṭtetsa judionesha'
po'prahuo. Ñaña'apa' alla rromosa Jesús pa'tcoṭpa'
ateṭ otosan Jesús:

—Napa' nemneñ o'ch ꝑocṭerren nepacillo,
42 ṭarro'mar neseñ ñeñṭ nepaṭrrorpa' ḥa
atsna'ten o' a'po'ntsa'mocha.

Ñehua, ñeñṭ po'señpa' allponte' echenan
po'charña ḥarra' puechena epa char.

43 Allempo cota'ner Jesús cota'huaner ñaña
shonte' acheñenesha' ḥa emchorratse'tnomet,
ḥa to'mama'tneñet. Allña'apa' cota'nmanet ñaña
puesheñarr coyanesha' ñeñṭ atsna'tets. Charra'
puechena epa char ñeñṭ atto ḥocma yella'yena.
Ama't epaye' partata o' a'gasta'huahuan
po'ḥllayor atto parteñet amaña eseshaye'
a'crraterraye. 44 Ñaña'apa' all cota'nenan Jesús
pa'che'ñoṭ, allña'apa' a'ṗllerrñaña' pa'shtam
pa'rrpe'moṭ. E'ñe a'ṗlla'hue' pa'shtampa'
allorocma maserrña po'rras, o' metuer ñeñṭ atto
mueroḥttena.

45 Jesúsña'apa' ateṭ otanet:

—¿Esesha'tña o' a'ṗlla'nmuennña neshtamoṭ?

Ama eseshaye' eñoratso. Pedroña ñaña ñeñṭ
epuet yemtena, ñetña'apa' ateṭ ochet Jesús:

—Maestrocha' ꝑapa' penteñe' shonte'
acheñenesha' ñeñṭ allotemeña peto'mama'tnene'.
¿Eso'mare'tña ꝑotenña esesha'te' ꝑa'ṗllene'
peshtamoṭ?

46 Tarraña Jesús'apa' ateṭ otarraneterr:

—Napa' neñoteñ po'ñoḥ puesheñarr acheñ
e'ñe puemnenñoṭ a'ṗllenen neshtamoṭ ṭarro'mar

napa' neñotena napa' o' na'crrach e'ñe na nehوامencoť atto a'p̄llenen.

47 Coyanesha'ña allempo ñapa' eñotena amach errotenoť a'nasoto. Ñapa' čha pa'shmuena pueyorñoť concorposa Jesús pa'rrp̄oť. Allñapa' e'ñe a'meta'huosan ñapa' añecopña a'p̄llenan Jesús pa'shtam attoch correrra e'ñe cohuen. Allñapa' atet otan allohuen acheñenesha':

—Na allempo na'p̄lloñ Ayochreshat pa'shtampa' ñeñtña na'crraterre' allorocma.

48 Jesúsñapa' atet otan coyanesha':

—Papa' nesñeshacha' atto atarr peyemtena na attoña te'pa' o' e'ñe na'crratnomuep̄. Te'ñapa' o'ch ahuerreḡ e'ñe peñmañesha'.

49 Allempo eñorena atetpa' allñapa' huačha'ta ñeñt huetsa añcha'taret Jairo pa'pacloť. Ñetña huapuetpa' atet otoset Jairo:

—Peseña' o'ca'ye rroma. Te'ñapa' amach allo'na pa'tsrre'močhtana'tatsche Maestro o'ch coterreḡ pepaclo.

50 Jesúsña ama't e'man atet otoset Jairopa' ñaña'apa' atet otan Jairo:

—Papa' amach čha pe'charrtatatsto peyočher, nachña e'ñe peyemta attoch correrraña peseñ.

51-53 Allempoñapa' ahuanmuet Jairopahuo. Chapuet pocollo allñapa' allo'tsa'yen shonte' acheñenesha' all yahuanrrortenet, ya'na'teñet arromñať. Jesúsñapa' otosanet:

—Amach atarr seyahuatsto. Añ shopshesha'pa' amaca'ye čhoye' rromueno čhaca'ye muen.

Ñetña pachm̄are'teñoťetpa' atta che'tatsetyesapet tarro'mar ñetpa' e'ñeca'ye

eñoteñet čhoca'ye rromuen. Allempoña Jesúsñapa' ama muenatano allohuen acheñenesha' o'ch be'toset allo'tsen arromñať. Ñapa' aña muenat Pedro ñaña Juan, ñaña Jacobo ñaña arromñať puepapar ñaña pachor ñeñña epuet be'tosča'toset allo'tsen arromñať. ⁵⁴ Allempoña Jesúsapa' rremota'tosan shopsheshañ pototpa' po'huamencocma otos:

—O'ch nesñe notosep, te'pa' čhořa tanterrtsa.

⁵⁵ E'ñe otue' atetpa' allente'pa'tcha' o'rerrererra čha tanterrtsa. Jesúsñapa' otanet:

—Te'pa' o'ch serratallme'cher.

⁵⁶ Puepaparña ñaña pachorpa' ñetñapa' atta co-huanrrorteñet. Jesúsñapa' atet otanet:

—Amach esesha' sotařsa'tatsto ama't puesheñarra ñeñť atet o' norrtatennasa' sepacillo.

9

Allempo Jesúsapa' llesensan pueyochresha' čharrasheña ñeñť puechetsa epsheña

(Mt. 10.5-15; Mr. 6.7-13)

¹ Allempo čhapa'muen allempo Jesús agota'muenan pueyochresha' čharrasheña ñeñť puechetsa epsheña. E'ñe apčha'huet ñeshopa' ñañaapa' atarr ahuamencat řa'yesanet, attoña apanet ñaña llesens attoch cačhpatatyeret oneñeť acheñenesha' ama't erra'tsena ñeñť atarr mueročhtatyenahuet. Ñaña ahuamencat řanet attoch a'crratyeset acheñenesha' ama't erra'tsena ñeñť osyenahuet. ² Attoña llesensanet attoch ahuanemyeset pa'namen anetso'mar serrpare'tyesnomuet Yompor po'cohuenña atto

atarr ayochreshattena ña. Ñaña añecpa'ñaña llesensenanet attoch a'crratyesoset acheñenesha'.

³Ñaña atet otapanet:

—Amach es sanmatsto ama't coñe'ta allcha' sechopeñe'chyes—ama't secarra, ama't sebolsa, ama't ñeñtcha' serra'yesnom ama't seçllayora ama't e'ñe epma seshtampa' amach sanmatsche sechope'chpayo. ⁴Alla oterraneterr:

—Ama't errach pocollro seçhap allach sommosa allponmat esempohuach ahuerrerr po'poñ anetso. ⁵Ñerra'm erra anetsro ñeñt allo'marnesha'ña ama cohuenaye' agapasetopa' o'ch señterrrer ñaña allot. Ñerra'm allempo señterrrerña ñaña allot ñeñtña setco'tsa'yen pañe'te' patspa' çhoch sepa'shetca'tyesnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenanetoña Yompor.

⁶E'ñe ñeñtña otaretetuetpa' ñetña'pa' allenta ahuanmuet o'ch chopeñe'chyeset erracmañen anetso'mar. Allña'pa' añ serrpare'tyesnomuet cohuen ñoñets alloch yequeshperra. Ñaña all chopeñe'chyeset erracmañenpa' allña a'crratyesnomet ñeñt atsna'tyets.

Allempo e'ñe cohuen es orrtatyes Jesús, Herodesña'pa' çha otapañ Juanañte' o' tanterra ñeñt apataye't acheñ Yomporecop

(Mt. 14.1-12; Mr. 6.14-29)

⁷Añcha'tareña Herodespa' ñaña'pa' atet e'mare'tenan Jesús ora ñeñt allpon atet pa'yena. Ñaña'pa' çha atarr llequëna tarro'mar patanta'tets acheñenesha'pa' atet otyenet te'pa' o' orrterra

Juanañ, o' tanterra rromot. (Herodespa' añña atarr llecatene' tarro'mar ñapa' ña pechate' Juan ahuaña.) Ñeñto'marña ñapa' ñeñta nen pueyoçhro atto acheñenesha' otenet ahuo' tanterra Juan rromot. ⁸ Po'potantañña' atet otyenet:

—Elíasoñca'ye o' orrterra.

Po'potantañña' ñetpa'cho'ña atet otyenet:

—Añpa' ñeñtca'ye a'mtaye't Yompor po'ñoñ ahuañ, te'ñapa' o' tanterra rromot.

⁹ Amicha'taretña Herodespa' atet ot:

—Napa' neñotena naca'ye pechate'ña Juan ahuaña. Esesha'huañaca'yeña ñeñt orrtatene' ñeñt ama't ahuañapa' ama yentare ñeñt atet atarr ne'mare'ten.

Ñeñto'marña ñapa' atarr mueneñ o'ch entan ñeñt Jesúsotets ñeñt orrtatyene' ñeñt ama puentare acheñenesha'.

Allempo Jesúsapa' rratenan shonte' acheñenesha'; ñeñtña acheñenesha'pa' allo'tsen amnaroch mil

(Mt. 14.13-21; Mr. 6.30-44; Jn. 6.1-14)

¹⁰ Allempo huaçherra Jesús pueyochresha' ñeñt llesensa'yes ahuaña. Ñetña'pa' o' çhaçherret Jesúsesho, serrpare'tatyesueret Jesús allohuen allpon atet pa'yeset allemeñ anetso'mar. Allempoña Jesúsapa' ahuanman pueyochresha' e'ne ñaptoçhayet, çhapuet all ama acheñempañooyaye all allame'tets anetso, ñeñt anetspa' añ pa'so'cheñ Betsaida. ¹¹ Tarraña acheñenesha'ñapa' allempo e'mare'chet o' ahuanmuet all, ñetpa'cho'ña allenta ahuanmuet ñamet. Chaçha'tet Jesúsesho ñaña'pa' e'ne cohuen agapanet. Allña'pa' serrpare'tatyesapuerraneterr

atet penaña Yompor po'cohuenña atto atarr ayochreshattena ña. Ñaña allpa' a'crratyesa puerranerr ñeñt atsna'tyets.

¹² Atteñapa' o' ellerren. Añña pueyochresha' çharrasheña ñeñt puechetsa epsheña ñetñapa' oteñeta' Jesús:

—Te'pa' o'ch pemueñhuer acheñenesha' ahuanemyerretapa' anetso'mar allampaño allcha' mayesuerret allcha' entyesuerret puerrar ñeñtcha' rra'yesuerret. Tarro'mar te'pa' arro'tseney all ama acheñempaño yaye.

¹³ Tarraña Jesúsñapa' otan pueyochresha':

—Sachca'ye apa'yesahuet ñeñtcha' rret.

Ñetñapa' atet ochet:

—Ya arrpa' amaca'ye es yecheno ama't coñe'ta. Yapa' e'ñe amnara pan yechen ñaña epatoll cac. Ñato' yapa' o'ch ahuey anetso allcha' yerañfena' rreñets ñeñtcha' yerrach allohuen shonte' acheñenesha'.

¹⁴ Ñehua, allo'tsen shonte' acheñenesha' amnaroche' mil yacmanesha'. Allempoña Jesúsapa' atet otan pueyochresha':

—Te'pa' o'ch soch acheñenesha' anorrcha'tyesetepa' e'ñe ñopa'ttsocmuet, e'ñech amnaroche'ttsocma çharrapa'tets anorrcha'tyeset.

¹⁵ Pueyochresha'ñapa' atetcho' pet, anorrcha'tatieset acheñenesha' allohuenet.

¹⁶ Allempoña Jesúsapa' agapan ñeñt amnar pan ñaña epatoll cac, cohua' enone't parasyoso'tañpsan pan. Allempoñapa' shota'tan pan, shetse'tan ñaña cac. Apanatyesan

pueyochresha', ñetñapa' epatyaset allohuen
acheñenesha' ñeññ anorrcha'tyets all. ¹⁷ O'ña
epa'huet allempoña o' rrallme'chet allohuenet,
e'ñe yetrra'tuahuet. O'ña yetuahuetpa' cha
a'pchatyaset ñeññapa' a'yapaçheret. Ñeñña
a'yapaçherretpa' çhepa'tcha' chorrats çharra'
puechena epa cañter e'ñe tamo'yare'.

*Atto Pedropa' otan Jesús p̄apa' p̄aña Yompor
Puechemerep̄ ñeñtep̄ Cristotosets*

(Mt. 16.13-19; Mr. 8.27-29)

¹⁸ Allempoña pamtarrpa' allo'tsen Jesús all
ma'yochena e'ñe ñaptochayet pueyochresha'
epuet allo'tsen. Allñapa' atet otan pueyochresha':

—¿Errofena't otyenenña allohuen acheñenesha'
napa' eseshante'?

¹⁹ Ñetñapa' atet otyeset:

—Patantarr acheñenesha'pa' atetca'ye otyenpet
p̄apa' Juanañpo'te' ñeñtepo' apatañtase't
Yomporecop. Po'potantaññapa' atet otyenpet,
p̄apa' Elíasopo'te'. Po'potantaññapa' atet otyenpet
p̄apa' ñeñtepo' ñeññ a'mtaye't Yompor po'ñoñ
ahuañ. Te'ñapa' ahua' alla petanterra perromñoñ.

²⁰ Allempoñapa' alla a'p̄to'terraneterr:

—Sañapa' ¿errofena't sotenennña sa?

Pedroñapa' eñoratsapa' atet och:

—Papa' ñeñtep̄ca'ye Parets Puechemerep̄
ñeñtep̄ Cristotosets.

*Atto Jesúsapa' eñotatan pueyochresha' ñapa' amt-
saretterrach*

(Mt. 16.20-28; Mr. 8.30-9.1)

²¹ Jesúsñapa' alla oterraneterr:

—Ama't puesheñarroña amach esesha' sotaḡsa'tatsto napa' ñeññen Yompor Puechemeren ñeññen Cristotets. E'ñe po'ñoçh notenes amach esesha' sotaḡsa'tatsto.

²² Elloñapa' alla oterraneterr:

—Napa' Ñeññen Acheñetosets, atet anaret nocop, nanaccha' na'mueroçhtataretterra. Amach esesha' pocteye' nenterraye —ama't ñeññ pompornesha' pen allohuen judionesha', ama't ñeññ pa'mcha'tareternesha' pen allohuen judionesha' po'cornaneshar, ama't ñaña ñeññ etsotayenayeñ ñoñets ñeññ atet anaret judioneshacop. Ama't ñetpa' amach eseshaye' neyemterraye. Attachña napa' muetsataterretcha'. Tarraña poma'pamtañopa' o'ch alla tantaterren Nompor.

²³ Elloñapa' alla oterraneterr allohuenet:

—Ñerra'm esesha' muenene' o'ch coferret na e'ñe po'ñoçh attoch neyochresha' neperranet, añ poctetsa sehuanmuetepañña ñeññ atet muenenet e'ñe ñocueta. Attochña ñetpa' o'ch e'ñe toma'nteret ñeññ chechnene' po'corsoch ama't pate'tets yet allcha' mueroçhtet ñamet. Attochña coferret e'ñe poctacma. ²⁴ Tarro'mar ñerra'm esesha' e'ñe añña muenenet o'ch correna atomat attoch e'ñe coshenet arr patsro, ñetñapa' çhach a'chencatet ñañeñeta. Tarraña ñerra'm esesha' e'ñe pocte' entene' o'ch sohuanmuet ñeññ atet muenenet ñeññ e'ñe ñocueta arr patsro attochña ñetpa' añach ma'yoçhret ñeññ cohuentetsa nocop, ñeññña acheñerpa' corretsach pocsheñeshocmañen tayoteñ e'ñe errponañohuen.

25 Ama't errponenañaren esocmañen es yeyoratsetyes ora allpon ñeñ yentyen añe patsro, tarraña ñerra'm ñeñtach e'ñe ya'chencaterre' yecamquëño huen ñeññapa' ama't coñe'tapa' amach es sherberrye. 26 Tarraña ñerra'm erra'tsencha' nepenquënaya na te' neñoñpa'cho'ña cha apencochen entennanet, napa'cho'ña nepenca'huerranetcha' esempoch nohuerra. Po'ño ch napa' Ñeñten Acheñetosets nohuerrach e'ñe na necohuenño, ñeñtara Nompore po'cohuenña epan ñaña po'mllaño teññaneshar ñeñ e'ñe torra'yetsa Partsocop. 27 Po'ño chca' te'pa' o'ch notas: Patanta'ttsos ñeñtes arro'tsa'yenes te'ña ama't ama serromhuena'pa' o'ch senterrñañ Yompor po'cohuenña atto atarr ayochreshatterra ña.

Allempo Jesús pa' po'poñetañpana pueyochresha' (Mt. 17.1-8; Mr. 9.2-8)

28 Allempo met allponmat ñato' po'psocmatño Jesús pa' ahuanman pueyochresha'; añ anem Pedro ñaña Juan ñaña Jacobo. Arr anmanet aspen to allcha' ma'yochena' Jesús. 29 Allña ma'yochosapa' machayotepa'tcha' po'poñetañpsosanet. Pa'clloyotpa' cha po'poñ orrtosanet. Pa'shtamohuen atarr huallama'to popotosa. 30-31 Allña pa' machayotepa'tcha' orrtanet Moisés ñaña Elías. Ñetpa'cho'ña atarr cohuen orreyenet. Allña pa' serrpare'toset epuet Jesús. Ñetpa' añ serrpare'tenet atto o' chapmoch attoch rroma Jesús o'ch ahuer pue'ntaño. Ñetpa' atet otyenet, arrcha' atet peret Jerusaléño. 32 Ñehua, Pedro ñaña ñeñ epuet allo'tsen, ñetña pa' ama't

atarr moñe'tenetañpa' alla e'ñe achñesuerret, attoña entoñet Jesús po'cohuenña ama't ñeñt' parro tom'chen. ³³ O' ma'naterrmocha Moisés ñaña Elías attoch sa'neret Jesús. Pedroñapa' allenta eñora, atet otan Jesús:

—¡Atarruaca'ye Maestrocha' cohueno'tseneyte' arr! Ama't pocte' penteñe o'ch yatomatonas ma'ppahua quèrpachet, puepahuarrpa' p'copcha', po'ppahueñpa' Moisésocopcha', po'ppahueñpa' Elíasocopcha'.

Pedropa' pueyorñoñ atta muene' otatset, ama eñoche errotench'a' ot. ³⁴ Allempo eñorena Pedropa' cha orrtosahuet os chepa'tcha' a'pomam'psosanet. Atto a'pomam'psosanet ospa' ñetñapa' atarr nanac yorenet. ³⁵ Cha e'morrtostsa ñoñets osot; ñeñtña ñoñetspa' Yompor otosahuet; ñeñt'pa' atet ot:

—Añmapa' ñeñt' no Nechemer ñeñt' atarr nemuerena ñeñt'cha' e'ñe cohuen se'mñoterr.

³⁶ Allempo o'huañ e'morrrta ñoñetspa' o' e'ñe ñap'amerra Jesús. Pueyochresha'ña allempopa' atta a'nasoteñet. Ama't puesheñarrofetapa' ama otuerreto ñeñt' atet o' entuahuet.

Atto Jesús'pa' a'crraterran cheshachor ñeñt' otaten oneñt'

(Mt. 17.14-21; Mr. 9.14-29)

³⁷ Tsapa'tña allempo hua'chenet aspentotpa' allñapa' shonte' acheñenesha' ñeñt' hua'cha'ttsa ñeñt' pocterrahuet. ³⁸ Allo'tsen puesheñarr yacma ñaña'pa' atet otosan Jesús:

—Maestro, napa' atarr nemneñ o'ch pentennana' nacñe'ter. Napa' e'ñe ñeñtetollapa

nepatrrior. ³⁹ Ñapa' ñerra'm esempo rromueñ oneñeñpa' çhach rranare'ta o'ch otachpa' o'ch ata'tach patso çhach amtan pa'po'. Attoña atarr atserrpãtse'tateñ. Ama mueno o'ch a'rroyer. ⁴⁰ Napa' o' notuosnañña peyochresha' o'ch caçhpatateret oneñeñ ñarraña ñetñapa' ama erroť peto attoch caçhpatateret oneñeñ ñeññ atarr mueroçhtatene'.

⁴¹ Jesúsñapa' atet ot:

—Sapa' ñeññes acheñres ama't mameshapa' ama ayemtenaye' sentpenno, çhach po'poñ sentuena seyoçhro nocop. O' allponmatuanen allo'tsenen arr patsro napa' atta atarr na'huantennas, atta necuenes ñato' attotpa' o'ch same'ñerrna.

Allempoñapa' atet otan yacma ñeññ otene' o'ch a'crratoñ puechemer:

—Te'pa' o'ch ñanmon pechemer arr.

⁴² Allempo anemñ Jesúseshopa' oneñeñña' alla rromuerranerr cheshachor o' alla otatererr alla ata'tatererr patso. Jesúsñapa' atet otapan oneñeñ:

—Te'pa' po'ñoçh o'ch notañ, pecaçhpa'nerñaca'yeña añ cheshachor.

Allempo a'crrater Jesús o' alla apuerrñañ pompor. ⁴³ Allohuen acheñenesha'pa' atta cohuanrrorteñet. Ñetpa' e'ñe eñoteñet Yompor po'partsoña orrtetsa.

Arrpa' atto Jesúsapa' eñotaterraneterr puepocheño ñapa' çhocmach muetseret

(Mt. 17.22-23; Mr. 9.30-32)

Atta epaye' cohuanrrorteñet atarr cohuen enteññañet po'partsoña, ñarraña Jesúsñapa' alla yerpaterranerr pueyochresha', ñeññpa' atet otanet:

44 —Te'pa' se'mñnoten e'ñe cohuen, amach sepsatsterrnano neñoñ ñeññ atet notenes te'. Na Ñeñten Acheñetosetspa' pomataterrnetcha' attochña erroṭuanencha' perrnet.

45 Ñeñña ñoñetspa' ñetñapa' ama't puesheñarroṭetapa' ama eshcaye' eñotenaye' enteñeto tarro'mar ama čhena' allempoch čhapanet pueyočhreto. Ñetña pueyorñotetpa' ama eseshaye' a'ṗto'tenaye este' otenanetña atto eñorana'tenanet.

All eñotateney ñeññ acheñer e'ñe po'ñoch atarr asherben enten Yompor

(Mt. 18.1-5; Mr. 9.33-37)

46 Po'pocheñoña pueyočhresha'pa' e'ñe ñagattseta otanna'tyeset:

—Ta'mca'ye erra'tsenoṭeyte'ñaca'ye ñeññey atarr sherbets ñeññey atarr añcha'tareṭoyen enteney acheñenesha'.

47 Jesúsñapa' e'ñe eñotenanet ñeññ atet cotape'chatse'tyenet ñet pueyočhreto atto e'ñe cohuen entyenet e'ñe ñañeñeta. Ñañapa' cheshaṭolla chore'tpa' tomach e'ñe ñesho,

48 allempoñapa' atet otanet:

—Erra'tsenoṭes sa ñerra'm e'ñe cohuen saguëñ ama't ñeññ ama asherbenaye' enteneto atet ñerra'm añ cheshaṭoll tarro'mar sapa' na same'ñena, na'naña e'ñe cohuen saguën. Elloña ñañña erra'tsenoṭes sa ñeññes naguëne' na, ama e'ñe naptocheye' saguëno, añe'naña saguënnan Nompör ñeññ nellsensene'. Tarro'mar ñerra'm erra'tsencha' pocte' entene' o'ch yenpuenan

ama't ñeñt ama esoye' enteneto, ñetña' atarrcha' po'ñoçh asherben entenanet Yompör.

Atto eñotateney ñeñt ama çhoye' yepatare'tenaye ñeñtña po'ñoçhpa' e'ñe parrocmayeyenpanna (Mr. 9.38-40)

⁴⁹ Allempoña pueyochresha' ñeñt Juanpa' atet otan Jesús:

—Maestro, ya ahuañapa' atet yeñch puecheñarr yacma ñeñt caçhpatatene' oneñet acheñ. E'ñe pueçhore'teñoñep ãa peso'chñopa' oneñetpa' caçhpa'nerran acheñ. Yañapa' ama pocteye' yeñche țarro'mar ñapa' ama parroye' yeyemteno. Ñeñto'marña yapa' yoch:

—Amach atet peřatsto.

⁵⁰ Jesúsñapa' atet otanet:

—Amachca'ye sepatare'tatsche țarro'mar ñerra'm ama çho epatare'tenye yaña ñeñtña po'ñoçhpa' e'ñeca'ye parrocmayeyenpanna.

Allempo Jesús'pa' cotape'chaterran cohuen pueyochresha' epsheña, ñeñtña' Jacobo ñaña Juan

⁵¹ Chapmoch allempoch o'ch alla ahuer Jesús pue'ntañopa' ñaña' atarr sechena o'ch ahuer Jerusaléño. Ñeñto'marña mueñan pueyochresha' ñeñtcha' otrra'tatsa ⁵² o'ch ahuet samario'marnesha' pa'netsro o'ch e'noset muets allcha' çhap ñaña Jesús allcha' amesnom epuet pueyochresha'. ⁵³ Tarraña samario'marnesha'ñapa' ama mueneto o'ch agaparettet all pa'netsreto, țarro'mar ñetpa'

eñoteñet arr sechenet o'ch ahuet Jerusaléño.*
 54 Ñeñto'marña Jacobo ñaña Juan ñetñapa' atet ochet Jesús:

—Partseshacha' ¿ama't pocte' penteñe yapa' o'ch yenam huapuepa' tso' entot? allochñapa' ñeñtcha' a'poyatatuerrahuet ñeñtcha' e'ñe a'chencatuerrahuet ñeñt atet pe't Elías ñeñt a'mtaye't Yompor po'ñoñ ahuat.

55 Jesúsñapa' atfa cohuanetpa' atet otanet:

—Ñeñt atet soctape'chatse'tyenpa' ama't mameshapa' ama pocteyaye. Ama't señoteñeña Yomporpa' ama atteye' cotape'chatenyena Puecamquëñoñ. Ñeñt semnen sapa' po'poña cotapñats. 56 Na Ñeñten e'ñe Acheñetosetspa' amaca'yeña añecop nohuapo o'ch na'chencatos acheñenesha'. Napa' añecopca'yeña nohuapa o'ch na'queshpatos allohuen acheñenesha'.

Allempoñapa' o' metaçha'tet allotpa' ahuanmuet po'poñ anetso.

Allempo Jesúsapa' yeçhatan ñeñt muenene' o'ch coter

(Mt. 8.19-22)

57 Po'pocheñoñapa' allempo oñemyenet toño'mar allñapa' poctanet puesheñarr yacmapa' ñañapa' atet otapan Jesús:

—Na te'pa' nemneñ o'ch noctare'tyeseþ ama't errohuanencha' pechopeñe'chyes.

58 Jesúsñapa' atet och:

—Te'pa' napa' peñotench'a' ama't nepacllapa' ama necheñe all neyçhenañ. Ro'quëþpa' çhocma

* **9:53** Ñehua, yapa' yeñoteñ samario'marnesha'pa' ama mueno o'ch amo'tstana jerusaléño'marnesha' ñeñtara judionesha'.

eñall pa'pon allecma yečhena.† Otečhnopa'cho'ña
 chocma eñall pa'ma' allecma yeča'yenet.
 Tarraña naña Ñeñten Acheñetosetspa' ama eñalle
 ñeñt e'ñe nepaquëll nepen allcha' neñanena.

⁵⁹ Po'pocheñoña Jesús pa' atet oterranerr
 po'psheñeñ acheñ:

—Te'pa' o'ch pōcta'n attoch po'ñočh neyochre-
 sha' neperreř.

Tarraña ñeñtña acheñerpa' atet otan Jesús:

—Te'pa' arrcha'ña ñanom pemnaterren o'ch
 ahuerren apuesho, o'chña nepampa'huera'
 apañpa' allempochña nohuerrapa' o'ch noctař.

⁶⁰ Tarraña Jesús pa' atet och:

—Acheñenasha' ñeñt ama yerpa'penaye
 Yompor, ñetñapa' pampanna'tetepa' parro
 arromñaecmuet. Tarraña pōcoppa' ñeñteř o'
 peyerpuera Yompor añ pōctetsa o'ch auyeseř
 serrpare'tyese' Yompor po'cohuenña ñeñt atto
 atarr ayochreshattena ña.

⁶¹ Po'pocheño allempo serrpare'ten Jesús epuet
 ñeñt ame'ñenaya, ñeñtña acheñerpa' atet otan Jesús:

—Napa' Ayochreshate po'ñočhcha'ca'ye noctař.
 Te'pa' ato't nasuerra' nepacillo attoch neso'tera'
 namo'tsesha'; allempochña alla nohuerrerrpa'
 o'ch noctař.

⁶² Jesúsñapa' atet och:

—Ñeñt ama e'ñeye' ma'yočhrenaye attoch
 torrenet e'ñe cohuen Yomporecop, ñeñtña
 acheñerpa' amach e'ñe cohuenaye' sherbeno
 attoch e'ñe epatuan Yompor po'cohuenña

† **9:58** Ñehua, Jesús añ toma'ntacha zorra ñeñt berrotets all pa'nyo.

ñeñt̃ atto atarr ayochreshattena ña. Ñeñt̃
acheñerpa' atetcha' netma'ntacha: Ñerra'm esesha'
orrene' etamapets attoch etaman pats e'ñe
cohuen pačharr pa'mro, ñerra'm pa'che'ñonña
cohua'nom ama't mameshapa' amach etsotanoña
etamapets attoch e'ñe pačharr etaman pats allcha'
nare'tatse't pa'mro.

10

*Atto Jesúsapa' mueñan pueyochresha' ñeñt̃
cančhroch čharrasheña ñeñt̃cha' otatsa*

¹ Allempoña Partsesha'pa' alla llesenserranerr
po'potantañ pueyochresha' cančhroch
čharrasheña ñeñt̃cha' otrra'tatsa o'ch
serrpare'tyesnomuet. Ñetpa' atetcha' pa'nmuet
e'ñech epsheña'ttsocma tet. Arrcha' ta'yeset ora
allohuen anetso'mar ñaña ama't allampaño'mar;
allochñapa' allcha' oñem ñaña tsapa-tonet̃ Jesús.

² Ama ahuaneneta' Jesúsñapa' atet otanet:

—Shonte' narmets ñeñt̃ nanac ellom̃re'tets
ñeñt̃cha' a'yapačhetañ. Tarraña ataruasañña
ñeñt̃cha' a'yapačhe'pa' ama atarr atonayaye.
Te'pa' añcha'ña sanamoñ pamo'mte'
mueñanepañña ñeñt̃cha' a'yapačherrets pa'mro.
Ñeñt̃pa' atet toma'ntatanet Jesús atto atarr
shonte' acheñenesha' ñeñt̃cha' ame'ñerrtsañ
tarraña ñeñt̃cha' ame'ñaterrahuetpa' ama atarr
atonayaye. Añcha'ña yenam Yompor ñeñt̃
Yamo'mte' yepen mueñanepañña pa'taruasañer
ñeñt̃cha' torra'yerrtsa ñocop allemeñ anetso'mar.

³ Ñaña sapa' ñerra'm o'ch ahues te'pa' señochcha'
po'ñočh čhocmach eñall ñeñt̃cha' se'moñe'te'

ama't sapa' amach čho erroť sepenanetañe ñet. Ñeñto'marña notenes te'pa' o'ch nemñas e'ñech attes ñerra'm carrnero o'ch ahuo' allo'tsen ma'yarročno. ⁴ Ñaña amach sanmatsto quelle, ama't sebolsa, ama't po'ptaña sesapatpa' amach sanmatsche. O'ch ahues sema'yorñecma. Ama't esesha'ch sehuomcha'tyesnom toño'marpa' amach alla so'chtatsto. ⁵ Allempoch sečhap ama't erra'tsena anetsro all sesen, ama't erra'tsena pocoll allcha' sečhappa' ñanomcha' atet seřosa. E'ñe sehuomcha'teñoť ñeñť apaclatesha'pa' o'ch senamatosñañ Yompor pa'nateña. Ñerra'm ñetña po'ñočh e'neññañet Yompor pa'nateña, Yomporñapa' a'natenanetcha'. ⁶ Tarraña ñerra'm ñetña ama e'neññañeto Yompor pa'nateñapa' Yomporñapa' o'ch alla apuerres sa pa'nateña. ⁷ Ñeñte pocollro allcha' e'ñe cohuen agapaset allach sa'posa. Ñeñť rrenet ñet ñeñťcha' rratapaset, ñeñťach serros saña. Tarro'mar ñeñtes torretsa e'ñe pocte' atetcha' tsa'tenset. Amach sommare'tyesatsto allemeñ pocollo'mar, allach e'ñe sommosa puepahuarro. ⁸ Ama't erra'tsena anetsro allcha' sečherrerr allcha' e'ñe cohuen aguërrseterr, ama't errotena rreñets apasetpa' ñeñťach serros. ⁹ Allñapa' sa'crratyesoscha' ñaña ñeñť atsna'tyets. Allcha' seserrpare'tatyesosanet, atetcha' sotos: "Te'pa' o' yečhapatonas Yompor po'cohuenña ñeñť atto ayochreshattena ña. Aña palltetsa o'ch same'ñera attoch e'ñe čhaponasa seyočhro." ¹⁰ Tarraña ñerra'm erra anetsro allcha' sečhap ñeñť allo'marnesha'ña ama cohuenaye' agapaseto,

allña òño allecma chopenne'chyenet ñet o'ch señotatnomanet. Ñeñtpa' atetcha' sotnomanet:
 11 “Ama't pats ñeñt o' cheta yetco arr sa'netsro, te'ñapa' o'ch yepa'shetca'tyesnoma attoch señoch sapa' ama't mameshapa' ama pocteye' entenso Yompor. Tarraña ama't atteñpa' te'pa' o'ch neñotatnomues Yompor po'cohuenña autsa çhaponasañ ñeñt atto ayochreshattena ña.”

12 Allempoña Jesúsapa' alla oterranerr puey-ochresha' allempo ama seneta':

—Po'ñoçh te'pa' o'ch notas, esempohuañen allempoch a'craretetuerra allohuen acheñenesha'pa' añ anetso'marnesha' ñeñt ama cohuenaye' sagapaye te', nanaccha' yoroçheno'tsenterret allempo. Ama't sodomo'marnesha'pa' amach tama yoroçheno'tsenterreto atet ñerra'm ñeñt anetso'marnesha' ñeñt ama cohuenaye' sagapaye te'.

Atto Jesúsapa' eños epo'mar anetsocop all ama ame'ñyeto

(Mt. 11.20-24)

13 Allempoña Jesúsapa' alla oterrerr:

—Nanaccha' llequëntso'tsa'yenes coraziño'marneshacha'; nanaccha' llequëntso'tsa'yenes saña betsaido'marneshacha'. Tarro'mar ama't atarr norrtatyennaseñ nepartsoña sesho, sañapa' amaña soctape'chuerroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuatoteñte' cotape'cherretañ e'ne cohuen

Yomporecop. Ñetpa' attochña e'ñe orrtetañ
 cha llecatenonet po'chñar, cotnashe'mach
 chorra'yesetañ, tsapñach epachshema'tyenetañ
 all anorrcha'tyenet puellquëñotet. ¹⁴Ñeñto'marña
 te'pa' notenes, esempohuañen allempoch
 a'craretetuerra allohuen acheñenesha'pa'
 tiro'marnesha' ñaña sidóno'marnesha'
 ñetñapa' amach tama a'coñchataretterreto
 allempo. Coraziño'marneshacha' ñaña
 betsaido'marneshacha' saña allempopa'
 atarrcha' coñchaterrset. ¹⁵Ñaña sa caper-
 naumo'marneshacha' chate' sotenapañ atto
 e'ñe cohuen sentyena sañeña, Yomporñapa'
 allentach a'tapaterres pue'ntaño. Ñeñtpa'
 amachca'ye atteye' perrsoña Yompor, allachca'ye
 huapore'terres o'pono coñcha'puetso.

¹⁶ Jesúsña allempo ama sena' pueyochresha'
 o'ch serrpare'tyeneta' anetso'mar ñañaapa' alla
 oterraneterr:

—Ñerra'm esesha'ch se'mñnotapue' sa, na'naña
 e'mñnotenet. Tarraña ñerra'm esesha'ch ama saga-
 paye sa, na'naña ama aguëneto. Ñaña ñerra'm ese-
 sha' ama mueno o'ch agapnet na, Nompore'naña
 ama mueneñeto o'ch agapet tarro'mar ñapa' ña
 nellsensene'.

Arrpa' allohua ñeñt atet otan pueyochre-
 sha'chno ñeñt canchroch charrasheña. Allempo-
 ñapa' mueñanet allcha' serrpare'tatiesnomuet.

*Atto huacherra Jesús pueyochresha' ñeñt
 canchroch charrasheña*

¹⁷ E'ñe allponmatatsapa' o' alla huacherra
 pueyochresha' ñeñt canchroch charrasheña.

Ñetñapa' e'ñe pocsheñeshocmañen huächenet Jesúsesho. Atet serrpare'tatueñet:

—Partseshacha' ama't oneñeñechnopa' e'ñe yecha'nmacha'tatue e'ñe yeçhore'teñoñ pa peso'chño.

¹⁸ Ñañapa' otapuenanet:

—Napa' neñchca'ye oneñeñ allempo aprratam̄psareña po'huamenc. E'ñe attema't ñerra'm ñapa' o' cha'nmachet entoñ atet pena meratste' huetsa entoñ o'ch chap añe patsro.

¹⁹ Po'ñoçhca'ye napa' atarr ahuamencat neña'yesapas. Ama't allohuen ñeññ se'moñe'tyene' sañapa' ñeñfecopña nellsensa'yesas allochñapa' attoch e'ñe sa'mchechatyesuena' allohuen pa'namen, ama't shechpeçhno ñaña yellasoçhno, e'ñe sañmama'teñoñpa' e'ñe sa'peptse'tatse'tueña'. Allochñapa' amach eñalleterre'te ñeññcha' semueroçhtate' ama't patrra. ²⁰ Ama't atarr ahuamencateseñ atto o' sa'mchechatyesuahue oneñeñeçhno, amachña ñeñña atarr socshatsto. Añcha'ña e'ñe socshena atto aquellca'yesaretes seso'cheñ Yomporesho ñeññ pue'ntaño'tsen.

*Atto Jesúsapa' atarr pocsheñesha' ma'yochena
(Mt. 11.25-27; 13.16-17)*

²¹ E'ñe allempoña Jesúsapa' atarr coshateñ Parets Puecamquëñ. Ñeñño'marña ñapa' e'ñe pocsheñeshoñ ma'yochenana Pompor, ñeññpa' atet oten:

—Na Apacha' o'ch na'ye'choçhtatonap, pa'pa' pa' ñeññep atarr ayochreshattetsa pe'ntaño ama't ñaña arr patsro. Na'ye'choçhtatonap tarro'mar

ora añechno ñeñt pecohuenña pepen, ñeñtpa' ama arreye' pechapateñe pueyoçhro ñeñt atarr eñotañ entyetsa. Papa' aña pechapaten pueyoçhreto ñeñt ama eñotañeye' entetso. Tarro'mar Apa e'ñe pe-muereñoñ ñeñtpa' atetña e'ñe pocte' penten ãa. Arrpa' allohua ñeñt atet ma'yochenana Pompor.

²² 'Nompor allohuen po'cohuenña e'ñe eñotatuenen. Na ñeñten Puechemerenpa' ama po'ñoçh eseshaye' neñotenaye, ñapñaña Nompor eñotenen. Nomporna'cho'ña ama po'ñoçh eseshaye' eñotenaye, napñaña na ñeñten Puechemeren e'ñe neñoteñ Nompor, ñaña erra'tsencha' ñeñt e'ñe pocte' nenten na ñeñten Puechemeren ñeñtñapa' o'ch neñotater Nompor.

²³ Allempoñapa' alla cohueranerr pueyoçhresha'pa' atet otanet e'ñe ñocpueta:

—Atarr cosheñtso'tsa'yenes sa tarro'mar e'ñe sa secloyoçtpa' o' senterrñañ Yompor po'cohuenña.

²⁴ Po'ñoçhca'ye notenes e'ñe ahuatoteñpa' shonte' ñeñt a'mta'yesaye't Yompor po'ñoñ ama't ñaña ñeñt añcha'tarettatse't allempo, ñetñapa' atarr muenetañe't o'ch enterrñañetañ Yompor po'cohuenña ñeñt o' senterr sa te'. Tarraña allempo ñetpa' amaña eseshaye'ña enterrapaye Yompor po'cohuenña. Ama't atarr muenetañe't o'ch e'mñoterrñañet Yompor po'ñoñ ñeñt o' se'muerr sa te' tarraña allempo ñetpa' amaña eseshaye'ña e'muerrapayeña Yompor po'ñoñ.

Atto atarr cohuen orrtatos puesheñarr samario'marnesha'

²⁵ Allempoña puesheñarr ñeñt atarr etsotene' ñoñets ñeñt atet anaret judioneshacop, ñaña

tantapa' atet otan Jesús attoch eñoch errofente' yeçhaten ña, ñeñtpa' atet och:

—Maestrocha' ta', ¿errofena'tcha' nepaña na e'ñe cohuen attoch napa' corretsanach e'ñe tayoteñ ama't errponañohuen?

²⁶ Jesúsña anaþpa' atet och:

—¿Errofena't otenña ñoñets ñeñt atet anaret ahuatoteñ? ¿Eso'tña ñoñtsor pelleyenña þa ñeñt anaret all?

²⁷ Ñañaþa' atet och:

—Ñeñt ñoñetspa' atet oten: “Atarrcha' yemorrenteña Yeyomporer ñeñt Yepartseshar yepen e'ñe yeyochrocmañen. Ñaña e'ñe yecamquẽñoť yemorrenchach e'ñe yehuamencohuen, ama't ñaña ora yocþañohuen.” Ellonet po'poñpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.”

²⁸ Jesúsñaþa' atet och:

—Atetca'ye e'ñe atet þoten. Ñerra'm atetcha' e'ñe peþohuapa' þañaþa' corretsaþach e'ñe tayoteñ ama't errponañohuen.

²⁹ Ñeñtña acheñerpa' aña atarr muenen o'ch e'ñe cohuen enteñ Jesús ñaña allohuen acheñenesha'. Ñeñto'marña alla a'þto'terranerr Jesús:

—Ñehua, te'pa' o'ch þoten ¿eseshatña ñeñt e'ñe po'ñoçh namo'ts nepen?

³⁰ Attoch eñotach ñeñt e'ñe po'ñoçh amotsot entetsa ñeñt e'ñe pamo'ts þannena, Jesúsñaþa' atet toma'ntacha, ñeñtpa' atet serrpare'tach:

—Eñall puesheñarr judionesha' ñeñt huetsa Jerusalénoť, ñapa' arr sen Jericó. Toñoñapa' alla rromaþ eñet e'ñe puerratañþsatsre'tuet ama't

pa'shtam. Atarr atserrpet. Autsa muetsapuetañ allempoña ñeñt atserrpape'pa' ahuanerret. ³¹ Allempoña tematenpa' puesheñarr judionesha' ñeñt cornesha' ñapa'cho'ña all oñem. Ñaña' ama't entospa' atta oñmatse'tam̄pesya a'yo'marpa' o' metane. ³² Allempoña tematenpa' huapa ñaña po'psheñeñ judionesha' ñeñt levitaneshatets. Ñapa'cho'ña ama't entospa' atta oñmatse'tam̄pesya a'yo'mar o' metane ñaña. ³³ Allempoña tematerrerr o' huapa ñaña puesheñarr ñeñt ama judioneshayaye ñeñtpa' samario'marnesha'. Ñapa' ñeñt pamo'tsesha' pen ama amo'tstenano judionesha'. Tarraña ñapa' allempo entosan puesheñarr judionesha' ñeñt atserrpenetpa' atarr muerosya. ³⁴ Allenta ponmosya, shosñañ olivose'* ñaña vino allo partosñañ all atserrpeñet.

Allempoñapa' huanquërrñañ all atserrpeñet. Tantaterpa' montacha pashanoropa' aneñ allcha' mos. Allña' all cohuañpsos. ³⁵ Tsapañña' cheta'muenan epa denario apa'muenan apacllatesha' atet ota'mueñ: "Te'pa' pecuañpescha', errponcha' pa'gasta' ello peçllayor, napa' netsa'tuerrpach esempoch nehuerra."

³⁶ Jesúsña'papa' alla oterranerr ñeñt acheñer:

—Ma'psheño'maretpa' p̄papa' ¿erra'tsena'tña pentenña ñeñt atarr amo'tsof entetsa ñeñt e'ñe pamo'ts pene' ñeñt rroma' eñe?

³⁷ Ñeñtña acheñerpa' atet oterranerr Jesús:

* **10:34** Olivo ñeñt tsach allot yoreñet puerets pue'merot.

—Añca'ye e'ñe pamo'ts pene' ñeñt e'ñe puemuereñoť partatse'terre'.

Jesúsñapa' atet och:

—Te'pa' atetcha' peperra pãña. O'ch ahuerreppa' atarrcha' pemorrentera ora allohuen acheñenesha'.

Allempo Jesúsapa' čhap pocollo allyečhena Marta puet pa'mo'nerr María

³⁸ All oñen Jesúsapa' o' čhap pa'terr anetso. Allña puesheñarr coyanesha' añ pa'so'cheñ Marta, ñañaapa' e'ñe cohuen agapapan Jesús pa'paclo.

³⁹ Ñeñña Martapa' eñall ñaña pa'mo'nerr ñeñtpa' añ pa'so'cheñ María. Maríañapa' all anen Partsasha' Jesús pa'rrpõt allot e'mñoteññañ ñeñt atet serrpare'tatenanet. ⁴⁰ Pa'mo'nerrña Martapa' aña e'ñe ma'yochrena a'toramñpse' all puetare'tallme'chen. Ñañaapa' ponmana Jesúsapa' atet otos:

—Ayochreshate, amate' pocte' penteñe napta neptare'tallme'chen; nemo'nerrñapa' ama yen-puenno. Te'pa' o'ch pōch a'toramñpsapretnepa' naťar.

⁴¹ Jesúsñapa' atet och:

—Nočha Marta, shonte' pa'namen ñeñt petorra'yena, pãpa' ñeññaña atarr pellcatene'.

⁴² Tarraña e'ñe paťraña ñeñt atarr sherbets; ñeñtpa' atto e'ñe cohuen socshennana neñoñ. Pemo'nerr Mariapa' ñapa' ñeññaña atarr e'nen. Ñeñtpa' ama't e'ñe esesha amach erroťenoť puerratañpereto.

11

Atto Jesúsapa' yečhatan pueyochresha' atetcha' ma'yochet

(Mt. 6.9-15; 7.7-11)

¹ Po'pocheño Jesúsapa' alla ma'yocherrerr. O' ma'yochuapa' puesheñarrña pueyochresha'pa' atet och:

—Partseshacha' te'pa' o'ch peyčhatey ma'yochatsa atet pe't Juanañ, ñapa' čhocma yečhatane't ña pueyochresha' atetcha' ma'yochet.

² Jesúsñapa' atet otanet:

—Ñehua, ñerra'm esempoch sema'yochena atetcha' sot:

Yompore Partso ñeñteḡ pe'ntaño'tsen,
yentapepa'ch ḡa atarr Partsoḡ.
Chapuepa'ch Nompore allempoch
atarr ḡa'yochresha'tterra arr patsro.
Yetsotonapepa'ch arr patsro ñeñt atet
pemnen ḡa Nompore atet penet ñaña
pe'ntaño.

³ Chocmuepa'ch Nompore ḡapueney ñaña yocr-
ramñ ñeñt allpon yepallta'yena pate'tets yet.

⁴ Peḡretna'huonayepa'ch Nompore allohuen
yo'chñar ñeñt ama pocteye' pentapretenye,
atto Nompore yapa'čo'ña yeḡretnannena
ñerra'm esempo erroḡ yeḡannena. Ñaña
amach Nompore pemnatatsche sosya'tañ
o'ch atarr topateney. Añcha'ña čhoch
Nompore ḡa'ypo'ñataterrey allohuen
sosya'tsañečno.

⁵ Elloñapa' alla yečhaterraneterr ñeñt' atto e'ñe yenamueñoť Yompor apueycha'. Ñeñt'pa' atet serpare'taterraneterr toma'nteñtso.

—Ñerra'm eñall puesheñarr ñeñt' e'ñe cohuen yeyemtenaya, ama't rročh tsapo o'ch ahuey pa'pacillo yečhore'teñoťpa' atetcha' yotos: “Napa' masheñcha' añecop nohuena o'ch p̄apuen ama't coñe'ta rreñets, ⁶ tarro'mar o' čhap puesheñarr namo'ts ñeñt' huetsa bačhayoť, napa' ama es necheno ama't coñe'ta alloch neyema'cha.”

⁷ Tarraña ñapa' po'ponroťpa' ñato' čhach otapuey: “Amach p̄a'tsrre'močhtana'tatstosno tarro'mar o' e'ñe echarr neyottam̄pesuena, allohuen nacñeťareťolleshohuenpa' o' yemanrra'tuen. Ñeñto'marña ama eshcaye' atantenno o'ch neča'nmona'pa' attoch es napa'p̄.” ⁸ Tarraña napa' o'ch notas, ama't ñeñt' atarr yeyemtenaña' ñerra'm ama čha'nmaponayopa' yañapa' ñerra'm alla yenamuere'tpa' čha'nmaponayach attoch apapuey ama't erra'tsena ñeñt' atarr yenamueñ attoch amach alla ya'tsrre'močhtana'tneñe es enamare'te'.

⁹ Ñeñto'marña napa' o'ch notas: E'ñe senamueñoť, Yomporña' apascha'. Se'name'teñoťpa' señchcha', sečhore'teñoť, Yomporña' e'ñe pue'mñnoteñoťespa' e'ñech cohuen toram̄psapas. ¹⁰ Tarro'mar ñeñt' es enamare'tetspa' ñetña es aguětset; ñaña erra'tsen ñeñt' es e'nyetspa' ñetña'pa' enteretcha', ñaña erra'tsen ñeñt' čhore'tyene' ñetña'pa' e'ñech e'mñnotenat Yompor.

¹¹⁻¹³ 'Yompor ñeñt' pue'ntaño'tsen čhocmach e'ñe cohuenare' es apa'yeney ñerra'm esempo

es yenamueñ. Ñapa' amach aña apuenye ñeñt ama cohuenaye' yenteno ya. Ama't sa ñeñtes arromñates atet sepeñ saña sechemer, e'ñech cohuen es sapueñ ñerra'm esempo es enamuenes. Atet ñerra'm allempo pa'chporrñoť es enamuenes, o'ch enamas mam* ñeñtcha' rra', sapa' ama't puesheñarroťesapa' amach aña sapueñeña sechemer mapue' ñeñt ama arrapahuoyaye. Amapa' ñerra'm cac enamuenes sañapa' ama't puesheñarroťesapa' ama aña sapueñeña sechemer shecheř ñeñt atarr amuerochtatañ. Amapa' ñerra'm pa'me' enamuenes sañapa' ama't puesheñarroťesapa' ama aña sapueñeña sechemer yellas. Ñeñto'marña sa ama't arromñates ama't ñaña atsrre'mñates sapa' e'ñe señoteñ apa'yese' sechemerasha' e'ñe cohuenare'. Añña ñeñt Seyomporer sepen saña ñeñt pue'ntaño'tsen elloña ñapa' e'ñe eñoteñ atto e'ñe cohuenare' es apa'yenes saña. Ama't Puecamquēñ ñeñt e'ñe cohuen Parets attoña e'ñe cohuen chorratensa allohuenes ñeñtes enemyene' ña.

Atto puesheña'tets oteñet Jesús ñapa' oneñeto' po'huamencot cačhpatenanña po'potantañ oneñeťechno acheñenesha'

(Mt. 12.22-30; Mr. 3.19-27)

¹⁴ Po'pocheño allo'tsen puesheñarr acheñ ñeñt chorrena oneñeť, čha opanatateñ. Allempoña Jesús pa' cačhpatosan oneñeť atto chorrenana acheñ. Atto cačhpa'ner oneñeť ñeñtña opanpa' o' alla eñorrera. Acheñenesha'ña allpa' atta

* **11:11-13** Ñehua, Jesús añ toma'ntatanet pan ñeñt puerrar penet all pa'nyo.

cohuanrrorteñet, atarr cohuen enteñet. ¹⁵ Tarraña po'potantañechnoña acheñenesha'pa' ama't mameshapa' ama pocteye' eñcheto. Ñetñapa' atet otyeñet:

—Atto cächpatatenan oneñet acheñpa' añaca'ye ahuaencat pene' Beelzebú ñeñt pompor pen allohuen oneñeñechno.

¹⁶ Po'potantañ acheñenesha' ñetñapa' cha mueneñet o'ch topachet Jesús. Ñetpa' atet ochet:

—Yapa' añ yemnen o'ch pegatey pepartsoña entot allochñapa' attoch yeñotañ po'ñoçh papa' Parets Puechemerep.

¹⁷ Jesúsñapa' eñotanet ñeñt atet cotape'chatse'tyenet pueyoçhreto ñocop ñeñt atto otyeñet ñapa' oneñeña pompor po'huamencot cächpatenanetña oneñeñechno. Ñeñto'marña ñapa' atet otanet:

—Ñerra'm puesheñarr amcha'taret ellop-tannena pa'cheñer e'ñe ñagattsetapa' e'ñech poctacma a'cllatanna'tuerret. Attecmach pannerra ama't ñeñt e'ñe pamo'tsna'tarecmuet ñerra'm elloptannerret e'ñe ñagattsetpa' e'ñech a'cllatanna'tuerret. ¹⁸ Attecmach pannerra ñaña oneñet pueyochresha'chno ñerra'm oneñeñechno e'moñe'tannenet e'ñe ñagattseta, ñetña atto huomencatenetpa' çhach huañerrets amach allo'na huomencatneneto. Ñeñtpa' atet o' notuas tarro'mar sapa' cha sotenen napa' Beelzebo' po'huamencot necächpatateññañ e'ñe ña pueyochresha' ñeñt pompor pen allohuen oneñeñechno. Po'ñoçh oneñetpa' amaca'ye huapore'tanneno. ¹⁹ Sapa' atet

sotenen napa' Beelzebo' po'huamencot necachpatateññañ e'ñe ña pueyochresha', ñehua, te'pa' o'ch notas: Ñeñt seyochresha' sepen sa ñeñt eñotene' ñamet o'ch cachpatachet oneñet acheñenesha' ñetpa'cho'ña amaña Beezebú po'huamencoteye' cachpatateñetoña oneñet acheñenesha'. Ñetpa'cho'ña Yomporoña po'huamencot cachpatatenetña oneñet. Ñeñtña o' eñotatas ñeñt atet sotenoñ ñeñtpa' amaca'ye po'ñoçh atteyaye. ²⁰ Po'ñoçhca'ye Yompor po'huamencot necachpatateñña oneñetechno acheñenesha' ñeñtcha'ña señotate' te'pa' o' nechapatonas Yompor po'cohuenña ñeñt atto po'ñoçh atarr ayochreshattena ña.

²¹ 'Ñeñtpa' o' e'ñe notuas atet tarro'mar yeñoteñ ñeñt atarr ahuamencattetsa atto atarr ahuamencattena oneñet, ñaña' e'ñe po'huamencot cohuañpesyenan allohuen e'ñe cohuen ñeñt pa'paquell pa'yen. Ñapa' po'huamencocmañen na'yenan ñeñtcha' e'ñe cohuañpene' all añcha'tarettena ña.

²² Tarraña ñerra'm esempo o'ch huapoña ñeñt atarr ahuamencatesha' ñeñtcha' ello metanose'ña po'huamenc atet ñerra'm na Nompor, ñeñtcha'ña e'ñe a'mchechatose'. Attoña e'ñe puerratañpsosñañ ñeñt allpon moñenaya ñeñt atarr yemuetyena ña. Allochña'pa' o'ch be'tosos all ñeñt pa'paquell pa'yen o'ch e'ñe puerratañpeshuos ñeñt allpon o'patyena ña.

²³ 'Ñeñto'marña te'pa' o'ch notas allohuenes: Ñerra'm eseshas ñeñtes ama netorrapretenaye

ñeñña acheñerpa' čhaca'ye epatare'tennan
 ñeññ atet netorra'yena na. Ñeñtpa' o'ch
 netma'ntatasa atet: Ñerra'm esesha' ama
 na'yapačhapretenaye ñeññ na'yapačhen na,
 ñeññapa' čha a'parratse'tañpenen a'yenet.

*Atto Jesús'pa' eñotatanet ñato' oneñe'tpa' o'ch alla
 chorreranerr acheñ allot čha'nom ahuaña
 (Mt. 12.43-45)*

²⁴ Ellonetpa' o'ch alla neñotaterrerr po'poñonet:
 Oneñeñ ñerra'm esempo čha'nom acheñeshoť,
 ñeñña oneñe'tpa' o'ch auyes errařaren
 ama't amayo'mar e'nyese' po'psheñeñ allcha'
 yečherrerr allcha' e'ñe amesuerrerr cohuen.
 Tarraña ñerra'm amach erra eñčepa' atteñapa'
 o'ch ot: "Napa' o'ch alla ahuerren nepacillo
 allot nečha'nom ahuaña."²⁵ Atetča'cho'
 pa. O'ch alla ahuererr allot čha'nom ahuaña.
 Allña o'ch čherrpa' e'ñech cohuen entuerran
 pa'paquëll, e'ñech cohuen atarrapo'tuaret, e'ñech
 cohuen añño'tyesaret.²⁶ Allempoñapa' o'ch
 alla ahuererr allo'tsa'yen pamo'tsesha'pa' o'ch
 enana' po'poñ cančherrsheña oneñe'tečno ñeññ
 nanac sosyare', ñeññ ello metana'tuene' ñeññ
 atet sosyaten ñeññ hua'ñene' o'ch yečhaprecha.
 Allohuenetñapa' o'ch chorreñet ñeññ acheñer.
 Allempoña tsapatonetpa' allo'nach sen ñeññ
 acheñer sosyatnomuets huomenc. Elloch
 metanerran ñeññ atet řatse'tyese't ñenmať.

²⁷ Jesús allempo atet serrpare'tatenan
 acheñenesha'pa' puesheñarrña coyanesha'pa'
 machayo'tepa'tcha' rrana, ñeñtpa' atet ot:

—Ama't ñeñt̃ p̃achor pepen p̃apa' atarr cosheñtso'tsen tarro'mar ñapa' ñeñt̃ pe'ñallete' p̃a ñeñt̃ep̃ atarr cohuen es peyečcaten ñaña ñapa' e'ñe cohuen cohuañpsaṣ̃ allempo cheshaṭollenp̃a'.

²⁸ Jesúsñapa' atet och:

—Elloña allohuenetpa' atarr cosheñtso'tsa'yenet ñeñt̃ pue'mñoteñotet Yompor po'ñoñ e'ñe atet p̃ohuenet.

Atto Jesúsapa' otan acheñenesha' ñeñt̃ ama cohue-naye' coṭape'chetso ñetñapa' čhocma e'nenet part-soteñets

(Mt. 12.38-42; Mr. 8.12)

²⁹ Allempoña acheñenesha' emchorreñet Jesús, ñañaapa' atet otanet:

—Acheñenesha' ñeñt̃ corra'yetsa te' ñetñapa' ama cohuenaye' coṭape'chyeneto. Tarro'mar ñetpa' aña e'nenet ahuo'ch norrtatanet nepartsoteña atto'chña eñotnet napa' po'ñocho'te' Parets Puechemeren ñeñt̃eno'te' Cristotosets. Tarraña amach es norrtataneto. Napa' añach paterr neñotatanet atet eñotatane't Jonás ahuaṭ nínivo'marnesha' allempo a'mítane't Yompor po'ñoñ. ³⁰ Tarro'mar atto eñotatane't Jonás nínivo'marnesha' ahuaṭ ñapa' Yomporeshoṭ huena, napa'čo'ña te'pa' atetcha' neñotach naña acheñenesha' ñeñt̃ corretsa te' napa'čo'ña Yomporeshoṭ nohuena. ³¹⁻³² Tarro'mar ahuaṭ allempo serrpare'tatane't Jonás nínivo'marnesha' ñetñapa' allempocma coṭape'cherret ello e'ñe cohuen Yomporecop. Te'ña arr seshopa' allo'tsenen na ñeñten ello metanene' ñeñt̃ atet

serrpare'tate't Jonás. Tarraña sañapa' amaña
 soctape'chenoña ello cohuen Yomporecop.
 Ñeñto'marña esempohuañen allempoch
 a'crare'tetuerra allohuen acheñenesha',
 ñeñtña nínivo'marnesha' ñeñt e'ñe cohuen
 cotape'cherrets Yomporecop ahuať, ñetpa'cho'ña
 orrterretcha', ñeñtcha'ña seño'taterre'ña sapa'
 ama't mamesha ama pocteyayeña ñeñt atet
 sepa'yese't tarro'mar sapa' ama soctape'cherro
 ello cohuen Yomporecop. Ñaña te'pa' o'ch
 neyerpatasa ñeñt atet pa ahuať puesheñarr
 coyanesha' ñeñt amcha'tarettatse't atarr
 bačhayo allohuanen pats sa'ponet. Ñeñtña
 coyanesha'pa' alloteñ on o'ch e'mñotenana'
 Salomón pueserrpareñ ñeñt atet atarr eño'tante't.
 Te'ña arr e'ñe seshopa' allo'tsenen ñeñten
 puesheñarrana ñeñten atarr es neñoten namña,
 ello nemítaneñ atto eño'tante't Salomón. Tarraña
 sañapa' amaña es sotapoteno. Ñeñto'marña
 esempohuañen allempoch a'crare'tetuerra
 allohuen acheñenesha', ñeñtña coyanesha' ñeñt
 e'ñe cohuen e'mñotatse't ñapa'cho'ña orrterrach,
 ñeñtcha'ña seño'taterre' sapa' ama pocteyayeña
 ñeñt atet sepa'yese't tarro'mar sapa' ama es
 sotapote'te ama't e'ñe mamesha.

*Atto yeclle'pa' añ toma'ntena ñeñt po'lampareñ
 pen allohuen yechets*

(Mt. 5.15; 6.22-23)

³³ Jesús'pa' alla serrpare'taterraneterr, ñeñt'pa'
 atet otarraneterr:

—Ñerra'm esempo ya'llchaten lampareñ,
 ñeñt'pa' ama tarrecpaye' ya'huortateñe o'ch

yene' o'pono e'ñe a'nareto. Ñaña ama añecpaye' ya'llchateñe o'ch ye'rramañpes coymño. Ñeñtpa' añecopña ya'huortatenña lampareñ o'ch yene' enonet attochña e'ñech çoyo'tamñpesuan allohuen acheñenesha' ñeñt be'tosçhets all pocollo. ³⁴⁻³⁵ Yecle'pa' añ toma'ntena atet ñerra'm ñeñt po'lampareñ pen allohuen yechets. Ñerra'm e'ñe cohuen huomech yecle'pa' e'ñech cohuen entateney puetare' allochñapa' attoch e'ñe cohuen torratyenana allemeñ yechets tarro'mar e'ñe cohuen a'puetarsamñpsareñtenet. Tarraña yecle'ña ñerra'm ama e'ñe cohuen huomñcheyayepa' amach e'ñe cohuenaye' entatenye puetare' attochña amach eshcaye' torratyenano allemeñ yechets tarro'mar çha ottena ñerra'mrrate' checmeto'tsa'yeneta. Attecma pena ñaña yeyoçher. Ñerra'm e'ñe cohuen yoctape'chyen yeyoçhropa' attoña çhennayaña yeyoçhro e'ñe ora allohuen Yompor poçtañña ñeñt po'cohuenña pen. Attoña ora yoctañña' e'ñech a'puetarsamñpsareñtena Yomproshot. Tarraña o'ch yeñota e'ñe yañeña tarro'mar ñerra'm ama cohuenaye' yoctape'cheno yeyoçhro, ñeñtpa' amach errotenot a'puetarsamñpenyeña ñeñt yoctañña yepen. Ñeñña yoctañña yepenpa' çhach a'checmetamñpennay yeyoçher. ³⁶ Tarraña ñerra'm po'ñoçh e'ñe cohuen yoctape'chen yeyoçhro, attoña çhennayaña yeyoçhro e'ñe ora allohuen Yompor poçtañña attochña yeñoteñ orrtatyese' ñeñt e'ñe cohuen enten ña. Attoña e'ñech cohuen es yepa'yen atet ñerra'mrrate' lampareñ e'ñe

cohuen choyo'tam̄peney attoch e'ñe cohuen es yentyen. Allempopa' o'huañcha' allo'na yechechmetam̄pesnen.

Atto Jesús'pa' a'metare'tenan fariseonesha' ñeñĩ atet yechenet ñetpa' ñeñĩpa' ama cohuenaye' entapretenaneto Yompor

(Mt. 23.1-36; Mr. 12.38-40; Lc. 20.45-47)

³⁷ O' serrpare'tatuanet Jesús'pa' puesheñarrña fariseonesha'pa' hua'ña'nerran Jesús o'ch rrallme'chapreteña' pa'paclo. Allempo chap Jesús allpa' be'tosos anorros allcha' rrallme'chapretosan ñeñĩ hua'ñene'. ³⁸ Ñeñĩña fariseopa' entenan Jesús atto ñapa' ama e'pota'to ñeñĩ atet yeçhena judionesha'. Ñehua, ñetpa' atet yechenet, amach rrallme'cheneta'pa' o'ch e'pota'tyeset Partsocop. Ñeñto'marña fariseopa' atet cotape'ch Jesúsocop:

—Ta'm, eso'marte'ca'ye amaña e'pota'tenoña ñeñĩ atet poctetsa Partsocop.

³⁹ Partsesha'ña Jesús'pa' atet toma'ntatana ñeñĩ atet pena allohuen fariseonesha', ñeñĩpa' atet otan ñeñĩ hua'ñene':

—Ñeñtes fariseoneshas sapa' e'ñe se'pame'teneña setaza enotpa' o'ponotñapa' ama se'parro'teñe. Seplatopa'cho'ña enoña e'ñe se'pata'teñ o'ponotñapa' ama se'pata'teñe. E'ñe atet sepena samña. E'ñe sa'cohuentatena ñeñĩ eno'mar ñeñĩ atet seyçhena sa allochñapa' attoch entenes allohuen acheñenesha' sapa' e'ño' cohuenes, tarraña o'ponot seyochropa' ama sa'cohuentateñe, allñapa' e'ñe chorren shonte' sosya'tsañeçhno ñeñĩ atto e'ñe seshquëño'çhocma

es seprratañpesyen, seshonten pa'namen ñeñt̃ ama pocteye' entapretenso Yompor. ⁴⁰ Cha sottena ñerra'm erra'tsen puesheñarr acheñ ñeñt̃ ama es eñoteno. Ama't señoñeña Yomporña ñeñt̃ yeçhcatyene' allohuen ñeñt̃ allpon yentyen arr patsro, ñeñt̃ a'yote'tsa'yen yeshot̃ ñeñt̃ara Yompor ñeñt̃ yeçhcate' ñaña yeyoçher alloch e'ñe cohuen yoctape'chen o'pono yeyoçhro. ⁴¹ Ñerra'm o'ch po'ñoçh soctape'cherr cohuen seyoçhro Yomporecop attochña e'ñe cohuen seyoçhrocmañen es sapa'yen attoch seyempa'yeñ po'potantañ. Ñerra'm atetcha' seperrapa' Yomporña'pa' e'ñech cohuenare' enterres.

⁴² 'Atarr llequëñtso'tsenes sa ñeñtes fariseoneshas tarro'mar ama atteye' sepeno ñeñt̃ atet o' notuas. Ora allohuen ñeñt̃ senaremñ sepen ama't çhocma sapueñeñ Yompor allpon ñeñt̃ poctetsa ñocop—mentapan ñaña rudapan. Tarraña añña ñeñt̃ nanac sherbets Yomporecop e'ñech pocte' es yepeññañ po'psheñeñ ñaña e'ñech cohuen yemorrenteña Yompor. Ñeñt̃ atetpa' sañapa' ama soctape'cheñe ama't mamesha. Sapa' ñeñt̃ña sepa'lltena o'ch e'ñe atet seþohua. Tarraña ñeñt̃ attoçhocma es sapa'yen Yomporecop ñeñt̃pa'çho'ña amach secaçpatsche.

⁴³ 'Atarr llequëñtso'tsa'yenes sa ñeñtes fariseoneshas tarro'mar sapa' e'ñe sommo'cheñoñ atarr semneñ allohuen acheñenesha'pa' o'ch e'ñe cohuen entenset. Ñeñto'marña sapa' añña atarr semnen o'ch sanorrçha'tyen judionesha' po'prahuo allecma anorryen ñeñt̃ atarr

am̃cha'na'tpo' enten allohuen acheñenesha'. Ñaña sapa' ña atarr semnen allohuen acheñenesha'pa' o'ch huom̃cha'tenset pueñcha'nañot̃ ñerra'm esempo sechopeñe'chen toño'mar allecma chopeñe'chyen allohuen acheñenesha'.

⁴⁴ 'Atarr llequëñets socop, tarro'mar sapa' e'ñe attes ñerra'mrrate' apampaña ñeñt̃ amach orrteno enot̃ all apamparettena arromñaat̃ o'pono patso. Ñeñto'marña acheñenesha'pa' allach chopeñe'chyenet all ama esesha' eñotenaye o'ponopa' allo'tsa'yen arromñaat̃ap all e'ñe chorren sosya'tsañ.

⁴⁵ Allempoña puesheñarr ñeñt̃ atarr etsotenayeñ ñoñets ñeñt̃ atet̃ anaret̃ judioneshacop, ñaña'apa' atet̃ otan Jesús:

—Maestro, ñeñt̃ atet̃ poten ya'naña čha muene' pepencaten.

⁴⁶ Jesúsña'apa' atet̃ och:

—Sapa' ñeñtes atarr etsotenayeñ ñoñets ñeñt̃ atet̃ anaret̃ judioneshacop, sapa'čo'ña atarr llequëñets socop, tarro'mar sapa' atarr es sena'yeññañ acheñenesha' ñeñt̃ atarr echarrare' entyenet̃ ñet, po'ñočhpa' amach errotenot̃ e'ñe atet̃ p̃ohueto. Sapa' ama't mameshapa' ama ayenpuenaye' sentpenaneto.

⁴⁷ 'Llequëñtsa ñaña socop tarro'mar sa te'pa' sařomaten enot̃ ñeñt̃ atarr cohuen senten sa all pampa'yesete't̃ ñeñt̃ a'mta'yesaye't̃ Yompor po'ñoñ ahuat̃ ñeñt̃ muetsanatyese't̃ ñeñt̃ satañneshañ sepe't̃. ⁴⁸ Sapa' e'ñe señoñeññañ sa'tañneshañ atfo ñetpa' muetsanachete't̃ ñeñt̃ a'mta'yesaye't̃ Yompor po'ñoñ tarraña sapa'čo'ña

ñeññaña e'ñe pocte' senten samña ñeñño'mar te'pa' e'ñe sa'cohuentam̄penanet all apamparettenet.

49 'Ama't Yompor ahuaŧ, e'ñe pueñnoteñoŧpa' atet ote't: "Napa' o'ch nemñe acheñeneshesho ñeññcha' a'mitene' neñoñ ñaña ñeññ nellsensarnesha' nepa'yen. Tarraña patantarrña acheñenesha'ñapa' cha muetsanatanet, po'potantaññapa' cha cotare'tyeset." 50 Attoña e'ñe allempoteñ ayeçhcatareŧta añ pats, ora allohuen ñeññ a'mta'yesaye't Yompor po'ñoñ allpon ñeññ amsanatyeseŧtate't ashatare'tetyeseŧe't po'rras, sañapa' allempoteñ e'ñe sa'yohuareŧtena teme'ttsen sa ñeññes corretsa te'. 51 E'ñe allempoteñ muetseret Abel tarremphua allempo muetseret ñaña Zacarías ñeññpa' alla semtser Parets po'ponro puecha'petaroŧ allo'tsen altar alloŧecma sherbete't Yompor. Po'ñoçhca'ye notenes añenesha' ñeññ corretsa te' atarr ayohuarettenet.

52 'Llequēñtsa socop ñeññescha' e'ñe etsotenayeñ ñoñets ñeññ atet anareŧ judioneshacop tarro'mar sapa' cha seprratam̄peñ acheñenesha' ñeññ alloch enteret ñeññ e'ñe po'ñoçh alloch queshperret. Tarro'mar ama't sapa' amaca'ye senteññañaña Yompor po'cohuenña, ellonetpa'cho'ña çhocma sepatare'teñña po'potantañ ñeññ e'nene' Yompor po'cohuenña.

53 Allempoña ñetpa' e'ñe pa'tsrre'mueñoŧ atarr es a'p̄to'tare'tyeset Jesús. 54 Ñetpa' añ atarr e'nenet attoch otatse'tachet allochñapa' ñato' po'tatse'tateñoŧetpa' attoch otteñe'cheñet.

12

Atto Jesús'pa' yečhatan pueyochresha' amach eñotatstoñeto fariseonesha' pommo'cheña

¹ Shonte' acheñenesha' ñeñt' huačhenoya Jesús, shonte' nanac patoner. Cha che'muechoset Jesúsesho atta aťmatca'tanna'tyesoset. Jesúsña ñanompa' alla serrpare'taterranerr pueyochresha', ñeñt'pa' atet otanet:

—E'ñech señota ñato't semeñe'teña' fariseonesha' poctapña, tarraña ñeñt' poctapña penet ñetpa' ñeñt'pa' ommo'cheñtsa. Ñeñt'pa' mametollapa' o'ch epa'hua erraparen e'ñe atet pena ñerra'mrrate' chase' mametollapa' o'ch e'ñe es a'chasa'hua. ² Tarro'mar yapa' yeñoteñ allohuen ñeñt' allo e'ñe a'nahua shecare'tyenet te' esempohuañenñapa' a'metam̃psaretterretcha'. Ama't allohuen ñeñt' e'ñe a'nasotyenet te'pa' esempohuañenñapa' e'ñech eñotatareťetuerret.

³ Ñeñto'marña ama't erra'tsena seserrparen e'ñe a'nahua te' esempopa' señotatuercha' ora allohuen acheñenesha'. Ama't erra'tsena ñeñt' atet seserrpare'tyen te' e'ñe a'nahua o'pono pocollo, esempopa' seserrpare'tatcha' allcha' e'ñe cohuen e'mhuerres allohuen acheñenesha' atet ñerra'mrrate' enot seserrpare'ten shelletot.

Atto amach yemcha'tatsto ñeñt'cha' muetse' yechets, añcha'ña yemcha'na't Yompor

(Mt. 10.28-31)

⁴ Te'pa' o'ch notas masheñneshacha', amach aña semcha'tatsto ñeñt'cha' semtse'. Tarro'mar añach muetsonaset sechets, secamquēññapa' amach errotenot muetsonaseto. ⁵ Añcha'ña semcha'na't

Yompor tarro'mar ñerra'm ña muenats e'ñe ña po'huamencotpa' o'ch a'chencatonay ye'chets, yecamquëñpa'cho'ña o'ch mueñonay coñcheñtso all parraren tso'. E'ñe po'ñoçh notenes, Yomporcha'ña semcha'na'ten.

6-7 Elloña te'pa' napa' o'ch notas, chocmach seyemcha Yompor, po'ñoçh ñapa' ñach secuanñpene'. Ama't otetollesha'pa'cho'ña chocma cohuanñpeñ. Ñehua, ama't yapa' yeñoteñ otetollpa' ama tama sherbeno. Ama't yepomatset, amnar otetollesha'pa' ñeñtpa' ama tsa'teyaye, e'ñe eptallatolla centavo tsa'tena. Tarraña ama't atteñ Yomporña ama't patrra otetollpa' ama pueseñe. Ñeñto'marña notenes, ama't mameshapa' amach semcha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

*Atto ama a'nasotpahuo Jesucristo
acheñesho'mar
(Mt. 10.32-33; 12.32; 10.19-20)*

8 Elloña napa' o'ch noterrser, allohuen ama't erra'tsencha' ñeñtcha' ama na'nasotenaye acheñenesesho, napa'cho'ña Ñeñten Acheñetosetspa' amach na'nasotuerraneto namña Nomporesho allo'tsa'yen epuet po'millañoñeñnaneshar. 9 Tarraña ñerra'm esesha' na'nasotenaya na arr patsro acheñenesesho, napa'cho'ña na'nasoterranetcha' Nomporesho allo'tsa'yen epuet po'millañoñeñnaneshar.

10 'Ñerra'm esesha' nesasene' na Ñeñten Acheñetsosets ñeñtpa' aṗretna'po' nenteñ. Tarraña ñerra'm esesha' añ achmāre'tenet Parets Puecamquēñ ñeñtñapa' ama aṗretna'pahuoye' nenteñe.

11 Ñaña o'ch noterrser, ñerra'm esepoch anmaset judionesha' po'prahuo allcha' a'metare'tamṗsaset añcha'taretesho, sañapa' amach čha sellca'ṗsatsto, amach čha sotapṣa'tatsto: Errotuachca'ye notoste' attoch cohuen nanapos, esuachca'ye notte'. 12 Sapa' añcha'ña se'ñoratose' Parets Puecamquēñ e'ñe allempo a'ṗto'tare'tenset all.

Ñeñt e'ñe aña muenen o'ch esocmañen echyas, ñeñtpa' atarr yoročheno'tsen

13 All che'muechen shonte' acheñenesha' Jesúsesho, puesheñarrñapa' atet otan Jesús:

—Maestro, te'pa' o'ch ṗoton nemo'nasheñ nepo'nar apuerrnepa'ñaca'yeña naña ñeñt allpon o'patatnomna nomporeñ.

14 Tarraña Jesúsñapa' atet och:

—Masheñcha' napa' ama eseshaye' nenaye ñeñtencha' a'pocstatene' ñoñets attoch soten o'ch napa'yesas allpon o'patatyenset.

15 Alla oterraneterr Jesús:

—E'ñech señota sañeña, ama't seyočhrapa' amach es seye'chapretanna'tatsto ama't e'ñe coñe'ta tarro'mar atto yocrrena arr cohuen añe patsropa' ñeñtpa' ama añecpayaye alloch esocmañen es yechyerr ñeñtcha' atarr yocshaterre' tsapaonet.

16 Ñeñtpa' atet otanet toma'nteñtso:

—Eñall puesheñarr achenñ atarr nanac eçllayoret. Allña po'patsñopa' shonte' nanac aton a'yechcaten. ¹⁷ Ñeññña eçllayoretpa' atet cotape'chen pueyoçhropa' atet oten: “Errotuachca'ye neña'ña, ñeññ atarr nanac aton netotaten amaca'ye eñalleña allcha' e'ñe nañño'tue.” ¹⁸ Allempo atet cotape'chenpa' alla otterrerr: “Te'pa' o'ca' neñoch atetcha'ca'ye neña. O'chca'ye na'materrña pocollashe'm allecma nañño'te't coñe'ta'tets te'ñapa' o'ch alla nařomaterr atarrpo' allcha' e'ñe nañño'tua allohuen ñeññ allpon netotaten ama't ñaña allohuen ñeññ allpon pa'namen esocmañen nechyen. ¹⁹ Allempoñapa' atetcha' not neyoçhro: Napa' ama es nepallteno ama't e'ñe mamesha. Ñeññ allpon shonte' o' nañño'tuapa' atarrcha' atomat char amach es nepallterre'te. Te'pa' o'ch names e'ñe poctacma. Nellapene'tcha' rrats, nellapene'tcha' orrare'tats; ñeññcha'ña e'ñe nocshatene'ña na.” ²⁰ Tarraña ñeññ acheñerpa' Yomporpa' atet och: “Papa' atarr otatsñatep, ama es peñoteno ama't mamesha. Te'pa' a'ne tsaprocmaçh o'ch perromuen. Ñeññña shonte' o' pañño'tuapa' te'ñapa' esesha'huachñaca'ye o'paterraya.” ²¹ Ñeñño'mar yeñoteñ, ñeññ añño'tene' shonte' esocmañen ñeññ e'ñe ñocpa, ñeññña acheñer atetpa' ama echenanoña ñeññ sherbets Yomporecop.

*Atto Yomporpa' ñach e'ñe cohuen cohuanpene'
ñeññ puechmeresha' pen
(Mt. 6.25-34)*

22 Allempoña Jesús pa' alla oterranerr pueyochresha':

—Ñeñto'marña te'pa' o'ch noterrser, amach aña sellcatsto ñeñt atto yeychena arr patsro. Ama't seyoçhra amach sotatsto, esuachca'ye yerrerrerrte' tsapaonet. Ñaña amach aña sellcatsto ñeñt e'ñe sechtsocpa, amach sotatsto, esuachca'ye yechorrate'. 23 Tarro'mar Yomporpa' ña yapuene' yo'rrerrña allo yocrrena ñeñtña atarr nanac sherbets. Ñeñto'marña yeñoteñ ña yapuene' ñaña yerrar, ñeñtña ñocoppa' ama esoye' enteñe. Ñaña ña yeçhcatene' yechets ñeñt atarr sherbets. Ñeñto'marña yeñoteñ ña yapuene' ñaña ama't ñeñt yechorra'yena, ñeñtña ñocop ama esoye' enteñe. 24 Sentente' atto correna pa'namen otneshaçhno. Ñetpa' ama çoye' nare'tatse'teneto ñaña ama çoye' apçha'yeneto puerrar ñeñtcha' rra'yenet. Ñetpa' ama es echenaye allcha' es añño'tyenet. Ama't atto correnetpa' Yomporña e'ñe yeçhcatyesuanet ñeñtcha' puerrar pa'yenet. Elloña sa Yomporpa' atarr morrentensa sa; ello semtaneñ ñeñt atto atarr morrentenana otneshaçhno. 25 Ñaña amach sellcatsto attoch amach serromo, tarro'mar ama't sellquëñañ attoch atarr atomat socra arr patsro tarraña ama't e'ñe puesheñarrotësapa' amate' errotenot so'chtatoña socreña ama't e'ñe pamtarra. 26 Ñehua, atto ama't e'ñe sellquëñoña sa ama errof es sepeno, ñeñtepñapa' amach pa'namena es sellca'yesatsto tarro'mar ñeñtpa' e'ñech orrena es sellca'yena.

27 'Ñaña sentente' atet yečquëna rorečno. Ñetpa' ama čoye' taruasa'yeneto ama't mamesha, ama čoye' taneneto ñeñt chorra'yenet atto e'ñe cohuen orretyenet. Tarraña napa' o'ch notas, ama't ancha'taret Salomón atto e'ñe a'cohuentate't ahuať, ama't ñapa' ama chorrane'teña ñeñt atarr cohuen ñeñt atet atarr cohuentena ror. 28 Ñeñt ror pue'chorpa' ñeñtara ta'te' ñeñt chepyets allemeñ ñeñt sentyen te' tarraña ñeñt'pa' mamecpa. Ama't cohuen chepyeneñ te'pa' tsapa'toneñña'pa' o'ch etomañperetpa' e'ñech colla'huerra o'huañcha' cohuenta. Ñehua, Yompor atto cohuentatyenan ama't ñeñt e'ñe mamecpa, elloña sapa' atarr chorratyensañ saña; saña'pa' eso'marte'ña amaña e'ñeye' seyemteño. 29 Amach e'ñe patrra se'nen ñeñt atto serren ñaña ñeñt atto es sorryen. Amach ñeñtaña e'ñe paterr sellca'yesatsto. 30 Tarro'mar allohuen acheñenesha' arr patsro ñeñt ama ame'ña'yetso, ñetpa' ñeñtaña e'ñe paterr e'nenet. Ñehua, Somporña ñeñt pue'ntaño'tsen ñapa' e'ñe entuenes ñeñt allpon pa'namen sepallta'yena arr patsro. 31 Sapa' ancha'ña e'ñe ñanom sema'yočhrena Yomporecop attoch atarr ayochreshatterra ña allochña'pa' ñachña sapa'yene' ñeñt allpon sepallta'yena saña.

*Atto ñeñt'cha' seshonterr ñeñt atarr sherbets archa'ca'ye seshonteñ all Yompor pue'ntaño
(Mt. 6.19-21)*

32 'Amach neyochreneshačhnocha' es sellcatsto ama't ama atarr shonteyayso, Yomporña atarr cohuen secuañpene' atet ñerra'mrrate' e'ñe

po'carrneror penes. E'ñe pocsheñesho'pa' apascha' attoch e'ñe cohuen socshapreterrñaña po'cohuenña attoch atarr ayochresha'tterra. ³³ Te'pa' o'ch sepomyen ñeñt' allpon sechyen allochñapa' o'ch sapa'yes ñaña ñeñt' atarr es pallta'yetsa. Ñerra'm atet sepena allo'nach atarr aton seshonta'nen ñeñt' e'ñe po'ño'ch atarr sherbets Yomporecop. Ñeñt'pa' ama atteyaye ñerra'mrrate' ñeñt' seçllayepo'rer sepen arr patsro, ñeñt'pa' atarr amllasha'tña. Tarraña ñeñt' seshonta'nen ñeñt' atarr sherbets ñeñt' ama ahuañaño, ñeñt'pa' arr seshonteñ Yompor pue'ntaño. Allña ama't eñe'tapa' amach çheno o'ch etatsre'tas ñaña ama't pom'papa' amach eñalle ñeñt'cha' rrerre' ñeñt' seshonten all. ³⁴ Tarro'mar ñerra'm all pue'ntaño seshonta'nen ñeñt' atarr cohuen senten, yeñoteñ e'ñe ñeñta paterr senen seyo'chro ñeñt'ña atarr sherbets Yomporecop. Tarraña arr patsro ñerra'm aña seshonta'nen ñeñt' atarr semorrentena, yeñoteñ e'ñe ñeñta paterr senen seyo'chro ñeñt'ña' ama es sherbenoña Yomporecop.

Atto çhocmach yeñose'rteña Yepartseshar Cristo esempoch huerra

³⁵⁻³⁶ Te'pa' o'ch notas po'poñ: Chocmuepa'ch señosere'tna esempohuañenpa' o'ch alla nohuerra. Ñato' o'ch netma'ntatasa atet ñerra'mrrate' puesheñarr yacma ñeñt' atarr ayochresha't. Ñapa' ahuo' allcha' rrallme'chapretenana' pacma ñeñt' sena'tetsa. Pueyochresha'ñapa' alla cohuet pa'paclo esempoch huerra. Allempoña ñetpa' a'huortatyeset po'lampareñ

allochñapa' attoch ñerra'm esempoch huerra ñeñ
 pamo'mte' penet ñerra'm o'ch chore'tuenanetpa'
 ñetñapa' allorocmach toram̃sapueñet attoch
 sherbapueñet. ³⁷ Atarr cosheñtso'tsa'yen
 pueyochresha' ñerra'm esempoch huerret
 pamo'mte' allñapa' entuenanet cho atarr
 eñose'rteñet. Po'ñoçhpa' napa' o'ch notas,
 ñachca'yeña sherba'huene'ña ñeñ pueyochresha'
 pen ña. O'ch chana'huena ñañapa' o'ch
 anorrcha'tatuenanet allcha' rrallme'chatuenanet.
³⁸ Ñeñtpa' atetcha' perranet ama't rroçh tsapopa'
 o'ch huenanet amapa' o'ch puetarenmochpa' o'ch
 huenanet. Ñeñto'marña notenes, ñerra'm alla
 entuenanet cho atarr eñose'rteñet, ñeñña atarr
 eñose'retyenayapa' atarrcha' cosheñtso'tsa'yenet.
³⁹ E'ñech machayoťa nohuerra atet pena eñet
 allempo atta es sepcha'yena machayoťach
 huaponasa o'ch yoratsre'tensa'. Tarraña sa ñeñtes
 apacllates ñerra'm señoñeñ e'ñech esempo
 huaponasa eñet amach cha semanrra'teno attoch
 amach semnacheña o'ch toram̃psas sepaclo
 o'ch be'tosam̃psasa o'ch yoruennasa' ñeñ
 allpon semorrentyena. ⁴⁰ Ñeñto'mar notenes,
 sapa'cho'ña chocmuepa'chña seño'srtenna
 tarro'mar ñerra'm allempo atta es sepcha'yenapa'
 allempochña nohuerra na Ñeñten Acheñetosets.

*Atetcha' aparetterra ataruasañ ñeñ e'ñe cohuen
 etsotene' atet yecheña pamo'mte' ñaña atetcha'
 aparetterra po'poñ ataruasañ ñeñ ama etsotaye
 ñeñ atet yecheña pamo'mte'*

(Mt. 24.45-51)

⁴¹ Allempoña Pedropa' atet a'pto'ch:

—Partseshacha' ñeñt atet petma'ntatena te' ñeñtpa' ¿eseshacpa'tña, ñato' yocpate' ñeñfey peyochreshay pepeney amapa' ñato' allohuenacpa'nate'?

⁴² Partsesha'ñapa' alla toma'ntaterraneterr po'poñoneñ, atet otterranneterr:

—Allohuenespa' atetcha' sepa e'ñe cohuen atet ñerra'mrrate' puesheñarr yacma ñeñt yechena ñeñt pamo'mte' pen all pa'paclo. Ñeñtcha' po'taruas pene' chocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa puesheña'ttsocop. Ñapa' attecmach pena chocmach apuenanet ñerra'm esempoch cherrerr allempo atet anaret ñocop o'ch alla apa'yerraneterr po'pocheño. Ñapa' chocmach atet pena amach cachpuere tarro'mar ñapa' eñoteñ attoch e'ñe coshatenan pamo'mte'.

⁴³ Ñeñtña ataruasañpa' atarrcha' coshatueñ pamo'mte'; ñerra'm esempoch huerrapa' alla entuenan pa'taruasañer ama cho cachpuenano ñeñt po'taruas apa'neñ ahuañmo'choteñ.

⁴⁴ Po'ñoçh o'ch notas, atarrcha' coshatueñ. Añcha' coshaterre' o'ch nohuer pamo'mte' añcha'taret ñeñtcha' cohuanñpsaprete' ñeñt allpon echyen pamo'mte'.

⁴⁵ Tarraña ñeñt ataruasañer allempo ama huerra' pamo'mte' ñerra'm ñapa' atfa oten pueyoçhro, namo'mte'pa' amach ahuen huerro, allempoña ñapa' chach ashtapechyenan ataruasañeçhno ñeñtcha' rratañ ama't ñaña coyaneshohuen. Ñañaapa' attach allemeñ rrapretyen ñaña attach orrare'tapretyen allcha' atarr posa'tare'tyen. ⁴⁶ Ñeñtña ataruasañer

ñerra'm ñapa' attach ottatse'tyena amach es puecha'yeno amach eñoteñe ñeñte yetaroch huerra pamo'mte' ama't erro'tsencha' yetro huena. Machayotachña huerra pamo'mte'pa' atarrcha' coñchatuer, allach mueñuer all ñeñt o'patenaya allohuen ñeñt ama es otapotetso ama't mamesha.

⁴⁷ 'Elloña napa' o'ch notas, ama't erra'tsena ataruasañer ñerra'm eñotenan ñeñt atet muenen pamo'mte' tarraña ñerra'm ama cohuen ameñenano pamo'mte' ñerra'm ama e'ñe cohuenaye' es pa'yeno attoch e'ñe cohuen aguërran pamo'mte' esempoch huerra, ama't erra'tsena ataruasañerpa' ñeñt atet petsapa' atarrcha' ashtaretterret. ⁴⁸ Tarraña erra'tsencha' ataruasañer ñeñt ama eñotano ñeñt atet muenen pamo'mte' ama't ñetpa'cho'ña aña atet pa'yenet ñeñt ama cohuenayaye ama't e'ñe poctetñ attecnoch ashtaretterretañ ñamet, tarraña ñetpa' mamesha'ttsach ashtapecharetetyerret tarro'mar ñetpa' ama eñoteneto ñeñt atet muenen pamo'mte'. Allohueney erra'tsenotey ñeñtey atarr aparetey attoch atarr yeñoterrñañ ñeñt atarr sherbets Yomporecop, ñeñteycha'ña atarrcha' cohueney Yompor o'ch e'ñe yesherbatuon shonte' allohuen ñeñt atarr eñotateney. Ñaña allohueney erra'tsenotey ñeñtey atarr yemtenya Yompor elloña allempopa' atarrcha' cohueney o'ch allo'na e'ñe cohuen yesherba'neñ.

*Atto Jesúsapa' orrtatosan e'ñe ño'mar
elloptanna'teñets
(Mt. 10.34-36)*

49 'Te'pa' o'ch neñotaterrser po'poñ. Napa' atto nohuena arr patsro o'ch norrtatos elloptanna'teñets ñeñt' atarr huomenc atet ñerra'm tso' atarr atserrtetsa. Pocte' nenteñ o'ch orrtet e'ñe tayecma. 50 Ñaña nocoppa' e'ñe atet anaret na'muerochtataretterrach e'ñe atarr huomenc atet ñerra'mrate' cho chorratennet ñeñtcha' atarr nemuerochtaterre'. Neñto'mar napa' ñeñtña atarr nellcatene' te' atta atarr na'huanteñ esempoch e'ñech etsotuerra. 51 Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñenesha' arr patsro. Neñtpa' ama atteyaye. Añeepa'ña nohuapa allochñapa' e'ñe no'marpa' acheñenesha'ñapa' o'ch atta elloptanna'tyeset. 52 Ñehua, ñeñt noten te' e'ñe tayoteñ ñato' all yeçhena amnarsheña puepahuarro pocollopa' ñato' ñetpa' o'ch ellopa'tetstatet pocta'ña. Ñato' allo'tsen ma'psheña ñeñtcha' name'ñerraya, ñato' epsheñañapa' amach mueno o'ch ame'ñerrnet. Amapa' ñato' epsheñach allo'tsen ñeñtcha' name'ñerraya, ma'psheñañapa' amach mueno o'ch ame'ñerrnet. 53 Ñato' e'ñe no'marpa' o'ch ellopa'tetstatenet pocta'ña. Ñato' pompor o'ch epatare'tenan puechemer, amapa' ñato' puechemerñapa' o'ch epatare'tenan ñaña pompor, ñaña ñato' pachorpa' o'ch epatare'tenan puechoyor amapa' puechoyor o'ch epatare'tenan pachor, ñaña ñato' pa'so'mue o'ch epatare'tenan pa'to'ñen amapa' ñato' pa'to'ñenñapa' o'ch epatare'tenan pa'so'mue.

Atto Jesús pa' orrtatosan ñeñtcha' eñotatahuet o'

*čhapanet Yompor po'cohuenña**(Mt. 16.1-4; Mr. 8.11-13)*

⁵⁴ Allempoña Jesúsapa' atet yerpatana acheñenesha' ñeñt atet otyenet ñet pa'nyeto:

—Sapa' ñerra'm esempo senten arr chorren os all emuena atsne', sañapa' čhocmach atet sotyen: “Te'pa' čhach huatena.” Atetča'čo' p̄a, o'chčo' huatena. ⁵⁵ Ñaña ñerra'm esempo senten huena m̄orr topotot, ñeñtpa'čo'ña atetča' sotyen: “Te'pa' o' charenmoch.” Atetča'čo' p̄a, o'chčo' huorater huomenc. ⁵⁶ Sapa' atarr señoteneña ñeñt sentyen ento ñeñtña señoatene'; ama't ñaña ñeñt atet sentyen ñaña arr patsro ñeñtpa' e'ñe señoTueñeñ. Tarraña ñeñt atet norrtatyennas nepartsoteña, eso'marte'ña ñeñtñapa' amaña eñoatatensoña ñeñt atet pennas Yompor te' o'ch orrtatonas po'cohuenña. Ñeñtpa' attate' se-shquëñ.

Atto eñotatanet čhoyach amo'tsterraya e'ñe mamecma ñeñt ye'moñe'tene'

(Mt. 5.25-26)

⁵⁷ 'Elloña e'ñe soťa señoTEpa'chña ñeñt pocte' enten Yompor socop ñeñtča' atet sepanna. ⁵⁸ Ñato' o'ch netma'ntatasa atet ñerra'mrrate' esesha' setmantene' ñeñtča' sanmue' añcha'taretesho allcha' sa'poctaterr señoñ. Añ pocTetsa allempo ama sečhena' añcha'taretesho o'ch p̄och ñeñt petmantene': “O'ch ya'pocTaterr yeñoñ e'ñe cohuen tayecma tayepa'tña ama yečhena' añcha'taretesho.” Tarro'mar ñeñt petmantene' ñerra'm o'ch čhapatap̄ añcha'taretesho, añcha'tareTñapa'

čhate' pomap̄ policeyaneshesho, ñetñapa' čhate' abe'tapet cárcelo allcha' muerochtaterrpet. ⁵⁹ O'ch notas, ñerra'm čhoch yottam̄psasetpa' allasach o'pono, alloťñapa' amach ahuen čha'nmaterrseto. Esemphuañencha' čhoch sečha'nmaterret ñerra'm allempoch e'ñe setsa'tuerra ora allohuen ñeñť allpon quelle muenenet. Ama't e'ñe eptalla centavoťollña ñerra'm ama setsa'tueña' amachca'ye čha'nmaterrseto alloť. Ñeñťo'marña notenes o'ch e'ñe cohuen samo'tstera ñeñť se'moñe'tene' tayepa'tñapa' ama čhennasa' ñeñť atarr yoročhen senten socop.

13

Añ poctetsa yocop o'ch yocťape'cherr ello cohuen Yomporecop

¹ Allempo huapa puesheña'tets acheñenesha' Jesúsesho, ñetñapa' serrpare'tatoset Jesús atet en-tenet ñet; ñeñťpa' atet otoset:

—Allponsheña ñeñť galileo'marnesha' allo'tsa'yenet allecma muetsatenet berr ñeñť Yomporecop. Allempoñapa' huapanet ñeñť mueñen am̄cha'taret Pilato ñetñapa' čha muetsanatosanet e'ñe all allempo muetsatenet berr ñeñť Yomporecop. Attoña ñetpa' allña atsetatse'tatarettet ñet po'rras epuet pueberoret po'rras.

² Jesúsñapa' atet otanet:

—Sapa' čhate' sotenapañ ñeñť galileo'marnesha' allempo atet aťarettet ñato' ñetpa' atarrte' nanac ochñatet ellote' metana'tueñet allohuen po'potantañ

galileo'marnesha' po'chñaret. Chate' sotenapañ ñeñto'marte'ña atet apearettet ñeñt atarr sosey apencochen. ³ Tarraña napa' o'ch notas: Ama't allohuenes saña ñerra'm amach e'ñe cohuen soctape'cherro ello Yomporecop, sapa'cho'ña attecmaç seperra sechenca'huerrach e'ñe poctacma. ⁴ Ñaña ñeñt çharra' ñeñt puechetsa posocsheña ñeñt colla'huatsa ahuaña ñeñt a'tpetse't pocoll torrepo' allempo mata'nerr Jerusaléno e'ñe all oteñet Siloé. Ñehua, sapa' çhate' sotenapañ ñeñt a'cllaterr torrepa' ñetpa' atarrte' atparña'tet ellote' metana'tueñet allohuen po'potantañ ñeñt atto atpare'tena jerusaléno'marnesha'. ⁵ Tarraña napa' o'ch notas: Ama't allohuenes saña ñerra'm amach e'ñe cohuen soctape'cherro ello Yomporecop, sapa'cho'ña attecmaç seperra sechenca'huerrach e'ñe poctacma.

Arrpa' all toma'ntatanet Jesús atet pena partech ñeñt ama me'tetso

⁶ Allempoña Jesúsapa' alla toma'ntaterraneterr po'pocheño, ñeñtpa' atet oterraneterr:

—Puesheñarr acheñ all puenarenmopa' allña' ahuañmo'choteñ nare'tatenan ñaña puecharr partech.* Atteñapa' çhap allempo huapa e'nosñañ pue'mer. Tarraña ama't puenarrapa' ama entosñañe pue'mer. Partayechpa' ama me'teno. ⁷ Allempoña' atet otan ñeñt cohuanpene' puenarenma': "Te'pa' o' met ma'pa char çhocma nohuena e'nene' partech pue'mer.

* **13:6** Ñehua, Jesús añ toma'ntatanet higo ñeñt puenarenm penet all pa'nyo.

Teme'ttsen ama't pueñarra pue'merpa' ama nenteññañe. Te'pa' o'ch p̄a'mater tarro'mar e'ñe orrena quechcare'tennay yepatseñ atto ama yenare'teno po'poñ narmets all." ⁸ Tarraña ñeñt̄ cohuan̄pene' narmetspa' atet̄ otan pamo'mte': "Allach nomporcha' añ char ñeñt̄ o' huerrerrpa' napa' o'ch na'mueñtsetāmpes pats o'ch nenoñ amar. ⁹ Ñato'rraña atet̄ nepe'pa' o'ch cohuen me't tsapa't charo. Tarraña ñerra'm ama me'topa' pocte'ñächo' allempopa' o'ch p̄a'matater."

Atto Jesús'pa' a'crraterran coyanesha' ñeñt̄ atta mo'quētsa ama't añe yetro allempocma amesenet

¹⁰ Allempo čhapa'muener allempo amesenet, Jesúsñapa' yečhatenanet judionesha' po'prahueto. ¹¹ Allñapa' allo'tsen puesheñarr coyanesha' ñeñt̄ čha mo'quēna, ama eshcaye' pačharrteno. Ñeñtpa' oneñe't̄ atet̄ p̄atene'. Ahuatoteñ̄ atta pena o' čharren char puechena posoc atta mo'quēna. ¹² Jesúsñapa' all eñchpa' o' čhore'tospa' atet̄ och:

—Noča te'pa' pasaterreṗcha' ñeñt̄ atto atarr pemueročhtena.

¹³ Allempoñapa' a'ṗllamco'ch. A'ṗllamco'tue'pa' allorocma e'ñe cohuen pačharrterra. Ñaña'pa' atarr aye'chočhtaterran Yompor. ¹⁴ Allempoña ñeñt̄ añcha'tarettetsa all judionesha' po'prahuo, ñapa' allempo entan atet̄ o' a'crratan Jesús atsnañe't̄, ñaña'pa' ñeñña atarr atsrre'mate'. Ama't mameshapa' ama pocteye' eñche o'ch a'crratan acheñ ñeñte yetro allempo amesenet. Ñeñto'marña ñapa' atet̄ otan acheñenesha':

—Eñall pechapmat yet allempo pocte' o'ch yetaruasen. Ñeñtpa' pocte' o'ch sehuapa allempo attoch sa'crrater atsnañeť. Tarraña añ yetro allempo yamesen amach sehuapatsto a'crrate' atsnañeť.

¹⁵ Partsesha'ñapa' atet och:

—Sapa' ñeñtes e'ñe sommo'cheñoťpa' atarr seshcare'ten. Sapa'cho'ña ama't añe yetro allempocma yamesen čhocma setaruasen saña. Sepyampeñ sehuacsher, sashanor allecma serrateñ o'ch sanemñ ñaña oño allcha' sonayeñ oñ.

¹⁶ Añ coyanesha' ama't ñeñť po'mñreneñ pen yatañ Abraham ama't čcharra' puechena posoc char ñeñť allponmat o' huanquěr oneñeť, pocte'ca'ye o'ch ya'rroyatater ama't añe yetro allempo yamesen.

¹⁷ Acheñenesha' allohuen ñeñť e'moñe'tene' ñetpa' ñeñťña atarr pencatahuet. Po'potantañña acheñeneshačhnopa' ñetñapa' atarr nanac coshenet. Atarr nanac cohuen entenet ñeñť atet pa Jesús.

Atto Jesús'pa' toma'ntaterranet atet pena pue'llomer ñeñť otenet mostazllom

(Mt. 13.31-32; Mr. 4.30-32)

¹⁸ Ñeñño'marña allempopa' alla o'terraneterr:

—Añ Yompor po'cohuenña ñeñť atto ayochreshattena ña, ñanompa' e'ñech puesheña'ttsa ame'ña'yetsa, allempoteññapa' allo'nach sen atonetnomtsa ñeñťcha' ame'ñerrtsa attochña e'ñe epa'huerra erracmañen Yompor po'cohuenña. Ñeñťña te'pa' o'ch netma'ntatasa ñeñť atet pena ña. ¹⁹ Ñehua, ñeñťpa' atet pena ñerra'mrrate' pue'llomer ñeñť atarr añeťolleshallmerr ñeñť

otenet mostazllomñ. Ñeñt̃ pue'llom̃retollpa' puešheñarrñapa' o' aneñ pa'mro allcha' nare'teña'. E'ñe allponmatatsapa' o' chop, ñeñt̃ñapa' allo'na sen rrorranmats e'ñe cohuen atarrchetnom. Ñeñt̃ña narmetsocherpa' o'ch huačha'toña o'tečno ñeñt̃cha' ama'tanatyesosets puetacro'mar.

Atto Jesús'pa' toma'ntaterranet ñeñt̃ atet̃ pena chase'

(Mt. 13.33)

²⁰ Elloña alla o'terraneterr:

—Po'poñoneñ o'ch netma'ntatasa ñeñt̃ atet̃ pena Yompor po'cohuenña ñeñt̃ atto atarr ayochreshattena ña. Ñeñt̃pa' ama'tcha' añeñolla ñeñt̃cha' ñanom orrtatsa t̃arraña e'ñe ña po'huamencot̃pa' mame'tollapa' o'ch e'ñe epa'hua ora errap̃aren.

²¹ Ñeñt̃pa' añ toma'ntaterraneterr atet̃ pena chase':

—Ñeñt̃ chase'pa' allo tsetenan coyanesha' harina' ñeñt̃ oñetsetst̃aten attoch a'chasatan harina' esheccha' e'ñe a'muesatue. Ñeñt̃ña chase'pa' ama'tcha' añeñolla net, ama'tcha' aton harina' ñeñt̃ ma'pa arroga, mame'tollapa' o'ch e'ñe a'muesatuanña ama't atarr aton harina'.

Atto Jesús'pa' toma'ntaterraneterr ñerra'mrrate' yetarro'tollo yebe'ten esheccha' yečhap Yomporesho

(Mt. 7.13-14, 21-23)

²² All oñemyen Jesús e'ñe ora asuahuanom allohuen anetso'mar all shonta'yena acheñenesha' ama't ñaña all ama tama eñalleyaye acheñenesha'. Allña e'ñe serrpare'tatyesnomanet. Allempo

oñemyen allemeñ anetso'mar ñapa' arr sen
Jerusaléño all sechena. ²³ All oñen toñopa'
allempona puesheñarrpa' a'p̄to'tnom̄, atet och:

—Ayochreshate, ñeñtcha' allpon
a'qeshp̄ataretterrtsapa' ta'm ñetpa'
¿puesheña'ttsetate' ñato' amapa' atarrcha' shonte'?

Jesúsña'pa' atet och:

²⁴ —Sapa' añcha'ña e'ñe cohuen sema'yochrena
ñeñt cohuen enten Yompor attochña sesuanom
ñeñt ama cohuenaye' enteno ña. Ñeñtpa'
o'ch netma'ntacha atet ñerra'mrrate' allcha'
yebe'tos esheccha' yechap ñesho ñeñtpa' atarr
añetoll, atarr torrapo' o'ch yebe'tos all. Ñaña
o'ch notas esempohuañen ama'tcha' shonte'
acheñenesha' ñeñtcha' atarr muenatseñ o'ch
be'terretañ all attoch cherretañ Yomporesho
tarraña allempopa' amach eshec be'terreto attoch
cherret all tarro'mar allempopa' o'ch huañerr
atto atarr cohueney Yompor. ²⁵ Ñeñtpa' o'ch
netma'ntacha atet ñerra'mrrate' esempo o'ch
chen ñeñt apacllatesha' ñaña'pa' o'ch tantuena
o'ch e'ñe echarr yottam̄pesuena. Allempopa'
ama't e'ñe eseshapa' amach eshec be'tosoña all.
Allempona ama'tcha' shonteseñ o'ch sehua'cha'ta
all petotach sechorros allotcha' se'chore'tos
apacllatesha'. Allña sapa' atetcha' sotos:
“Ayochreshate petoram̄psapuey.” Ñapa' atetcha'
otapas: “Napa' ama nentarso, erro'tte' sehuenaña
sa.” ²⁶ Sañapa' atetcha' sotererr: “Ama't parrocmā
yerrallme'chyese'teña ahuañmo'cha ñaña ama't
ya ya'netsro'mar allecma chopeñe'chyenet
allca'yeña peychatyese't.” ²⁷ Tarraña ñapa'

atetcha' oterrserr: "Te'pa' o'ch notas, napa' amaca'ye po'ño'ch nentarso, errofte' sehuenañña sa. Te'pa' orrerres arroť neshoť allohuenes ñeñtes ma'yo'chrenaya ñeñť ama pocte' enteno Yompor."
²⁸ O'ch ahues all ñeñť o'patatenset sa. Allñapa' allcha' seyahuanrrortosa, sanmueñoť atserrpa' serraso'tyesoscha' sas. Allotcha'ña sentosña satañneshachno —Abraham ñaña Isaac ñaña Jacob ñaña allohuen ñeñť a'mta'yesaye't Yompor po'ñoñ. Ñetñapa' e'ñe Yomporesho'tsa'yenet all añcha'tarettena ña. Sañapa' cha'petoña hua'petoña huapore'tenset.
²⁹ Allñapa' allenateñcha' hua'cha'ta shonte' ñeñť ama judioneshayaye ñeñťcha' anorrcha'tyesosets all e'ñe Yomporesho all añcha'tarettena ña allcha' rrallme'choset all e'ñe cohuentena Yompor.
³⁰ Te'pa' seño'chcha' eñall acheñenesha' ñeñť ama asherbenaye' senteno sa te' țarraña allempoña ñetpa' atarrcha' asherben enterranet Yompor. Ñaña eñall acheñenesha' ñeñť atarr asherben sentyen sa te', țarraña allempoña ñetpa' amach asherbenaye' enterraneto Yompor.

*Atto Jesús pa' puellquëññotan
 jerusaléño'marnesha' atarr ya'na'tenanet*

(Mt. 23.37-39)

³¹ E'ñe ñeñte yetrocma allempo hua'cha'toña patantarr fariseonesha'. Ñetñapa' atet otoset Jesús:
 —Te'pa' o'ch peyeta arroť țarro'mar añcha'taret Herodespa' o'patenpa' ahuo'ch muetsatap.

³² Jesúsñapa' atet otapanet:

—O'ch ahuerrespa' atetcha' sotuer Herodes ñeñť atarr eñotene' shequëñnets: "Te'pa' o'ch

peñoch, napa' atterach necačhpatateññañ
 acheñenesha' po'neñeñer ñaña atterach shonte'
 na'crratyets ñeñt atсна'tyets. Atet nepena te',
 tsapatoneṭpa'cho'ña attecmach nepena, o'chña
 tsapatonterrerra' o'ch e'ñe netsotatue allohuen."
³³ Nocoppa' añ poctetsa chocmach nesen ama't
 te', ama't tsapatoneṭpa'cho'ña, ama't ñaña o'ch
 tsapatonterrerra' chocmach nesen. Attotach
 necherr Jerusaléño, tarro'mar allpa' allecma
 chocma muetsayeseṭt ñeñt a'mta'yesayeṭt
 Yompor po'ñoñ.

³⁴ Allempoña Jesús e'ñe puellquëñoṭ judione-
 sha'pa' atet eñorena ñocpuet, ñeñto'marña atet
 otanet:

—Sa jerusaléño'marneshacha' ñeñtes
 muetsanatyeseṭt ñeñt a'mta'yesayeṭt Yompor
 po'ñoñ, sa ñeñtes rrollapechyesayeṭt ñeñt
 amñareñ sesho. Atarr atonoche'tats nemneñeñ
 o'ch na'yapačha'huerrsoñ allohuenes nesho
 attoch e'ñe cohuen necuam̄pensoñ. Nemneñeñ
 o'ch na'yapačha'huerres atet ñerra'mrrate'
 atollop a'yapačhene' puechoyoresha' o'ch
 e'ñe seto'tuanet. Tarraña sañapa' ama't e'ñe
 mameshapa' amaña semno. ³⁵ Te'ñapa' all
 seyčhena sa, Yomporñapa' o'ch a'ypo'ñerres.
 Tarro'mar te'pa' o'ch alla noterrerr: Na
 po'pocheñopa' amach alla senterrno te'.
 Esemphuañenñapa' senterrencha' allempoñapa'
 atetcha' soterren: "Aye'chočtatpahuepa'ch
 Jesucristo ñeñt huapatsa ñeñt llesensen
 Yeyomporer."

14

Atto Jesúspa' a'crraterran puesheñarr yacma ñeñt̃ cha ananen

¹ Allempoña çherrerr pamtarr allempo amesenet. Jesúsñapa' ahuo' allcha' rrallme'chapretenana' puesheñarr fariseo ñeñt̃ atarr amcha'tarettetsa. Chap all pa'paclopa' po'potantañña fariseonesha' ñetñapa' atarr cohuana'tyesapet Jesús. ² Allñapa' allo'tsen puesheñarr yacma ñeñt̃ cha ananen. ³ Jesúsñapa' all serrpare'tos epuet fariseonesha' ñaña ñeñt̃ allo'tsa'yen ñeñt̃ atarr etsotene' ñoñets ñeñt̃ atet̃ anaret̃ judioneshacop. Ñañapa' atta a'p̃to'tosanet e'ñe po'tomña, allochñapa' o'ch eñoch ñato' errottencha' anapet. Ñeñt̃pa' atet̃ otosanet:

—¿Errotena'tña sotenna sa, ta'm pocte'te' o'ch na'crratos atsnañeñ ane yetro allempo yamesen? ¿Atfe't otenña ñoñets ñeñt̃ atet̃ anaret̃, ñato' amate'?

⁴ Fariseonesha'ñapa' ama eseshaye' anapuetso ama't puesheñarroña. Allempoña Jesúspa' a'p̃llamco'tosan atsnañeñ. E'ñe a'p̃llamco'tue'pa' cha corrrrtsa allenta mueñer pa'pacillo.

⁵ Allempoña Jesúspa' alla oterranerr fariseonesha':
—Sapa' ñerra'm sashanor amapa' sehuacsher shora'nets aroroto all chorren oñ, ama'tcha'ña sechtereña allot e'ñe allorocma ama't ane yetro allempocma yamesen.

⁶ Ñetñapa' ama errotenaye' otenaye' enteñeto ama't e'ñe puesheñarroña.

Atto ahua'ñarettet o'ch rrallme'chapreteñeta' ñeñt̃ sena'tetsa

⁷ Allempoña ñeñt̃ ahua'ñareñsha' ñetña'pa' aña atarr muenenet o'ch anorryesoset allecma anen ñeñt̃ atarr añcha'na'tpo' entyenet. Jesúsña'pa' entapanet ñeñt̃ atet̃ muenenet ñet o'ch čha ommo'chyesoset. Allempoña'pa' atet̃ otapanet:

⁸ —Ñerra'm esempo ahua'ñareñes o'ch serrallme'chapreteña' ñeñt̃ sena'tetsa, sommo'cheño'pa' amach arra sanorratsetyesoso allecma anen ñeñt̃ atarr añcha'na'tpo' entyenet. Ñetña chenta'pa' o'ch huapuet ñamet. ⁹ Ane'tañ ñeñt̃ sehua'ñene' allohuenes ñaña'pa' o'ch huapa pesho o'ch otaṣ: “Te'pa' o'ch petanterra arroṣ, all ṣanen te'pa' o' huapaña ñeñt̃ panorrrpue' pene' all ṣanen ñeñt̃ atarr añcha'na'tpo' entyenet.” Paña allempopa' atarrcha' pepenquēñoṣ petanterra o'ch ahueṣ allcha' ṣanorros allecma anorryen ñeñt̃ ama esoshe'maye' entyeneto. ¹⁰ Sapa' atet̃cha'ña seṣa ñerra'm esempo hua'ñenset. Allempo sečhap all hua'ñenset sapa' allach sanorros allecma anorrčha'tyen ñeñt̃ ama esoshe'maye' entyeneto. Allña'pa' o'ch huapa ane'tañ, ñapa' atet̃cha' otoseṣ: “Masheñcha' ṣapa' arrcha' ṣanorros allecma anen ñeñt̃ atarr añcha'na'tpo' entyenet.” Attochña allohuen ahua'ñareñsha'pa' o'ch entapet ṣapa' atarr añcha'na'tpo' entyenpet. ¹¹ Tarro'mar allohuen ñeñt̃ e'ñe cohuen entetsa e'ñe pommo'cheñoṣ ñetña tsapaṣoneṣpa' amach esoshe'maye' entereto. Tarraña allohuen ñeñt̃ ama esoshe'maye' entetso te', ñeñt̃ña tsapaṣoneṣpa' atarrcha' cohuen enteret.

¹² Allempoña'pa' atet̃ otan ane'tañ ñeñt̃

hua'ñene':

—Ñerra'm esempoch p̄orrtaten rreñets ñeñtcha' serra'muen aromtaña amapa' ellerronef amach e'ñe aña pehua'ñatsto ñeñt e'ñe parro peyemtena ñaña ñeñt pemo'nasheñ pepen ñaña po'potantañ ñeñt e'ñe p̄amo'tsesha' pepen ama't ñaña allo'marnesha' ñeñt atarr eçllayoretet. Tarro'mar ñerra'm ñeñta pehua'ñenpa' ñetpa'cho'ña tsapa-tonet o'ch alla hua'ñerrpet p̄ama. Attoch tsa'terrpet. ¹³ Tarraña ñerra'm esempoch p̄orrtat rreñets aña'nachña pehua'ña'yes ñeñt atarr huocchañetyets ñaña achocraña'chno ñaña ñeñt checa're'pachno ñaña aporo'yetechno. ¹⁴ Attochña p̄apa' atarrcha' cosheñtso'tsenep̄ tarro'mar ñetpa' amach errotenot̄ alla tsa'terrpeto. Papa' esempohuañencha'ña atsa'taretep̄ allempoch atantatare'tterra allohuen ñeñt e'ñe pocte' es p̄a'yestse't̄.

Arrpa' all atma'ntatare'ttena ane'tañ ñeñt atarr aton yeçhcatatene' rreñets

¹⁵ Allempo e'mueñet Jesús atet ser- rpare'tatuanet, puesheñarrña ñeñt parro anorrchenet ñeñt parro rrallme'chenet, ñaña'apa' atet otan Jesús:

—Atarrcha' cosheñtso'tsene'y allohueney ñeñteycha' rrallme'chapreterre' Yompor all amcha'tare'ttena pue'ntaño.

¹⁶ Jesúsña'apa' toma'ntaterraneterr, ñeñt'pa' atet oterraneterr:

—Eñall puesheñarr ane'tañ ñaña'apa' o'ch yeçhcatatan atarr shonte' aton rreñets.

Allempoñapa' otyesan shonte' acheñenesha' ñeñtcha' rrallme'chapretenaya' esempoch e'ñe a'potatuan rreñets. ¹⁷ O'ña chap allempo e'ñe a'potatuan rreñetspa' ñaña'pa' mueñan pa'taruasañer ñeñtcha' hua'ña'yenaya' allohuen acheñenesha' ñeñt otarettatsa ahuaña. Ñeñtña pa'taruasañerpa' atet otosan acheñenesha':

—Te'pa' o'ca'ye e'ñe a'potaretetuaña rreñets sona'cha't o'ch serrallme'chapretena'. ¹⁸ Tarraña ñeñt ahua'ñaretechnopa' ñetñapa' ama esesha' tatso. Ñehua, ñeñt ñanom puesheñarrpa' atet ot: “Napa' te'pa' o'ca'ye nerañta pats, o'chca'ye ahuen o'ch necua'yena'. Potuercha' pamo'mte' peretnerrnepa', napa' amachca'ye neto.” ¹⁹ Po'psheñeñpa'cho'ña atet ot: “Napa'cho'ña o'ca'ye nerañta charrana toro po'yuntohuen e'ñe epna'ttsocma; o'chca'ye ahuen o'ch netpach taruasate'. Potuercha' pamo'mte' peretnerrnepa', napa' amachca'ye neto.” ²⁰ Po'psheñeñpa'cho'ña atet ot: “Napa' errtenca'ye sena'tetsa ñeñto'marña napa' amachca'ye eshec neto.” ²¹ Ñeñtña ataruasañer atet otyes acheñenesha'pa' ñaña'pa' ahuerr pamo'mtayesho, serrpare'tatuerran pamo'mte' atet otyeset ñeñt hua'ña'yeseñ. Ane'tañña'pa' ñeñtña atarr atrre'mate'. Patsrre'mueño'pa' atet oterranerr pa'taruasañer: “Te'pa' o'ch ahuerrperr e'ñe tayecma ñaña all anetso allecma atarr chopeñe'chyen shonte' acheñenesha'. Allotcha'ña pehuapaterr huocchañnesha'chno ñaña achocrañachno ñaña aporo'yetechno ñaña checa'repa'chno.” ²² Pa'taruasañerñapa' atetcho'

perrerr. Allempo huerra atet otuerranerr pamo'mte': "Nomporcha' ñeñt atet potenpa' te'pa' o' e'ñe atet nepohua. Tarraña allcha' anorrcha'tyes ñeñtcha' rrallme'chosetspa' orameñ." ²³ Pamo'mte'ñapa' atet otererr: "Te'pa' o'ch alla ahuerrperr allampaño'mar all shonte' toñechno allecma chopeñe'chyen acheñenesha'. Allñapa' atarrcha' potare'tyes acheñenesha' onetepa' arr nepaclo attoch e'ñe chorra acheñenesha' arr nepaclo. ²⁴ Po'ñoch te' napa' o'ch notas, ñeñt ñanom nehua'ñatyeseñpa' ñetña te'ñapa' ama't e'ñe puesheñarro'tetapa' amach rrallme'chapreterrneto attoch cosherret nesho."

Añ poctetsa o'ch e'ñe yesuanem ñeñt e'ñe yocpa attoch yoc'er Cristo e'ñe poctacma

²⁵ All oñemyen Jesúsapa' shonte' acheñenesha' cota'huanene'. Ñañaapa' cohua'nmanet allenet shontenetpa' atet otnomanet:

²⁶ —Ñerra'm esesha' muene' o'ch coterrren e'ñe po'ñoch, añ nemnen o'ch atarr nanac morrentennet. Elloch metaneñet atto atarr morrenteñet pompor, ama't ñaña pachor, ama't ñaña puetapor ñaña puechemeresha', pa'mo'nasheñnesha', po'chanesha'. Atto atarr morrentennet ello metaneñet atto atarr morrentenet ñañeñeta ñeñt atto correnet arr patsro. Ñerra'm erra'tsen ama atteye' nemorrentenayepa' ñañaapa' amach erro'tenot neyochresha' neperraneto. ²⁷ Tarro'mar ñerra'm erra'tsen ama e'ñeye' sehuanmaye ñeñt atet muenenet e'ñe ñocueta attoch coterrnet e'ñe

poctacma, nañapa' amach errotenoť neyochresha' neperraneto. Ñeñťpa' añ toma'ntena atet ñerra'mrrate' čho sechechnen secorsoch allcha' semueročhta saña. ²⁸ Ñeñťo'marña ñerra'm erra'tsenoťes muenene' o'ch neyochresha' neperres, añ poctetsa čhoch ñanom soctape'ch, e'ñeťe' pocte' senteñ o'ch sesuanom ora allohuen ñeñť atet notenes. Ñeñťpa' atet'cha' netma'ntacha atet ñerra'mrrate' eseshas muenene' o'ch saťomat sepaquell atarrpo'pa' añ sepalltena čhoch ñanom sanorr allcha' soctape'ch errponte' tsa'tena. Ñato' eñallťe' allpon quelle attoch mameshapa' o'ch sa'pue'. ²⁹ Ñerra'm ama atet ñanom soctape'chenopa' ñato' o'ch saťomatañ ñanom alloch echarr sorrat sepaquell, ñerra'm čha sehuañapes quelle attoch sa'pañ sepaquellpa' attach secačhpue'. Acheñenesha'ña ñeñť sentene'pa' čhach che'tatsetaset; ³⁰ ñetñapa' atet'cha' otyeset: "Añ acheñerpa' o' tomataneñña atarrpo' pa'paquell, alla huañapes quellepa' ama esoye' a'patano pa'paquell." ³¹ Ñeñťara cotapñatser o'ch alla netma'ntacha po'poñoneť. Ateť ñerra'mrrate' puesheñarr añcha'tareť ñerra'm añ cotape'chen o'ch quellaratan po'solltarer epuet po'psheñeñ añcha'tareť po'solltarer čhoch ñanom anorr allcha' e'ñe cohuen cotape'ch. Allempopa' atet'cha' ot: "Napa' e'ñeca' čharra' mila nechen nesolltarer; po'psheñeñña añcha'tareťpa' echenan po'solltarer epoch čharra' mil. Ta'm, pocte'te' o'ch nemñe čharra' mil nesolltarer ñeñťcha' poctapue' epoch čharra' mil solltarnesha' ñeñťcha'

yehuapoya. Ta'mca'ye a'mchechatuette'ca'ye —shonte'." ³² Allempoña o'ch atet cotape'chuapa' ñerra'm ama errot apenaye' eñchepa' allempo ama aponmarettteneta' ñaña'pa' o'ch mueñan allponsheña ñeñtcha' atet otosahuet: "Yapa' añecop yen o'ch ya'pocstaterr ñoñets e'ñe cohuen e'ñe atta, amach yeçllaranna'tatsto." ³³ Ñeñto'mar notenes, ñerra'm eseshas ama e'ñe pocyte' senteñe o'ch sesuanom ora ñeñt allpon sechen, nañapa' amach errotenoñ neyochresha' neperrso.

Arrpa' all atma'ntatarettet atet ñerra'm pos o'ch huañ po'poserrteña'pa' o'huañcha' sherba'
(Mt. 5.13; Mr. 9.50)

³⁴ Ñehua, yapa' yeñoteñ pospa' atarr cohuen sherbenan allohuen acheñenesha' arr patsro. (Allohuen ñeñt po'ñoçh neyochresha' nepen ñetña'pa' atarr sherbenet attet ñerra'mrrate' pos atarr cohuen sherbeney.) Tarraña pospa' ñerra'm o'ch huañerr po'poserrteña amach errotenoñ ellopa' ya'poserrtatere. ³⁵ Attoña amach es sherberro ama't e'ñe coñe'ta. Ama't attoch yetnarrataterr allo patspa' ama't ñeñtecpapa' amach sherberro; ñeñto'marña ama't ñeñtecpapa' amach yañño'tatsche. Ñeñto'marña o'ch yehuapore'ter a'yo. Ñerra'm eseshaste' ne'mñotene'pa' çhaponasepa'ch seyoçhro ñeñt atet neyçhatenes.

15

Acheñ ñeñt ama ame'ñetsopa' arrpa' all atma'ntatarettet atet ñerra'm carrnero ñeñt

*chenquëtsa**(Mt. 18.10-14)*

¹ Shonte' ñeñt cobrets quelle gobiernocop ñeñtara ñeñt atarr shecare'tyets ñaña shonte' ochñañenesha', ñetñapa' huača'tet Jesúsesho o'ch e'mñoteññañeta' ñeñt atet serrpare'tatenan allohuen acheñenesha'. ² Añña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop, ñetñapa' ama't mameshapa' ama pocteye' enteñeto. Ñetñapa' atta sasare'teñet Jesúsapa' ñeñtpa' atet otanna'tyenet:

—Añ acheñer ama't ñeñt atarr ochñañenesha'pa' eso'marte'ña e'ñe cohuen agapyenanet, ñaña alla rrallme'chapreteñet.

³ Ñeñto'mar Jesúsapa' alla toma'ntaterraneterr; ñeñtpa' atet otarraneterr:

⁴ —Sapa' ñerra'm eseshas echene' shonte' secarrneror, çharroch çcharra' sechen tarraña ñerra'm pomocarrña machayoña sa'chencachpa' ama't atet sepeno. O'ch sesa'nom allohuen po'potantañ ñeñt o' noventa nueñaña all amayo ama't atarr a'yopa' o'ch ahues e'nerraya' pomocarr ñeñt chenquëtsa. Allcha' se'name'tyera'pa' attotach senter. ⁵ Allña senterpa' o'ch senatner, e'ñech socsheñeshocmañen saner. ⁶ O'chña seçhapater sepaclopa' allñapa' o'ch seçhore'tuer samo'tsesha' o'ch onača'tet. Allñapa' o'ch sotuerr: “Te'pa' o'ch socshapreterrna necarrneror, te'pa' o' nenterrña ñeñt na'chencaten.” ⁷ Ñeñto'marña te'pa' notenes: Yamo'mte' ñeñt pue'taño'tsen attecmach atarr nanac cosherrana ama't puesheñarra

acheñ ñeñt̃ atarr ochñañt̃ ñerra'm esempoçh o'ch cotape'cherret ello e'ñe cohuen ñocop. Elloch metana'tuerran ñeñt̃ atto coshenana po'potantañ ñeñt̃ shonte' ñeñt̃ e'ñe pocte' es pa'yenet ñocop ama't ñetpa' shontet atet̃ ñerra'm noventa nueve carrnero ñaña ñetpa' ama't ama pallteneto o'ch cotape'cherret ello cohuen.

Arrpa' all atma'ntatarettēna puetallarr quelle ñeñt̃ a'chencaten pamo'mte'

8 'Ñeñt̃ara cotap̃ñats, te'pa' ñato' atetcha' netma'ntacha po'poñonet̃ atet̃ ñerra'm puesheñarr coyanesha' ñerra'm echenan çharratlla po'çllayor ñeñt̃ atarr morrentena. Ñerra'm çho a'chencach puetallarrpa' ama'tcha' a'llchatanoña po'lampareñ attoch tarrapo'tenan pa'paquell allcha' e'name'tyerran puetallarr po'çllayor. Atto'tcha'ña enter. 9 O'chña enterpa' allempoñapa' o'ch agotan pamo'tsesha' e'ñe pacmaneshoche', atetcha' otanet: "Te'pa' o'ch socshapreterrna ñeñt̃ puetallarr neçllayor ñeñt̃ na'chencat, te'pa' o' nenter." 10 Te'pa' o'ch noterrser, elloña atarrcha' nanac coshateret Yompör po'mllaño'teñreneshohuen ñerra'm esempo ama't puesheñarra acheñ ñeñt̃ atarr ochñañt̃pa' o'ch cotape'cherret ello e'ñe cohuen Yomporecop.

Arrpa' all atma'ntatarettēna puesheñarr yacma puechemer ñeñt̃ atarr ottatsñañt̃

11 Elloña Jesúsapa' alla toma'ntaterraneterr, ñeñt̃pa' atet̃ oterraneterr:

—Eñall puesheñarr acheñ echenan epsheña puechemer. 12 Ñeñt̃ña puechoyomer penpa'

atet otan pompor: “Apacha’ ñeñt ora allpon pechen te’ napa’ nemneñ o’ch ñapuen e’ñe tayecma ñeñt allpon ño’patatenna.” Allempoña pompor ora ñeñt allpon echyenpa’ o’ apa’yesan epsheño’mar puechemerasha’ ñeñt allpon o’patatyenanet e’ñe puesheña’ttset. ¹³ E’ñe allponmatatsa ñeñtña puechoyomer penpa’ o’ e’ñe pomhuahuanman ora allohuen ñeñt allpon aþ pompor allo agapan shonte’ quelle attoch ta ñachayo po’poñ anetso. Allempoña chap ñachayopa’ allña’pa’ sosya’tsañechna atet ña’yesos. Attoña ama’t shonte’ po’çllayor ñeñt anem o’ e’ñe a’gasta’huahue e’ñe pottatse’teñoť. ¹⁴ O’ e’ñe a’gasta’huan ora po’çllayorpa’ allempoña allpa’ o’ orrta muecheñets all ñeñte anetsro. Ñaña’pa’ o’huañ erraye’ entan puerrar ñeñtcha’ rren. ¹⁵ Allempoña ñapa’ o’ ahuo’ allo’tsen ane’tañ all e’nyenan taruas. Ane’tañña’pa’ aña aþ po’taruas o’ch auyesos a’yenet allcha’ cohuanpesyesoñ po’chañchor. ¹⁶ Ña pa’chporrñoťpa’ atarr mueneñ o’ch rrapretosan chañcho puerrar attoch yetosa. Ama’t chañchopa’ pa’talle’tsa puerrar pen ñapa’cho’ña ñeñtña atarr muenen o’ch rros ñarraña ama’t chañcho ama eseshaye’ apuenaye puerrar ñeñtcha’ rra’. ¹⁷ Atteñapa’ machayoťa chapoña pueyoçhro, atet ot: “Apa pa’taruasañer ama’t shontetpa’ echyenet puerrar; ello puechare’tyena. Naña arpa’ o’ nerromuerrmoch nachporrñoť. ¹⁸ Te’pa’ o’ch ahuerren apuesho; te’ napa’ atetcha’ notuer: Apacha’ napa’ o’ neþohua ñeñt ama cohuenayaye Yomporecop ama’t ñaña þocop.

19 Napa' ama cohuenayayno attoch pechemer peřapuerren. Te' napa' aña pochtetsa nocop řapa' řa'taruasañrach peřapuerren." 20 O'ña atet cotape'chua ello e'ñe cohuen Yomporecoppa' allempoñapa' ahuen pomporesho.

'Ama't atarr ellařarmeñ allempo entapueñ pompor e'ñe puemuereñoť mata pochtapueñpa' a'čhono'tapueñ, tso'ttsapa'tapueñ. Ñeñtpa' atet huomñcha'tapuenan puechemer atto e'ñe cohuen agapapueñ. 21 Puechemerñapa' atet otueñ: "Apache' napa' o' neřohua ñeñť ama cohuenayaye Yomporecop ama't ñaña řocop. Na te'pa' ama cohuenayayno attoch pechemer peřapuerren."

22 Tarraña pomporñapa' e'ñe allorocma otan pueñañreshačhno: "O'ch sena' e'ñe tayecma shetamuets ñeñť atarr cohuen cočhnesha', o'ch sechorratapuennana nechemer. O'ch senatapueñ ñaña anillo potařo, o'ch senatapueñ ñaña sapatets pa'tco. 23 O'ch sennana' ñaña nehuacsher ñeñť atarr ne'soya'taten o'ch semtse o'ch yerrallme'ch o'ch yocshame'tamřsapueña. 24 Tarro'mar añ nechemer ama't o' rromhuañ, te'ñapa' o' alla tanterra. Ama't o' chenca'huañpa' te'ñapa' o' alla nenter." Allempoñapa' atarr nanac coshame'tamřsapueñet.

25 'Ñehua, po'psheñeñ puechemer ñeñť popo'nar ñañaapa' pa'mro'tsen allempo čhen puechoyomer. Allempoña err pa'mroť e'ñe ya'rroterrtsa pocollopa' o' e'mhuerran coshamñiats all requerquenet ñaña ashe'rarañ. 26 Allempoñapa' chore'tuerran cheshachorpa' a'řto'tuer: "¿Eso'mare'tña coshame'tenet? ¿Eso'tña atarr

coshame'tam̃penet? ²⁷ Cheshachorñapa' atet otapuer: "O' huena pemo'nasheñ, p̃omporna' o' muetsatan becer ñeñt̃ se'soya'taten tarro'mar atarr coshapuenana puechemer. Ama çhoye' rromueno, e'ñe huomech agapapueñ." ²⁸ Ñaña' ñeñña atarr atsrre'matuerre' ama mueno o'ch be'tosuerr all o' çhen pa'mo'nasheñ. Atteñapa' çha'nom p̃omporna' allach otere't: "Pebe'tosuerr." Ñaña' ama mueno o'ch be'tosuerr. ²⁹ Ñaña' atet otuerran p̃omporna': "Napa' peñotenen o' shonte' char e'ñe cohuen name'ñenpa; napa' ama't parrochapa' ama esempo natpare'tenpe. Tarraña ama't atet nepenpeñpa' nañapa' ama't esempapa' ama p̃apuennoña ama't patra cabra attoch nocshame'ta naña epan ñeñt̃ parro neyemuetyena na. ³⁰ Te'ña o' huena ñeñt̃ pechemerma't pepen ama't ora o' a'gasta'huona p̃ peçllayor e'ñe puecañoresha'teñoť, te'ña p̃apa' o' pemsatapueñ becer ñeñt̃ ye'soya'taten." ³¹ P̃omporna' atet otererr: "Po'ñoçh nechemercha' p̃apa' çhocma arro'tseney parro. Amahuaca'ye nechemercha' peñoteñe'te' ñeñt̃ allpon nechenpa' e'ñerramche' p̃ocma. ³² Ñeñto'marña te'pa' añ p̃ocetsa o'ch yocshame'tam̃psapueña pemo'nasheñ, o'ch atarr nanac yocshena tarro'mar ama't o' rromhuañ te'ñapa' o' alla tanterra; ama't o' chenca'huañ te'ñapa' o' alla yenter."

16

*Atet atma'ntatarettena atet pena ñeñt̃
cohuañsatsre'tene' pamo'mte'*

¹ Elloña Jesús'pa' alla toma'ntaterranerr puey-ochresha', ñeñtpa' atet serrpare'taterraneterr:

—Eñall yacma puesheñarr ñeñt atarr eçllayoret. Ñapa' echenan pa'cheñer ñeñt po'taruas pene' o'ch cohuañpsan ora allpon ñeñt echyen pamo'mte'. Ñaña ñach quellquëne' po'potantañ ñeñt allpon teña'yeññañet pamo'mte'. Atteña allempoña puesheña'tets acheñenesha'pa' a'metampeñeta' pamo'mtayesho, atet otoñet pamo'mte': "O'ca'ye atta a'chencatatsre'tapña ñeñt penen ñeñtcha' pecuañpsatsre'tene'."

² Allempoña pamo'mte' atet e'mare'chpa' allenta agotach. Allempoña huapapa' atet otañ: "Eso'maruañaca'yeña atet pa'chencatatsre'tenen. Te'pa' o'ch peñotatnomuen e'ñe ora allohuen ñeñt allpon petaruasen tarro'mar te'pa' ama nemno o'ch allo'na pecuañpsatsre'tenen." O' atet otue pamo'mte', ñaña'pa' allenta ahuer. ³ Allempoña pa'taruasañer ñap'opa' atet cotape'chen: "Te'pa' amach allo'na netaruasa'nenonamo'mtayesho; o'ca'ye mopa'tamperrenña allo neganena. Te'pa' errotenuachñaca'ye neñate'. Napa' ama necheno nehuamenc attoch namre't ñeñtcha' netaruas neperreñ, ñaña ama nemno o'ch netaruas neña' o'ch atta nenamare'tyen quelle atet pa'yena po'psheññe'chno ñeñt po'taruas pene' o'ch enamare'tyeset quelle, tarro'mar na ñeñtpa' atarr apenco'chen nenteñ." ⁴ Allempoña o' e'ñe cotape'chuepa' atet ot: "Te'ña po'ño'chpa' o'ca'ye neño'ch atetcha'ca'ye neña attoch acheñenesha'pa' e'ñech cohuen agapnet pa'pacillo tsapatonet allempoch huañ neçllayor ñeñt allpon naguën

te' netaruasot." ⁵ Allempoña atet cotape'chenpa' atetcho' pa. Ñeñto'marña agotatan allohuen allponsheña ñeñt teña'yets pamo'mtayesho. E'ñe puesheña'ttsa ñanom a'pto'tyesap, atet otapanet: "Papa' ¿errpona't petebeñña namo'mte'?" ⁶ Ñañaapa' atet otos: "Napa' netebeñca'ye çharroch çcharra' cilindro aceite'." Ñeñt patron pa'cheñerñapa' aþ allo quellquëññañ ñeñt allpon teben ahuatoteñ. Allempoñapa' atet otererr: "Te'pa' o'ch þanorr tecmapa' o'ch pe'sherrña ñeñt çharroch çcharra' cilindro o'ch pequellquërr amnaroch çcharra' o'ca'ye allponamaña ñeñt peteben." ⁷ Allempoñapa' oterranerr ñaña po'psheñeñ: "Papa'cho'ña ¿errpona't petebeñña namo'mte'?" Ñañaapa' atet otos: "Napa' netebeñ çharroch çcharra' arroga trigo." Ñeñt patron pa'cheñerñapa' aþ ñaña allo quellquëññañ ñeñt allpon teben ahuatoteñ allempoña ñapa'cho'ña atet otererr: "Papa'cho'ña þanorr tecma o'ch pe'sherrña ñeñt çharroch çcharra' arroga o'ch pequellquërr poscoch çcharra'; te'pa' o'ca'ye allponamaña ñeñt allpon petebeñ namo'mte'." ⁸ Allempo pamo'mte' eñotan ñeñt pa'taruasañer atta shecare'teñ, ñañaapa' atet oten: "Añ acheñer ama't puehquëñoþpa' e'ñe eñoteñ o'ch entan ñeñtcha' atarr sherberre' ñocop tsapatonet." Po'ñoçh acheñenesha' arr patsro ñeñt ama ame'ñetso ñetñapa' atarr eñoteñet attoch e'ñech aña e'nenet ñeñtcha' atarr sherberrets ñocpuet tsapatonet. Tarraña ñeñtña ame'ñetsapa' ama tama eñoteñeto, ama es cotape'cheneto o'ch

e'nenet ñeñtcha' atarr sherberrahuet ñamet tsapatonet.

9'Ñeñto'marña te'pa' o'ch notenes:

—Ñeñt allpon pa'namen sechyen seçllayorohuen ñeñt'pa' añecpuepa'chña sherbenes alloch seyenpueñ po'potantañ allochñapa' attochña e'ñech cohuen muererrset. Sapa' añecpuepa'chña setaruasatña sa seçllayor ñeñt atarr sherbets Yomporecop ama't yeñoteñ quellepa' atarr a'gasta'po' ama't ñaña añecop ñeñt ama pocteye' enteno Yompor. Allochñapa' eñallcha' socop ñeñtcha' e'ñe cohuen sagüerre' e'ñe all Yomporepahuo esempoch secha'cherr all, allempopa' o'huañcha' allo'na sherbenes quelle ñeñt patso'marecpa. Attoch allohuenes e'ñech cohuen socrra'huerra Yomporepahuo ñeñt'pa' ama ahuañaño.

10'Elloña o'ch notas:

—Ama't e'ñe coñe'ta yechen ñerra'm añecop yesherbateñ ñeñt cohuen enten Yompor; ñaña'pa' eñoteny atet ñerra'm ama't atarr aton yechen atterach yesherbateñ ñocop. Tarraña ama't e'ñe coñe'ta yechen ñerra'm ama añecpaye' yesherbateñ ñocop, ñaña'pa' e'ñech eñoteny attoña ama'tcha' atarr aton yecheneñpa' atterach amach es yesherbateñ ñocop. ¹¹Ñaña ama't e'ñe allpona quelle yechen arr patsro ama't e'ñe patso'marecpa tarraña ñerra'm ama añecop yesherbateñ ñeñt cohuen enten Yompor allempopa' amach errotent alla apuerryerroña ñeñt po'ño'ch atarr sherbets ñeñt apueney ña. ¹²Ñaña ñerra'm ama es yesherbateññañe ñeñt po'psheñño atet ñerra'm

ñeññ Yomporo, allempopa' amach errotenoť apyeña ñaña ñeññ e'ñe yocop ñeññcha' e'ñe cohuen yocshatene'.

¹³Ñeññpa' atetcha' netma'ntacha:

—Ama't puesheñarroteyapa' amach errotenoť e'ñe cohuen yetaruasoña epsheño'mar yamo'mtayecop. Tarro'mar ñerra'm atet yeřapa' puesheñarr e'ñech cohuen yemorrenteñoť yocsheñeshocmañen yesherbeñ, po'psheñeññapa' amach e'ñeye' yemorrenteño; čhach yottena ñerra'm čha yetsena'teñ. Ñeñño'mar atetpa' amach cohuenaye' yesherbeñe. Ñerra'm aña e'ñe sema'yochrena ñeññ e'ñe socpa attoch segana aton quelle, ñeññ atetpa' amach errotenoť sema'yochroña ñaña añecop ñeññ atarr sherbets Yomporecop.

¹⁴Añña fariseonesha' ñeññ e'muene' Jesús ñeññ atet serrpare'tatenan acheñenesha', ñetñapa' aña atarr ye'chapretenet quelle. Ñeñño'marña ñet allempopa' puesasare'teñoťet Jesúsapa' čha atarr che'tatseteñet.

¹⁵Jesúsñapa' atet otanet:

—Sapa' čha sottenañ ñerra'mrrate' atarr cohuensoñ attoña acheñenesha'pa' e'ñe cohuen entyensetañ. Tarraña Yomporñapa' e'ñe eñotennas seyočer ñeññ atto sapa' atarr seshcare'tyeñ acheñenesha'. Tarraña ñeññ e'ñe ñañeñeta atarr cohuen entyetsat arr patsro, ñetñapa' atarr tsena'tenanet Yompor.

Moisés po'ñoñpa' ñeññ atet anaret ñeññpa' ñeññaña e'ñe yemtete't tarrempohua allempo orrterra

Yompor po'cohuenña ñeñt atto ayochreshattena ña

¹⁶ Allempoña Jesús^{spa}' atet serrpare'taterranerr acheñenesha' po'poñonet:

—Añña ñoñets Moisés po'ñoñ ñeñt atet anareñ ñaña añ ñoñets ñeñt quellca'yese't ñeñt a'mta'yese't Yompor po'ñoñ, ñetpa' ñeñta e'ñe serrpare'tete't tarremphua allempo orrtosa Juan. Allempoteñ serrpare'tatosanet Juanpa' ñapa' añ serrpare'tatosanet atet penaña Yompor po'cohuenña atto atarr ayochreshattena ña, ñeñtara cohuen ñoñets alloch sequeshperra. Ñaña allohuen acheñenesha' e'ñe pueyoçhrocmañenet ñeñta atarr muenenet.

¹⁷ 'Tarraña ama't atteñpa' ñeñt atet anareñ Yompor po'ñoñ ama't patrra quellec puehempotollohuenpa' amach chenquerro. Tarro'mar Yompor po'ñoñpa' amach erroteno ya'huañatere ñeñt atto sherbeney. Patsña epuet enet ñeñtpa' huañerrcha'.

Atto Jesús^{spa}' yeçhatosanet ama asanna'tpahuoyaye

(Mt. 19.1-12; Mr. 10.1-12)

¹⁸ 'Ama a'huañatpahuoyaye Yompor po'ñoñ ñeñt atet yotene' ama asa'pahuo yetapor tarro'mar ñerra'm esesha' serre' puetapor o'ch yorerran po'psheñeñ coyanesha' ñeñtcha' puetapor perretpa' ñeñtñapa' çhach ochña'tam'perrana puetaporeshe'mañ; ñeñtcha' ama cohuenaye' enteñe Yompor. Ñaña ñeñtcha' yorerre' coyanesha' asareñ, ñeñt yacmarpa' çhach

chetapreten taporets; ñeñtpa'cho'ña ama
cohuenaye' enteñe Yompor.

*Atet aþaretta puesheñarr yacma ñeñt atarr
eçllayoret; atet aþaretta ñaña po'psheñeñ yacma
ñeñt atarr huocchañetets, ñeñtpa' añ pa'so'cheñ
Lázaro*

¹⁹ Elloña Jesús pa' atet serrpare'tatanet:

—Eñall puesheñarr ñeñt atarr eçllayoret ñeñt
chorrenaya shetamuets atarr coçhneshare'
ñeñt atarr cohuen apomotyesareť. Epaye'
coshatse'tatyeni ñeñt allpon echyen. E'ñe
pocsheñoťpa' e'ñe ellapene't rrallme'chats. ²⁰ Eñall
ñaña puesheñarr ñeñt atarr huocchañetets
ñeñtña pa' cha ora puetsaren, ñeñtpa' añ
pa'so'cheñ Lázaro. Ñaña pa' allach ellapene't a'yoť
yetarrot allotecma be'ten eçllayoret pa'paclo.

²¹ Ñapa' añach atarr ye'chena o'ch rra'yesan ama't
coñeta'ttsa rreñets ñeñt a'shore'tatyen eçllayoret
po'mesaþnacho. Allña ochepa' o'ch huapoña
o'ch tso'na'teññaña' pueptsarña. ²² Atteña o' chap
pamtarr allempo rroma ñeñt huocchañeshar. O'
rroma mellañoťeñnesha'ña huacha'tapa' o' aneret
e'ñe Abrahamuesho, allña pa' o' chapachet atarr
cosheñtso. Atteña pa' chap allempo rroma ñaña
ñeñt atarr eçllayoret, ñeñtña pa' pampueñeta'.

²³ Ñaña pa' alla chap coñcha'puetso ñeñt o'patenaya
ñeñt rromuets ñeñt ama ame'ñetso. Allña pa'
atarr mueroçhtosa all coñchosa. Atteña pa' cohua'
enonetpa' allotña entosan Abraham allaþaro'tsen
ento. Allña pa' allo'tsen epuet Lázaro. ²⁴ Ñeñtña
eçllayoret allenta chore'tan Abraham, ñeñtpa'

ateŧ och: “Nompore Abrahamama pemueraye’chna, pemñaye’chon Lázaro o’ch huapa arr attoch esha’tosan potaṗ oño, ama’t potaṗoŧapa’ o’ch onenapna’ oñ attoch a’yamoserrapona’ neñeñ o’ e’ñe neporrarra’nmahuap. Atarr nanac o’ nemueročhtosa arr tso.” ²⁵ Abrahamñapa’ ateŧ och: “Nechemerñecha’ te’pa’ o’ch peyerposa ora allpon pa’namen ñeñŧ pechyeseŧ ñeñŧ atarr cočhneshare’ pentyeseŧ allempo ṗocreŧ patso. Lázaroñapa’ ama es echeŧe ama’t coñeŧa ñeñŧ atarr cohuen enten ñaña. Te’ña ñapa’ o’ atarr acshatareŧterra, ṗaña’ o’ atarr ṗa’coñchatareŧterra.” ²⁶ Elloña te’pa’ ama’t e’ñe eseshapa’ amach erroŧenot čhapañṗsapeto allo’tsenep tarro’mar ṗapa’ atsereto’tsenṗa yonŧa’n. Sapa’čo’ña te’pa’ ama’t e’ñe puesheñarroŧesapa’ amach erroŧenot sečhapañṗesyoyama. Amate’ erroŧ yepereŧe ñeñŧpa’ ateŧ anaret attoch yello’tsentatareŧterra.” ²⁷ Allempoña ečllayoreŧpa’ ateŧ oterranerr Abraham: “Tarraña ama’t atteñ nomporepa’ te’pa’ o’ch notap o’ch pemñer Lázaro all patsro nompore pa’paclo.” ²⁸ Tarro’mar all napa’ nechen amnarsheña nemo’nasheñ. Ñeñto’marña nemneñ o’ch ahuer o’ch cotape’chaterraneta’ e’ñe cohuen teŧ ñetpa’čo’ña esempopa’ alla čhapuet arr coñcha’puetso.” ²⁹ Abrahamñapa’ alla otererr: “Ñetpa’ echenet Yompore po’ñoñ ñeñŧ quellquēŧ Moisés ñaña allohuen ñeñŧ a’ñtayeŧ Yompore po’ñoñ ahuat. Te’pa’ e’ñnoterrñañetepa’ Yompore po’ñoñ ñeñŧ echenet.” ³⁰ Ñaña’pa’ ateŧ oterranerr Abraham: “Ñato’ amach

e'mñoterrñañeto Yompor po'ñoñ, tarraña nompore Abrahamama ñerra'm esesha' tanterrtsa rromot ñeñtcha' orrterrahuet allempoñapa' po'ñoñ ñeñtcha'ña cotape'chaterrahuet ello e'ñe cohuen Yomporecop." ³¹ Abrahamñapa' alla otererr: "Ñerra'm amach e'mñoterrñañeto Yompor po'ñoñ ñeñt atet quellquë't Moisés ñaña allohuen ñeñt a'mtaye't Yompor po'ñoñ ahuat, te'ña ama't esesha'ch tanterrtsa rromotpa' amach eshec çapanetoña pueyoçhreto attoch cotape'cherret ello e'ñe cohuen Yomporecop."

17

Atto çhocmach huaponaya ñeñtcha' yetpatyene' o'ch atet patyesey ñeñt ama pocteye' enteno Yompor (Mt. 18.6-7, 21-22; Mr. 9.42)

¹ Allempoña Jesúsapa' alla serrpare'taterranerr pueyochresha', ñeñtapa' atet otanet:

—Chocmach huaponaya ñeñtcha' yetpatyene' o'ch atet p̄atey ñeñt ama pocteye' enteno Yompor. Tarraña napa' o'ch notas, atarrcha' yoroçheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet p̄atyenanet ñamet ñeñt ama't mamesha ama pocteye' enteno Yompor. ² Ama't ñeñt e'ñe errte' name'ñenaya ñerra'm esesha' o'ch orrtatanet attoch o'ch atet p̄atachet ñeñt ama pocteye' enteno Yompor, ñeñtña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet p̄atenana'

po'psheñeñ, e'ñech allorocma çharachetañ mapue' añecmuen pa'chnoþo allpon ñerra'm puetse'tamets o'ch huapore'chet oño epo allcha' ño'shach mapue'. ³ Ñeñto'marña sapa' e'ñech señoa, amach sorratatsto attoch sa'shoratach po'psheñeñ ama't erra'tsena.

'Elloña napa' o'ch alla noterrser, ñerra'm esempo samo'ts erroñ þonas sa ñeññ ama pocteye' enteno Yompor, socoppa' añ poctetsa o'ch soctape'chater e'ñe cohuen o'ch þoter ñeññ atet o' þohuonaþpa' ama't mameshapa' ama pocteye' enteñe Yompor. Allochñapa' ñerra'm o'ch alla cotape'cherran cohuen Yomporecop, sañapa' añ poctetsa o'ch alla e'ñe cohuen seþretner. ⁴ Ama'tcha' atonoche'tats atet penset, ama'tcha' pamtarrpa' cançhroche'tatscha' atet penset ñerra'm o'ch alla llequërrana ñeññ atet pennaset, ñerra'm ama't pamtarr cançhroche'tats o'ch alla otterrset: "Napa' o' atet neþonaþ ñeññ ama pocteyaye tarraña te'ña ellopa' amach alla atet neperre'te", socoppa'cho'ña añña e'ñe poctetsa o'ch alla e'ñe cohuen seþretner ñeññ atet sepene'.

E'ñe yeyemteñoñ Jesús ñeñña ahuamencat yepene' attoch es yorrtatyen ñocop

⁵ Allempo atet otarettenet añña puellsensarne-sha'ñapa' atet ochet Po'partsesharet Jesús:

—Elloña yapa' ahuamencatcha' peþa'y allochñapa' e'ñech cohuen yeyemterrpa.

⁶ Partseshañapa' alla oterraneterr:

—Ñerra'm po'ñoçh e'ñe na seyemtenañ napa' e'ñeca'ye na'poctatenña neñoñ ñeññ atet notenes, ama'tcha' allponatolloa seyemtena

ñerra'mrrate' mostazllometoll, sañapa' ama't erra'tsena senamuennonñ ama't ñeññ atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot añ tsachecop sicómo'rech: "Bera'nmuepa'ch arroṭ all ten, arropa'chña tomhuerrerr a'yo sa'po", tsachñapa' atetcha'cho'ña pñañ e'ñe atet soteñ.

Atto atma'ntatarettena ataruasañpa' añ poctetsa ñocop e'ñech etsotenan ñeññ atet muenateñ pamo'mte'

⁷ Ellopa' alla toma'ntaterraneterr, ñeññpa' atet oterrane'terr:

—Ñerra'm eseshas echene' sa'taruasañer, ñato' ñapa' ellapene'tcha' llampue' sechamuellen amapa' ñato' ellapene'tcha' cohuanpene' sayara'chno ellerronetña allempoch huerra po'taruasotpa' sañapa' ama't puesheñarrofesapa' amach sotapuereña señañra: "Te'pa' o'ch pebe'tosuerr o'ch yerrallme'chnen parro."

⁸ Elloña ñeññapa' o'chcho' alla sotapuerrerr: "Te'ñapa' o'ch peptare'tuerren ñeññcha' nerra'nen, allotñapa' o'ch pñacohuenetuerr peshtam attoch e'ñe cohuen pesherba'huerrren choṭcha'ña naphuerre' nerrar ñeññcha' nerra'nen. O'chña nerruanen napa' allempoñapa' choṭcha'ña rrallme'chnets pñaña." ⁹ Ama'tña sapa' atetca'ye sepena. Ñaña sa'taruasañer ñerra'm esempoch e'nuan ora po'taruas ñeññ seyecheña, sañapa' ama't puesheñarrofesapa' amach sotereña: "Parasyos o' pe'nuon netaruas." Ama't ama atarr socshateñe ñeññpa' e'ñe pocte' ñocop tarro'mar ñapa' allpona o' e'nua ñeññ allpon seyecheña.

10 Sapa'cho'ña Yompor pa'taruasañer sepene'. Ñaña ama't allempoch setsotuen ora allohuen ñeñt atet otenes Yompor atterepa'chña sentena ama atarr atonaye' sesherbena. Aña setsoten ñeñt e'ñe pochtetsa allohuen añecop ñeñt pa'taruasañer pen Yompor.

Atto Jesús pa' e'ñe po'ñoñoña a'crratyesapan apt-sarñatechno ñeñt charrasheña

11 Allempo sechena Jesús Jerusaléno arr oñem allohua temuena Samaria epuet Galilea. 12 Allempoñapa' chap paterr anetso. Allñapa' hua'cha'toña charrasheña ñeñt osyen puetsarñats ñeñt otenet lepra. Ñeñtña aptsarñatechno a'yoña tom'cha'tyesoset. 13 Ñetñapa' alloña rranare'tyesosetpa' atet ochet Jesús:

—Maestro Jesúsocha' pemueraye'chosya yaña.

14 Jesúsñapa' allenta cohuosanetpa' atet otosanet:

—Te'pa' o'ch ahues o'ch segatyena' sañeña judionesha' po'cornanesharesho attoch ñetpa' o'ch eñotaset te'pa' o' socrrerra.

Atet otanet Jesús, ñetña ahuanmatsetpa' e'ñe allorocma acrra'yesserrochet. 15 Puesheñarrña allempo eñota o' correrrapa' alla puetallerrapa' o' alla ahuer Jesúseshonet atarr nanac pocsheñesha' aye'chochtatnerran Yompor.

16 E'ñe pueparasyoso'teñesha' rromosa Jesús pa'rrpot. Nehua, ñeñt atet patsapa' ñeñtpa' ñeñtña samario'marnesha'. 17 Allempoña Jesús pa' atet otan acheñenesha' ñeñt allo'tsa'yen:

—Ama't charrasheña ñeñt o' na'crratyesua te'. ¿Po'potantaña esconsheñapa'? Ñetñapa' ama

es yerpa'pesnomayeña attoch aye'chochtatoñet Yompor. ¹⁸ E'ñe puesheñarraña ñeñt puerrerrtsa attoch atarr aye'chochtatan Yompor ama't ñapa' ama judioneshayaye.

¹⁹ Allempoña Jesús'pa' atet otan ñeñt a'crraterr:

—Te'ñapa' o'ch petanterra, e'ñech cohuen pe-serr tarro'mar ñapa' e'ñe peyemteñoen na o' pocrerra.

Atto fariseonesha'pa' a'pto'chet Jesús: ¿Esem-po'tcha' orrterraña Yompor po'cohuenña allempoch atarr añcha'taretterra ña?

(Mt. 24.23-28, 36-41)

²⁰ Parrochña fariseonesha'pa' a'pto'chet Jesús:

—¿Esem-po'tcha' orrterraña Yompor po'cohuenña allempoch atarr añcha'taretterra ña?

Jesúsñapa' atet otanet:

—Yompor po'cohuenña atto ayochreshattena ñapa' ñeñtpa' ama atteyaye ñerra'mrrate' ñeñt es yentyen yecloyot. ²¹ Ñeñto'marña amach errotenot oteto: “Arrca'yeña añcha'tarettenaña Yompor”, amapa' “Tarroca'yeña añcha'tarettenaña Yompor.” Tarro'mar Yompor po'cohuenña ñeñt atto ayochreshattena ñapa' ñeñtpa' o'ca'ye motetnoma orrtatsa e'ñe sesho ama't seyoçhro.

²² Elloña ñapa' atet otarranerr pueyochresha':

—Cherrcha' esempohuañen allempoch atarr se'nerren atarrcha' semnerren Ñeñten Acheñetostset o'ch norrterrnasa ama't e'ñe pamtarra. Tarraña ama't e'ñe allempa amach senterrno. ²³ Saña allempopa' atetcha' otasetañ: “Te'pa' o' orrterraña Cristo allo'tsenca'ye”,

amapa' "Tarro'tsenca'yeña Cristo." Sañapa' amach setatstoña all, amach soctatscheña ñeñt sets all. ²⁴ Tarro'mar ñerra'm esempo çherr allempoch nohuerra na Ñeñten Acheñetosets e'ñe allohuen acheñenesha'pa' e'ñech entuapuerrnet tarro'mar allempopa' atetcha' perra ñerra'mrrate' meratste', o'ch meratsta huomencpa' e'ñech a'puetaresuan ora enet erraparen. ²⁵ Ñehua, na te' ñeñt atet anare't nocop ñanompa' atarrcha' na'mueroçhtatare'tta, ama't namo'tsesha' ñeñt corretsa te'pa' amach eseshaye' naguënaye. ²⁶ Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't ahuat allempo corre't Noé. ²⁷ Allempopa' ama es puecha'yeneto aña e'ñe co'tape'chete't atto atarr pa'namen muenenet ñeñtcha' rra'yenet, orrare'tyesete't, sena'tanatyena yacmaneshachno, coyaneshachnopa'cho'ña apanatyese't ñeñt yoranatyeshahete't. Ñetñapa' ñeñta e'ñe cohuen entete't. Atteñapa' çhap allempo be'tosos Noé po'huarcopahuo. Allempoñapa' huata, cho'pa oñ erracmañen, e'ñe a'cclatuan allohuen acheñenesha' erraparen. ²⁸ Attecma perreterr allempo corre't Lot, aña e'ñe co'tape'chyerreterr shonte' rrallme'chyesete't ñaña shonte' orrare'tyesete't, atarr es rañta'yese't, ñaña pomatsre'tyesete't. Shonte' esocmañen ñeñt pa'namen nare'tyesete't, tomatyese't ñaña shonte' pocollaçhno. Ñetñapa' e'ñe ñeñta cohuen entete't. ²⁹ Atteñapa' çhap allempo cha'nom Lot ñeñt anetsro't. E'ñe

ñeñte yetrocma allempo cha'nom Lot allot,
Yomporña pue'ntañõ a'shoranet tso' ñeñt
shemashrepñeño' huorten, ñeñña e'ñe
a'cllatuerrahueterr allempo. ³⁰ Attecmach
perreterr allempoch norretuerra na Ñeñten
Acheñetosets.

³¹ 'Tarraña allempoch norrterra na
sapa' arepa'chña aña soctape'cheno ñeñt
patso'marecpa, atet ñerra'mrrate' puesheñarr
ñato' a'yote'tsenach pa'pacloť arepa'chña
be'tosatsterro ama't e'ñe mamesha pa'paclo
attoch yoratsre'tnoma. Amapa' ñerra'm
puesheñarr pa'mro'tsenpa' arepa'chña onatsterro.

³² Seyerpuempa'chña atet pa ahuat Lot puetapor
ñeñt atarr morrentnomaya ñeñt patso'marecpa.

³³ Ñaña ñerra'm esesha' e'ñe aña e'nenet o'ch
correna atomat attoch e'ñe coshenet arr patsro,
ñetñapa' a'chencaterretcha' ñañeñeta. Tarraña
ñerra'm esesha' e'ñe pocte' entene' o'ch es
sehuanmuet ñeñt atet muenenet ñeñt e'ñe
ñocpueta arr patsro ñeñña acheñerpa' corretsach
pocsheñeshocmañen e'ñe tayoteñ errponañohuen.

³⁴ 'Po'ñoçhca'ye o'ch notas atetcha'ca'ye
perra allempoch nohuerra, puesheña'tetspa'
anmaretterretcha'; ama't ñeñt e'ñe pamo'ts
pene', ñeñña' allach asa'nmaretterra. Atet
ñerra'm tsapo all manrrenet epsheño'maret,
puesheñarrpa' anmaretterrach, po'psheñña'pa'
allach asa'nmaretterra. ³⁵ Amapa' ñato' allem-
popa' allo'tsencha' epsheña coyanesha' ñeñt parro
puetse'tets mapyo ñeñtpa'cho'ña puesheñarrpa'
anmaretterrach ñaña po'psheñña'pa'

allach asa'nmare'tterra. ³⁶ Amapa' ñato' allempopa' allo'tsencha' ñaña epsheña ñeñ e'ñe parro taruasenet pa'mro. Puesheñarrñapa' anmare'tterrach, po'psheñeñña' allach asa'nmare'tterra.

³⁷ Allempoña pueyochresha'pa' a'pto'chet, atet ochet:

—Parteshacha' ñeñpa' ¿erra'tcha'ña atet perra?

Jesúsña'pa' atet otanet toma'nteñtso:

—Ñerra'm erro'tsencha' ñeñ rromue'pa' allcha'ña shontaña tse'm.

18

Atto atma'ntatare'ttena rretorrnanasha' ñeñ ñhocma enamare'tene' juez attoch yenpue'

¹ Allempoña Jesús'pa' alla serrpare'taterraneterr toma'nteñtso attoch eñochet ñeñ poctetsa yocop ñhocmach yema'yochena amach yemuenme'chatsche ma'yochatsa. ² Ñeñto'marña allempopa' atet otanet:

—Pa'terr anetso allo'tsen puesheñarr juez ñeñ po'taruas pene' o'ch e'ñe cohuen a'poctatan ñoñets acheñeneshacop ñerra'm esempo e'moñe'tannenet. Tarraña ñeñña juezpa' atarr atsrre'mñañ. Ama't Yomporpa' ama amicha'na'tpahuoye' enteñe ama't e'ñe mamesha. Acheñenasha'pa'cho'ña ama't puesheñarrapa' ama acua'penaye' entenaneto.

³ Ñeñña anetsropa' all ye'hena ñaña puesheñarr rretorrnanasha'. Ñaña'pa' eñall po'psheñeñ ñeñ e'moñe'tene', ñhocmach erro't peññañ ñeñ ama pocteyaye. Rretorrnanasha'ña'pa' ñhocmach sene't juezesho. Allcha' ñhocma atet otare'tenan

juez: “Te’pa’ nemneñ o’ch e’ñe cohuen peyenpa’n attoch p̄a’poc̄taton cohuen ñoñets añecop ñeñt̄ ne’moñe’tene’.” ⁴ Juezñapa’ ama’t allponmat ama mueno o’ch yenpue’. Tarraña rretorrnaneshap̄ ñapa’ chocmach sen juezesho enamare’tene’ attoch a’poc̄tatoñ ñoñets añecop ñeñt̄ e’moñe’tene’. Atteñapa’ chap allempo cotape’ch juezpa’ atet̄ ot: “Napa’ po’ñoçh ama’t Parets ama nemñcha’tene; acheñeneshap̄a’cho’ña ama’t mameshap̄a’ ama acua’penaye’ nentenaneto. ⁵ Tarraña añ rretorrnanesharpa’ atarr atsrre’moc̄htana’tenen, epaye’ huapame’tennana, o’ca’ye atarr a’mñechatna. Ñeñto’marña te’pa’ o’ch neyenpue’ allochñapa’ amach alla huerrnane’tē.”

⁶ Allempoña Jesúsapa’ atet̄ oterrerr:

—Ama’t se’mueñeña ñeñt̄ atet̄ oten juez ñeñt̄ atarr atsrre’mñañ. Te’pa’ oten ahuo’ch a’poc̄tatan rretorrnaneshacop ama’t ñapa’ ñeñt̄ acheñer ñeñt̄ atarr atsrre’mñañ. ⁷⁻⁸ Ñeñto’marña te’pa’ o’ch noterr̄serr: Yomporpa’ elloña nanaccha’ cohuen a’poc̄tatonay ñeñt̄ey o’ acrerrey ya ñeñt̄eycha’ e’ñe puechemer pen ñerra’m yapa’ chocmach yeçhore’tēñ ama’t yeto ama’t ñaña tsapo. Napa’ po’ñoçh o’ch notas, Yomporñapa’ amach atomato, choc̄h ye’mñote’; ñapa’ e’ñechca’ye allorocma e’mñotey o’ch e’ñe cohuen a’poc̄tatonay ñeñt̄ yocop. Tarraña te’pa’ o’ch notas, ñerra’m esempoch nehuerra Ñeñten Acheñetsets, errponsheñate’ña nentuerrña arr patsro ñeñt̄ e’ñe cohuen name’ñenaya.

Atet̄ ma’yochena fariseonesha’ ñeñt̄ e’ñe cohuen

*entetsa, all ma'yocha ñaña po'psheñeñ e'ñe puel-
lquëñesha' ñeñt atarr ochñañ entetsa*

⁹ Po'pocheñoña Jesúsapa' atet serrpare'tatan allpon acheñenesha' ñeñt e'ñe ñeta yemtetset tarro'mar ñetpa' e'ñe cohuen entyenet e'ñe ñañeñeta. Ñetñaapa' ama't mameshapa' ama cohuenaye' enteñetoña po'potantañ acheñenesha'. Ñeñto'marña Jesúsapa' alla toma'ntatanet, ñeñtpa' atet otanet:

¹⁰ —Eñall epsheña acheñ ñeñt sets Parets pa'paclo allcha' ma'yochoset. Puesheñarr ñeñtpa' fariseo ñeñt e'ñe ñañeña cohuen entetsa; po'psheñeññaapa' ñeñt puehquëñoñe'na cobra'yenan acheñenesha' quelle ñeñt gobiernocop. ¹¹ Ñeñtña fariseopa' tomos all ma'yochosañ, ñeñtpa' atet otos: “Nompore, napa' o'ch neparasyoso'tosep tarro'mar napa' atarr cohuen acheñren, napa' ama atteyayno Nompore ñerra'm po'potantañ acheñenesha'. Ñetpa' atarr es puerratañpsanna'tyenet, ama pocteye' es panna'tyeneto, atarrcha' cheta'yeñet coyaneshačno ñeñt ama puetaporeyaye. Napa' ama atteye' Nompore nepeno. Napa' ama neshcare'teno atet pena añ acheñer ñeñt puehquëñoñe'na cobra'yene' acheñenesha' quelle gobiernocop. ¹² Napa' pate'tets semanapa' epochcha' netore'tena Nompore pocop, ñaña ama't ora ñeñt allpon naguën chocma napuenep allpon poctetsa pocop ama't nediezmo Nompore.” Allohua huañ atet ma'yochena fariseo. ¹³ Po'psheñeñña ñeñt cobrets quelle ñañaapa' alla tomos a'yot. Ñapa' eñotena atarr

ochñaĩ ñeñño'marña ñapa' ama cohuoso enoneť Yomporeshonet. Ña puellquëñoťpa' nosan pot puesomapo. Ña puema'yocheñoť atet otos: "Nompore, te'pa' o'ch pemorrenterrna attoch e'ñe peľretna'huerrnan allohuen no'chñar tarro'mar napa' atarrca'ye ochñaaten."

¹⁴ Jesúsña'pa' atet oterraneterr:

—Napa' o'ch notas, ñeñña atet a'metene' po'chñar ñeñña acheñerpa' e'ñe pocte' enteñ Yompor. Ñeñño'marña allempo ma'yochuapa' o' ahuer pa'paclo e'ñe cohuen aľretna'huareterra po'chñar. Po'psheñeñña fariseo ñeñť ama a'metosaye po'chñar, Yomporña' arepa'tcha' pocteye' eñche. Tarro'mar allohuen ñeñť e'ñe cohuen entetsa e'ñe pommo'cheñoť ñeñña tsapatonetpa' amach esoshe'maye' entereto. Tarraña allohuen ñeñť ama esoshe'maye' entetso te', ñeñña tsapatonetpa' atarrcha' cohuen enteret.

Atto Jesús'pa' bensare'tamľsapan cheshanesh'
ñeñť huapatoñet

(Mt. 19.13-15; Mr. 10.13-16)

¹⁵ Ñaña allempopa' shonte' huačha'tachet cheshatollesha' Jesúsesho. Ñetpa' añecopña huačha'tachet o'ch a'ľlla'yesapanet Jesús attoch bensare'tamľsapanet. Jesúsña pueyochresha' allempo entapan ñeñť huačha'tate' cheshaneshachno, ñetña'pa' ama pocteye' eñcheto o'ch anmoset cheshatollesha' Jesúsesho ñeñño'marña ama amnataretapueto. ¹⁶ Tarraña Jesúsña'pa' allenta' chore'tapanet, atet otapanet:

—Pocte'ña'cho' semnachña'aca'yeña cheshaneshá' onosetepa' e'ñe nesho. Amachca'ye cha sepatare'tatstapaneto tarro'mar allohuen ñeñt' atarr neyemtenaya na e'ñe attet ñerra'mrrate' chesha'toll, ñetcha' o'patenetña Yompor po'cohuenña ñeñt' atto ayochreshattena ña pue'ntañof. ¹⁷ Po'ño'chpa' o'ch notas, ñerra'm esesha' ama e'ñeye' pueyemteño'feye' aguëñña'ñeto Yompor po'cohuenña amach atet perreto ñerra'm chesha'toll e'ñech yemtenana ñeñt' cohuanpene', ñetña'apa' amach pueyochreshaye' perraneto Yompor atto atarr ayochreshattena ña.

Atto puesheñarr ñeñt' huepueshameñ ñeñt' atarr eçllayore't' ñañapa' eñorana'tosana Jesús (Mt. 19.16-30; Mr. 10.17-31)

¹⁸ Po'pocheñoña puesheñarr ñeñt' atarr añcha'tarettetsa a'p'to'tosan Jesús, atet otos:

—Maestro, p'apa' atarr cohuen acheñreþ, te'pa' o'ch p'otapuen ¿erro'tena'tcha' neþaña na e'ñe cohuen attochña napa' corretsanach e'ñe tayoteñ ama't errponañohuen?

¹⁹ Jesúsña'apa' atet otaþ:

—Eso'mare't p'otenenña napa' atarro' cohuen acheñren. Arr arromña'tenesha' ama't e'ñe puesheñarrapa' ama eñalleña ñeñt' e'ñe cohuen acheñer. Ñap'taña Yompor ñeñt' e'ñe po'ño'ch cohuen. ²⁰ Papa' e'ñe peñotuen Yompor po'ño'ñ all oteney ñeñt'cha' atet yepena e'ñe cohuen; ñeñt'pa' atet oteney: “Amach yechtapretyesatsto taporets; amach yemtsanna'tatsto; amach yetyesatsto; amach yetoma'tamþsatsche yamo'ts e'ñe atfa;

ñaña yemorrenteñoṭpa' yeñcha'na'chcha' yompor ñaña yachor.”

²¹ Ñeñña a'ṭto'tene'pa' atet otererr:

—Napa' e'ñeca'ye cheshoteñ ora añechnopa' e'ñeca'ye netsotueñ.

²² O'ña atet otua Jesúsña'pa' alla otererr:

—Eñallmeñca'ye paterr ñeñt pepalltena ñeñt ama atteye' pepena'. Te'pa' añcha'ña atet peṭa o'ch e'ñe pepomhuerr ora allpon ñeñt pechyen o'ch ṭapa'yera' huocchañneshachno ñeñt atarr es pallta'yetsa attochña ṭapa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch ṭocterren attoch e'ñe neyochresha' neperreṭ e'ñe poctacma.

²³ O'ña e'mhuan ñeñt atet och Jesús'pa' ñaña'pa' cha atarr lleca tarro'mar ñapa' atarr eçllayoret, shonte' pa'namen echyen. ²⁴ Jesúsña eñch ñeñt atet atarr llecapa' ñaña'pa' puellcapreteñoṭpa' atet ot:

—Ñeñt atarr eçllayoreṭpa' atarr nanac echarr attoch agapoñet Yompor po'cohuenña ñeñt atto ayochreshattena ña. ²⁵ Ñehua, ñeñt'pa' atetcha' netma'ntacha. Po'ño'ch yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añeṭollponatollo atet ñerra'mrrate' acosh puetatollo. Ñeñt'pa' atetca'ye penaña acheñ ñeñt eçllayoreṭ ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar

* **18:25** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁶ Ñeñña e'muene' atet oten Jesús ñetñapa' atet ochet:

—Tarraña ñerra'm atette'pa' amate' esesha' a'qeshpatarettertso ama't puesheñarra tarro'mar yapa' yeñoteña'ye huaquëshpa' amaca'ye esho'tenoña acshequeto.

²⁷ Jesúsñapa' atet oterraneterr:

—Sa arromñañeneshaspa' amach es errotenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁸ Pedroñapa' atet och:

—Partseshacha' po'ñoçh yapa' o' e'ñe yesuanom ora allohuen ama't yepaclohuen attoch e'ñe yoc'terrep.

²⁹ Jesúsñapa' alla oterraneterr:

—Po'ñoçhpa' o'ch notas, allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ñato' puetapor, pa'mo'nasheñnesha' ñato' pompor, pachor, ñato' ama't ñaña puechemeresha' attoch e'ñe cohuen sherbaterrñañet Yompor po'cohuenña atto ayochreshattena ña, ³⁰ ama't erra'tsencha' ñeñtcha' sohuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen ama't te' allempo e'ñe correnet, elloña tsapatonetñapa' o'ch aguërret ñeñt alloch ñetpa' corretsetach beñecpuen.

Allempo Jesúsapa' alla eñotaterraneterr ñapa' chocmach amsaretterra
(Mt. 20.17-19; Mr. 10.32-34)

³¹ Ñeñt pueyochresha' ñeñt charra' puechena epsheña, Jesúsñaapa' ahuanmanet ellonet, allñaapa' atet otosanet:

—Te' po'ñoçhpa' o'ch ahueney Jerusaléño. All ora allpon quellca'yesone't ñeñt a'mta'yesaye't Yompor po'ñoñ ahuat ñeñtcha' atet na'paretterra na Ñeñtencha' Acheñetosets, te'ñaapa' o'ch e'ñe etsotuerra ñeñt atet anaret nocop. ³² Tarro'mar te'pa' pomuerrnetcha' po'poñ acheñesho ñeñt ama judioneshayaye. Allohuen acheñenesha'pa' o'ch achmāre'ternet, o'ch atserrpātse'ternet, pue'moñe'teñořetanha' o'ch a'coshare'ternet.

³³ O'ch nashtarētterra, attotcha'ña muetsernet. Tarraña poma'pamtañoñaapa' o'ch alla netanterra.

³⁴ Ama't atet otuanet, ñetñaapa' ama eseshaye' eñotaye ñeñt atet serrpare'tatanet. Ama't puesheñarrořetapa' ama't mameshapa' ama çhapanetoña pueyoçhreto ñeñt atet otenanet.

Atto Jesúsapa' cohuaterran puesheñarr aporo'yet ñeñt jerico'marnesha'

(Mt. 20.29-34; Mr. 10.46-52)

³⁵ All oñenet o'ña çhappochet anetso Jericópa' allña e'ñe toñetořñoapa' all anen puesheñarr aporo'yet ñeñt chocma enamuets quelle.

³⁶ Ñeñña aporo'yetpa' o' e'mapan shonte' acheñenesha' ñeñt metaçhets all toño, ñañaapa' allenta a'přto'tanet:

—¿Eso'mare't shonte' metaçhenña acheñenesha'?

37 Ñetñapa' atet ochet:

—Añca'ye huetsa Jesús ñeñt nazareto'marnesha'.

38 Ñaña'pa' allenta rrana huomencpa' atet otapan Jesús:

—Pemueraye'chnomna Jesúsocha' naña. Papa' ñeñteþ Davidna'tareþ.

39 Acheñenesha' ñeñt otaçhetsa ñetñapa' cha muene' che'ptare'tnomet, atet otoset:

—O'hua pemma.

Aporo'yetñapa' elloña alla rranerrerr atet oterranerr Jesús:

—Ñeñteþ Davidna'tareþ, pemueraye'chnomnañaca'ye.

40 Allempoña Jesús alla tomos otosan acheñenesha':

—Sanmon arr nesho.

O' huapapa' Jesúsñapa' atet otaþ:

41 —¿Eso'tña penmen ñeñtcha' atet neþoseþ?

Ñaña'pa' atet och:

—Añca'ye Ayochreshate nemnen o'ch pecuatnomuen attoch o'ch cohuen nenterrapa.

42 Jesúsñapa' alla otererr:

—Pecuerrepa'ch, tarro'mar atto atarr peyemtapna na ñeñtca'yeña o' e'ñe a'crraterreþ.

43 E'ñepa'tcha' allorocma e'ñe cohuen enterra. E'ñe cohuerrtsapa' cha coña'nmue'ñaña Jesús, allenta atarr aye'choçhtatnoman Yompor all coña'nenan Jesús. Atto' enteñ allohuen acheñenesha' ñetpa'cho'ña e'ñe cohuen aye'choçhtatneññañet Yompor.

19

Atto Jesús epuet ñaña Zaqueo eñorana'tannenet

¹ Allempoña Jesús pa' chap all anetso Jericó, all oñmos anetso'mar. ² Allñapa' allo'tsen puesheñarr yacma ñeñt sochetsa Zaqueo ñeñt pa'mcha'tareter peñ allohuen ñeñt cobra'yene' acheñenesha' quelle gobiernocop. Ñaña pa' atarr eçllayoret.

³ Zaqueo ñapa' atarr mueneñ o'ch entapan ñeñt otenet Jesús. Ñehua, ñapa' amach errotenot entapano Jesús tarro'mar shonte' acheñ ñeñt emchorra'nenaya all oñen ñaña Zaqueopa' allponmetolla.

⁴ Ñeñto'marña ñapa' mata allenetcha' oñem, a'tapos tsacho ñeñt pa'so'cheñ sicómo'rech allotcha' entapan Jesús tarro'mar allcha' oñem.

⁵ Allempoña chap Jesús e'ñe ñesho, cohuostsa enonetpa' alla entos, ñaña pa' atet otos:

—Zaqueo, pesuerra tecma. Te' napa' e'ñe poctennana o'ch nechap pepaclo.

⁶ Ñaña pa' allenta sohuerra tecma e'ñe pocsheñesha' agapař. ⁷ Allempoña acheñenesha' atet eñchet, ñetñapa' ama't mameshapa' ama pocteye' es entaye. Ñetpa' atet otanna'tyeset:

—Eso'marcha'ca'yeña be'tososña Jesús allcha' mos añ acheñer pa'paclo ñeñt atarr nanac ochñať.

⁸ Zaqueo ñapa' allenta tomhuerrpa' atet otapan Partsesha':

—Te'pa' o'ch pe'mñotosen Ayochreshate. Ñeñt ora allpon nechyen, te'ñapa' o'ch napa'yer puehmet huocchañneshachno. Po'ño'ch allempo es neprratam pesyeseť puesheña'tetspa' te'ñapa' pa'tatsoche'tatscha' napuerranet.

9 Jesúsñapa' atet otos:

—Teñapa' o' çhapanet allohuenacop ñeñt yeçhetsa añ pocollro alloch a'queshpataretterret. Ama't ñapa'choña Abrahamca'ye po'mreneñ.

10 Na Ñeñten Acheñetosets ñeñto'marña nohuapa aña patsro o'ch ne'nyesos acheñenesha' ñeñt chenquëtsa ñeñtcha'ña na'queshpatyesos.

Arrpa' all atma'ntatarettena çharrasheña ñeñt aparettsa quelle e'ñe allponeshapa'ttsocma

11 Acheñenesha' o' e'mñnotenet shonte' ñeñt atet serrpare'tatanet Jesús ñeñt atet pena Yompor po'cohuenña, ñaña Jesúsapa' o' çhapmoch Jerusaléño. Ñeñto'marña ñetñapa' cha otenapuetañ allempocmach etsota allempopa' ñach añcha'tarettsa Yomporeshot arr patsro. Ñeñto'marña elloña ñapa' toma'ntatanet po'poñ.

12 Ñeñtpa' atet otanet:

—Eñall puesheñarr acheñ ñeñt e'ñe cohuen añcha'na'tpo' entyen allohuen acheñenesha' ama't e'ñe pamo'tseshohuen. Ñeñtña acheñerpa' arr sechena ðachayo po'poñ anetso allotcha' apet llesens attoch esempoch huerrapa' o'ch añcha'taretetuerra all pa'nyo. 13 Allempo ama sena'pa' agotatnoman çharrasheña pa'taruasañer ñeñtcha' apa'yesnom allponeshapa'tets quelle e'ñe puesheña'ttsocmuet. Allempo apa'yesnomanetpa' atet otyesnomanet: “Añ quellepa' o'ch setaruasach nocop. Esemppoch nehuerrapa' allempochña e'ñe neñotuerrnas e'ñe puesheña'ttsos errponte' quelle segana'yesa ñeñt nocop.” 14 Tarraña patantarr acheñenesha' ñeñt

pa'nyo'marnesha', ñetñapa' atarr e'moñe'teñet. Ñeñto'mar allempo ta ñeññ anetsro, ñetñapa' mueñet allponsheña ñeññcha' eñososets all sen o'ch oteñeta' allo'marnesha': "Yapa' ama yemno o'ch sene' añ acheñer o'ch añcha'tareña yocop." ¹⁵ Tarraña ama't atet petañ ñocopñapa' chocmach apet llesens attoch huerra o'ch añcha'tareñetueterra all pa'nyo pamo'tseshacop. Allempoña cherrpa' agotatuerran pa'taruasañrenesha' ñeññ apa'yenom quelle ahuaña. Ñapa' añecopña agotatyesuerranet o'ch eñotuerranet errponte' quelle ganatyeshañet po'çllayor e'ñe puesheña'ttset. ¹⁶ Attoña apcha'huerranet ñeshopa' ñeññ ñanom huapatsapa' atet otos: "Ayochreshate, ñeññ allpon ppa'nmuen ahuaña quelle, nañapa' ello neganaterriaperr peçllayor çharroch." ¹⁷ Pamo'mte'ñapa' atet otuer: "E'ñe pocte', ppa' atarr cohuen pesherbened. Ama't allponatolla napa'nmañ ahuaña, pañapa' atarr cohuen pesherbaton. Ñeñto'marña te'pa' o'ch nenuerreñ çharracop anets allcha' pa'mcha'tareñterra pa." ¹⁸ Allempoñapa' o' huapa ñaña po'psheñeñ pa'taruasañerpa' ñapa'cho'ña atet otos: "Ayochreshate, na ñeññ allpon ppa'nmuen ahuaña quelle, nañapa' ello neganaterriaperr peçllayor anmaroch." ¹⁹ Pamo'mte'ñapa' atet otuer: "E'ñe pocte', te'pa' o'ch nenuerreñ paña amnarecop anets allcha' pa'mcha'tareñterra paña." ²⁰ Allempoñapa' huapa po'psheñeñ pa'taruasañer, ñapa'cho'ña atet otos: "Ayochreshate, arppa' ñeñña allponara

ñeñt e'ñe allpona p̄apa'nmuen ahuaña quelle. Napa' alla nañño'tennaḡ e'ñe cohuen nepennaḡ pañello. ²¹ Napa' čha nemčha'teneḡ tarro'mar neñoteneḡ p̄apa' amaca'ye matsrre'mñape. Papa' čhocmaca'ye peprratam̄pesyen ama't ñeñtpa' ama p̄oyaye, ñaña čhocmaca'ye peťotatyenña ñeñt ama p̄aye' nare'tatyenaye." ²² Pamo'mte'ñapa' atet otuer: "Paña po'ñočhpa' amaca'ye cohuenaye' pesherbanno ama't e'ñe mamesha. E'ñe atet p̄otenen napa' atarro' atsrre'mñaten te'ñapa' po'ñočh atetcha'ca'ye natsrre'močhtana'tuerreḡcha'. Ñerra'm po'ñočh peñotenoñ napa' atarr atsrre'mñateneñ, ñerra'm po'ñočh čhocma neprratam̄pesyeneñ ñeñt ama noyaye, ñaña napa' ñerra'm po'ñočh čhocma neťotatyeneñ ñeñt ama naye' nare'tatyenaye, ²³ ñerra'm po'ñočh atet pentennoñpa', eso'maruañaca'yeña ama bancoye' penennanoña nečllayor allochñapa' te'ña o' nehuerrapa' nagapuerreñcha' nečllayor allo atontateñet." ²⁴ Allempoña pamo'mte'pa' atet otan ñeñt tomčha'tyets all: "Te'pa' o'ch seprratam̄pesuer quelle, o'ch sapuer ñeñt ganatene' čharroch nečllayor." ²⁵ Ñetñapa' atet ochet: "Ayochreshate, ñapa' echenanca'yeña shonte' quelle ñeñt ganena čharroch." ²⁶ Pamo'mte'ñapa' atet oterraneterr: "Tarraña ama't atteñpa' te'pa' o'ch notas, ñeñt es echets shonte' e'ñe puesherb̄ateñoťet pamo'mte' ñetña ellonetpa' o'ch alla aparetterret po'poñ aton. Tarraña ñeñt ama es echetsopa' ama't allponatolla ñeñt echyenetañ aprratam̄psaretterretcha'. ²⁷ Ñaña te'pa' añña ñeñt ne'moñe'tene' ñeñt ama

muenenaye o'ch na'm'cha'tare'tta ñocpuet, te'ña sapa' o'ch sehuapatanet attoch semtsanatosanet e'ñe arr nesho."

Allempo chap Jesús Jerusaléño

(Mt. 21.1-11; Mr. 11.1-11; Jn. 12.12-19)

²⁸ Allempoñapa' ahuererr Jesús Jerusaléñonef.

²⁹ Chapmochet aspeno ñeñ pa'so'cheñ Olivopen allo'tsen anets ñeñ Betfagé ña'ma Betania. O' chapmochet all Jesúsñapa' ³⁰ atet otosan epsheña pueyochresha':

—Sapa' o'ch sota o'ch se'chap a'yente'ye' e'ñe allara anetso. O'ch se'chap allpa' allcha' sentos ashen rre'ptor all huanquënet; ñeñtpa' ama't puesheñarra acheñ ama monteña'. Ñeñña ashenpa' o'ch sepyam'psospa' o'ch sanerrnan arr. ³¹ Ñerra'm esesha'ch sotapue': "¿Eso'mare't sepyam'peñña ashen?" sañapa' atet'cha' sotosanet: "Yepartsesharca'ye muenene'ña añ ashen."

³² Allempoña ñeñ mueñapa' ñetñapa' ahuanmuet all anetso. Allñapa' atet'cho' entoset e'ñe atet otanet Jesús, allo'tsenca'ye ashen rre'ptor all huanquënet. ³³ Allempo pueyam'psosetpa' pamo'mte'ñapa' atet otapanet:

—¿Eso'mare't'cha'ña sepyam'psosnayña yashanor?

³⁴ Ñetñapa' atet otosñañetña ashen pamo'mte':

—Yepartsesharca'ye muenene'ña añ ashen.

³⁵ Allempoñapa' anerretña ashen Jesúsesho. Nohuerret pa'shtam ashnache'ñopa' montatueret Jesús. ³⁶ Allempo monta'nma Jesús allenet sen, acheñenesha'ñapa' to'tma'tyesoñet pa'shtam toño allcha' oñem. ³⁷ Atteñapa' o' chapmochet

Jerusaléño. Allempo a'nososet Olivopnoť shonte' acheñenesha' ñeñt ame'ñenaya Jesúsapa' ñetñaapa' alloteñ e'ñe cosha'rrtoset. E'ñe pocsheñesha' ahuanenet, pano'tatse'teñesha' aye'chočhtatneññañet Yompor, tarro'mar atarr cohuen entnenet atfo Jesúsapa' atarr orrtatenanet Pompor po'partsoña. ³⁸ Ñetñaapa' atet otyesnenet:

—¡Aye'chočhtaterrapo'ch Anicha'taret Jesús ñeñt llesensen Yompor! ¡Cosherrtepa'ch ama't ñeñt pue'ntaño'tsen! ¡Aye'chočhtaterrapo'ch ñaña Yompor Parets ñeñt pue'ntaño'tsen!

³⁹ Fariseonesha'ña puesheña'tets ñeñt allo'tsa'yen ñeñt ama ame'ñenaye Jesús, ñetñaapa' atet otapet Jesús:

—Maestro, peche'ptare'taye'chyesnomññaca'yeña peyochreshačno attoch amach allo'na atfa ačhotatsetnenpeto.

⁴⁰ Tarraña Jesúsñaapa' atet otosanet:

—Napa' o'ch notas, ama'tcha' atet notatstane-taña' muema'rrtetañcha', mapyečnoña' puer-ranare'teñoťetpa' načhotenayach.

⁴¹ Allempo o' e'ñe čhapmochet atfo entosan anets Jerusaléñ, Jesúsñaapa' atarr ya'na'tosan jerusaléño'marnesha'. ⁴² Allpa' atet eñorosa ñocpuet:

—Atarr nemneñeñ ama't e'ñe tayecma po'ñočh sapa'čo'ña o'te' señoťereñ erroťencha' seperra attoch Yomporpa' o'ch a'queshpaterrsoñ e'ñech socsheñesha' socrrerrañ. Tarraña saña teme'ttsen ñeññaapa' ama't mameshapa' ama čhennaso seyočhro. ⁴³ Tarro'mar napa' o'ch notas, po'ñočh o'ch čhap allempoch ñeñt

se'moñe'tene'pa' con'cha'tam̄perrnasetcha'
 sa'netser attoch e'ñe rroçhtam̄perrset allem̄ateñ
 sa'te'po'tpa' huacha'tonasetcha', attoch amach
 errene't seyeterro ama't e'ñe puesheñarro'tesa.
⁴⁴ A'mata'tuerrnasetcha' ora allohuen sa'netser
 attoch sepacille'nachña e'ñe sa'tpetse'tuerre'
 allohuenes ama't sacñe'tare'tolleshohuen. Allo
 sorraten sepaquëll ama't patrra mapue'pa'
 amach a'puerro, tarro'mar sapa' ama semno
 o'ch saguërrñañ Yompor pue'muereña allempo
 mueneñeñ o'ch yenpuerrsoñ saña.

*Atto Jesús'pa' a'cohuentatosan Parets pa'paquëll
 (Mt. 21.12-17; Mr. 11.15-19; Jn. 2.13-22)*

⁴⁵ Allempo çhap Jerusaléño Jesús'ña'pa'
 ahuos Parets pa'paclo. Be'tosospa' allotña'pa'
 cha'nma'cha'tatuosan ñeñ't pomatsre'tyetsa all.

⁴⁶ Allña'pa' atet otosan ñeñ't pomatsre'tyetsa:

—Yompor po'ñoñ ñeñ't atet anuaret ahuatoteñ,
 allña'pa' atet oten Yompor: “Añ ñeñ't nepaquëll
 nepenpa' añe'cpaca'yeña sherben allecmach
 ma'yochennet”; tarraña saña'pa' atet sepeññaña
 Yompor pa'paquëll atet ñerra'mrrate' eñe't ñeñ't
 e'potyetsa mapuetpono'mar.

⁴⁷ Pate'tets yet Jesús'pa' çhocmach sene't
 Parets pa'paclo all ye'chatenanete't Yompor
 po'ñoñ. Aña ñeñ't pa'm'cha'tare'ternesha' pen
 allohuen judionesha' po'cornaneshar ñaña
 añ ñeñ't atarr etsotayenayeñ ñoñets ñeñ't atet
 anaret ñaña po'potantañ ñeñ't añcha'taretetyetsa
 all anetso, ñetña'pa' Jesús'a atarr o'patyenet
 attoch muetsatachet. ⁴⁸ Tarraña ñetpa' ama
 erro't peto tarro'mar allohuen acheñenesha'pa'

atarr yemteññañet Jesús atto atarr cohuen serrpare'tatenanet Yompor po'ñoñ. Ñetpa' ñeññañña atarr cohuen entyenet.

20

*Atto allsensarettena Jesús
(Mt. 21.23-27; Mr. 11.27-33)*

¹ Po'pocheño pamtarr Jesúsñapa' alla yeçhaterranerr acheñenesha' Parets pa'paclo. Allpa' añ serrpare'tatenanet cohuen ñoñets alloch yequeshperra. Atteñapa' huaçha'toña shonte' amicha'taretnesha'—ñeñt pa'micha'tareternesha' pen allohuen judionesha' po'cornaneshar ñaña allponsheña ñeñt atarr etsotayenayeñ ñoñets ñeñt atet anaret ñaña po'potantañ ñeñt pompornesha' pa'yen allohuen judionesha'. ² Ñetñapa' atet otoset Jesús:

—Ñehua, yapa' añecop yehuena yemneñ o'ch p̄otey ¿errote't apuenpetña llesens? ¿Esesha'tña p̄apueñe'ña llesens attot p̄orrtatyenña ñeñt çhocma attecma pepa'yena?

³ Jesúsñapa' atet otapanet:

—Ñehua, napa'çho'ña nemneñ o'ch na'p̄to'tapas samã ama't patrra ñoñets. Sapa'çho'ña o'ch sotosen, ⁴ ahuañmo'cha allempo apate't Juanañ Yomporecop ñeñtpa' ¿eseshatña llesense' ñato' Yompor amapa' acheñaate' apue'ña llesens? Nemnen o'ch sotosen ñeñt atet soctape'chen sa.

⁵ Ñetñapa' e'ñe a'nahua otanna'tyeset:

—Ta'm errotcha'ca'ye yochte'. Ñerra'm çha yoch Yomporeshotca'ye apetña llesens, ñañaapa'

čhate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.”⁶ Elloña ñerra'm čha yoch acheñeshoťa apet llesenspa' acheñenesha'ñapa' čhate' e'moñe'tyetyet. Pue'moñe'teñoťetaypa' čhate' rrollapechyet tarro'mar ñetpa' e'ñe cohuen eñchete't Juanañ, čhocma otyenet ñapa' ñeñťca'yeña a'mťose' Yompor po'ñoñ.

⁷ Ñeñťo'marña ñetpa' atet ochet Jesús:

—Ta'm yapa' amaca'yeña yeñoťeñe; erroťte' hupaña Juan, erroťte' apetña ñaña llesens.

⁸ Allempoña Jesúsapa' atet oterraneterr:

—Napa'čho'ña te'pa' amach notaso samña allot apareťenña namña llesens attoť atet nepa'yena.

Atet atma'ntatareťtena ñeñť ataruasañečhno ñeñť ama cohuenayaye

(Mt. 21.33-44; Mr. 12.1-11)

⁹ Allempoña Jesúsapa' alla serrpare'taterranerr acheñenesha' toma'nteñťso, Ñeñťpa' atet otanet:

—Eñall puesheñarr acheñ ñeñťña nare'tanatatnomue' shonte' uvach, pa'muerñapa' e'ñe ora uvachmatatue. E'ñe allponmatatsapa' o' na'nman po'potantañ ñeñťcha' taruasatats uvachmo ñeñťcha' coyerrahuet allpon ñerra'm esempoch toteñet. Allempoña ñapa' ahuo' bačhayo po'poñ anetso alla atomat.¹⁰ Chap allempo yen uvachllompa' ñañaapa' mueñerran po'psheñeñ pa'taruasañer o'ch enamuerra' uvachllom po'psheñeñ pa'taruasañresho ñeñť cohuanpene' uvachma'. Allempoña čhen allpa' enamhuenan ñeñť allpon o'patena pamo'mtayet arepa'tcha'ña es apapuenayeña uvachllom, elloña

ñeñtapa' cha nalle'tapueñet, o' alla mueño'teret e'ñe atta. ¹¹ Allempoña ñeñt pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr allpa' ñapa'cho'ña cha es otnare'tapetpa' o'cho' nalle'tapet o' matateret e'ñe atta. ¹² Allempo poma'pocheño o' alla mueñerranerr po'psheñeñ pa'taruasañer. Ñeñtpa'cho'ña allempo chenerr ñaña allpa' ñañaapa' cha atarr atserrpatse'tapetpa' o'cho' alla matateret.

¹³ 'Allempoña ñeñt pamo'mte' penetpa' atet ot: "Te'pa' errotuachñaca'yeña nepe'te'. Te'pa' o'ch nemñe ñeñt e'ñe na nechemer ñeñt atarr nemorrentena. Ñato'rraña ñeñtpa' mecha'na'tapetcha'." ¹⁴ Arepa'tcha'ña ama't mameshapa' mecha'na'tapeto. Allempo entapoñet puechemerpa' atet otanna'tyeset: "Añmapa' ñeñtca'yeña puechemer ñeñtcha' o'paterraya pompor puenarenñ esempo. Ñapa'cho'ña te'pa' o'chca'ye yemtsaþ allochñapa' yachca'yeña e'ñe o'paterrayaña pompor puenarenñ." ¹⁵ Allempoñapa' o' rromapet o' chetare'tnomet narmetsmo a'yoť, allña muetsapoñetña ñaña puechemer. Arrpa' allohua atet toma'ntata Jesús e'ñe ñañeña.

Jesúsñapa' atet oterranerr acheñenesha':

—Ñehua, te'pa' o'ch notas, ñeñt pamo'mte' pen ataruasañechnopa' atetcha' pohuerranet. ¹⁶ Ñerra'm esempo ch huerranet, pamo'mtayetpa' a'cllatuerranetcha', narmetsma'ña o'ch apuerran po'potantañ.

Acheñenesha'ñapa' allempo e'mueñet Jesús atet oten, ñetñapa' atet ochet:

—¡Ñeñtpa' arepa'chña atteye' p̄atsterro, Neyompor-re!

¹⁷ Jesúsña atta cohuanetpa' atet otanet:

—Ñerra'm ama atet pueperra'chepa' eso'mare'tña otenña Yompor po'ñoñ ñeñt̄ anuaret̄ ahuatoteñ, ñeñtpa' e'ñechca'ye po'ñoçh atet perra. Tarro'mar ñeñtpa' atet oten nocop, all atma'ntatare'ten mapue'. Ñeñtpa' e'ñe atet anuaret̄ Yompor po'ñoñ ahuatoteñ:

Añ mapue' ñeñt̄ ama pocteye' entyeno ñeñt̄ tomatyene' pocoll, ñeñt̄ña te'pa' o' anare'tterra ñeñt̄cha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

¹⁸ Elloñapa' atet otanet:

—Allohuen ñeñt̄ epo'to'tetsa añ mapyopa' atar-rcha' atserrpenanet, ñaña añ mapue'pa' ñerra'm eseshesho mata'nompa' e'ñech a'tpetse'tuosanet.

*Atto a'p̄to'chet Jesús, pocte'te' o'ch tsa'tet im-
puesto*

(Mt. 21.45-46; 22.15-22; Mr. 12.12-17)

¹⁹ Añña ñeñt̄ atarr etsotayenayeñ ñoñets ñeñt̄ atet anaret̄ ñaña ñeñt̄ pa'm̄cha'tare'ternesha' pen allohuen judionesha' po'cornaneshar, ñetña allempopa' o' e'ñoçhet ñetca'ye atma'ntatare'ttenet, ñeñtpa' ñocpuetca'ye atet e'ñoçenaña Jesús. Allempoña ñetpa' atarr mueneñetañ o'ch rremuet Jesús e'ñe allorocma tarraña ama eseshaye' rromaye tarro'mar ñetpa' mecha'teñet acheñenesha'. Ñehua, acheñenesha' e'ñeca'ye

cohuen enteñet Jesús. ²⁰ Tarraña ñetpa' aña atarr e'nenet attoch ama't parrochapa' o'ch eñorachet ñeññ ama pocteyaye ama't ñaña gobiernocop, allochñapa' attoch rremuet o'ch pomueñeta' añcha'taretesho ñeññ nen gobierno' Romot ñeññ añcha'tarettetsa allo'marecop. Atteña ñetñapa' e'ñe a'nahua mueñet allponsheña acheñ Jesúsesho ñeññ ottetsañ ñerra'mrrate' atarr cohuen acheñ, tarraña ñetpa' añecpa amñarettet attoch e'ñe puehquẽñoť po'ñoñoťetpa' o'ch eñorachet ñeññ ama cohuenayaye. ²¹ Allempoña chapuet ñeshopa' atet otoset:

—Maestrocha' yapa' yeñoteneñ ñeññ atet peñen ñaña atto peychatyen Yompor poctapña ñeñtpa' e'ñe cohuenacma. Papa' allohuen acheñ e'ñe cohuen pentueñ; ama aña ñapueť pemorrenteno ñeññ atarr añcha'na'tpo' entyen allohuen acheñenesha'. ²² Ñeñto'marña te'pa' yemneñ o'ch peñotatapuey erra'tsente'ña e'ñe po'ñoch cohuentetsa. ¿Pocte'te' o'ch yetsa'ta impuestos añecop ñeññ añcha'tarettetsa Romo, ñeññ ama judioneshayaye? Ñato' amate' pocteyaye yocop ñeñtey judioneshay o'ch yetsa'ta añcha'tareť romo'marnesha' ñeññ ama judioneshayaye.

²³ Jesúsñapa' eñotanet ñeññ atet shecare'teñetañ, ñañaapa' atet otanet:

²⁴ —Ñehua, segaten puetallarr quelle.

Gatuetpa' atet otanet:

—Ñehua, sapa' o'ch soten, ¿eseshat'sentenña ñeññ atma'ntatarettetsa all? ¿Eseshat' pa'so'cheñ ñeññ aquellcarettetsaña all?

Ñetñapa' atet ochet:

—Am̃cha'tareṭca'ye atma'ntatareṭtetsaṅña all ñaṅña ñoca'yeña pa'so'cheñ ñeñṯ aquellcareṭtetsa all.

²⁵ Jesúsñapa' alla oterraneterr:

—Ñeñṯepñapa' añ poctetsa o'ch yaṗ am̃cha'tareṭ ñeñṯ ño ñeñṯ atet poctetsa gobiernocop; ṯarraña ellonet ñeñṯ Yomporo o'ch yaṗ ñaṅña ñeñṯ atet poctetsa ñocop.

²⁶ Attoña ama't pueshquëñotet atet otyenetpa' ama erroṭenot eñoracheto ñeñṯ ama pocteyaye ama't ñaṅña gobiernocop ṯarro'mar allohuen acheñenesha' ñeñṯ allo'tsa'yen e'ñe cohuen enteñet atet anapuenanet Jesús. Ñeñṯña ashcañnesha'pa' atta cohuanrrorteñet ṯarro'mar atarr cohuen anapuenanet Jesús. Ñeñṯo'marña ñetpa' ama erroṭenaye' otenaye' entereterro.

Atto a'ṗto'chet Jesús, ñerra'm po'ñochte' atan-terrapo' rromot, ta'm, allempopa' erroṭencha'ña yeperra

(Mt. 22.23-33; Mr. 12.18-27)

²⁷ Allempoñapa' huaḅha'toña ñaṅña patantarr ñeñṯ saduceoneshatets. Ñehua, ñeñṯ saduceoneshatets ñetñapa' ellonet echenet poctaṗña ñeñṯo'mar atet otenet amate' erroṭenot yetanterroña rromot ama't errponaña.

²⁸ Ñetñapa' atet otoset Jesús:

—Maestrocha' ahuaṯ Moiséspa' atet quellconay ñoñets ñeñṯ poctetsa ñeñṯcha' atet yeṗa. Ñeñṯpa' atet otenña Moisés po'ñoñ: Ñerra'm esempo rroma yacma o'ch sa'nman puetapor ṯarraña ama chemere'tnomopa' añ poctetsa pa'mo'nasheñcha' alla yorerre'ña po'norrar

allochñapa' attoch eñalletteraña ñeñtcha' puechemer perr pa'mo'nasheñeñ. Ñeñtpa' atetca'ye quellca'nmonayña Moisés ahuat.
²⁹ Ñehua, te'pa' eñall cancherrsheña ñeñt e'ñe poctacma pa'mo'nasheñecmuet. Ñeñt puesheñarr popo'naretpa' o' yoran coyanesha' ñeñt puetapor ña'. E'ñe allponmatatsapa' o' rromaña, yacma ama chemere'tnomo. ³⁰ Allempoña ñeñt po'rrocho'merpa' o' yorerran pa'mo'nasheñeñ puetapor. E'ñe allponmatatsapa' ñapa'cho'ña o' rromuerrerr ñaña, ñeñtpa'cho'ña ama chemere'tnomo. ³¹ Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña, ñeñtpa'cho'ña ama chemere'tnerrerro o' atta rromuerrerr. E'ñe attecma p̄ohuet cancherrsheño'maretpa' e'ñe pueyoruarochet ñeñtara puesheñarr coyanesha'. E'ñe allohuenetpa' e'ñe attecma pet colla'huet ama't puesheñarrofetapa' ama chemere'tnomueto. ³² Allempoña o' rromaña ñaña coyanesha'. ³³ Te'ña ñerra'm po'ñochte' yetantena yerromñoõpa' añña coyanesha' allempopa' ¿essha'tcha'ña puetapor perre' tarro'mar allohuenet cancherrsheño'maretpa' e'ñe pueyoruarochet?

³⁴ Allempoña Jesús otanet:

—Ñehua, atet yeçhen acheñenesha' arr patsro, çhocmach sena'tenet, coyanesha'paçho'ña apueñet ñeñtcha' puerrollar ña'. ³⁵ Tarraña esempohuañen allempoch tanterret po'pocheño allohuen ñeñtcha' e'ñe pocte' entuerr Yompor

allochñapa' attoch o'ch alla correrret po'pocheño, ñetña allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuerraye ñeñtcha' yorerrahuet. ³⁶ Tarro'mar allempopa' amach arromñat'terreto ama't ahuata attoch e'ñech atet perret ñerra'm mellañoteñnanesha'. Yomporñapa' o'ch e'ñe puechemer perranet e'ñe poptacma tarro'mar allempopa' o' tanterret rromotpa' o'huañcha' arromñat'terreto ama't errponaña. ³⁷ Elloña ama't Moisés atet eñotatane't acheñenesha' po'ñoçh ñeñt colla'huatsa allempo, ñetñapa' corretseta. Ñehua, all aquellcare't tsachmo'r ñeñt e'ñe ñoña huortets. Alloñaca'yeña Yomporpa' eñorana'tanaña Moisés; ñeñt'pa' atetca' otña Yompor allempo: "Napa' ñeñten Po'yomporer pen Abraham ñaña Isaac, ñaña Jacob."

³⁸ Jesúsñapa' alla o'terraneterr:

—Ñehua, yapa' yeñoteñ Yomporpa' ama añeye' Po'yomporer penaye ñeñt rromuets e'ñe poptacma ñapa' añca'yeña Po'yomporer pene' acheñ ñeñt corretsach. Yomporñapa' e'ñe entenanet allohuenetpa' e'ñe corretseta.

³⁹ Añña puesheña'tets ñeñt atarr etsotene' ñoñets ñeñt atet anaret, ñetñapa' atet ochet:

—E'ñe Maestrocha' e'ñe po'ñoçh atet p'toten.

⁴⁰ Ñeñto'mar allempoteñpa' ama't puesheñarrofetapa' ama eseshaye' a'p'totenaye' enterraye.

Atto Cristo ñeñt Po'partseshar pe't David, el-loñapa' o' alla po'mreneñ per

(Mt. 22.41-46; Mr. 12.35-37)

⁴¹ Allempoña Jesúsapa' atet otan ñeñt atarr etsotayenayeñ ñoñets ñeñt atet anaret:

—Eso'mare'tña otyenet ñeñtcha' Cristotosets ñapa' aña po'mreneñ pene' David tarro'mar ñeñtcha' Cristoterrets ama aña po'mreneñ peñe David tarro'mar ñapa' Po'partseshare'naña pe't David. ⁴² Tarro'mar ama't Davidpa' allempo quellquë't all libro Salmo allempopa' atetca'ye eñose'tña añecop ñeñtcha' Cristoterrets:

Yompor Paretsapa' atet otennan ñeñt Neparpartseshar nepen na (ñeñtara ñeñtcha' Cristoterrets):
“Te'pa' o'ch ñanorruerr arr necohuenro't allcha' pecohuentapreterrna.

⁴³ Attochña ama't ñeñt pe'moñe'tene' napa' o'ch name'ñatuerranet allochñapa' o'ch atet perret ñeñt pemnen ña.”

⁴⁴ Ñeñtapa' atetca'ye ote'tña David ñeñtcha' Cristoterretspa' ñeñtca'yeña Po'partseshar pe'tña ama't allempoteñ. Ñehua, ama't señoñeña Cristo ñeñt Po'partseshar pe't David ñeñtña te'pa' o' alla po'mreneñ per ñaña.

Atto Jesúsapa' a'metare'tenan ñeñt etsotayenayeñ ñoñets ñeñt atet anaret, ñeñt atet yeçhenet ñetpa' ñeñtapa' ama cohuenaye' entapretenaneto Yompor

(Mt. 23.1-36; Mr. 12.38-40; Lc. 11.37-54)

⁴⁵ Elloña shonte' acheñenesha' ñeñt e'mño'tene' allempo atet otenan Jesús pueyochresha':

⁴⁶ —Amach semeñe'tapretatsche om-moñatenesha' poçtañña ñeñtareta ñeñtet

atarr etsotayenayeñ ñoñets ñeñĩ atet anareñ. Tarro'mar ñetpa' aña'naña atarr cohuen entenet o'ch chorrenet atarrom shetamuets o'ch atta yorma'tatsetenet pa'shtam. Ñaña pommo'cheñoŕetpa' atarrcha' mueneñet o'ch e'ñe pueñcha'na'teñoĩ e'ñech cohuen huomñcha'tenanet acheñenesha' all chopeñe'chyenet. Ñaña ñetpa' aña'nach atarr muenenet o'ch anorrcha'tyenet judionesha' po'prahuo allecma anorryen ñeñĩ atarr amñcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet.
⁴⁷ Tarraña ñetñapa' rretorrnanesha'naña puerratañpesyenetña pa'paquell. Elloña e'ñe pommo'cheñoŕetpa' aña atarr muenenet o'ch atet penet ñerra'mrrate' ñetpa' atarro' cohuen acheñret ñeñto'marña arrcha' ma'yochenet all shontena acheñenesha', amach tematenayaya ma'yocheneto. Ñeñto'marña te' napa' o'ch notas, ñeñĩ atet petsa pommo'cheñoŕetpa' elloña atarrcha' a'coñcha'taretterret.

21

*Atto rretorrnanesha' ñeñĩ atarr huocchañetets ñapa'cho'ña nosan quelle ñeñĩ Yomporecop
 (Mr. 12.41-44)*

¹ Allempo allo'tsen Jesús Parets pa'pacillo, ñañaapa' arreneñ cohuen allecma nenet quelle Partsocop. Allñaapa' entenan eçllayoreñenesha' ñeñĩ na'yene' shonte' po'çllayor Partsocop.
² Jesúsña allpa' atta cohuenanet, huapa ñaña puesheñarr rretorrnanesha' ñeñĩ atarr

huocchañetets. Ñapa'cho'ña nosan eptallatoll
quellayetoll ñeññ cobretall. ³ Jesúsñapa' atet ot:

—Te'pa' o'ch notas, añ rretornanesha' ama't
atarr huocchañ ñapa' po'ño'chca'ye atarr aton
nosan quelle, ello metana'tuosan allohuen
po'potantañe'chno allpon quelle ñeññ na'yenet
ñet. ⁴ Tarro'mar allohuenet ñeññ na'yenet quelle,
añaca'ye na'yenet ñeññ a'pchatyenet, ñaña'apa' ama't
atarr huocchañpa' e'ñe pomhuahuospan allohuen
ñeññ echyen ñeññ muenatenaneñ allo'ch yoran
attoch correna arr patsro.

*Atto Jesús'pa' eñotatanet e'ñech
a'mata'taretetuerra Partsopo'
(Mt. 24.1-2; Mr. 13.1-2)*

⁵ Allempoña puesheña'ttets ñetñapa' aña atarr
serrpare'tyenet atto Parets pa'paquëllpa' atarr
a'cohuentañ. Mapyet ñeññ allo orratenet
Partsopo' ñeññpa' atarr co'chneshare' a'pa'yese'et.
Shonte' co'chneshare' ñaña allo'tsa'yen ñeññ
pomyen acheñenesha' all Partsocop. Jesúsñapa'
atet otanet:

⁶—Ora ñeññ allpon e'ñe co'chneshare' sentyen
te' cherrcha' allempoch e'ñe a'mata'taretetuerra.
Ama't puenñarra mapyetpa' amach a'puerroña all
allo orratenet Partsopo'.

*Atto Jesús'pa' eñotatanet shonte'ch entyerret
pa'namen ñeññcha' eñotaterrahuet o' cherrmoch
allempoch mellapoterra
(Mt. 24.3-28; Mr. 13.3-23)*

⁷ Pueyochresha'ñapa' a'p'to'chet:

—Maestro, ñeññpa' ¿esempo'tcha'ña atet perra?
Ñaña allempopa' ¿eso'tcha'ña yentyerr ñeññcha'

yeñotaterre' po'ñoçhpa' o'ch çherrmoch allempoch e'ñe etsotuerria ñeñt' atet' p'oteneý te'?

⁸ Jesúsñapa' otanet:

—E'ñech señoterra, allochñapa' amach esesha' seshquërraye. Tarro'mar shonte'ch orrterrtsa ñeñt'cha' ayçha'nataterre' neso'cheñ, ñeñt'cha' otyerrets: “Napa' ñeñtenca'yeña Cristotets; te'pa' o'ca'ye çherr allempoch norrterra na ñeñten Cristotets.” Tarraña sañapa' ñato'tña se'mñotenaneta'. ⁹ Ñaña allempopa' o'ch se'mare'tyerr o' quellareñtsotyerr allemeñ anetso'mar ñaña o'ch se'mare'tyerr o' orrterra ñaña atparñats erraþaren, saña allempopa' amach çha seyorenatsto ama't e'ñe mamesha. Ñeñtpa' atet'cha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra.

¹⁰ Jesúsñapa' alla oterraneterr:

—Pa'namen acheñ ñeñt' e'ñe po'poñe'ttsoçma mereñtsoret ñetpa' quellaranna'terret'cha'. Ñaña pa'namen anetsot an'cha'tareteçhnopa' quellaraterran'cha' pueyochreneshachno. ¹¹ Pella'yerrach pats huomenc ora erraþaren, ñaña orrterrach allemeñ muecheñets o'ch e'ñe chaporrñatsotyerr erraþaren. Orrterrach ñaña pa'namen atснаñtsoçhno ñeñt' atarr apatanna'tpo'. Allempopa' atarr'cha' an'cha'noçhterra entoť. Orrterrach ento ñeñt' ama't ahua'tapa' ama puentareto ñeñt'cha'ña eñotaterrahuet o' e'ñe çherrmoch allempoch mellapoterra.

12 'Ñehua, allempoch ama orrtena' atetpa' saña allempopa' rremanaterrsetcha' attoch muerochtaterrset, sanmare'terrach judionesha' po'prahuo allcha'ña e'ñe otteñe'cherrset, attochña abe'terrset cárcelo allcha' coñchaterrset. E'ñe same'ñeñoten na sapa' sanmare'terrach añcha'taretneshesho'mar ñaña allo'tsa'yen ñeñt nanac añcha'taretnesha'. 13 Tarraña allempopa' atarrcha' cohuen attoch sa'metosnanña neñoñ. 14 Ñeño'marña allempo sanmare'tetyesa allcha' otteñe'cherrset ama't mameshapa' amach sellca'psatsto, amach sotapsa'tatsto, errotuachca'ye notoste' añcha'taretesho allempoch a'p'to'tare'tapuen. 15 Tarro'mar allempopa' nachca'yeña se'ñoratosenña all attoch e'ñe cohuen seño'tyesña atetcha' sanapyesosanet. Allochñapa' ñeñt se'moñe'tene'pa' amach errotenaye' otenaye' entenseto. Ñaña amach erroteno't otaseto ñeñt atet soten sapa' ñeñtpa' amaca' po'ño'chaye' atet soteno. 16 Elloña allempoch atet perrsetpa' ñeñt e'ñe sompor sepen ñaña sachor ñato' ñeñtachca'ye sepomuerre' tarro'mar ñapa' amaca'ye ame'ñenno, amapa' ñato' semo'nasheñ, amapa' ñato' po'potantañ samo'tsesha', amapa' ñato' ñeñt e'ñe parro seyemtena ñeñtachca'ye sepomuerre' tarro'mar ñetpa' ama parrocmaye' atfecma soctape'cheno. Ñaña patanta'ttsospa' muetsatyerrsetcha'. 17 Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. 18 Napa' atarrcha' necuanmpenes attoch amach erroteno't sechenquërro ama't e'ñe ahuata. Attoña ama't

e'ñe pueḡarra sechpa' ñeñtḡpa'cho'ña amach na'chencaterrnaso. ¹⁹ Tarraña ama'tcha' atarr mueroçhtaterrset çhocmachña e'ñe seyemteñoŋen napa' e'ñech sa'huanta'huanomña allohuen mueroçhteñets. Attochña sapa' corretsasach e'ñe po'ñoçh.

²⁰ 'Ñerra'm esepoch senterr añ anetser Jerusaléñpa' o'ch e'ñe rroçhtampera solltarnesha' allempoña sapa' señochepe'ch o' çherrmoch attoch e'ñe a'mata'taretetuerra ñeñt anetser Jerusaléñ. ²¹ Allempoña ñeñt allpon Judeo'tsa'yenpa' ñetñapa' allorocmuepa'ch yetrra'tuerret ahuanerretepa'ña aspentareronet. Ñaña ñeñt allpon anetso'tsa'yen Jerusaléño, ñetpa'cho'ña ahuanemyesetepa'ch ñamet allot. Ñaña ñeñt allpon allampaño'tsa'yen all arepa'chña tatsterretoña all Jerusaléño. ²² Tarro'mar allempopa' Yomporcha'ña tsa'taterrayaña allohuen israelena'tarnesha', tarro'mar allempopa' o'ch e'ñe etsoterra ora allpon ñeñt atet anuarettatset atetcha' perra allempo. ²³ Allempopa' atarrcha' llequëñets añecop ñeñt açhomenare' coyanesha' ñaña ñeñt allohuen emaretetolleshaçhno. (Tarro'mar ñocpuetpa' atarr torrapo' attoch yetrra'tet ñamet.) Tarro'mar allempopa' o'ch orrterra ñeñtcha' atarr mueroçhtaterrahuet arr patsro. Atarrcha' a'coñchataretterra allohuen acheñenesha' allempo. ²⁴ Ñaña allempo shonte' acheñpa' e'ñech muetsanatuerranet ñeñtcha' quellarrerahuet. Po'potantaññapa' rremanatuerranetcha' ñeñt quellarenahuet o'ch anmaretterret po'poñ anetso ðachayo all

yecha'yena pa'namen acheñ. Acheñenesha' ñeñt ama judioneshayayepa' ñeñtcha'ña e'ñe a'mtsoññetuerre'ña jerusaléño'marnesha', attoch e'ñe a'mama'tueretña ñeñt anetser Jerusaléñ. Atetcha'ca'ye perra ñeñt allponmat onañchareñ ñeñt ama judioneshayaye o'ch amcha'noçhterret all Jerusaléño.

Atetcha' perra allempoch huerra Cristo Ñeñt Acheñetosets

(Mt. 24.29-35, 42-44; Mr. 13.24-37)

²⁵ 'Allempopa' orrterrach ento ñeñt ama't ahua'tapa' ama sentare ñeñtcha'ña seño'taterre', ñeñt'pa' e'ñech atsnesho, orrterra ñaña arorrosho ñaña rantoçhnesho. Ñaña arr patsro ora allpon pa'namen acheñenesha' pueyorño'tetpa' atarrcha' nanac lleca'rrterret. Añcha' atarr yore'tame'terrahuet atto ñeñt añecmuen sa'ppa' o'ch emo'yarterra, atarrcha' huomenc ma'moreterr allempo. ²⁶ Acheñenesha' e'ñe pomchaño'tetpa' çhach muene' o'fanatyerret ñarro'mar allempopa' o'ch eñoterret atarrcha' mueroçhterret allohuenet arr patsro. Ñaña ñeñt huomenc orra'yetsa ento te', allempoña ama't ñeñt'pa' pella'yerrach. ²⁷ Allempoñapa' entapuerrnetcha' na Ñeñten Acheñetosets o'ch nesuanperra oso e'ñe nepartsoteño'huen e'ñe necohuenteñesha'. ²⁸ Ñerra'm esempoch senterr o' motetnerra orretyetsa ñeñt allpon o' notuas, allempoña sapa' e'ñech socsheñesha' secuanrrorterr enonet ñarro'mar allempo o'ch çherrmoch allempoch sa'queshpataretterra e'ñe poctacma.

29 Allempoña Jesúsapa' alla ser-
rpare'taterraneterr toma'nteñtso, ñeñtapa' atet
oterraneterr:

—Señotenfe' atet pena tsach, higoch. 30 O'ch
senteñ allempo tapna'tyen pasopanerpa' sañapa'
ñeññaña señotatene'ña o' chenmoch allempoch
huorateterrerr. 31 Attecmach perra ñerra'm
esempoch sentyerr ñaña allpon ñeñt o' notuas
sapa' ñeñtcha'ña señotaterre' po'ñoch o'ca'ye
cherrmoch allempoch e'ñe etsoterra allempoch
añcha'tare'tterra Yompor.

32 'Napa' po'ñoch o'ch notas, acheñenesha' ñeñt
corretsa te' ñetpa' amach e'ñe rromhueneta'pa'
allempocmach e'ñech etsoterra allohuen añechno.
33 Esemppopa' añ enet ñeñt sentenpa' e'ñech
chenca'huerra; patspa'cho'ña attecmach perra
e'ñech chenca'huerra. Tarraña naña neñoñpa'
amach chenquerro ama't e'ñe errponaña.

34 'Tarraña te'pa' o'ch notas, sapa'
chocmachña e'ñe señotnoma attoch sapa' amach
aña soctape'chatsto ñeñt sosya'tsañechno,
posa'tare'teñets, ñaña atto e'ñe cohuen socrrena
añ patsro. Tarro'mar ñerra'm ñeñta e'ñe
soctape'chenpa' machayotach huaponasa añ
yeter 35 atet ñerra'mrrate' tamell e'ñech machayota
rreman ñeñtecop amencaret. Ñeñte yetarocmach
cherrana ora allohuen ñeñt ye'cha'yetsa añe
patsro erraparen. 36 Añcha'ña sapa' chocmachña
señose'rtena ñaña añcha'ña senamuen Yompor
attoch sa'huanata'huanom allohuen ñeñtcha'
sehuapoya pa'namen muerochteñtsochno
allochñapa' sañapa' e'ñech señmañesha' satomhuerr

nesho na Ñeññen Acheñetosets.

³⁷ Chocma atet pe't Jesús, ellapene'tcha' yechatats Parets pa'paclo, ellerronetñapa' o'ch ahuer Olivoño ñapa' allca'ye e'ñe a'pue't.

³⁸ Tsapat puetaren ahuatecmach huapa'muene't ñaña shonte' acheñenesha' ñeññ e'mñotyeyas'e't all serrpare'tatanete't Yompor po'ñoñ all Parets pa'paclo.

22

Atto atarr o'pateñet Jesús o'ch muetsatateret

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Allempoña chapmoch allempoch cherrerr pascuapo, allempoch rrerranerr judionesha' pan ñeññ ama anareteyaye chase'. ² Tarraña allohuen ñeññ pa'mcha'tareternesha' pen allohuen judionesha' po'cornaneshar ñaña allohuen ñeññ atarr etsotayenayeñ ñoñets ñeññ atet anaretet ñocpuet, ñetñapa' Jesús a atarr o'patenet o'ch muetsatachet tarraña ñetpa' aña mecha'na'tenet acheñenesha'.

³ Allempoña oneñetpa' chorrenana Judas ñeññara ñeññ sochetsa Iscariote. Ñehua, añ ñeññ Judaspa' Jesús pueyochresha' ñeññ parro yemtena po'potantañ ñeññ llesensen Jesús ñeññ allohuenet charrasheñet puechenet epsheña.

⁴ Ñeññña Judaspa' ahuo' allo'tsa'yen ñeññ pa'mcha'tareternesha' pen allohuen judionesha' po'cornaneshar ñaña allo'tsa'yen judionesha' po'guardiarnesha' ñeññ cohuanpene' Parets pa'paquëll. Allempo chap allpa' Judasñapa' serrpare'tos epuet ñeññ amcha'taretnesha'.

Attoña eñotatosanet ñapa' mueneñca'ye o'ch poman Jesús attoch rromuet. Allempo ñetñapa' otanna'tyeset:

—Te'pa' errotuachñaca'ye yepe'te' attoch yer-mue'.

⁵ Allempoña ñeñt atarr amcha'tareñnesha'pa' atarr coshenet, ñetñapa' a'pochtachet čhochca'ye tsa'chetña Judas allpon quelle. ⁶ Ñapa' e'ñe pocte' eñch. Allempoña ñapa' aña atarr e'nen er-rotenotcha' pomanña Jesús e'ñe a'nahua attoch amach eñche allohuen acheñenesha'.

Atto Jesús'pa' rrallme'chatnenan pueyochresha' attoch čhocmach yerpueret ñeñt yoten te' Santa Cena

(Mt. 26.17-29; Mr. 14.12-25; Jn. 13.21-30; 1Co. 11.23-26)

⁷ Allempoña čhapa'muen ñeñt yetñatsro allem-poch rrrerreterr pan ñeñt ama anareteyaye chase' allempoch muetserretter ñaña carrnero; ñeñtpa' pascuapo. ⁸ Chapa'muen ñeñt yeterpa' Jesúsñapa' atet ota'muenan pueyochresha' epsheña Pedro ñaña Juan:

—Sa te'pa' o'ch ahues allcha' sa'potos rreñets ñeñtcha' yerra' pascuapo.

⁹ Ñetñapa' atet ochet:

—¿Erra'tña pocollro pemneñña allcha' ya'pota'ña rreñets?

¹⁰ Ñaña'pa' atet oterraneterr:

—Te'pa' o'ch ahua'muenes anetso allcha' sepocte' puesheñarr yacma ñeñt anmam'pene' oñ porrto. Ñeñtña acheñerpa' o'ch socta'ner; allcha' be'tosuerr pocollopa' allcha'ña sebe'tosos

saña. ¹¹ Allña'pa' atetcha' sotos ñeñt' apaclatesha': "Yemaestropa' atet' otene' atetcha' yotosep': '¿Erro'tsena'tña pecuarto allcha' nerrallme'chos pascuapo epan neyochresha'?" " ¹² Ñeñt' apaclatesha'pa' gatapascha' eno po'cuarto ñeñt' atarr a'yohuen e'ñe cohuen a'paret. Allcha'ña saña'nosña ñeñt'cha' yerra' pascuapo.

¹³ Allempo atet' otuanet Jesús'pa' pueyochresha'ña'pa' atet'cho' pet, cha ahuanmatset. E'ñe atet' otapanet, ñetña'pa' e'ñe'cho' atet' entoset. Allcha' añña'nosña'ñeña' rreñets allcha' rrallme'chenet ñeñte pascuapo.

¹⁴ O'ña chap allempoch rrallme'chet. Jesús'ña'pa' allña anorros epuet allohuen pueyochresha'.

¹⁵ Allña'pa' atet' otosan pueyochresha':

—Napa' atarr cohuen nenteñ o'ch yerrallme'chen parro añ pascuapo tayepa'tña'pa' ama chena' allempoch muetsataterret.

¹⁶ Tarro'mar napa' o'ch notas, napa' po'pocheño amach alla nerrallme'cherre'te pascuapo. Esemphuañencha' etsoterra ñeñt' po'ño'ch toma'ntenaya pascuapo e'ñech allempocma añcha'tare'tetuerra Yompor. Allempoña'pa' e'ñech parrocmá o'ch alla yocsherrerr.

¹⁷ Jesús'ña' allempopa' chetan orramets, parasyoso'tan pompor, allempoña'pa' atet' otanet:

—Añ orrapo'pa' o'ch saga'ppa' o'ch sepatanna'ta sa allohuenes. ¹⁸ Te'pa' o'ch notas, tayoteñ napa' amach alla norrerre'te añ orrapo' ñeñt' narmetsos tarremphuach allempoch ello norrererr esempohuañencha' añcha'tare'tetuerra Yompor.

19 Allempoñapa' cheterranerr ñaña pan, parasyoso'terranerr pompor. Chetan panpa' shota'ch. Shotatuepa' apa'yesan pueyochresha' ñeñt'pa' atet otanet:

—Añpa' ñeñt'cha' nechets sepen ñeñt'cha' e'ñe nepom attoch e'ñe nerroma socop. Ñerra'm esempoch serren añ pan e'ñech seyerpueñofen na o'ch serreñ.

20 Allempoña rrohuet o' chetan ñaña orramets, ñeñt'pa'cho'ña atet oterraneterr Jesús:

—Añpa'cho'ña ñeñt'cha' nerras sepen ñeñt'cha' ashatarettatsa socop. Ñeñt'pa' alloch na'pocatonas e'ñe cohuen etserra Nomporesho.

21 'Te'pa' o'ch señoche ñaña ñeñt'cha' nepomuerre'pa' e'ñeca'ye parro yerrallme'chen.

22 Po'ñoche'ca'ye te'pa' allo'na sen etsotnomtsa ñeñt' atet onañchareñ nocop, na Ñeñten Acheñetosets, attot'cha' muetsaterrnet. Tarraña nocoppa' e'ñe pocte'; añña po'ñoche acheñer ñeñt'cha' nepomuerre' ñocoppa' atarr llequëñets.

23 Allempoña atet otua Jesús, pueyochresha'ñapa' allenta otanna'tyeset e'ñe ñañeñeta:

—Ta'm, eseshaycha'ca'ye pomuerre'ña Ya'yochresha'ter.

Atto pommo'cheño'tetpa' otanna'tyenet erra'tsenoteyte'ña ñeñtey atarr asherben enten allohuen acheñenesha'

24 Allempoña pueyochresha' e'ñe pommo'cheño'tetpa' atet otanna'tyenet e'ñe ñagattseta:

—Erra'tsenoteyte'ña ñeñtey atarr asherben enten allohuen acheñenesha' ñato'na, ñato'pa.

25 Allempoña Jesús pa' atet otanet:

—Sapa' señoñe' ñeñ' atet pena po'poñ
 acheñenesha' ñeñ' ama judioneshayaye.
 Ñet ñeñ' pa'mcha'tareter penet e'ñech
 pa'mcha'nochteñocmañen pomnaren pa'yenan
 allohuen pueyochreshachno. Tarraña ama't
 atet penetañ pommo'cheño'tpa' añach atarr
 muenen allohuen acheñenesha'pa' e'ñech
 mecha'na'tuenanet ñaña ñetpa' mueneñet
 acheñenesha'pa' o'ch entenanet, atarro'
 sherba'yenanet. 26 Sapa' arepa'chña atteye'
 sepanna'tatsto e'ñe sommo'cheño't. Ñerra'm
 erra'tsenotes ñeñes atarr añcha'taretoyen
 entetsa, ñeñes acheñrespa' socoppa' añ poctetsa
 o'ch atet senterra ñerra'm ama esoshe'mayayso
 atet ñerra'm ñeñ' atarr huepuesha'. Ñaña
 ñerra'm erra'tsenotes ñeñes muenene' o'ch
 atarr asherben entenset, ñeñesña acheñrespa' añ
 poctetsa o'ch atet senterra ñerra'm ama esoyayso,
 allochñapa' attoch e'ñe cohuen setorrena
 po'potantañecop. 27 Ñehua, yeñoteñ acheñenesha'
 arr patsro añca'ye atarr añcha'na'tpo'
 entenet ñeñ' e'ñe cohueno anorrcha'tyets all
 rrallme'chenet, amaña añeye'ña añcha'na'tpoye'
 enteneto ñeñ' puesherbeño't epatyene' rreñets
 ñeñ' anorrchets ñeñ' rrallme'chets. Tarraña
 napa' o'ch notas: Ñeñtecopca'yeña nohuapaña
 sesho attoch nema'yo'chrena torraya ñeñ'cha'
 po'ño'ch atarr sherberrets socop.

28 Tarraña sañapa' ñeñes atarr nellcapretenaya
 ñeñ' atarr llequëñets nenten na. 29 Ñeño'to'marña
 te'pa' o'ch nena'nerres sa ñeñescha'ña

napuerr attoch sa'micha'tarettapreterrna e'ñe atet pena Nompör o' na'n namña ñeñtencha' amicha'tarettapreterraya. ³⁰ Allcha' sanorrcha'tyesuerr e'ñe sa seconaño allcha' e'ñe sa'micha'taretetyesuerra. E'ñe puesheña'ttsos añecopcha'ña sa'micha'taretetyesuerra ñeñt mereñtsorecop israelena'tar ñeñt çharra' mereñtsor ñeñt puechetsa epsheña. Attoña allpa' o'ch na'micha'tarettterra e'ñe necohuenño e'ñech cohuen yeparrocmatuerr, allña'pa' e'ñech yocsheñeshocmañen yerrallme'chuerr e'ñe parro.

Atto Jesús'pa' eñotatan Pedro ñapa' çhocmach a'nasocha

(Mt. 26.31-35; Mr. 14.27-31; Jn. 13.36-38)

³¹ 'Simón, po'ñoçh te'pa' o'ch notaþ, oneñeþpa' atarrca'ye enamuenen na socop, añ muenen o'ch topatenes o'ch atet þatenes ñeñt atet cotape'chen ña ñeñt ama pocteye' enteno Yompör. O'ch atarr huomenc topatenes atet ñerra'm ñeñt shoshnene' po'trigo e'ñech huomenc pa'shmuenan puehoshnat. ³² Tarraña Simón o'ch notaþ, te'pa' napa' o' nema'yochua þocop attoch amach e'ñe poctacma a'huañañþsonapeña þa atto atarr peyemtenna. Tarraña ama'tcha' huaponañañ topateñets ñeñt atarr huomenc, þaña allempopa' o'ch alla þoctape'cherr cohuen Yomporecop. Allempoña'pa' o'ch alla e'ñe cohuen peyenpuer pemo'nasheñnesha' attoch ñetpa'çho'ña o'ch alla huomenc perret pueyoçher Yomporecop.

³³ Pedroña'pa' atet och:

—Partseshacha' napa' amach na'ypo'ñape, čhocmach noctañ ama't errach anmapet; ñerra'm cárceloch anmapet allcha' mueročhtatapet, napa'čo'ña nemnen allcha' yemueročhta parro. Ama'tcha' čho muetsapetpa' yerromuepa' parro.

³⁴ Jesúsñapa' atet otererr:

—Pedro, o'ch notañ, e'ñech añe tsaprocma amach eñena' atollop, pañapa' o'ch ma'poch pa'nasotenna. Ñeñtpa' atetcha' pōten, napa' año' pentarno.

Atto čhappoch allempoch atarr at-serrparetterra Jesús ñeñt atarr topateñets enten

³⁵ Elloña Jesúsapa' yerpatterana pueyochresha'; ñeñtpa' atet oterraneterr:

—Ñehua, ahuaña allempo nemñas atet notapas amach es sanmatsto ama't coñe'ta, ama't sebolsa, ama't sečllayor ama't ñaña sesapat. Ñehua allempopa' ¿eñalle'tña ñeñt sepalltena?

Ñetñapa' atet ochet:

—Allempopa' amaca'ye čho es yepallto ama't e'ñe mamesha.

³⁶ Jesúsñapa' alla oterraneterr:

—Tarraña te'pa' o'ch notas po'poñ, ñerra'm eseshaste' ñeñtes echene' sečllayor te'pa' o'chca'ye sanem all sechopeñe'chyen ama't ñaña sebolsa. Ñaña ñerra'm ama secheno socchellpa' pocte'ca'ye o'ch sepom seshtam alloch seyora socchell.

³⁷ Tarro'mar te'pa' o'ch alla noterrerr: Te'pa' o'chca'ye e'ñe etsoterra ñeñt atet anuaret Yompor po'ñoñ nocop. Allca'yēña oten napa' erroťuanencha' perrnet atet ñerra'mrrate' napa'

ñeñten amtsañen. Te'pa' ñeñtca'ye o' etsotmocha ñeñt e'ñe atet anaret nocop.

³⁸ Allempoña ñetñapa' atet otereterr:

—Partshacha' yapa' yechenca'yeña epmeta cochell.

Jesúsñapa' atet otanet:

—Ñeñtachca'ye.

Atto Jesús^{spa}' ma'yochuena all oteñet Getsemani (Mt. 26.36-46; Mr. 14.32-42)

³⁹ Allempoñapa' o' rrallme'chuanenet ñeñte pascuapo, Jesúsñapa' čha'nerrpa' ahuenerr Olivopño; ñapa' attecma pena čhocmach sen all. Pueyochresha'ñapa' coťa'huaneñet. ⁴⁰ Allempoña čhenet allpa' Jesúsñapa' atet otuenan pueyochresha':

—Te'pa' arrcha' sema'yochuena attoch e'ñe sa'huanta' ñeñtča' sehuapoya te' ñeñtča' atarr huomenc setpate'.

⁴¹ Allempoña ñapa' ahuo' mame' a'yenteye'. Ñañapa' all concorpa'huena o' ma'yochuena.

⁴² Puema'yocheñoť atet otuen:

—Apa, ñerra'm pčach pocte' ente' arepa'chña pemnatatsche o'ch čhapona ñeñt atarr amue-ročhtatañ nenten.* Tarraña ñerra'm pčach muenats añcha'ña atet peřaton ñeñt pemnen řa, amachña añeyaye ñeñt nemnen na.

⁴³ Allempoñapa' huapoña mellañoťeñ Yompor pue'ntañoť ñeñtña ahuaencat řose' attoch ahuantan puellquëña. ⁴⁴ Ñapa' atarr nanac puellquëñesha' ma'yochena; puema'yocheñoťpa'

* **22:42** Ñeñt amue-ročhtatañ ñeñtřpa' po'ñoč arr atma'ntataret ñerra'mrrate' ñeñt atarr pesherr yorren orrañtso.

atarr nanac ñorra'ten. Po'ñorrñapa' čha huatena atet ñerra'mrrate' errasats tsopsa'tets patso.

⁴⁵ Allempoña ma'yochuapa' tanterra, ahuer pueyochreshesho. All entuerranet ñetñapa' čha atarr manrrenet ama't e'ñe puellquëñeshet.

⁴⁶ Ñañaapa' atet otuerranet:

—Sapa' eso'mare'tña čha atarr semanrra'ten. Te'pa' o'ch setanterrapa' čhoña sema'yochrra'ta attoch sa'huanta' ñeñtcha' sehuapoya topateñets atarr huomenc.

Allempo rromoset Jesús

(Mt. 26.47-56; Mr. 14.43-50; Jn. 18.2-11)

⁴⁷ All atet otyenan pueyochresha'pa' allempoñapa' huačha'toña shonte' acheñenesha'. Ñeñt huačha'tatahuet ñeñtpa' ñeñt sochetsa Judas ñeñtara ñeñt pueyochresha' peneñ ñeñt čharrasheña ñeñt a'pchenahuet epsheña. Ñañaapa' čha ponmosaya Jesús, puetso'ttsapa'teñoť huomčha'tos. ⁴⁸ Jesúsñaapa' atet otař:

—E'ñe'tcha' petso'ttsapa'teñoťen pepomuerran na Ñeñten Acheñetosets.

⁴⁹ Añña ñeñt yemtenaya Jesús allempo atet eñchet o'ch rromoset Jesús, ñetñapa' atet ochet:

—Ayochreshate ¿amaťe' pocto o'ch yemoñsařa yocchello?

⁵⁰ Puesheñarrña pueyochresha' allenta chetan po'chell ahuo'ch čhonto'tapan cornesha' pa'cheñer puetepa'tcha' tsorroñ po'cohuenrot. Ñeñtpa' año pa'cheñer ñeñt pa'mčha'tareťer pen allohuen judionesha' po'cornaneshar. ⁵¹ Jesúsña allempo entan pueyochresha' atet řapa' ñañaapa' otanet:

—Ñeñtēpa'ta, amach atē sepatsto.

Allempoña ñeñt tsorrqueta'tetpa' alla a'p̄llerrñañ puet o' alla orrater o' e'ñe correrra.
⁵² Ñeñt huačha'toya ñeñtcha' rremose' Jesús pa' ñeñt pa' añca'ye ñeñt pa'm̄cha'tareternesha' pa'yen allohuen judionesha' po'cornaneshar, ñaña ñeñt judionesha' po'guardianeshar ñeñt cohuan̄pene' Parets pa'paquell ñaña ñeñt pompornesha' pen allohuen judionesha'. Allempo huačha'toñetpa' Jesúsña pa' atē otapanet:

—Eso'mare't sehuačha'tennanaña e'ñe occhel-letareroches ñaña etsachperetareroches attoch serrma'n. Napa' ¿e'ñe't atē sentenen ñerra'mrrate' eñeten? ⁵³ Napa' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaye'ña serrma'ne'te. Tarro'mar te' o' chap allempo ñeñt poctetsa socop ñeñto'mar te' o' chap allempoch oneñetpa' o'ch orrtatennas po'huamenc, ñeñt pa' e'ñe atē ñerra'm checmete'.

Atto Pedropa' a'nasotana Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Allempoñapa' rremoset Jesús pa' arr aneret am̄cha'tare't pa'paclo ñeñt pa'm̄cha'tareter pen allohuen judionesha' po'cornaneshar. Pedroñapa' ñapa'cho'ña cote' tarraña ñapa' chenta' en a'yot. ⁵⁵ Petotña rroch pampopa' all a'torenet tso' all anorrcha'tyen acheñenesha' ñeñt shotetsa. Pedroñapa' all anorros ñaña all shotosa.
⁵⁶ Allempoña huapa coyanesha' ñeñt am̄cha'tare't pueñañra. Entosan Pedro all shotenapa' alla cohuos, atē otos:

—Añpa'cho'ña encanesharpa' ñeñrramtso yem-taye'tña Jesús.

⁵⁷ Tarraña Pedroña čha a' nasochapa' atet otanña coyanesha':

—Napa' amaca'ye nentare.

⁵⁸ E'ñe o'chtapa' huapa ñaña po'psheñeñ entuererrpa' ñapa'cho'ña atet otuererr:

—Papa'cho'ña parroca'ye e'ñe peyemtena.

Pedroñapa' atet otan ñeñt' yacmar:

—Napa' amarramche' erra neyemtenoña na epan ña.

⁵⁹ O' tama o'chterrerrpa' o' alla huerrerr po'psheñeñ, ñapa'cho'ña atet otuererr:

—Po'ñočhca'ye añmapa' ñeñt'ca'ye e'ñe yemtenaya tarro'mar ñapa'cho'ña galileo'marnesha'ca'ye atet ñerra'm Jesús.

⁶⁰ Pedroñapa' alla oterranerr ñeñt' yacmar:

—Amarramche' neñoteñeña este'ña atarr p'otenen.

E'ñe allempo atet eñorena Pedro, e'ñepa'tcha' allempocma eñeña atollop. ⁶¹ Allempoña

Partsesha' Jesúsapa' cohua' allente'tsen Pedro. Pedroñapa' allenta yerpuerrana atet otneñ Partsesha': “Amach eñena' atollop ñeñte tsaprocma pañapa' o'ch ma'poch pa'nasotenna.”

⁶² Allempoña Pedropa' ahua' a'yo all e'ñe puellquëñesha' yahuosa huomenc.

Atto atarr achm'are'teñet Jesús

(Mt. 26.67-68; Mr. 14.65)

⁶³ All yottam'psateñet Jesús am'cha'tare't pa'pacillo añña solltarnesha' ñeñt' co-huam'psachet ñetñapa' atarr achm'are'teñet

Jesús all cohuanmpeñet. Atarr čhota'teñet.
⁶⁴ Huancacalle'cheñet, pachmare'teñoťetpa' atet oteñet:

—Ñehua, te'ña eñoratenperrepa' Parets allochñapa' attoch potey esesha'te'ña pečhota'tyene'.

⁶⁵ Elloña pachmare'teñoťetpa' pa'namen esocmañen otyeñet, sochatse'tyeñet.

Allempo chapata'mueñet Jesús all apcha'muena allohuen judionesha' pa'mcha'tareternesha' ñeñť a'pocatyene' ñoñets

(Mt. 26.59-66; Mr. 14.55-64; Jn. 18.19-24)

⁶⁶ Tsapaña allempo puetarenpa' apcha'muena allohuen ñeñť pompornesha' pen judionesha' epuet ñaña ñeñť pa'mcha'tareternesha' pen allohuen judionesha' po'cornaneshar epuet ñaña ñeñť atarr etsotayenayeñ ñoñets ñeñť atet anareť. All apcha'muena allohuen judionesha' pa'mcha'tareternesha' ñeñť a'pocatyene' ñoñets, all anma'mueñetña Jesús. Allñapa' a'pťo'tare'tapet, atet otapet:

⁶⁷ —Yapa' te'pa' yemneñ o'ch pťotosey ñerra'm po'ñočhte' pa' ñeñťep Cristotets.

Jesúsñapa' atet otosanet:

—Ama't notatstas na po'ñočh ñeñťen Cristotets sañapa' amachca'ye pocteye' sentno attoch same'ña'na. ⁶⁸ Ñaña napa'čo'ña ama't o'ch es na'pťo'tas saña sañapa' amachca'ye sanapñoña naña. Tarro'mar sapa' amachca'ye semno sa'rroyerren. ⁶⁹ Tarraña te'pa' ama'tcha' atet sepa'noñ te'ñapa' o' e'ñe chap allempoch o'ch alla nanorruerr Nompot po'cohuenroť ñeñť atarr ahuamencattetsa, ama't na Ñeñťen Acheñetosets.

⁷⁰ Allempoña allohuenet atet oteñet:

—Ñeñtepñapa' ¿pa'trraña Puechemer penña Yompor?

Jesúsñapa' atet oterraneterr:

—E'ñeca'ye po'ñoçh ñeñt atet sotenen sa.

⁷¹ Allempoña ñetpa' atet otanna'tyeset:

—Te' yapa' ama yemneñe po'potantañ ñeñtcha' a'metare'tam̄p̄sose' tarro'mar te' yapa' allohueney e'ñe ye'mhuen ñeñt atet otena añ acheñer, ñapa' Yomporo' Puechemer. Ñapa' çhaca'ye atarr achm̄are'tenan Yompor.

23

Allempo çhapata'mueñet Jesús allo'tsen am̄cha'taret Pilato

(Mt. 27.1-2, 11-14; Mr. 15.1-5; Jn. 18.28-38)

¹ Allempoña allohuenet tanrra'tuet, e'ñe parrocma anmet Jesús allo'tsen am̄cha'taret Pilato (ñeñt nen gobierno Romoñ ñeñt am̄cha'tarettetsa allo'marneshacop). ² Allñapa' atarr otteñe'choset, toma'tam̄pesyesoset, ñeñtpa' atet otyesoset:

—Ya añ acheñer çhocma yenteñ yeçhatyenan yamo'tseshaçhno judionesha' ñeñt ama't mameshapa' ama cohuenayaye, ñaña atet oteney año'ch yetsa'tatsto impuesto ñeñt romo'marneshacop ñeñt nen am̄cha'taret Romoñ. Ama't ñapa' atet otena ñapa' ño' Cristotets ño' atarr am̄cha'tarettetsa arr.

³ Allempoña am̄cha'taret Pilatopa' a'p̄to'tapan Jesús:

—Papa' ¿pa'tña judionesha' pa'm̄cha'taretereḡ? Jesúsñapa' atet och:

—Atetca'ye atet p̄otenen.

⁴ Añña ñeñt̄ pa'm̄cha'tareternesha' pen allohuen judionesha' po'cornaneshar ñaña acheñeneshačhno, ñetñapa' atet otanet Pilato:

—Ñehua, napa' amaca'yeña nentoñeña ñeñt̄ atto ama pocteye' es penoña añ acheñer.

⁵ Judionesha'ña pa'm̄cha'tareternesha'pa' alla otereterr Pilato:

—Tarraña yañapa' chocmaña yenteñ ñeñt̄ atet yečatyenan acheñenesha' attoch atpare'tatenanet gobierno. E'ñe Galileoteñ atet pena, ama't te'pa' o' chap ñaña arr Judeo e'ñe attecma o' yečatuerrerr ñeñt̄ ama cohuenaye' yenteno ya.

Allempo chapata'mueñet Jesús allo'tsen ñaña am̄cha'taret Herodes

⁶ Atto' e'm̄ñotenan judionesha' atet otyenet e'ñe Galileoteñ yečaten, allempoña Pilatopa' atet a'p̄to'tanet:

—Jesúspa' ñapa' ¿galileo'marnesha'tña?

⁷ Allempoña eñotachet ñapa' po'ñočca'ye galileo'marnesha' allempoña Pilatopa' atet cotape'ch ñeñt̄pa' Herodesocpaca'ye tarro'mar ñapa' ñeñt̄ am̄cha'tarettetsa galileo'marneshacop. Ñeñto'marña ñapa' mueñan Jesús Herodesesho tarro'mar Herodespa' allempo chap Jerusaléño all emo'ten. ⁸ Herodesñapa' e'ñe pocsheñesha' agapanen Jesús tarro'mar ahuatoteñ atarr mueneñ o'ch eñch tarro'mar ñapa' atet e'mare'tenan Jesús ñeñt̄ atet pa'yena. Ñapa' añecopña atarr mueneñ o'ch orrtatoñ ñaña ñeñt̄ atet pa'yena orrtatyese' ñeñt̄ ama puentareto.

9 Atarr es a'p̄to'tare'tapanañña Jesús tarraña ñapa' ama anapanoña Herodes ama't e'ñe parrocha. 10 All tom̄cha'toset ñaña allohuen am̄cha'taretnesha' ñeñt̄ pa'm̄cha'tareternesha' pen allohuen judionesha' po'cornaneshar ñaña allo'tsen ñeñt̄ atarr etsotayenayeñ ñoñets, ñetña allpa' otteñe'chuereterr Jesús all Herodesesho, pa'namen otyesuerreterr. 11 Allempo Herodes ñaña allohuen po'solltarneshar ñetpa'cho'ña puerraḡsoñet ñamet. Achm̄are'chet all che'tatseteñet. Pueche'tatseteñoñet chorrachet am̄cha'tareḡ pa'shtam ñeñt̄ atarr cohuen. Allempoña Herodespa' o' alla mueño'ter Pilatesho. 12 Ñeñto'marña Herodes epuet Pilatopa' e'ñe allempocma amo'tstannerret tarro'mar ahuañmo'chapa' cha e'moñe'tannenet.

Atto am̄cha'tareḡ Pilatopa' otanet ama'tpa' chosa muetse' Jesús

(Mt. 27.15-26; Mr. 15.6-15; Jn. 18.39-19.16)

13 Allempoña Pilatopa' alla ap̄chaterran ora allohuen judionesha' pa'm̄cha'tareternesha' ñeñt̄ po'cornaneshar pa'm̄cha'tareternesha' ñaña po'potantañ judionesha' pa'm̄cha'tareternesha' ama't ñaña allohuen acheñenesha'. 14 Pilatoñapa' alla otapuerreterr:

—Añ acheñer ñeñt̄ sehuapatennan ñeñt̄ soten sa ahuo' yechatyesan acheñenesha' ñeñt̄ ama cohuenaye' senteno sa, te'ña napa' o' na'p̄to'tare'tue ama't allempo allo'tsa'yenes tarraña nañapa' ama't parrochapa' ama nentoñeña ñeñt̄ atet sotyen atto' pena ñeñt̄ ama cohuenayaye. 15 Ama't ñaña Herodespa' ama entoñeña ñeñt̄ ama pocteye'

yečcateno, ñeñto'marña o' alla mueñer nesho. Po'ñočhpa' amaca'ye eñalleña ñeñ atet pen ñeñ ama cohuenaye' yenteno allohueney attotcha' yemtsatach. ¹⁶ Ñeñto'marña na te'pa' attachca'ye necoñchach mame'pa' o'ch alla na'rroyer.

¹⁷⁻¹⁹ Tarraña allohuen judionesha' puerran-narteñoŕet atet ochet Pilato:

—Pemtsatachñaca'ye, añcha'ña p̄a'rroyernay Barrabás.

Ñehua, ñeñ Barrabás ahuañmo'choteñ yot-tam̄peñet tarro'mar ña yečhatene' acheñenesha' atpare'chetepa' añcha'taret ñeñ nen gobierno' Romot. E'ñe patpare'teñoŕ o' muetsan acheñ. Ñehua, ñetpa' atet yečhenet. Pate'tets pascuapo ñeñ añcha'taret ñeñ nen gobierno' Romotpa' o'ch a'rroyerrñañet judionesha' puesheñarr pamo'ts ñeñ ayottam̄psarettetsa ñerra'm erra'tsen muenenet ñet, ñeñtpa' añecop a'rroyenanet attoch coshatenan judionesha'. ²⁰ Ñeñto'marña Pilatopa' atarr mueneñeñ o'ch a'rroyerranet Jesús, ñeñto'marña alla a'p̄to'terranerr allohuen acheñenesha'. ²¹ Tarraña ñetñapa' ama't mameshapa' amaña pocteye' enteñeto. Elloña ñeñtapa' rrannartet allohuenet, atet otereteŕ:

—¡Pecorso'tam̄psach! ¡Pecorso'tam̄psachñaca'ye!

²² Poma'pocheño Pilatopa' alla o'terraneterr:

—¿Eso'mare'tña semneña o'ch necorso'tam̄psach? Napa' amaca'ye nenteññañeña ñeñ atto ama pocteye' es peno attoch yemtsatach. Ñeñto'marña napa'

attachca'ye, necoñchach mame' allempopa' o'ch alla na'rroyer.

²³ Tarraña ñetpa' ama ca'hpueñeto otare'tet. Elloña ñetpa' e'ñe puerrannarteño'tet atarr enamueñet attoch corso'tam'psach. ²⁴ Ñeñto'marña Pilatopa' ame'ñachet. Attoña ñapa' atet eñora:

—Te'pa' o'ch atet neponas ñeñt atet atarr semnen sa. ²⁵ Ñeñto'mar allempo a'rroyanet Barrabás ñeñt enamueñet ama't ñeñt patparño't yottam'peñet ñaña puentseño't acheñ. Tarraña Jesúsñapa' o' apamet attoch muetset ñeñt atarr muenenet ñet.

Atto corso'tam'psoset Jesús

(Mt. 27.32-44; Mr. 15.21-32; Jn. 19.17-27)

²⁶ Allempo anmet Jesús a'yo allcha' corso'tam'psoset. Allña oñenetpa' allñapa' poctet puesheñarr yacma ñeñt cireneo'marnesha' ñeñtpa' añ pa'so'cheñ Simón ñeñt errte' huerrtsa a'yo't. Ñeñtña rremapetpa' o' chechatnomet Jesús po'corsoch ñeñtña anmue'ña chenta'.

²⁷ Allñapa' co'ta'huanemñ shonte' acheñenesha', shonte' coyanesha'chno ñeñt atarr ya'na'tnene' Jesús chenta', atarr gogaretyesnenet puellquëño'tet. ²⁸ Tarraña Jesúsapa' allenta cohua'nmanet, atet otnomanet:

—No'chanesha ñeñtes jerusaléño'marneshas, amach atarr seya'na'tatsteno na. E'ñe socpa atarr seyahuena sacñetaretolleshohuen. ²⁹ Tarro'mar esempopa' chocmach huaponasa ñeñtcha' atarr sellcaterre'. Allempoña coyanesha' ñeñt ama achoyore'tñepa' ñocpuetñapa' e'ñech

cohuen entaretterret allempo tarro'mar ñetpa' ama eñallete puechoyoreshet ñeñtcha' atarr muerochterrtsa. Ñeñto'marña allempopa' otyerrcha' allohuen acheñenesha': "O' atarr cosheñtso'tsenterra muechořnanesha', ama't allohuen ñeñt ama achoyore'tñe, ama't allohuen ñeñt ama es moma'yeneto." ³⁰ Tarro'mar allempo pemuerochteñoťet e'ñe puellquẽñoťetpa' atarrcha' ya'ñameterret. Pueya'ñameteñoťetpa' e'ñech pocte' entyerret ñegatañperretepa'to' attoch pampuerranet e'ñe poctacma. Allochñapa' o'huañcha' allo'na atarr nanac muerochtenet. ³¹ Tarro'mar te'pa' atto muerochtatennet na ama't napa' e'ñe cohuen es norrtatyeneñ, e'ñe atteneñ ñerra'm tsach e'ñe cohuen emmo'rate'. Ñeñto'mar te' napa' neñoteñ elloña atarrcha' amuerochtatareťterra ñeñt ama cohuenaye' es orrtateno; ñeñtñapa' e'ñe atet pena ñerra'm tsach rromuech. Arrpa' allohua atet otnomanet Jesús allempo aneñet allcha' corso'tamřsomet.

³² All aneñet ñaña epsheña ñeñt amtsañ ñeñtcha' epuet corso'tamřsomet. ³³ Allempoña chapachet all oteñet Poñetalleřno, allña corso'tamřsometña epuet ñaña epsheña ñeñt amtsañ, puesheñarr nosñañet po'cohuenroť, po'psheñeññapa' nosñañet pue'chcoťeroť. ³⁴ E'ñe allempo corso'tamřsometpa' Jesúsñapa' atet ma'yochamřsosana ñeñt e'moñe'tene', ñeñtpa' atet ot:

—Nomporcha' te'pa' peřpretnanetepa'ch tarro'mar ñetpa' po'ñočhpa' ama eñoteneto ñeñt atet yečcatenet, ñeñt ama pocteyaye.

Allempoña solltarnesha'pa' yell-
sheñe'chatoñet pa'shtam po'suertot attoch orrta
puesheña'tets ñeñtcha' yorayese' puema'tets.
³⁵ Acheñenesha'ñapa' atta cohuanrrorteñet all
tomchenet a'yenet. Pa'mñcha'tareterneshet
ñetñapa' atarr es otnare'teñet, atet otatse'tyeñet.

—Te'ña p̄apa' o' p̄a'queshp̄atyes po'potantañ,
te'ñapa' p̄a'queshp̄aterra e'ñe p̄añeña ñerra'm
po'ñochte' ñeñteḡ acren Yompor ñeñtcha'
Cristotosets.

³⁶ Solltarnesha'pa'cho'ña atarr achm̄are'teñet,
che'tatseteñet. Pueche'tatseteñoḡetpa'
ponem̄yetpa' aposet vinos ñeñt atarr chella'se'.
³⁷ Pachm̄are'teñoḡetpa' atet otyeñet:

—Ñerra'm p̄a po'ñochte' ñeñteḡ pa'mñcha'tareter
pen judionesha', te'ñapa' p̄a'queshp̄aterra p̄añeña.

³⁸ Ñehua, poñoḡ all corsocho all noñet tsachtall
aquellcareḡ ñeñtña quellecpa' atet oten: “Añpa'
ñeñtca'ye judionesha' Pa'mñcha'tareter.” Ñeñtña
quellecpa' ñeñt anareḡ ma'po'mar ñoñets—
griegach, latinaçh ñaña hebreyach, e'ñe attecma
oten.

³⁹ Puesheñarrña amtsañ ñeñt parro
corso'tam̄peñet, ñapa'cho'ña achm̄are'ch.
Potnare'teñoḡpa' atet oteñ:

—Ñerra'm po'ñochte' Cristoḡpa'
p̄a'queshp̄aterra p̄añeña, yapa'cho'ña o'ch
p̄a'queshp̄aterrey.

⁴⁰ Po'psheñeñ amtsañpa' che'ptare'ch.
Pueche'ptare'teñoḡpa' atet och:

Papa' eso'mare'tña ama pem̄cha'na'teñeña
Yompor, ama't parro amuroçhtatareḡey.

41 Tarraña yocoppa' e'ñeca'ye pocte' yemue-roçhtena tarro'mar ñeñtpa' añ tsa'tatenyet ñeñt allpon yeyeçcatyen ñeñt ama cohuenayaye ama't e'ñe mamesha. Tarraña añ acheñer ñeñt parro mueroçhtatenyet ñapa' ama es yeçcateno ama't mamesha ñeñt ama pocteyaye.

42 Allempoña ñapa' atet otan Jesús:

—Napa' peyerpa'huerrno'tach allcha' pa'mncha'taretetuerra.

43 Jesúsñapa' atet och:

—Napa' po'ñoçca'ye notaþ, e'ñe tayecma parro'tseneycha' cosheñtso.

Atto rroma Jesús all po'corsocho

(Mt. 27.45-56; Mr. 15.33-41; Jn. 19.28-30; Heb. 9.11-14)

44-45 Allempoña çhap pocto atsne'pa' o'huañ atsnom, o' e'ñe checmetua erraþaren añe pat-sro. O'ña ellerrotnenmochapa' o' alla puetar-err. Allempoña ñeñt besom allo yottampeññañet Parets pa'paquell po'ponro ahuepa't rrrarra'nom e'ñe poctacma, o' e'ñe ellopa'tetsta. 46 Allempoña Jesúsapa' rrana. Puerranaro'tpa' atet ot:

—Nompurcha' te'pa' o' nepomuerra e'ñe þocop e'ñe necamquëño-huen.

E'ñe ñeñta otuapa' o' rroma.

47 Solltar po'caþtáner ñeñt romo'marnesha' ñeñt corso'tamþse', allempo atet ent atet o' þa, ñañaapa' allenta aye'choçhtatan Yomporpa' ñapa' atet ot:

—Añ yacmarpa' po'ñoçhuaca'ye e'ñe attota o' yemtsatater, amaca'yeña eñalleña attoch yemtsa-tatereñ.

48 Ñaña allohuen acheñenesha' ñeñt̃ allo'tsa'yen ñeñt̃ ente' ñeñt̃ atet o' p̃ach o' yoročhtach, ñet̃ñapa' puellquēñesha' na'yesnerret pot puesomapo ahuanerret. 49 Allohuen ñeñt̃ atarr yemtaye't̃ Jesús ahuañoñeñ ñaña allohuen coyaneshačhno ñeñt̃ co'a'huanmue' Galileo't̃ ahuañoñeñ, ñet̃ñapa' alla tomčha'tyenet a'yenet allot̃ atta cohuanrrorteñet ñamet.

Atto pampuet Jesús

(Mt. 27.57-61; Mr. 15.42-47; Jn. 19.38-42)

50 Eñall puesheñarr yacma ñeñt̃ara judionesha' ñeñt̃ e'ñe cohuen acheñ e'ñe pocte' es p̃a'yen, ñeñt̃pa' añ pa'so'cheñ José ñeñt̃ arimateo'marnesha'. Ñapa'cho'ña puesheñarr ñeñt̃ pa'm̃cha'tareter pen allohuen judionesha' ñeñt̃ parrocmach chocmach apchenet epuet po'potantañ am̃cha'tareñesha' attoch a'pocatenet ñeñt̃ llequēna allohuen judionesha'.

51 Ñehua, ña ahuaña allempo apchenet parro po'potantañ am̃cha'tareñesha' atto o'pateñet Jesús o'ch muetsatachet, ñañapa' ama't̃ mameshapa' ama pocteye' eñche. Tarro'mar ñapa' ñeñt̃ atarr cohueñe' Yomp̃or esempohuañencha' o'ch atarr ayochreshatterra. 52 Ñeñt̃ña Josépa' o' ahuo' Pilatesho o'ch oteña' pocte'ch eñch ñach a'suatose' Jesús ñeñt̃ rromuets corsocho.

53 Pilatoñapa' e'ñe pocte' eñch, ñeñt̃o'marña ñapa' a'suater corsocho't̃ allempoñapa' ep̃atse'ch shetamtso ñeñt̃ e'ñe cohuen, allempoñapa' aneñ allcha' pampueña'. All eñare't̃ mapuetpon all ama apampare't̃ena' po'poñ arromña't̃, allca'yeña

nenana'ña Jesús. ⁵⁴ Ñehua, allempo pampuet Jesús'pa' ñeñt'pa' añe yetro allempo chocma añño'tena judionesha' ñeñt' tsapatecop allempoch ameserretter. Ñehua, allempo pampa'huet Jesús'pa' o' ellerren, ñeñto'mar judionesha'pa' o' mottan ñeñt' tsapatecop allempoch amesa'muenet e'ñe poctacma.

⁵⁵ Ñeñt'ña coyaneshachno ñeñt' atarr yemtenaya Jesús ñeñt' co'ta'huanmue' ahuaño'teñ Galileot, ñet'ña'pa' co'ta'huanmet all pampueñeta' attoch eñchet allcha' neret Jesús. ⁵⁶ Allempoña ñet onacherret allo'tpa' o' cha'cherret pocollo, ñet'ña'pa' allohuenetpa' yorayesuerret ñeñt' atarr eñmosa'techno alloch a'yana'tereta' Jesús ora po'chtsohuen attoch e'ñe cohuen eñmosa'tatereta'. Ñeñt'pa' e'ñeca'ye atet ye'chenaña judionesha'. Ñetpa' alla añño'tuaneñetña eñmosa'techno tarro'mar tsapa'tpa' amach serreto puepampro tarro'mar tsapa'tcha' cha'pa'muen ñeñte yetro allempo chocma amesen judionesha' ñeñt' atet anare'ttenet ñocpuet.

24

Atto tanterra Jesús

(Mt. 28.1-10; Mr. 16.1-8; Jn. 20.1-10)

¹ Allempo o' huañ yetñats allempo amesenet, allempo motta'muena yetñats temenc coyane-shachno'ña'pa' e'ñe ahuatecma ahuanma'muenet all pampueñet Jesús. Anma'mueññañet eñmosa'techno ñeñt' o'patateñet alloch a'yana'toset. All'ña'pa' co'ta'nma'muenanet po'potantañ

coyaneshachno. ² O'ña chacha'ta'muenet allpa' mapue'ña ñeñt' allo mopam̄pset Jesús ñeñt' puepampuer p̄achet ama atteraye' entoseto ñeñt' atet p̄am̄pset po'poñ ellerro. Entoset mapue' o' a'rrote'tarettena a'yenet. ³ Allempoña ñetpa' esho'trra'toset mapuetpono ñeñt' puepampuer p̄achet amaña esesha' entosayeña arromñat' all net. ⁴ Ñetñapa' cha muene' yoruoset ama eñoteñeto erro'tcha'ña p̄oset. E'ñe allempo atet cotape'chyenet ahuepa'tcha' orrtapanet epsheña yacma alla tom'cha'toset e'ñe allo'tsa'yenet, atarr cohuen popuetyenet pa'shtamuet. ⁵ Ñetña pueyorñofetpa' atta mo'crra'tyeset patso. Pom'chañofet ama eshcaye' cohua'p̄seto allenet ten. Ñeñt'ña yacma epsheñapa' atet otosanet:

—Ñeñt' ama arromñafeshayaye, eso'mare'tña se'name'teñña arr allecma nannena arromñatenesha'. ⁶ Te' ñapa' amaca'ye allo'tsenarayaye arr, o'ca'ye tanterra. Ama't seyerpueñoña ñeñt' atet otase't ama't ahuañmo'cho'teñ allempo Galileo'tsenmeñ. ⁷ Ñeñt'pa' atetca'ye otase't ñapa' ña Ñeñt' Acheñetosets chocmach pomueret attoch erro'tuanen per po'poñ acheñ ñeñt' atarr ochñafenesha' attoch corso'tam̄peret, tarraña poma'pamtañoña' chocmach tanterra.

⁸ Allempoña ñetpa'cho'ña allenta yerpueret atet otanete't ahuañmo'cho'teñ Jesús. ⁹ Allempoña coyaneshachnopa' onacherret puepampro't, chacherret pocollopa' serrpare'tatueret Jesús puellsensarnesha' ñeñt' charrasheña ñeñt' puesheñarraña o' puecherra ñaña

po'potantañechno ñeñt̃ pueyochresha' pen. Coyaneshachñoñapa' serrpare'tueret allohuen ñeñt̃ atet̃ enta'muenet Jesús puepampro. ¹⁰ Ñeñt̃ serrpare'tatenaya' Jesús puellsensarnesha' ñeñt̃pa' añ María Magdalena ñaña Juana ñaña po'psheñeñ María ñeñt̃ Jacobo pachor ñaña po'poñechno coyaneshachño. ¹¹ Tarraña Jesús puellsensarnesha' allempo serrpare'tatosanet coyaneshachño ñeñt̃ atet̃ entua'muenet, ñetñapa' ama't mameshapa' ama ame'ñyetoña coyaneshachño, cha otenapuetañ attate' otatse'tyen coyaneshachño.

¹² Tarraña Pedroñapa' allenta ta e'ñe matenacma. O'ña chap ñaña puepampropa' mo'cosa, cohuos o'pononet̃ all net. Ñapa'cho'ña ama entose, shetamtsa entos allo epatse'chet̃ alla o'shshe'ma'yena a'yenet̃. Ñapa'cho'ña ahuerri pocollo ama eñoteñe ñato' erro'tsente'.

Atto Jesúsapa' rremuerrana' epsheña pueyochresha' toño allempo senet Emaúso

(Mr. 16.12-13)

¹³ Ñeñte yetrocma epsheña pueyochresha' ñetñapa' arr senet̃ anetso ñeñt̃ pa'so'cheñ Emaús. Ñehua, ñeñt̃ pa'so'cheñ anets Emaúspa' Jerusaléñoñeñpa' allo'tsente' charra' puechena paterr kilómetro choycha' chapats anets Emaúso. ¹⁴ Ñetñapa' e'ñe pueserrparñesha' senet̃, añ serrpare'tyesnenet̃ ñeñt̃ allpon atet̃ o' p̃ohua. ¹⁵ All senet̃ e'ñe pueserrpare'teñeshetpa' anapanna'tyesnenet̃ Jesúsñapa' alla rremuer-raneta'. Allempoñapa' chope'chnomuet e'ñe

parro o' ahuanmuet anetsonet. ¹⁶ Tarraña ama't entapetañaña Jesús pa' ñetña pa' cha ottenet ñerra'mrrate' ama amnataretteneto attoch cheme'tapet, ama esesha' cheme'taye.

¹⁷ Jesús ñapa' atet otosan pueyochresha':

—¿Eso'tña seserrpare'tyesnen? ¿Eso'mare'tña cha atarr sellca'nena?

¹⁸ Puesheñarrña ñeñt sochetsa Cleofas, ñaña pa' och:

—¿Ama't peñoteñeña allohuen ñeñt Jerusaléño'tsen ahuaño'teñ o' e'ñe e'mare'tuet ñeñt atet o' metua all? Papa' ¿paptate'ña ñeñtep taya chapats all Jerusaléño ñeñtep ama eñotosaye ñeñt atet o' pohuerret Jerusaléño?

¹⁹ Ñaña pa' atet otnomanet:

—¿Eso'tña ñeñt atet o' pohuerretña all?

Ñetña pa' alla otnereterr:

—Añca'ye yeserrpare'tnen Jesús ñeñt nazareto'marnesha' ñeñt a'mtene' Yompor po'ñoñ ahuaña. Po'huamenco't orrtatennay po'partsoña ñeñt ama't ahuaña yapa' ama yentare. Ñaña atet yechatyese't ñeñtpa' atarr cohuen. Ñeñtpa' e'ñe pocte' entapreteñ Yompor; acheñenesha'pa'cho'ña e'ñe pocte' enteñet.

²⁰ Tarraña ya'mcha'tareternesha' ñaña ñeñt pa'mcha'tareternesha' pen allohuen judionesha' po'cornaneshar, ñetña pa' o' pomueret Jesús atto'tca'yeña o' muetsatateret, ñeñto'marña o' corso'tamperet. ²¹ Tarraña yapa' ñeñtca'yeña atarr yemneneñ ñato' ñach ya'rroyatatosayeña allohueney ñeñtey israelena'tarey (atto añcha'nochtana'tenya romo'marnesha' ya

ya'netsro). Tarraña te'ñapa' čhaña o' muetseret. Te'pa' o'ca'ye ma'pamta'muen. ²²⁻²³ Ñaña te'ña coyaneshačhnoña ñeñt parro yeyemtena, ñetñapa' ahuatecma ahuanma'muenet o'ch enta'mueñet puepampro ñetñapa' año' eseshaye' entosayeña puepampro all neretañ. Allempoña huačherret puepamproġ atet serrpare'tatuerryet, allñapa' año' orrtahuet mellañoŧeñ ñeñto'ña otahuet Jesúsŧa' o'ca'ye tanterra o' alla beŧterra. Ñeñto'marña yapa' ñeñtña atarr yeyore'tene'. ²⁴ Allempoña ñaña allponsheña ñeñt parro yeyemtena, ñetpa'čo'ña allenta ahuanmuet ñamet puepampro. E'ñe atet otuerrey coyaneshačhno, ñetpa'čo'ña ama eseshaye' entosaye.

²⁵ Jesúsñapa' alla otrerraneterr:

—Sapa' ama es sečhenoyoña seyočhro, atarr se'charrtaten seyočher attoch e'ñe same'ña'huaña ora ñeñt atet eñosyesete't Cristocop allohuen ñeñt a'mta'yesaye't Yompor po'ñoñ ahuaŧoteñ.

²⁶ Ama't señoŧeñeña ñeñtča' Cristotatspa' atetca'ye anareña ñocop ñapa' atarrcha'ca'ye amuročhtatareŧetuanena čoch rromats. Elloñapa' o'ch alla čherr esempo allempochña e'ñe cohuen a'cohuentatareŧterra.

²⁷ Allempoña Jesúsŧa' o' yerpatnerraneterr ora allohuen ñeñt atet anareŧ añecop ñeñtča' Cristotats. E'ñe Moisés po'ñoñoŧeñ yerpatnomanet ñaña po'potantañečhno po'ñoñ ñeñt eñosyestse't Cristocop, ñeñtara ñeñt a'mta'yesaye't Yompor po'ñoñ ahuaŧ.

²⁸ Allempoñapa' čhapmochet anetso all sechenet. Jesúsñapa' čha otetnena ñerra'm ñapa'

am̄toche'ch. ²⁹ Ñetña alla puepateñoŕetpa' atet ochet:

—Allachca'ye yečhap arr parro o'ca'ye tsapuenmoch.

Allempoña Jesúsapa' be'ťosos allcha' čhapuet. ³⁰ Allempoña anorrčha'toset allcha' rrallme'choset. Jesúsñapa' chetosan pan, parasyoso'tam̄psosan pan, shota'tospa' apa'yesosanet. ³¹ Allempo atet p̄osa, pueyochresha'ña epsheñapa' čha e'ñe cheme'toset aña' ñeñŕepa'tca'yeña Jesús. E'ñe allorocma ñetpa' o' amnataretterret attoch e'ñe cheme'teret. E'ñe cheme'teretpa' allepa'tcha' ma'natañperranet.

³² Allempoña ñetpa' atet otanna'tyeset:

—Ñeñŕo'marepa'tca'yeña atarr nanac coshatosey ñorra' ama't čha yellquēna yeyočhro allempo serrpare'tatnomuey ŕoño all yerpatnomya Yompor po'ñoñ ñeñŕ atet ana'yeseŕet e'ñe ñocop.

³³ Ñetña e'ñe allorocma tanrra'teretpa' o' alla ahuanerret Jerusaléno. Allña'pa' o' čherret allo'tsa'yen po'potantañ puellsensarnesha' ñeñŕ o' čharrasheñaña puechena puesheñarr. Allo'tsen ñaña po'potantañečhno. ³⁴ Allña ñetpa' atet otueret po'potantañ:

—Po'ñočhca'ye o' tanterraña Yepartseshar. El-lonetña'pa' orrterrana ñaña Simón.

³⁵ Allempoña ñetpa' serrpare'tueret ñeñŕ atet enteret ŕoño ñaña all shota'tosan pan, attoña ñetpa' allña e'ñe cheme'tosetña Jesús.

Atto Jesúsapa' orrterrana allohuen pueyochresha' (Mt. 28.16-20; Mr. 16.14-18; Jn. 20.19-23)

36 Ñeñta atarr otatsetyenetpa' Jesúsñapa' čhepa'tcha' tomhuets e'ñe all chorren allohuen pueyochreshačhno. Alla huomñcha'tuenanet, puehuomñcha'tueñoťanetpa' atet otuenanet:

—Te'pa' čhosaña e'ñe cosherrtsa seyočhro.

37 Tarraña ñetñapa' čha atarr yore'tuenanet, čha atarr mecha'trra'tet, čha otenapuetañ choyeshe'matste' orrterranet. 38 Jesúsñapa' atet otuenanet:

—Eso'mare'tña sañapa' čhaña seyoren. Eso'mare'tña sañapa' čhaña atarr se'charrtatenña seyočer. 39 Te'pa' o'ch secuapuennan not ama't ñaña netac atťoch e'ñe señoťapuerren naca'ye. Sa'płlapuennan nechets, secua'yesapuennan nechets allochñapa' o'ch e'ñe señoťapuenen. Napa' ñeñten echtsoťen, choyeshe'matspa' amaca'yeña echtsoťeyayeto ñaña amaca'ye anpateyaye atet o' sentapuenen napa' echtsoťenca'ye ñaña anpatenca'ye.

40 Allempoñapa' gatuenanet pot ñaña pa'tac.

41 Ñetñapa' atťa cohuanrrortapueñet. Ama't atarr coshapueñetañpa' amaña e'ñeye' ame'ñapueñeto ñato' po'ñočhte' Jesús. Atťa echarrtatenet pueyočer tarraña Jesúsñapa' atet oterraneterr:

—¿Arrpa' ama't secheno ama't coñe'ta rreñets?

42 Ñetñapa' aña apapueñet pasheparr cac achmareť ñaña pets pocoyem all nenan po'moñ.

43 Ñeñta agaphuenpa' o' rrohueñ all chorrenet atťoña ñetpa' entapueñet. 44 Allempoñapa' atet oterraneterr:

—Ñeñť atet notase't allempo orameñ allo'tseney e'ñe parro, ora allohuen ñeñť atet anareť ahuaťoteñ Yompor po'ñoño nocop, ñeñťña te'pa'

o' e'ñe etsotuerra —e'ñe Moisésoteñ po'ñoñ ñeñt atet anaret ama't ñaña ora allohuen ñeñt quellca'yesone't ñeñt a'nta'yesaye't Yompor po'ñoñ, ama't ñaña ñeñt aquellcarettatset libro Salmos, te'pa' ñeñtña o' e'ñe etsotuerra ñeñt atet ana'yesaret nocop ahuatoteñ.

⁴⁵ Allempoñapa' o' chapatanet pueyoçhreto allohuen ñoñtsoçhno ñeñt quellca'yesaret ñocop.

⁴⁶ Jesúsñapa' alla oterraneterr:

—Po'ñoçhpa' allohuen ñoñets ñeñt quellca'yesaret atetca'ye oten ñeñtcha' Cristotosetspa' çhocmach po'ñoçh rromos, tarraña poma'pamtañoñapa' o'ch alla tanterra. ⁴⁷ Attoçhña serrpare'teret Cristo e'ñe Jerusaléño'teñ erraþaren ora allemeñ allohuanen acheñenesesho'mar. Attoçhña acheñenesha'pa' o'ch cotape'cherret ello e'ñe cohuen Yomporecop allochñapa' attoçhña o'ch e'ñe aþretna'huare'tterret allohuenet po'chñaret. ⁴⁸ Jesúsñapa' atet oterraneterr:

—Te'ña sapa' o'ch sa'poterrnan ora ñeñt allpon atet sentyesne't ama't teme'ttsen. ⁴⁹ Ñaña sa te'pa' ellonet o'ch atet notnerres, po'ñoçhca'ye napa' nemño huernascha' Yompor Puecamquëñ entot ñeñtcha' e'ñe sechorra'yesaya e'ñe puesheña'ttsos ñeñt atet oten Yompor ñeñtcha' e'ñe apa'yerres. Tarraña sañapa' allasach anetso Jerusaléño, esempohuach chorratasa Parets Puecamquëñ ñeñtcha'ña ahuamencat seþa'yesose' ñeñtcha' apuerres Yompor pue'ntaño't.

*Allempo a'terr Jesús pue'ntaño
(Mr. 16.19-20)*

⁵⁰ Allempoña Jesús err Jerusaléño, ahuanerran pueyochreshačno a'yo anetso Betanio. Allñapa' echantosan potpa' bensare'tam̃pesyesosanet.

⁵¹ E'ñe puebensare'tam̃peñoñanetpa' allñapa' a'tenoche' pue'ntaño o' sohuanenanña pueyochreshačno.

⁵² Ñetña allempo atet entapueret Jesús ahurr pue'ntaño'pa' pa'ye'chochtateñesha' ma'yochnerretpa' ahuanerret Jerusaléño e'ñe pocsheñeshocmañenet.

⁵³ Ñetña allempopa' ellapenete't Parets pa'paclo all atarr aye'chochtateññañet Yompor. Ñeñtpa' attetepa'ch Nompore. Allohua.

**Yompōr Po'ñoñ ñeññ attō Yepartseshar
Jesuscristo e'ñe etserra a'pōctaterrnay
Yomporesho
New Testament in Yanasha' (PE:ame:Yanasha')**

copyright © 2008 Wycliffe Bible Translators, Inc.

Language: Yanasha'

Translation by: Wycliffe Bible Translators, Inc.

Yanasha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanasha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

fa985bb4-fad0-5968-9ee4-626b89cba24f